


Майн Гид

ОК,
ТАНЛИ
САРДОР













МАЙН РИД

ОҚ ТАНЛИ
САРДОР

Шимолий Америка афсонаси

ЭРҚИН МИРОБИДОВ таржимаси



Тошкент
Ўзбекистон ЛҚСМ Марказий Комитети
«Ёш гвардия» нашриёти
1990

Рид Майн.

Р 49 Оқ танли сардор. (Шимолий Америка афсона-
си/Э. Миробидов тарж.— Т. «Еш гвардия», 1990.—
368 б.

Американинг машҳур ёзувчиси Майн Риднинг «Оқ танли сардор» романи ўзининг кўтаринки руҳи билан хотирада сақланиб қолади. Бу кўтаринкилик, аввало, ҳақиқат учун кураш, ўз орзу-ўйларини рўёбга чиқариш йўлидаги фидойилик билан белгиланади. Китоб қаҳрамонлари бу кураш йўлида шаклланадилар, вояга етадилар.

М. Рид романлари орасида бу китоб ўзининг ижтимоий масалаларни кўтариши, ерли халқ вакиллари — ҳиндуларнинг америка ва испан босқинчиларига қарши адолатли курашини тасвирлашга бағишланган.

Рид Майн. Белый вождь. Роман.

И (Амер)

М $\frac{4703000000 - 4}{356 (04) 90}$ 64—90

ISBN 5—633—00450—7

© Москва, Детгиз, 1956 г.

© Эркин Миробидов, 1990 (Перевод, оформление)

І Б О Б

Бу ҳикоят Америка қитъасининг ичкариларида, ҳар иккала океандан минг милядан ортиқроқ олис масофада содир бўлган.

Камина қулингиз билан бирга ҳув анови тоққа кўтарилиб, унинг қорли чўққисидан атрофга бир назар ташланг-а.

Мана биз аллақачон энг баланд чўққига ҳам чиқиб олдик. Хуш, нималарни кўряпмиз биз?

Шимол ёққа қараб, ўтгизта параллел чизиқларини кесиб ўтиб, Шимолий Муз океанига қадар тоғлар сйлсиласи чўзилиб кетган. Бу тоғ силсиласи жануб ёқда ҳам ўркач-ўркач бўлиб бетартиб бир тарзда бир-бирови узра минггашиб-қалашиб ётибди: тизматор занжирлари дам турли тарафга қараб шохлаб кетади, дам занжир учлари қовушиб, тугун ҳосил қилади. Мағриб ёқда ҳам тоғлар қалашган; уларнинг нотекис иланг-биланг шакли-тарҳи осмон сийнасида аниқ-равшан кўзга ташланади, тоғ этақларида эса кенг-кенг ясситоғликлар қулоч ёйган.

Ана энди машриқ ёққа ўгириламиз. Биронта тоғ чўққисидан ном-нишон кўринмайди-я! Ҳа, биронта чўққи—кўз илғагунга қадарли ва ундан яна минг милялар нариларда ҳам биронта чўққининг қораси кўринмайди. Ҳув анови қорайиб турган, уфқда кўзга чалинаётган чизиқ — бу худди бепоён даштликлардаги каби, илло денгиз сатҳидан хиёл баландроқ жойлашган бошқа ясситоғликнинг қоядор чеккаси холос.

Қаерда турибмиз ўзи? Қайси тоғ чўққисиди? Овчилар «Испан чўққиси» деб атайдирган Сьерра-Бланкда. Биз Буюк Текисликларнинг мағриб ёқдаги этагида турибмиз.

Машриқ тарафда бирон-бир маданий олам белги-аломати чалинмайди кўзга. Бир ойлаб йўл босган чоғда ҳам барибир учратмаслик мумкин бундайин аломатларни. Шимолда ҳам, жанубда ҳам — тоғ ва фақат тоғ тизмалари.

Мағриб тараф мутлақо ўзгача. Дурбин орқали сиз олис-олислардаги офтобда ойнадай ярқираётган дарё соҳиллари бўйлаб ястанган зироатчилик далаларини кўрасиз. Бу Янги Мексиканинг кенту қишлоқлари, Рио дель Норте сувларидан ташналигини қондирадиган воҳа-ю водийлари. Аммо биз ҳикоя қилмоқ ниятидаги воқеалар бу ерларда кечган эмас.

Қани, машриқ ёққа яна бир карра назар ташлангчи — ана, ҳаракат майдони, воқеалар кечган маскан рўпарангизда турибди-да. Шу топда биз турган тоғ этагидан машриқ ёққа қараб узоқ-узоқларгача ясситоғлик чўзилиб кетган. У ерда тоғолди яланглигу адирликлари йўқ, ясситоғлик тўғридан-тўғри тоғ тизмалари биқинига тақалиб келган, бир қадам қўйсангиз бас — оёғи-гиз текис ерда эмас, балки тошли-қояли, қарағай билан қопланган ёнбағирда турибди-да.

Мазкур ясситоғликни бир хил манзара, бир хил кўринишда деб бўлмайди асло. Пастак қуюқ ўт-ўлан қоплаган жойлари оч-яшил, бироқ аксар қисми Саҳрои Кабир янглиғ беҳосилу бесамара ерлар. Мана, қаршингизда офтобда жизғанаги чиққан бўзраиғ ер ястаниб ётибди, унинг бетига бирон майса-ғиёҳдан асар кўрипмайди, нарироғида эса сарғимтил қум, ундан ҳам нарида эса, худди биз турган чўққини қоплаган қор мисоли ҳаммаёқ оппоқ — бу ер бетига сизиб чиққан туз.

Сийрагу турлари жиҳатидан қашшоқ ўсимлик дунёси тупроқни яшил либос-ла ясата олмайди, қурби етмайди бунга. Агава¹ барглариини қизил-қўнгир доғлар босиб кетган, бутун танаси тиканаклар билан қопланганидан хира-яшилтоб кактус — қуманжирлар ундан ҳам баттар жонсиз, ўлик туюлади наздингизда. Юкка²ларнинг учли япроқлари чанг-тупроқ босганидан сарғайиб-қовжираган, бамисоли даста-даста занглаган милтиқ найзаларига ўхшаб кетади; пакана, рамақижоп акаслар деярли соя бермайди, шу боис йирик қорамтир

¹ Агава — катта-катта баргли тропик ўсимлик.

² Юкка — агавасимонлар оиласига мансуб доимий яшил ўсимлик.

келтакесак ва шиқилдоқ илонлар аранг паноҳ топа олади бу кўланкадан. Гоҳ у, гоҳ бу ерда яланғоч танали, учида шокилда мисоли бир ҳовучгина баргли пакана пальма сўппайиб кўринади; у нимаси биландир Африка тусини беради атрофга. Учи тўмтоғу тўпори ҳамда тиванли нарсаларга тикилганда ҳамиша кўз тез толиқади, бу ерда эса нафақат дов-дарахт, шувингдек жамики ўсимлик шундай шаклу шамойилда, ҳаттоки ҳар битта инсоннинг ҳам ўзига хос найза-наштари бор.

Тоғ этагидан машриққа қараб узанган сўлим водийга қандайин бир қувонч-ла, кўзларинг яшнаб тикиласан-а! Унинг биз турган ясситоғликка сира ўхшамаслигини, мутлақо бўлакча эканлигини қаранг! Унга сидирғасига бамисоли дуру жавоҳирот каби турфа рангда товланган гулу чечаклар бодраган ёрқин яшил гилам тўшалган. Терак, эману болут ва мажнунтолу хитойи дарахтларнинг шох-шаббалари сават янглиғ чирмашиб кетган соя-салқин дарахтзорларнинг ўз сийнасига чорлаб-чақиришини айтмайсизми! Қелинг, ўша соя-салқин, оромбахш жойларга тушайлик.

Мана биз ясситоғлик чеккасидамиз, водий эса ҳануз қуйида, олисларда, унга етгунча кам деганда минг футлар чамаси масофа бор ораликда, илло тепасида нақ муаллақ турган қоядан уни талай миллаб нариларигача бемалол кўздан кечирса бўлади. У ҳам худди тепасида ястанган ясситоғлик сингариясси; шу боисдан ҳам унга тепадан тикиларкансиз, назарингизда, ер қобуғи шу жойда ёрилиб, ясситоғликнинг бир қисми қуйига чўккан-у, заминнинг баланд ясситоғликка насиб этмаган ҳаётбахш қудрати манбаи ила туташгандек туюлади.

Водийнинг ҳар иккала биқинида кўз илғайдиган ерга қадар тик қоялар чўзилиб кетган, улар минг футлик баландликдан тиккасига қуйилаб келади, деярли ҳеч еридан чиқиб бўлмайти юқорига; у ер-бу еридангина иниш мумкин тепага. Водий энига ўн миля келади, икки биқинидан исканжага олган тош деворлар эса бир хил баландликда, мисоли эгизаклардай бир-бировига ўхшаб кетади. Сўлиму гул-гул яшнаган водий тепасига бостириб келган тунду бадқовоқ ҳамда ёввойи тизма қоялар силсиласи қўполдан-қўпол, қўлбола чорчўпдаги ажойибу беқиёс суратга ўхшайди.

¹ Фут — 30,48 см.га тенг узунлик ўлчови.

Дарё водийни иккига тилишлаб оқади; у кумуш илон янглиғ гоҳ уннга, гоҳ сўлга бурилиб, гўёки мазкур яшнаган ҳамда «шўх-шодон» қирғоқлар ўртасида биланглаб оқишни жондан суюдигандек, олға интилади. Беҳад-бениҳоя бурилишлар, осойишта оқиши ўзан-тўшаги деярли силлиқ эканидан далолат беради. Қирғоқларини дов-дарахт қоплаган, лекин сидирғасига эмас: бу ерда сербар минтақа мисоли чўзилиб боради, анави жойда қирғоқ ёқасига етгунча ҳаккам-дуккам дарахт кўринади, ҳув нарида эса ям-яшил яйлов кўзга ташланади — у сувнинг қоқ буйғинасигача «ўрмалаб» келган.

У ерда бир тўп, бу ерда бир тўп, дарахтзорлар «сочилган». Улар турли шакл, турли қиёфада: баъзилари думалоқ, бошқалари — чўзиқроқ ёхуд тухумсимон, учинчи хиллари эса мўл-кўл ҳосилдан бели мугуз мисоли букилгандай қайрилган. Гоҳи жойларда якка-ярим дарахтлар ўсган; тарвақайлаган, ҳашамдор шох-бутоқлари табиат улардан саховатини аямаганини айтиб турибди. Бу водий инсон қўли билан барпо этилган ғаройиб боғни эслатади, бу ердаги дарахтлар баайни боғнинг кўркини кўздан яширмай, унинг чиройини очиши зарур бўлган миқдорда десангиз.

Наҳотки ушбу манзарани бекаму кўст тулатадиган сарой ёхуд қаср бўлмаса бу ерда? Ҳа, на қаср, на бирон-бир бошпана бор; кўкка ўрлаётган тутундан асар ҳам кўринмайди. Мазкур овлоқ жаннатмакон — боғи эрамда биронта тирик жон қораси ташланади денг кўзга. Кийингу буғулар пода-пода бўлиб тентиб юради, соя-салқин дарахтзорларда салобатли лослар дам олади-ю, илло одам зоти йўқ бунда. Эҳтимолки, инсон оёғи ҳеч қачон...

Э-йўқ! Бизнинг ҳамроҳимиз асло бўлак гапни айтяпти. Мана, қулоқ беринг-а:

«Бу Сан-Ильдефонсо водийси. Ҳозирда одам яшмайди унда, аммо шундай замонлар бўлганким, бу ерда маданий олам аҳли истиқомат қилган. Водийнинг деярли ўртасида, у ер-бу ерда аллақандай бетартиб уюм-тепачалар кўзга ташланади, уларни шиғаб ўсган ёввойи ўт-ғиёҳлар, дов-дарахтлар босиб кетган, бироқ яхшилаб разм солсангиз — бу шаҳар харобаси эканини пайқайсиз.

Шундоқ, бир замонлар шу жойда йирик, бадавлат шаҳар бўлган. Истеҳком-қалъа қад кўтарган бунда, унинг минораларида испан байроғи ҳилпираган. Бунда

яна иезуит падари бузрукворлар асос солган миссия ҳам бўлган, бутун водий бўйлаб, шаҳар теграсида қон ва асиендо¹ларнинг бадавлат эгалари жойлашганлар. Ҳамма ер ишчан одамлар билан гавжум бўлган, ҳамма ёқда майлу эҳтирослар — муҳаббат ва нафрат, шухрат-парастлигу худбинлик, ҳирсу ҳарислик, ўч-интиқом авжга минган. Ана шу майлу иштиёқлар ўт қалаган қалблар аллазамонлар уришдан тўхтаган, улар бошлаган ишу фаолиятни бирон солномачи зоти қоғозга тушириб қолмаган. Улар ҳақиқатдан кўра кўпроқ тўқимага ухшайдиган ҳикоятлар, афсона-достонлардагина яшаб келяпти, холос.

Шундоқ бўлса ҳам, бу ҳикояту афсоналарнинг «ёши» юз йилдан ошмаган. Юз йил муқаддам мана шу тоғ тепасидан нафақат Сан-Ильдефонсо кентинигина, шунингдек, талай шаҳар, кенту қишлоқларни кўриш мумкин эди, ҳозирда эса уларнинг ўрнида инсон боласи бошпанасининг изи-асарини ҳам кўрмайсиз. Уша шаҳару кентларнинг номлариям унут бўлган, уларнинг тарихи харобалар остига дафн этилган.

Ҳиндулар Монтесума² қотилларидан бешафқат қасос олганлар. Башарти сакслар уша уруш, уша интиқом авжланишига яна юз йил... йўқ, ҳатто эллик йил йўл қўйиб борганларида борми, Кортеснинг авлодлари ва унинг истилочи аскарларидан Анауак³ тупроғида асар ҳам, из ҳам қолмаслиги тайин эди.

Алқисса, Сан-Ильдефонсо афсонасига қулоқ беринглар!»

И Б О Б

Чамаси, оламдаги бирор мамлакатда диний байрамлар Мексикадагичалик кўп бўлмаса кераг-ов. Черковийду байрамлари маҳаллий аҳолини христианликка ўтказишда ёрдам беради деб ҳисоблайдилар бу ерда, ана шу боисдан «мунаввару муқаддас» Мексика тупроғида авлиё-анбиёлар байрамлари, диний маросимлар силсиласи хийла кенгайтирилгандир. Барча расму раса-

¹ Асиендо — йириқ мулк, амлон.

² Монтесума — Мексикадаги ацтеклар сардори. Испанлар Мексикани забт этаётганларида, 1520 йили ҳалок бўлган.

³ Анауак — тоғлик Мексика ўлкасининг жанубий қисми, ацтеклар иттифоқи ташкил топган жой; ацтеклар тилида «сув ёқасидаги ўлка» деган маънони англатади.

мадини рисоладагидек ўрнига қўйиб бирон байрам ўтказилмайдиган ҳафта камдан-кам бўлади. Исо алайҳуссалом тимсоли боқиб турган туғу аламлар дейсизми, дабдабали издиҳом юришлари дейсизми, бамисоли «Писарро»¹ томошасини кўрсатишга чоғлангандек, байрамона ясаниб-тусаниб олган руҳонийлар дейсизми, мушакбозлик дейсизми — бари бекаму-кўст муҳайё бунда, яна тағин қаёққа қараманг ҳамма ерда бош кийимларини олиб, тўғридан-тўғри тупроққа тиз чўкиб сажда қилаверади дегг соддадил аҳоли. Буларнинг бари бирваракайига «порох исёни»²ни хотирлаб Лондонда бўлиб турадиган издиҳом юришларига ўхшаб кетади жуда ва жамоатнинг маънавийетига деярли ўшандайин ижобий ҳамда самарали таъсир кўрсатади.

Авлиё оталар бундайин маросимларни шунчаки эрмак учун ўйлаб чиқармасдилар албатта, ҳа, мутлақо ундай эмас. Уларнинг изми-ихтиёрларида озми-кўпми турли хил қисқа-қисқа дуолар, индульгенция³лар, муқаддас сув заҳираси бўлиб, буларнинг бариини байрам пайтларида художўйларга улашар эдилар, улашганда ҳам асло текинга эмасди; бечора гуноҳкор тавба-тазарру этишни истаб қолган чоғида эса уни обдан шилиб, бунинг эвазига унга тўғри беҳиштга элтгувчи энг қисқа ҳамда энг осону энг енгил йўлни ваъда қиладилар.

Афтидан, мазкур маросимлар асълию дабдабали, тантанавор тусда ўтадиганга ўхшарди — аммо мутлақо ундай эмас. Аслини олганда, шунчаки эрмак бўлиб қолади, холос. Кўпинча тиз чўкиб турган художўйнинг жон-жаҳди ила серапе⁴си қатлари орасига яшириб олган ва кичқириб юборай деяётган бабоқ хўрозини тиңчитишга уриниб ётганига кўзинг тушиб қолади. Бу яна-

¹ «Писарро» — немис драматурги А. Ф. Коцебаинг (1761—1819) «Испанлар Перуда» номли пьесасининг машҳур инглиз драматурги Р. Б. Шеридан қаламига мансуб таржимаси.

² «Порох исёни» — католикларнинг 1605 йилги инглиз қироли Иаков I га қарши муваффақиятсиз чиққан суиқасди. Парламент мажлислари очиладиган кун парламент остидаги ертўлада исён ташаббускорлари порох солинган бочкани портлатмоқчи бўлганлар. Исён фош этилган, бошчилари эса қатл қилинганлар. Ушандан эътиборан талай вақтларгача исён фош этилган кун — 5 ноябрда Лондонда исёнчилар раҳнамоси Гай Фоксинг қўғирчоқ-тулумини кўтариб кўча айланиб юриш одат тусига кирган.

³ Индульгенция — гуноҳлардан фориғ этадиган папа ёрлиги, индульгенциялар католик черкови томонидан пулга сотилган.

⁴ С е р а п е — слкапўш, ёпинчиқ.

тагин — халлоқи оламнинг маскани — жоме гумбазлари остида-я!

Байрам кунлари тоат-ибодату сажда-илтижолар узоқ чўзилмайди, ана ундан кейин эса қимор, пойга, айиққа ишларни «ол-кишлаш», хўроз уриштириш ва бўлак оддий-содалликда булардан қолишмайдиган ўйинлару боз-бозликлар бошланиб кетади. Боз-бозлар орасида сиз эрталаб дуо ўқиб, ваъз айтган жуббали руҳонийни ҳам учратасиз ва борди-ю, майлингиз бўлса, ўзингиз унинг тангасига қарши ўз долларингиз ёхуд дублонингизни ти-кишингиз мумкин.

Байрамлар орасида энг дабдабалию энг таитанали-ларидан бири — авлиё Иоанн куни. Бу куни, айниқсан-ги Янги Мексика қишлоқларида, ҳеч ким уйда ўлтир-майди. Ясаниб-тусаниб олган тўда-тўда одамлар оломони буқа қувиш, пойга, хўроз кўпқари каби турли-туман мусобақа-бахслашувларни мириқиб томоша қилгани би-рор-бир маълум ерга, одатда ёнгинадаги яйловга қараб оқа бошлайди. Танаффус пайтларида қарта ўйнайди-лар, чекадилар, қизлар билан шакаргуфторлик қилади-лар.

Байрам кунлари, худди жумҳурият ҳукми ҳимояси остида яшаётгандек, бир қадар тенглик қарор топгандай бўлади. Бою камбағал, оқсуягу авом-бари оломон бў-либ қорншиб кетади, бари биргалашиб вақтичоғлик қи-лади, кўнгил очади.

Бугун авлиё Иоанн байрами куни. Сан-Ильдефонсо ахли шаҳар чеккасидан нарига қараб кетган ям-яшил кенг яйловда тўпланган. Бу ерда ҳамиша байрам кун-лари турли ўйин-томошалар ўтказилади, мана бугун ҳам ҳадемай бошланиб қолади улар. Унгача эса, ке-линг, оломонни оралаб, у кимлардан жамулжам бўлган-ини кўрамиз.

Бу ерда жамоатнинг жаминки қатламию табақаси, аниқроғи — бутун маҳаллий жамоат жам бўлган.

Ана, миссиядан дағал саржадан жубба кийган, бўй-нидаги хочлари тиззаларигача тушган, тасбеҳ тутган икки нафар биққи руҳоний тақсирлар келишяпти; ҳар иккаларининг тепаси ҳафсала билан қиртишланган бошлари ялтирайди. Ҳинду-апач буларнинг каллаҳомини қўлга киритишни хаёлига келтирмаса ҳам бўлади.

Ана, эгнига узундан-узун қора жубба, бошига кенг-бар соябонли шляпа, оёғига қора ипак пайпоқ билан

тўқали кавш кийган шаҳар черковининг руҳонийси — у кўзингизга ярқ этиб ташланади.

У оломонга гоҳ илтифотли табассум инъом этар, гоҳ қора кўзлари ила муғамбирона ва ғазабнок нигоҳ ташлар, гоҳ ҳозиргина етиб келган сеньорага қўша-қўша узуклари, нозик бармоқларию яланғоч қўлларини кўз-кўз қилиш учун қулайроқ жойга ўтиб олишига кўмаклашар эди. Мексика черковининг ушбу покдомон хизматчилари чиндан-да, беназиру беқийёс хотинпарастрлардир.

Мана биз амфитеатр сингари аста баландлаб борадиган бир неча қатор ўриндиқларга яқинлашдик. Қани кўрайлик-чи, бу ерда кимлар жойлашиб олишибди экан. Бир қарашдаёқ булар жамоатчиликнинг гуллари, маҳаллий зодагонлар эканлиги аён бўлади-қолади. Дарҳақиқат, ана давлатманд йирик савдогар дон Хосе Ринкон ўзининг биққи хотинию тўрттала лўппи ва алвиршалвир қизлари билан бирга ўлтирибди. Алькальд¹нинг умр йўлдошию бутун хонадонидагилар ҳам шу ерда; мартабаси тимсоли бўлмиш популар ила безатилган асосини ушлаб олган алькальднинг ўзи ҳам ўлтирибди; кейин Эчеварианинг қизлари ҳам — сулув жононлар (ўз кўнгилларида) — париждача модани деб миллий либосдан кечган олифта-сатанг акалари ҳамроҳлигида ушбу ерда ҳозир. Сонн-саноғи йўқ подалару водийдаги кенг-ковул амлокнинг соҳиби бадавлат асиендадо² сеньор Хомес дель Монте ҳам шунда; хотини қизларини эргаштириб кўплаб бўлак заминдорлар жам бўлганлар. Кўзу нигоҳларни ром этгувчи соҳибжамол Каталина де Крусес — кон эгаси давлатманд дон Амбрисионинг қизи ҳам ҳозир бунда.

Каталинанинг табассумига муяссар бўлган кимса, тўғрироғи, отасининг илтифоту мойиллигини қозона олган зот бахтиёр бўлмоғи тайин, зотан қизини турмушга беришда унинг сўзи — ҳал қилувчи сўздир. Айтмоқчи, миш-мишларга қараганда ҳамма иш ҳал бўлган, ҳаммаси келишиб қўйилган, Каталинанинг қўлига эришиши тайин омадли даъвогар — қалъа гарнизонида комендантдан кейинги биринчи шахс бўлмиш капитан Робладо эмиш. Ия, ана унинг ўзи ҳам — башанг, мўйловдор йигит; кўкрагию кифтларини заррин уқаю шокилалар

¹ Алькальд — шаҳар граждон маъмуриятининг бошлиғи.

² Асиендадо — йирик мулк, асиендо эгаси.

қоплаган; бирор кимса сулув Каталинага тикилиб қараса борми, унинг қошлари ғазаб-ла чимирилиб кетяпти. Гарчи йигитнинг уқа-шокилалари заррин, қиёфаси мағрурона бўлса-да, бу нарса Каталинанинг диди ўткирлигидан далолат бериши даргумон эди.

Дарвоқе, бу йигитни қизнинг ўзи танлаганмикин? Эҳтимол ундай эмасдир; балки дон Амбросио танлагандир уни. Шухратпарастона ниятлари, худбинона орзу-ҳаваси устун келгандир: аслида қора халқдан чиққан ота тагли-тахтли идальго билан қариндош бўлишга аҳд этганди. Капитаннинг бисотида, башарти аскарий маоши ҳисобга олинмаса, қора чақаси ҳам йўқ, маошнинг бир неча ойлигини олдиндан тагига сув қуйиб бўлган десангиз, аммо-лекинига у ҳақиқий ачупино¹ — унинг томирларида асл идальгонинг «мовий» қони гупуриб турибди. Қари зиқнанинг шухратпарастона орзу-умидлари эса — янгилик эмас, бу барча «ясама, қўлбола» бойларга хос касал.

Дароз, қирқ яшар полковник комендант Вискаarra ҳам ҳозир у нозир, заррин уқа-шокилдаю шоп-шалдоқларга ғарқ, шляпасига пару патлар қадалган — ҳақиқий товус дейсиз уни.

Бу — қувноқ кекса бўйдоқ. Ўзи дам иезуит тақсирлари, дам шаҳар руҳонийси, дам алькальд билан қизгин гап сотарди-ю, айни вақтда кўзлари ёнларидан ўтиб бораётган, байрамга келган деҳқон қизларида эди, нигоҳи бир кўҳликкина чехрадан иккинчисига кўчиб, олма-кесак терарди. Қизлар эса унинг кўзни қамаштиргувчи башанг мундирига хижолатомуз таажжуб-ла, ийманибгина қараб-қараб қўйишар, ўзини нақ Дон Жуан деб тасаввур этадиган комендантнинг наздида бўлса қизларнинг кўзлари ҳаяжондан чақнаб кетгандек туюлар, шу боисдан у қизларга лутфу илтифот кўрсатиб, табассум-ла жавоб қайтарар эди.

Бунда учинчи зобит — офицер (қалъада улар бор-йўғи уч нафаргина эдилар) — лейтенант Гарсия ҳам ҳозир эди. У катта зобитлардан ҳусидорроқ, шу сабабдан да у ҳам бой-бадавлат ва аслзода хонимлар, ҳам оддий деҳқон қизлари орасида хийла кўпроқ муваффақиятга мушарраф эди. Очиғини айтганда, соҳибжамол Каталинанинг уни хуш кўрмагани, унга кўнгил қўймага-

¹ Ачупино — Америкага кўчиб келган испанларнинг лақаби.

нидан таажжубдаман. Дарвоқе, уни шундай қилмаган деб ким ҳам кафолат бера оларди дейсиз. Мексикада аёл зоти қалбидаги сири — дил розини яхши сақлай олади; юзларидан буни икки дунёда уқиб ололмайсиз, тилларидан ҳам осонликча гулламайдилар асти.

Каталинанинг ўй-хаёли шу топда кимда эканини билиш осон иш эмас. Унинг ёшида — ёши эса йигирмада — қизлар қалби камдан-кам буш бўлади. Илло ким экан мазкур қалбни ром этган? Роблагоми? Бас бойлашишга тайёрманки, асло у эмас. Ё Гарсиями? Бу борада баҳслашса бўлади ҳарҳолда. Хуш деганингиздан, булардан булак йигитлар — навқирон аспендадолар ҳам, кон хизматчилари ҳам, яна-тагин бир неча шаҳарлик олифта-сатанг савдогарлар ҳам бор-ку, ахир. Ушалардан бирортасини танлаган бўлиши мумкин-ку! Яна ким билади дейсиз.

Келинг, тагин пича оломонни оралайлик.

Ана, гарнизон аскарлари, уларнинг пошналаридаги шпорлари жингиллайди, қиличлари сурғалиб ер чизади, улар серапе кийган ҳунарманд-косиблар, кончилар, водийлик чорвадорлар оломони билан биродарларча аралашиб кетган. Улар юриш-туришда, ўзларини тутишда зобитларга тақлид қилиб, шунақанги олифтанамо, гердайиб одимлашардики, манзарани бир кўргандаёқ бу ерда бутун ҳокимият ва куч-қудрат ҳарбийларда эканини тушунади — олади киши. Ҳаммалари уланлар бўлиб — ҳиндулар билан бўладиган олишувда пиёдалардан наф чиқмаслиги тайин эди — шпорларининг жиринглашию қиличларининг жаранг-журинги атрофдагиларнинг кузю наздида обрў-эътиборларини янада орттириб юборади деб хаёл қилишарди улар. Жангчилар қизларга бетакаллуфлик-ла, кўзларини лўқ қилиб тикилишарди, деҳқон йигитларга эса бу кўпдаям ёқавермасди, улар ўз қаллиқлари ва севгилиларини рашк кузила кузатганлари-кузатган эди.

Жамки қизлар — чиройлилариям, хунуклариям байрамга энг яхши, энг ярқироқ кийимларини кийиб, ясашиб-тусаниб олишган. Бир хилларининг юбкалари зангори, иккинчилариники қип-қизил, учинчилариники товланадиган, улардан аксариятининг этаги иигичка тасмаэди чатилган қаппайма, қат-қат қўш этак. Қизлар каш-

¹ Уланлар — снгил отлиқ аскарлар.

тагулли қордай опноқ кофта кийишади одатда, устидан эса буйнилари, кўкраклари, елкларини беркитиш учун чиройли қилиб қоп-қора шолрўмол ташлаб оладилар. гоҳо эса айрича бир нозу карашма ила юзларини ҳам беркитиб оладилар. Аммо-лекин ҳали кеч кириб қош қораймасиданоқ бу ёпинчиқ ўз соҳиббаларининг уятчанлигини унчалик рашиқ билан хасиўшламаёқ қўяди. Ана шу турфа хил товлангувчи бежирим қатлар остидан эндиликда ёруғ жаҳонга энг сулув чехралар муралай бошлайди, офтоб қорайтиб улгурмаган терилари қандайини нозигу нафис, уларнинг икки ҳафта давомида тусларини тавия қилиб турган тар мева ширасини бетларидан нақ байрам сайлига отланиш олдидан ювганларини англаш мушкул эмас.

Чорвадорлар ҳам энг яхши байрамлик энгил-бошларини кийиб, ясаниб олишган: энгиларида почаси кенг, икки биқинида ҳошия-жнякли бархит шим, ярқиратиб тозалаб-мойланган хиром этик, ошланган қўй терисидан ёки ола-була панжарагулчин қилиб тикилган бархит калта камзул, камзуллари остида эса каштадўзи кўйлак, барчалари белларини оч-қизил шойи белбоғ билан боғлаб олишган. Бошларида соябони -кенгдан-кенг қора ярқироқ сомбреро¹; уларга икки учи бемалол ҳилпираб-осилиб турган заррин ёхуд мошранг тасмача боғланган. Баъзилар калта камзул ўрнига елкаларига напосандона бир тарзда серапе ташлаб олган. Ҳаммалари от етаклаган, ҳаммаларининг товонларида оғирлиги бемалол беш фунт², ғилдиракчаси уч, ҳатто беш тийинлик чақадек қеладиған ниқтагич-шпор.

Кон хизматчилари, шаҳарлик ёш-яланглар ва майда ҳунарманд-косиблар деярли бир тусда кийинганлар; лекин жамоатнинг «қаймоғига» даҳлдор амалдору коммерсантлар — юпқа қора мовутдан калта камзул билан худди ўшандай матою ўзига хос бичимдаги — нақд европача бичимда деб бўлмайдиган, аммо хиёл шунга ўхшашроқ, парижча бичиму маҳаллий миллат камзули бичими оралиғидаги андозада тикилган панталон³ларда.

Ана, анови мутлақо бошқача камзул, уни кўпчилик, ҳа, оломон орасида жуда кўпчилик кийган, булар тинч ҳаёт кечирिशга ўтган, ярим-қашшоқ, яқиндагина муқад-

¹ Сомбреро — сербар соябонли шляпа.

² Фунт — 453,6 гр.га тенг оғирлик ўлчови.

³ Панталон — эркакларнинг шимсимон тор кийими.

дас черков қавми сафига ўтказилган ҳиндулар. Уларнинг кийимлари соддагина: аввало тильма — енгсиз камзулга ўхшаш бир нарса; мабодо қаҳвадан бўшаган қопнинг туби бош ўтадиган қилиб тешилса, икки биқинидан қўл чиқадиган қилиб ўйилса — ана ўша нарса айнан тильманинг ўзгинасига айланади-қолади. Бунақанги камзулда бел деган нарсанинг ўзи йўқ, унинг на шаклиёна бичими бор, шунчаки кифтларда ҳалпиллаб осилиб, этаги деярли бўксагача тушиб туради. Одатда тильма қишлоқда тўқилган қўлбола дағал жун матодан тикилади; бу матони «герга» деб атайдилар; туси оқнароқ, бир нечтагина бошқа рангдаги йўл-йўл «гул» бегаз туради уни. Бунга ошланган қўй тери иштон билан қўполдан-қўпол кавушни қўшинг — тинч меҳнат билан кун кўрадиган мексикалик ҳиндунинг бор энгил-боши ана шу. Бошида ҳеч нима йўқ, оёғи ҳам яланг: тиззасидан тўпигача қизғиш-мис тусли териси кўриниб туради.

Юзлаб маҳаллий қизил танли аҳоли — миссия ва конларда ишловчи пеонлар¹ — сайр қилиб уёқдан-буёққа бориб-келишяпти, хотинлари билан қизлари ерда чўк тушиб ўлтиришибди. Олдиларидаги бўйраларда бу ўлкаларда етишадиган анвойи тур мевалару полиз маҳсулотлари: хурмо, петахайя, олхўри, ўрик, узум, қовун-тэрвунинг барча навлари, тоғликлар келтирадиган қоврилган кедр ёнғоғи уйилган. Баъзи бир хиллар пештахтада ширинликлар, асал шарбати, лимонад билан савдо қилишяпти; бошқалари чоғроқ-чоғроқ ҳажмдаги каллақанд ёки агаванинг қовурилган илдиэ-томирларини сотишяпти. Яна бир хиллар олов олдида чўнқайиб олиб, жўхори унидан зогора ёки қизил қалампир пиширяпти, ё сопол кўзачада тахтакачланган қаҳвани шакарга қўшиб қорйштиряпти. Ушбу бечораҳол чаканафурушлардан бир неча майда чақага аччиқ қилиб қалампир сепилган яхна гўштдан бир улуш, бир тақсимча жўхори гўжа ёки финжонда маккайи шарбати олса бўлади. Бошқа дўкон эгаларидан кичикроқ арзон сигара ёхуд ичга ўт қалайдиган сув — Таос ёки Эль Пасодан келтириладиган ўткир агвардиенте харид қилиш мумкин. Худди ана шу ерда ҳамиша ташналикда ўртанадиган қончилар билан аскарлар уймалашганлари-уймалашган. Бу ерда чодир деган нарса йўқ, деяли ҳамма савдо қи-

¹ Пеонлар — ер эгаларига ярим қўл сифатида қарам бўлган қишлоқ хўжалик ишчилари.

лувчилар бошлари тепасига пальма бўйрадан соябон қилиб олганлар, баҳайбат шамсияга ўхшаб кетадиган бу қўлбола соябонлар уларни жазирама қуёш нуридан асрайди.


Бу ерда ҳозир бўлганларнинг тағин бир тоифаси тўғрисида, авлиё Йоанн байрамида муҳим мавқе тутувчи зотлар хусусида сўзлаб ўтмоқ лозим: булар турли мусобақалар қатнашчилари, товкаларда ғолибликка даъвогарлар.

Бу йигитларнинг бари жамоатнинг турли табақасидан, турган гапки, ҳаммалари отлиқ, ҳар қайсилари қўлидан келганича энг олди отни топишга ҳаракат қилган. Қисқаси, мана улар ола-қуроқ безатилган отларини асло кутилмаган бир тарзда — айниқсанги ёш сеньориталар жойлашган ўриндиқлар олдидан — ўйноқлаш, сакрашу гижинглашга мажбур этганча важоҳат-ла, савлат тўкиб ўтиб боришяпти. Кон қазувчилар дейсизми, навқирон асиендадолар дейсизми, чорвадору молбоқарлар дейсизми, бизон¹ овловчилар дейсизми, савдо аҳли вакиллари дейсизми — бари шулар сафида, жамикилари эгарда чаптастик-ла ўлтиришибди. Мексикада ҳар бир киши ажойиб чавандоз, ҳатто шаҳарликлар ҳам чавандозликда устаси фаранг.

Улар сафида беллашиш, чавандозлик санъатида эпчилликни талаб этадиган турли хил ўйину мусобақаларда ўзини кўрсатишга тайёр ва уларни енгилаш бор.

Шундоқ экан, қани, бошлана қолсин уша мусобақалар!

Ш Б О Б



Мусобақалар «coleo deltoros»дан бошланади, бунинг маъноси буқа қувмоқ демакдир. Чинакам буқа жанги ўтказиладиган саҳна-майдон Мексиканинг фақат йирик шаҳарларида мавжуд, холос; аммо ҳар бир, ҳатто энг кичик қишлоқчада ҳам буқа қувиб юрганларини кўриш мумкин, сабаби, бундай ўйин учун очиқ майдону ниҳоятда қутуриб ётган буқа топилса бас. Спортнинг бу тури буқалар жанги — буқа билан олишув сингари одамни талвасага солиб, унчалик қонини қиздириб юборол-

¹ Бизон — Шимолий Америка ёввойи қорамоли, қўтосларнинг бир тури.

майди, нега деганда бу ўйин қатнашчилар учун у қадар хавфли эмас. Лекинга бундай томошаларда ҳам буқа отни шохи билан илиб отган ёки чавандозни жароҳатлаган пайтлар тез-тез учраб туради, гоҳида эса ҳалокатли ҳоллар ҳам бўлади. Гоҳи от қоқилиб кетади-ю, орқада елиб келаётган отлар уни устидаги чавандози билан қўшиб босиб-янчиб ўтади; бунақанги бетартиб, айқаш-уйқаш пойгада фалокат бўлиши одатий бир гап.

Хулласи калом, «soleo» — бу куч сипашиш, мардлик, чаққонлигу эпчиллик бобида мусобақалашув. Янги Мексикадаги ҳар бир ўспирин голиб чиқишга тиришади ушбу беллашувларда.

Барча тараддуду тадорик ишлари тугаб, жарчи мусобақа ҳозир бошланишини эълон қилиб жар солди. Тайёргарлик ишлари жўнгина эди: оломонни бир чеккага суришди, натижада тутқунликдан бўшатиб озодликка чиқариб юбориладиган буқага тўппа-тўғри прерия — бепоён дашт сари йўл очилди. Башарти буқага мазкур имтиёз берилмайдиган бўлса, у оломонга даф қилиши мумкин, бу эса ғоятда хатарли эди. Ана шундан қўрққан кўплаб хотин-халаж араваларга чиқиб олишганди, кўпчилик буёққа уловда келгани боисдан ҳам аравалар талайгина эди. Амфитеатрсимон ортга қараб аста баландлаб борадиган ўриндиқларга жойлашган сеньору сеньориталарга келганда эса, улар ўзларини бежавотир сезишаётганди, албатта.

Мусобақалашувчи рақиблар аллақачон бир қаторга тизилиб, саф тортишганди. Биринчи қур пойгада ун икки киши — энг олди чавандоз ёки ўзларини шундай деб биладирган турли табақаю тоифадан чиққан ўспиринлар қатнашиши керак. Антика либосдаги чорвадорлар дейсизми, ҳеч нимадан тап тортмайдиган мол ҳайдовчилар дейсизми, тоғдан тушиб келган маъдан қазувчилару шаҳарликлар дейсизми, водийлик ер эгаларию чорвадор фермалардан келган молбоқарлар дейсизми, бошпанаси бепоён дашт бўлмиш бизон овчилари дейсизми — барининг намояндаси бор. От ўйнатиш, чавандозлик санъати бобида ҳеч ким ўзлари билан тенглаша олмаслигини исбот қилиш майлу иштиёқида тоқатсизланаётган бир неча улан ҳам бор эди бу сафда.

Мана, ишора берилди-ю, қўшни қўтондан буқа чиқариб юборилди. Уни пиёда ҳайдовчилар измига топшириш ақлсизлик бўлурди — ана, уни бақувват отларни

минган молбоқарлар кузатиб келишяпти, чўпонлар лас-со'ларининг учи буқанинг шохларига ўралган; ҳайдовчилар сергак, борди-ю, буқа бевошлик қилиб, ғалва чиқаришга урингудек бўлсами, ўша заҳотиёқ бир силташда уни ерга қулатишади.

Кўринишидан буқа — ёвуз махлуққа ўхшайди, пешонаси ҳурпайма жунли, кўзлари ёвузона, қутурганнамо боқади, айни пайтда хира тортган. Жигига тегиб, газабини қўзғашга уриниш узоққа бормаслиги очиқ-ойдин кўришиб турибди, негаки, ҳозирнинг ўзида дарғазаб бўлиб, думи билан икки биқинини савалаб боряпти, тўғри, узун шохлари ила ҳавони нуқиб, қисқа-қисқа нишқирган кўйи, тоқатсизлик-ла ер тепиниб боряпти. Кўришиб турибдики, испан буқалари зотининг энг ашаддий намояндаларидан бири бу.

Томошабинлар буқадан кўзларини узмай, овозларини баралла қўйиб унинг сифатларини муҳокама қилишяпти. Бир хиллари уни етилиб жуда семириб кетган дейишса, бошқалари нақ пойга учун тобига етган деб тасдиқлашарди: ахир «soleo» учун буқа зўр бўлишдан кўраям кўпроқ илдамроқ бўлиши керак-да. Фикрлари бир жойдан чиқмаган кўпчилик пойга — буқа қувишнинг натижаси хусусида гаров бойлашар, қувиш бошланганидан токи уни ушлаб, қулатадиган дақиқаларигача — қувиш шу билан тугар, ўйиннинг мақсади ҳам худди шу эди-да — қанча вақт кетиши устида мубоҳасалашишар эди.

Агарда бақувват, илдам, дарғазаб, қисқаси ажойиб буқа танланганини, таъқибчи уни қуруқ қўл билан, ҳатто лассонинг ёрдамисиз эплаштириши лозимлигини эътиборга олинадиган бўлса — бунинг машаққат эканини тан олмасликнинг иложи йўқ. Буқа жон-жаҳди билан, деярли йўртоқи от тезлигида югуради. Ана шундай шароитда уни ерга қулатиш учун беқиёс паҳлавонона кучга эга, ниҳоятда эпчил, моҳир фавандоз одамнинггина қўлидан келадиган мардона жасоратни кўрсатмоқ даркор. Ушбу ўзига хос жасорат буқани думидан ушлаб, бир силтаб тортгандаёқ қулатишдан иборат.

Ана, буқани чавандозлар саф тортган маррадан икки юз ярд²ча масофага ҳайдаб бориб, тўхтатдилар; бу-

¹ Лассо — каманд, ҳайвонларни тутиш учун ташланадиган спиртмоқли узун арқон.

² Ярд — 91,44 см.га тенг узунлик ўлчови.

қанинг қаршисида интиҳосиз дашт ястанган эди. Уни шохидан тутиб турган лассони эҳтиёткорлик билан бўшатдилар-да, ҳаво кучи билан ишлайдиган қуролдан икки-уч бор ўқ уздилар, учи ўткир найза ўқлар буқанинг сағрисига қадалди — шунда у томошабинларнинг баралла ҳайқириқлари остида жонҳолатда даштга қараб қоча бошлади. Орадан лаҳза ўтмаёқ чавандозлар отларини ниқтаб, ҳар қайсиси ўз мақомида ҳайқирганча орқасидан қува кетдилар.

Саф бузилиб, таъқибчилар бетартиб бир ҳолатда, бамисоли тулки ови пайтидагидек бутун яйлов бўйлаб тўзиб кетдилар. Дақиқа ўтгани сайин таъқибчилар сафи — қалқа-занжирлари чўзилиб-узайиб бораверди; бошда улар таъқибни бир қаторга тизилиб бошлашганди, энди бўлса якка-якка, икки нафар-икки нафарга бўлинишиб, сафлари юз ярдлаб чўзилиб кетди. Шунанга қарамай, улар отларини жонлари борича саваб, биқинига ниқтаб ва чуҳ-чуҳлаб қичаганча таъқибни давом эттиришяпти.

Биқинларига қадалган бамисоли найзадай ўткир тиканли ўқларнинг оғриғи жонидан ўтганидан қутураёзган, тиканли ўқларнинг пат қанотларининг чувиллашидан ўтакаси ёрилаёзган буқа кучи борича, шаталоқ отиб олға югурарди. У дастлабки сонияда олган «сийлов масофа»ни ҳатто энг учқур отда ҳам йўққа чиқариш осон эмасди, шу боис буқа таъқибчиларнинг барчасидан — улардан бирортаси унга яқинлашиб улгурмасидан буруноқ — роса бир милядан ортиқроқ илгарилаб кетганди. Бироқ мана, йирик тўриқ отли улан унга қувиб етди-ю, ниҳоят думидан тутиб олди. У бир, икки марта тортди, жониворни қулатиш учун ўз билаклари кучини етарли деб чамалаганди, аммо бунга муваффақ бўлолмади — буқа лаҳза ўтмаёқ юлқиниб чиқиб, бошқа ёққа йўл солди ва таъқибчисини ортда қолдириб кетди.

Ана энди буқага ажойиб отли навқирон асиендадо етиб олди; лекин у думидан чангаллайман деб ҳар гал қўл чўганида буқа нақ тумшуққинаси остидан қочиб қоларди. Ҳарқалай чавандоз ахийри думни ушлашга муваффақ бўлди, аммо буқа сира кутилмаганда четга ташланиб, рақибни қўлидаги думини суғуриб чиқарди-ю, «саломат бўлсинлар» дегандай яна жуфтакни ростлади.

«Солео»нинг шартларидан бирига биноан қатнашчи-

лардан бир марта муваффақиятсизликка учрагани ўйиндан чиқиб кетади. Шундай қилиб, асиендадо билан отлиқ аскар энди таъқибда иштирок этишолмасди. Улар отларини орқага буришди-ю, лекин тўғри томошабинлар тўпланиб турган томонга қараб ҳайдашмади. Улар чеҳраларидаги беҳудуд аламзадалик аломатларини ҳеч ким кўрмасин учун одамларни четлаб, нарироққа кетишди.

Буқа ҳамон узоқлашиб боряпти, тоқатсизланаётган, таъқибга берилиб қизишиб кетган чавандозлар эса унинг кетидан қувишяпти. Уланлардан яна бири буқани ушлашга уриниб кўрди ва бунисиям эплолмади, ундан кейин чўпон, кейин тагин бир чавандоз ва яна бирови— ҳаммаларининг ҳаракати зое кетди, ҳар бир муваффақиятсиз уринишни оломон афсус-надоматли хўрсинишла қарши оларди. Бир неча киши эгардан учиб кетди, шунда томошабинлар хохолаб кулишарди ундан. Бир от эса қаттиқ жароҳатланди: у буқанинг йўлида кўндаланг бўлиб қолган, буқа бўлса отни шоҳлари билан ёриб-йиртиб ташлаганди.

Орадан ўн дақиқа кечмаёқ ўн икки чавандоздан ўн бир нафари ўйиндан чиқиб бўлди.

Эндиликда ёлғиз бир чавандозгина таъқибни давом эттиряпти. Буқа жуда зўр, нақ рисоладагидек чиқиб, ҳаммага ёқиб қолди, томошабинлар уни гулдурос қарсақлар-ла олқишлашяпти.

— Қойил! Тасанно!— деган нидою ҳайқириқлар янгираяпти тўрт томондан.

Эндиликда барчанинг кўзи ғазаби қўзиб, қутуриб кетган жонивору унинг яккаю ягона таъқибчисига қадалган. Ҳар иккалалари ҳозирча хийла яқин ерда, шу боис уларни бемалол кўрса бўлади — шу пайтгача буқа таъқибчилардан тўғри дашт ичкарисига томон эмас, балки гоҳ ўнгга, гоҳ сўлга қараб қочаётган эди-да, ахир, мана шунинг учун ҳам ҳозир у билан оломоннинг оралири ортидан биринчи отлиқ етиб олган пайтдагидан ортиқ эмасди. Буқа шу топдаям у томондан-бу томонга ташланяпти, инчунун, ҳар икковлари ҳам — таъқибчи билан таъқиб қилинаётган — ўриндиқлар тизилган жойдан яхши кўриниб турибди.

Бу орада гузалликда уларга тенг келадигани йўқлигига ишонч ҳосил қилмоқлик учун чавандоз билан остидаги отга бир марта назар ташлашнинг ўзи кифоя эди.

Тезкорлик ва эпчилликда ҳам ҳаммадан ўтармикан булар? Вақт кўрсатади буни.

Бу от — йирик, сақичдай қоп-қора, учига томон тулкининг думи сингари санжоблашиб борадиган узун ҳурпайма думли мустанг¹. Гарчи лўкиллаб югураётган бўлса-да, тет-текис яйлоа сийнасида, бўйни камондек, қадди-қомати келишган, қамчиндек экани бемалол кўзга ташланиб турар, томошабинлар эса ҳайрат ичра, ҳаяжонланиб ҳайқиришарди.

Чавандоз йигирма ёшлар атрофида ёхуд хиёлгина каттароқ, у ўз рақобатчиларига асло ўхшамайди: сочи оч-малла тусли, қўнғироқ-қўнғироқ, териси оппоқ, нафис қизиллик югурган; қолганларнинг бари беистисно буғдойранг. Унинг эғнида чорвадорларнинг сербезак ҳамда гул чекилган кишилик — байрамий либоси, одабий серапе ўрнида эса хийла бежирим ва майини, товланувчи ридо. Ридосининг узун этак-барлари қўлларни бемалол, эркин ҳаракатлансин учун орқага ташланган, шамолда ҳилпираб, қат-қат бўлиб йиғилиб, жойига қайтар экан, чавандознинг кўркига кўрк қўшяпти.

Ушбу абжир чавандознинг қўққисдан пайдо бўлиши — дастлабига у ўзининг қизил ридоси барини қўли оша ташлаган кўйи ҳаммадан кейинда, кўзга ташланмай борганди — мана, умумнинг эътиборини тортди-ю, кўпчилик унинг кимлигини суриштириб қолди.

— Бу Карлос-ку, бизон овчиси-чи! — қичқириб деди ҳозир бўлганлардан бири ҳамма эшитадиган баланд овозда.

Афтидан, бу исм баъзи бировларга маълум экан чамаси, лекин кўпчилик биринчи марта эшитаётган эди. Уни танийдиганлардан бири сўради:

— Карлос нимага илгарироқ олдинга отилмадийкин? Ахир у истаса буқага бемалол етиб олиши мумкин эди-ку!

— Жин урсин! Албатта, мумкин эди! — жавоб қилди бошқаси. — Бошқалар ҳам омадини синаб кўрсин деб жўрттага орқада юрган. Бу буқани ҳеч ким уддалаёлмаслигини билган у. Ана, қара, қара!

Шубҳасизки, бу гапни айтаётган ҳақ эди.

Бу чавандознинг буқага ҳеч машаққатсиз етиб олиши мумкинлиги бир қарагандаёқ аён бўлганди. Ҳаттоки ҳозир ҳам унинг оти бемалол лўкиллаб югурияпти.

¹ Мустанг — ёввойилашган от.

гарчи қулоқлари диккайган, қизғиш бурун карраклари кенгайиб бораётган эса-да, бу чарчаш аломати эмас, балки таъқиб чоғида қизишиш ва чавандознинг шу чоқ-қача жиловни бўшатиб, эрк бермаётганидан норозилик аломати эди. Ҳақиқатан ҳам у ҳали-ҳануз жилов тизгинини қаттиқ тортиб борарди.

Суҳбатлашаётганлардан бири ҳаяжонланиб: «Қара, қара!»—деб қичқирган сонияда чавандознинг ҳатти-ҳаракати тўсатдан ўзгарганди. У қаршисидаги жонли нишондан тахминан йигирма одимча кейинда, орқасидан қувиб бораётган эди. От қўққисдан икки баробар тезликда олға ташланди ва бир неча сакрашда буқа билан барабарлашди. Буқанинг тиккасига орқага чўзилган узун, думини чавандоз қандай чангаллаб олганини, икки букилиб энгашиганини, ўша лаҳзадаёқ шартта қаддини яна ростлаганини — уйдайд келадиган шохдор махлуқ гуппа қулаганини ҳаммалари кўриб туришди. Чавандоз бу ишларнинг барини (буқани эмас, балки оддийгина мушукни енгандай) осонгина адо этди. Томошабинлар томоқ йиртгудек бўлиб «viva» дея қичқира кетдилар. Голиб отини бурди, камтаринона таъзим бажо келтирганча ўриндиқлар сафи қаршисидан ўтиб борди-ю, оломон орасига кириб ғойиб бўлди.

Томошабинлар орасида шундайлар ҳам бор эдики, уларнинг наздида таъзим бажо келтираётганида голибининг нигоҳи гўёки соҳибжамол Каталина де Крусеста қадалгандай бўлиб кўринди; бир хиллар эса ҳатто, қиз йигитга жавобан кулиб қўйди, жигаридан урган чоғи, деб ишонтирмоқчи бўлишарди. Аммо, турган гапки, бундай бўлиши мумкин эмас. Дон Амбросиодек бадавлат одамнинг меросхўри қандайдир бизон овчисининг таъзимига наҳотки табассум-ла жавоб қайтаради!

Бироқ, томошабин аёллар орасида бир кимса ростдан ҳам унга табассум бахшида этганди. Бу бағоят оппоқ, оқпар-малласоч қиз бўлиб, голиб яқинлаб борган аравада типпа-тик турган эди. Маана энди, икковлари ёнма-ён туришаркан, икки томчи сувдек бир-бировларига ўхшашлари аён бўлди. Ҳар икковларининг томирларида битта қон оқмоқда эди, териларининг туси бир хилда, улар битта халқнинг фарзанди, эҳтимолки, битта отанинг зурриёди эдилар. Ҳа, оқ-малла соч қиз бизон овчисининг синглиси эди. У акасининг ғалабасидан бахтиёр, яйраб-яшнаб куларди.

Мазкур араванинг ичкарироғида қиёфаси дарҳол киши эътиборини тортгувчи — узун, қордай оппоқ патила сочли қари аёл ўтирарди. У чурқ этиб оғиз очмасди, аммо Карлосга текилган уткир нигоҳи тантанавор чақнарди. Гоҳилар кампирга қизиқсиниб қарашаётган, бирок кўплар қўрқув аралаш, деярли даҳшат-ла боқишаётган эди. Улар кампир хусусида унча-мунча билишар ва пичирлашиб бир-бирларига ғалати миш-мишларни етказишар эди.

— У жодугар!— дейишарди улар.— Авроқчи!

Одамлар бу гапларни Карлос ёки оқпар-малла соч қиз эшитиб қолмасин деб чўчиётгандай секин-секин, пичирлашиб гапиришарди. Ахир бу аёл уларнинг онаси эди-да!

IV БОБ

Уйинлар давом этарди. Карлосдан мағлуб бўлган буқа бағоят ювош тортиб қолган ва тўрсайганча яйловда тентираб юрарди. У мусобақанинг иккинчи турида қатнашишга ярамасди энди, шунинг учун шохига лассо ташлаб, олиб кетишди уни: бу соврин, ғолибга беришарди уни.

Бошқа буқани етаклаб чиқиб, қўйиб юборишган эди, ун чоғли янги чавандозлар изма-из қува кетишди уни.

Бу гал жонивор билан унинг таъқибчилари бир-бироларига кўпроқ мўс тушишди — аниқроғи, буқа унчалик илдам эмас экан: ҳаммалари унга бараварига етиб олишди-да, пойга забтида анча-мунча олдинга ўтиб кетишди. Буқа мутлақо кутилмаганда шартта орқага бурилди-ю, тўғри томошабинларга қараб югуриб қолди. Аравалардаги деҳқон қиз-жувонлар, уриндиқларда ўлтирган сеньору сеньориталар айюҳаннос кўтаришди. Сира ҳайрон қоладиган жойи йўқ: яна бирон лаҳза фурсат ўтмаёқ қутуриб кетган ҳайвон шу ерда, улар орасида бўлади-я!

Чавандозлар қаердадир орқада қолиб кетишган. Жонжаҳди билан елиб кетаётган отларини орқага буриш зарурати уларни ғафлатда қолдирган эди, бунинг оқибатида ҳозир буқа улардан анча илгарилаб кетганди. Ҳатто энг яқин жойдагилари ҳам вақтида етиб кела олмасди.

Бошқа жамики отлиқлар аллақачон отларидан ту-

шиб бўлишган эди. Жон-жаҳди билан югурганча келатган дарғазаб буқанинг йўлини пиёда тўсиб чиқишга ким журъат эта оларди дейсиз!

Эркаклар ўзларини йўқотиб қўйдилар; уларнинг бақриқ-чақриқлари даҳшатга тушган хотин-халажнинг дод-фарёдларига қоришиб кетди. Қурбон бериладиган кўринади... эҳтимол битта-яримтагина эмас, кўпроқ бўлишям мумкин қурбонлар. Улим чангалидан қутулиб қолишига ҳеч кимнинг ишончи қатъий эмасди.

Ўлгудек қўрқиб кетган хотин-қизларга тўла арава-лар ўриндиқлар сафининг икки биқинида саф тортиб, яйловнинг нариги томони сари чўзилиб бориб, ярим ҳалқага ўхшаган бир давра ҳосил этганди. Ана, буқа аллазамон ўша ярим доира ўртасида, аравалар сафи унинг на ўнггаю на сўлга бурилишига йўл қўйяпти, шу сабабдан ҳам у, худди ўша ердан ёриб ўтишни мўлжал қилгандай, қутуриб ўриндиқлар томон бостириб келяпти. Аёллар сапчиб ўринларидан туриб кетишди-ю, эс-ҳушларини йўқотиб қўйганларидан, чамаси, тўппа-тўғри махлуқнинг шохига сакрашга тайёрдек эдилар. Воҳ, нақадар даҳшатлию қутқули дақиқа бу!

Айнан шу сонияда аравалар қаршисида лассо ушлаган бир пиёда одам пайдо бўлди. Оломон орасидан аранг чиқиб келиб, лассосини боши узра айлантира кетди. Тағин бир дақиқа ўтди-ю, жазавага тушган буқанинг шохларига ташлаб, илаштирди-олди.

Ҳалиги одам бирон лаҳзаниям бой бермай, ярим доиранинг деярли ўртасида ўсган пастак дарахтга қараб отилди-ю, шашту шитоб-ла лассонинг иккинчи учини дарахт танасига урай кетди. Мабодо яна бир сония ҳаяллаб қолганида борми, фурсат ўтиб бўларди.

У боғлаб бўлгани ҳаманоқ кучли силтов буқанинг бошвоққа тушиб, боғланиб қолганидан дарак берди. У шохларига маҳкам чирмашган лассонинг қолган узунлиги баробар масофагача югуриб боргани ҳаманоқ аллақандай мубҳам бир куч дарғазаб буқани қўққисдан таққа тўхтатиб, орқага итқитиб юборди-ю, буқа томошабинлар оёқлари остига гурсиллаб қулади.

Даҳшатдан лол бўлиб қолган юзлаб одамлар овозлари чиқар даражада ўзларига келганлари замоноқ ҳайқириқлар янгради:— Қойил! Тасанно! Viva, viva, viva, Карлос, бизон овчисига шон-шарафлар бўлсин!

Ҳа, ҳеч ким эмас, шахсан ўша бугун барчанинг олди-

да ўзининг абжирлигию жасоратини иккинчи бор исботлаб берганди.

Илло буқа ҳали мағлуб бўлганича йўқ, маълум — лассонинг узунлиги баробариндаги масофада ҳаракатлана олиш имконияти билан чегаралаб қўйилганди, шу боисдан ҳам у оёққа тура солибоқ газаб-ла ўқирганча тўғри одамларга қараб ташланди. Яхшиямки лассо буқа унги ёки сўл қанотдан томошабинлар сафигача етиб боролмайдиган даражада калта, шу сабабдан буқа тағин йиқилди, орқа оёқларига ўтириб қолди. Оломон даҳшат ичра тўрт томонга қочди: ким билсин, сиртмоқ тўсатдан шохларидан сирғалиб чиқиб кетса-чи? Бироқ мана, чавандозлар ҳам етиб келишди. Янгидан-янги лассолар буқанинг бўйнига чирмашди, оёқларини тушовлади, ниҳоят уни шафқатсизларча гурсиллатиб ерга қулатишди, қилт этиб қимирлаёлмай қолди у.

Ана энди буткул маҳв этилганди, ортиқ даф қила олмайди. Ўйиннинг мазкур тури учун бор-йўғи иккита жониворни тайёрлаганлари сабабли бугун буқа қувиш мусобақаси тугади.

Бугунги байрамдаги бошқа йирик ўйинга ҳали-ҳозирча тайёргарлик ишлари кетаётгани туфайли отлиқлардан баъзилари чавандозлик санъати бобида бир қадар пастроқ даражадаги маҳоратларини намойиш қила бошлаган эди. Бу ўзига хос интермедия бўлиб, ҳар қайсилари хаёлига келган нарсани кўрсатарди томошабинларга. Масалан, жони борича югураётган одамнинг оёғига лассо ташлаб, сиртмоқни тўпигига илинтирарди-да, турган гапки, уни гуппа қулатарди. Буни жуда кўплар — отлиқлар ҳам, пиёдалар ҳам — қила олишарди, кўришиб турибдики, бунинг учун алоҳида маҳорат талаб қилинмасди; ҳар ҳолда энг маҳоратли, энг уста чавандозлар — ушбу эрмакда иштирок этишни ўзлари учун эп кўрмайдиганлар шундай деб ўйлашарди.

Сўнгра чавандозлар шляпа билан бажариладиган томошани намойиш этишди. Бу ўйиннинг бор ҳийла-ҳикмати шундаки, отни лўкиллатиб бораётиб бошдаги шляпани ерга ташланади, кейин эса отни елдириб кета туриб, эгарда ўтирган ерида энгашиб уни ердан олинади. Деярли барчалари бир хил муваффақият-ла бажаришди бу машғулоти, чавандозлардан энг ёшларигина айрича энчиллик белгиси деб билишарди ушбу машқни. Салкам йигирма чоғлиқ отлиқ ўспирин томошабинлар

қаршисида давра ясаб, ўз сомбреросини ерга ташла-
шар ва отларини учириб кела туриб яна ётган жойидан
илиб кетишар эди.

Аммо кичикроқ нарсани — масалап ерда ётган тан-
гани олиш энди унчалик осон эмасди; бунда омадини
синаб кўриш энг моҳир чавандоз учун ҳам ор эмасди.

Комендант Вискаarra олдинга чиқиб, тинчлик сақла-
нишини талаб этди. У испан долларини ерга қўйди-да:

— Бу доллар биринчи галнинг ўзида ердан ололган
одамники! — деб эълон қилди. — Беш тилло тикиб айта-
манки, бунни сержант Хомес қотиради!

Бир неча дақиқа ҳамма жим қолди. Беш тилло кат-
та пул. Фақат бой-бадавлат одамгина таваккал қила
олади бунча пулни тикишга.

Шундай бўлса-да, ҳар қалай ушбу даъват жавобсиз
қолмади. Навқирон бир чорвадор олдинга чиқди.

— Полковник Вискаarra, — дея гап бошлади у, — сер-
жант Хомес қотирадимиз ё эпполмайдимиз, бу тўғрида
баҳслашиб ўтирмайман-у, лекин гаров ўйнашга тайёр-
ман: орамизда бошқа бир одам ҳам бор — Хомесдан
тирноқчалик қолишадиган жойи йўқ уни. Совринни ик-
ки баравар оширолмайдиларми мабодо?

— Айтинг ўша одамни!

— Карлос, бизон овчиси.

— Жуда соз, таклифингизни қабул этаман. Яна ким
омадини синаб кўришни хоҳлайди? — сўзини давом эт-
тирди Вискаarra оломонга қарата. — Ердан олинган
доллар ўрнига ҳар гал янгисини қўяман. Лекин эсингиз-
да бўлсин — биринчи уринишдаёқ оласизлар!

Баъзилар уриниб кўришди-ю, омадлари келмади.
Баъзи бир хилларнинг қўли тангага тегди, ҳатто уни
жойидан қўзғатишди ҳам, аммо ҳеч ким ердан ола бил-
мади уни.

Охири ўтлоққа йирик тўриқ от минган чавандоз чиқ-
ди — сержант Хомесни ҳамма таниди. Биринчи бўлиб
буқага етиб олган, бироқ уни йиқитолмаган ўша эди.
Муваффақиятсизликдан кейин ҳанузгача тинчий олмай
ётгани бир қарашдаёқ сезилиб турарди — унинг
шундоқ ҳам заъфарон-заҳил тусли тунд юзи бутунлай
тумтайиб кетган эди. У дароздан келган, чайиру бақув-
ват ва шубҳасизки яхши чавандоз, бироқ гоётда қўпол,
қад-қомати беўхшов, номутаносиб одам эди; унга эпчил-
лик ва ҳаракатчан-абжирлик етишмасди.

Маэкур иш унча-мунча тайёргарлик кўришни талаб этарди. Сержант айил-узангиларни текширди, қиличи билан камарбандларини ечиб қўйди-да, отини жилдирди.

Чавандоз маҳорат-ла бошқараётган от бир неча дақиқа ичида офтобда ярақлаётган танга ёнига етиб борди. Хомес энгашиб, тангани олишга уринди. Ердан узди ҳам уни, аммо тангани маҳкам чангаллаёлмаган экан, у қаддини ростлаб улгурмасидан бармоқларидан сирғалиб тушиб кетди.

Оломон узра ғала-ғовур кўтарилди — ҳам ҳайрат, ҳам афсус-алам қоришиб кетганди бу ҳайқириқларда. Кўпчилик Хомесга мойиллик билан қарарди, нега дега-нингизда, Вискаarra уни ёқларди-да. Полковник Вискаrrани жуда-жуда ёқтирганлари учун эмас, йўқ, ундан қўрққанлари учун ўзларини шундай кўрсатишарди, ана шунинг учун ҳам унинг раъйига қарши чиқмасликка ҳаракат қилишарди.

Энди Карлос ўзининг қорабайирида олдинга чиқди. Жамики кўз зоти унга қадалди. Башарти терисининг туси ҳаддан зиёд оппоқ бўлмаганида, унинг ҳусни умум жамоатни ялписига мафтуну маҳлиё қилиб қўярмиди. Ана шу нарса умум жамоатни унга нисбатан ишончсизлик билан қарашга мажбур этарди: ахир у бошқа халқнинг намояндаси эди-да!

Аммо-лекин, аёллар қалби бу фикрга қўшила олмасди, олтинсоч америкаликни кўрганда бир қанча қизларнинг қоп-қора қуралай кўзларида ҳайрат учқунлари чатнаб кетди, зеро Карлос, бизон овчиси, аслида америкалик эди-да.

Унга мойиллигу илтифот билан қараб, лутф айлаётган нафақат аёллар, маъқулловчи сузларни пичирлаётган нафақат ўшалар эди. Деярли ҳайвон ўрнида кўриладиган ва шу даражага туширилган, қаддилари дол букилиб, бошлари ҳам, кўзлари ер сузиб яшайдиган тагнос қабиласидан бўлмиш ҳиндулар орасида олис замонларда қолиб кетган ўтмиш кунларини орзу қиладиган одамлар ҳам бор эди; улар бир замонлар ота-боболари озод яшаганларини билардилар; тоғдаги ғорда ёхуд нимқоронғи чакалакзор ўрмон ичкариларида ўтадиган махфий йиғинларида улар ҳануз тангри Кецаль-

коатль¹ шарафига муқаддас олов ёқиб, ҳанузгача Монтесума, озодлик ҳақида сўзлаб келадилар.

Карлос ҳеч қандай ҳозирлигу тайёргарлик қилиб ўлтирмади. У ҳатто ридосини ҳам ечмади, нописандлик ила орқага ташлаб қўйди холос, унинг узун барлари отнинг сағрисидан пастга осилиб тушди.

Соҳибининг овозига итоат этгувчи от қўзғалишданоқ лўкиллаб чопа кетди, кейин чавандознинг тиззалари унинг биқинини астагина қисди-ю, жонивор ушбу ишорага бўйсуниб ўтлоқда давра ясаб, тезлагандан-тезлай-верди.

Бир пайт чавандоз отни худди ўша тезлигида тўғри ялтиллаб турган танга устига қараб солди. Тангагача йўрттириб боргач, эгарда ўлтирган ерида эгилиб, тилло тангани олди-ю, боши узра баландга итқитди, отини таққа тўхтатиб, қўлини олға узатди, олтин танга очиқ кафтига келиб тушди.

Ана шу ишларнинг барини у нақ ҳинд фақиридек бемалол, оппа-осонгина адо этди. Ҳатто уни хуш кўрмаганлар ҳам ўзларини қарсак чалиб юборишдан тия олмадилар, Карлос, бизон овчиси шарафига яна «viva» садолари янғради.

Сержант ер билан баробар бўлди. Бу мусобақада у кўп вақтлардан буён голиб чиқиб келарди: бугунги кунгача Карлос бўлмасди бу ерда ёки у ҳеч қачон қатнашмасди мазкур мусобақаларда. Вискаarra ҳам ўзини ундан тузукроқ ҳис этмаётганди шу топда. Унинг арзандаси шарманда қилинди, ўзи бўлса ўн тиллодан айрилди — бу ҳатто чегарадаги қалъа комендантн учун ҳам оз пул эмасди. Ҳа, бундан ташқари, ютишига имони комиллик ила ўзи бошлаган гаровда бой бериб сулув сеньориталар олдида кулги бўлиш ниҳоятда кўнгилсиз ҳол эди. Айнан шу дақиқадан бошлаб Вискаarra бизон овчиси Карлосни ёмон кўриб қолди.

Томоша-ўйинларнинг навбатдаги тури яйлов чеккасидан ўтадиган чуқур зовурнинг нақ лабгинасигача от йўрттириб бориш эди. Бунда нафақат чавандознинг жасорати ва эпчиллигинигина, балки отнинг аъло даражада тарбия кўрганини ҳам намойиш қилиш мумкин эди.

¹ Кецалякоатль — толтеклар — Мексика водийсида яшаган ҳалқнинг тангриси. Қанотли, қушсимон илон тимсолида тасвирланган.

Зовур — суғориш учун қазилган канал — от сакраб утолмайдиган даражада кенг, қулаш чавандозга унчалик хуш келмайдиган даражада чуқур эди. Шунинг учун ҳам чавандоз фақат эпчилу чаққонгина эмас, айни чоқда жасоратли, довюрак бўлиши керак эди. От бор кучи-ла зовурга қараб учиб боряпти; ана шу елиб-учиб бораётганида қўққисдан тўхтатиш лозим уни, тўхтатганда ҳам тўрттала оёғи чизикдан ўтмаслиги шарт, бу чизик эса зовур лабидан икки от танаси узунлигига баробар масофа берироқдан ўтказилади. Замини, албатта, қаттиқ, заранг, акс ҳолда бу ўйинни бажариб бўлмасди.

Кўплар бундайин мусобақа жабҳасида санъаткорона маҳорат орттирган ва ушбу мушкул вазифани бенуқсон бажардилар. Жон ҳалписида елиб бораётган тулпорни тўсатдан таққа тўхтатиш — ажойибу антиқа томоша-да: от олдини икки оёғини кўтариб, нақ кўкка сапчигундек бир қиёфада зовурнинг лабгинасида тўхтади, боши орқага ташланган, кўзлари ёниб-чақнайди, бурун катакларини кенгайиб-керилиб кетган. Баъзи бир чавандозлар эса, аксинча, жуда кулгили қиёфага кирадилар, шундай пайтларда оломон улардан кулиб, мазах қиладилар. Булар ё юраксизроқ — бундайлар зовур лабига етмай, анча беридаёқ отларини тўхтатиб қолишади — ёки ўзи довюраг-у, лекин чапдаст эмас: отни шартли чизикда тўхтатиб қололмай, чуқур лойқа сувга учиб тушишади. Ҳар қандай муваффақиятсизликни томошабинлар деярли бетиним кулги ва ҳайқариқлар билан қарши олишади, чунки зовур қирғоғига бот-бот сал бўлмаса чукиб кетаёзган, бошдан-оёқ шалаббо чавандозлар чиқиб келишади. Айни чоқда моҳирона адо этилган ҳар бир ҳаракатни «viva» деган ҳайқариқлару гулдурос қарсақлар ила олқишлашади.

Шу қабилдаги мусобақалар мудом ўтказиб турилади; бундай усул билан таълим олиб жаҳонда энг олди чавандоз бўлиб етишиш табиий, алқисса, мексикаликлар чиндан ҳам беқиёс чавандозлардир.

Бизон овчисининг бу ўйинда қатнашмаслиги кўриниб, сезилиб турибди. Хўш, сабаб? Дўстларининг айтишлари-чи, бу ўйин унга муносиб эмас экан. Хийла оғир мусобақаларда қатнашиб, моҳир чавандоз эканини кўрсатиб қўйди-ку, ахир, дейишарди улар, яна-тағни десангиз бу ўйинда қатнашса эндиликда ўзи учун мутлақо кера-

ги йўқ галаба кетидан қувган бўлармиш. Карлос ҳақиқатан ҳам шундай деб ўйларди.

Аламзада, таъби тирриқ бўлган комендант эса бунга ўзгача кўз билан қарарди. Шунингдек, капитан Робладо ҳам, зеро у овчининг ҳар бир янги галабасидан сўнг Каталанининг нигоҳи-қарашларида аллақандай галати ифодани кўраётган ёхуд хаёлан тасаввур қилаётган эди. Иккала ҳарбийнинг худди ўзларига ўхшаган палидона режалари бор эди: ҳар икковлариям Карлосни камситиш пайида эдилар.

Унинг ёнига бориб, охириги ўйинда нега омадини синаяб кўрмаганини сўрашди йигитдан.

— Уринганга арзийдиган иш эмас деб ўйлайман,— дея жўнгина жавоб қилди овчи.

— Хо-о!— истехзоли оҳангда деди Робладо.— Э-йўқ, ошна, турган гапки, бошқача важ-сабабларингиз бўлса кераг-ов. Қопқон-тузоқнинг шундоқ лабгинасида тўхташ — сиз айтганчалик арзимас нарса эмас. Шу, назаринида, калла ташлаб чўмилиб олишдан чўчиётганга ўхшайсиз-да.

Капитан ушбу сўзларни ҳазиллашаётгандай, аммо атрофдаги ҳамма эшитсин деб етарилича баланд овозда айтди-да, охирида масхаралаётгандек қаҳ-қаҳ уриб кулиб юборди.

Улар айнан шу нарсани — йигитнинг қандай чўмилиб чиқишини кўришни истаётган эдилар. Улар, борди-ю, Карлос даъват-чорловларини қабул қилгудек бўлса, у чоқда оёқ остидан бирор тасодифий фалокат, масалан оти тойиб ёки қоқилиб кетиб, ўзи зовурга учиб тушишидан уиндвор эдилар. Бу ҳол овчини қанчалик ерга урса, қанчалик обрўсини тўкса, улар ўшанчалик хурсанд, ўшанчалик мамнун бўлишади. Ифлосу балчиқ зовурдан эмакляб-ўрмалаб чиққан, шилтаи шалаббо бўлган одам бунга ҳатто ўз жасорату мардлиги сабабчи бўлса ҳамки, бари бир томошаталаб оломон кўзига кулгиди ва аянчли кўринади. Карлосни худди ана шундай аҳволда кўриш истагида ўртанаётган эди бу икковлон.

Овчи уларнинг нимани истаётганларини пайқадими ё йўқми, буни заррача сездирмади. Унинг жавобидан буни фаҳмлаб бўлмади. Лекин атроф-теваракдагилар жавобини эшитганларида зовур, лойқа сув — бари ўша ондаёқ унут бўлди. Эндиликда томошабинларни ҳийла қизиқарлироқ манзара-томоша кутмоқда эди.

У БОБ

Карлос дарҳол жавоб бермади; у бирон дақиқа чамаси индамай, қилт этмай ўтириб қолди эгарда. Афтидан, боши қотиб, гангиб қолганга ўхшарди. Ҳар иккала зобитнинг феъл-атвори, Робладонинг гаплари қаттиқ текканди унга. Унчалик мушкуллик жойи йўқ, сирасини айтганда, аллақачон тугаган ўйинга қатнашиш, яна-тагин фақат Робладо билан комендантнинг хаёлига унинг жиғига тегиш фикри келиб қолганлиги учунгина қатнашиш алам қилмайдими ахир! Рад этиш эса — кулгимасхара ва фисқи-фасодга нишон бўлиб қолиш демак. Эҳтимол улар худди шунга эришиш истагидадирлар?

Унинг зобитларнинг нияти ғаразли деб шубҳага тушишига асоси бор эди. У бу икки нусха ҳақида унчамунча нарсадан, яъни иш пайтида, вазифаларини адо этаётганларида, ўзларини қандоқ тутишларидан хабардор эди, билмай, беҳабар қола олмасди ҳам-да! Ахир улар бу ерда — олий ҳокимият-ку! Лекинига у яна буларнинг хизматдан бўш пайтларида, шахсий ҳаётларида қандай одам эканликларидан ҳам боҳабар эди, мазкур хабарлар мутлақо зобитлар фойдасидан сўзламасди. Робладога келганда овчининг уни ёқтирмаслигига ўзи билгувчи важҳу сабаблари, ҳа-ҳа, бутунлай ўзгача сабаблари бор эди; башарти Робладо бир нарсани билганида борми, Карлосга худди ўшандай хушқўрмаслик туйғуси ила жавоб қайтармоқликка бағоят ишонарли асосга эга бўлиши тайин эди. Ушбу кунга қадар Робладо ҳатто оламда кўпдан-кўп вақтини бу ерлардан олсда ўтказган бизон овчиси бор эканини мутлақо билмасди ҳам. Эҳтимол зобит илгари уни сира учратмаган ёки, ҳар қалай, ҳеч қачон у билан бирон оғиз гаплашмагандир. Карлос булса уни яхшироқ билар ва мазкур учрашувдан анчагина илгарироқданоқ ёқтирмай қўйган эди уни, юқорида шаъма қилиб ўтганимиздек, бунга ўзига хос сабаблари бор эди.

Зобитнинг бугунги қилиғи Карлоснинг кунглидаги хушқўрмаслик туйғусини озайтирмади. Аксинча унинг такаббуруна, истеҳзолию кинояли оҳангда сўзлаши овчининг иззат-нафсига тегди.

— Капитан Робладо,— дея жавоб қайтарди у ниҳоят,— мен, бу ўйин вақтни исроф қилганга арзимайди, дедим: ўн яшар болакай ҳам буни жасорат кўрсатиш

деб ҳисобламайди. Бундай пуч, беҳуда эрмакни деб отимнинг лаб-лунжини йиртиб, озор бериб ўтирмайман. Хуш, шу зовурча лабида отни таққа тўхтатиш ҳам арзийдиган иш бўлганими? Лекин, борди-ю...

— Қани-қани, уёғи-чи?..— тоқатсизлик ила сўради Робладо орага чўккан танаффусдан фойдаланиб, Карлоснинг нима демоқчи бўлаётганини фаҳмлай бошларкан.

— Борди-ю, таваккал қилиб бир дублон тикишни истасангиз — мен бор-йўғи камбағал овчиман, бундан ортиқ тикишга чоғим келмайди,— унда ўн яшар болакай ҳам чинакам санъат деб ҳисоблайдиган ишни бажарганим бўлсин.

— Сеньор овчи, нима бўлиши мумкин ўша иш?— истехзо-ла, иршайганча сўради зобит.

— Елдек учиб бораётган отимни ҳув анови қоянинг қирғоғида тўхтатаман.

— Тик кесиб тушган ёнбағир четидан икки от бўйи бериди-я?

— Икки от бўйи бериди? Йўқ — камроқ; шу ердаги, зовур ёқасидаги масофачалик бериди.

Унинг сўзи яқин-атрофда бўлган ва бунини эшитганларни шунақанги лол қилиб қўйдик, дамлари ичларига тушиб кетганидан ҳеч қайсилари бир неча дақиқа мобайнида чурқ этиб оғиз очолмадилар. Бу таклиф жиддий айтилганига ишончлари йўқ эди сира, зотан шунчалик қутқули, ақлга тўғри келмайдиган жасорату матонат акс этарди унда. Ҳатто анг-танг бўлиб қолган иккала зобит, шунчаки бизни масхара қилиб куляпти, деб ўйлашга ҳам тайёр эдилар.

Карлос кўрсатган қоя баланд ясситоғликнинг чекка қисми бўлиб, девор янглиғ типпа-тик ёнбағри водийга келиб қадаларди. У олдинга туртиб чиққан бурунга ўхшаб кетар ва қуйидан — водийдан яхшироқ кўриниб турай дегандек жўрттага олдинга туртиб чиққан эди. Баланд қоя, бир-бировига мингашган қоя-тошлардан қад кўтарган бутун тик ёнбағирлик сингари, нимаси биландир тўлқин айирғични эслатарди. Унинг қирғоғида ўт-ўлан — тепада, ясситоғликда ястанган яшил дашти ўтлоқнинг бир чеккагинаси кўзга ташланиб турарди. Текис, поғона-зинапоялару ботиқлик-унгурлардан маҳрум, бошдан-оёқ горизонталь чизиқлар-ла тилишланган девор водийга тикка тушиб келарди — бу навбатма-нав-

бат алмашинадиган оҳактош ва қумтош қатламлари эди. Қоянинг қирғоғи билан ям-яшил водий ўтлоғини минг футдан ортиқроқ баландлик ажратиб турарди. Асаби бўш одамнинг пастдан юқорига қарата баландликни кўз билан чамалаб чиқиши унчалик осон эмасди; юқорида туриб пастга қараш имтиҳонидан ўтиш эса энг довурак, энг қўрқмас одамларнинггина қўлидан келиши мумкин. Карлос отини қирғоғида таққа тўхтатишга аҳд этган қоя ана шундай жой эди. Бундай таклиф барчанинг дамини ичига тушириб, лол қолдиргани энди тушунарли бўлгандир дейман. Илло орага чўккан сукунатга куйидаги қичқириқлар раҳна солди:

— Мумкинмас бу! Ақлдан озибди у! Э, ҳазиллашяпти у! У жаноб ҳарбийлар устидан куляпти!

Карлос парво қилмай, жилов тизгинини чертиб-ўйнаган кўйи жавобларини кутиб ўлтирарди от устида.

Кўп кутмади у. Вискаarra билан Робладо наридан-бери икки оғизгина сўзлашиб олишди-ю, Робладо шошқалоқлик ила қичқирди:

— Бўпти, гаров бойлашганим бўлсин!

— Мен ҳам бир олтин тикаман!— қўшимча қилди Вискаarra.

— Сеньорлар!— деди Карлос, чамаси ранжиганроқ кўринарди у.— Минг афсуски, икки киши билан баҳслашолмайман. Бу дублон — бисотимда бори шу, иннайкейин, яна бир дублон қарз бериб турадиган мард топилармикин шу топда.

Шу сўзларни айтarkan, Карлос оломонга кулиб боқди, лекин одамлар бунга кулги билан жавоб қайтарадиган аҳволда эмасди ҳозир. Улар вужудини ваҳима чулғаб олганди. Улар телба овчини муқаррар ҳалокат кутаётганига шубҳа қилишмасди асти. Шунга қарамай, ҳар қалай аллаким жавоб берди:

— Карлос, бошқа хоҳлаган нарсангга йигирма тилла беришга ҳам тайёрман-у, аммо бу ишга эмас. Ахир бу телбалик-ку!

Ушбу гапни чорвадор йигит, олдинроқ ҳам Карлоснинг тарафини олган ўша йигит айтди.

— Раҳмат, дон Хуан,— жавоб қилди овчи.— Биламан, менга қарз бериб туришга ҳамиша тайёрсан. Шундай бўлсаям раҳмат сенга. Қўрқма ҳеч! Тиллани албатта ютаман. Қандайдир ачупино мени мазах қилиб кул-

син учун йигирма йилдан бери эгардан тушмай юрган им йўқ!

— Оғзингизга қараб гапиринг, тақсирим!— барава-рига қичқириб қолишди Вискаarra билан Робладо. Шахт-ла қиличлари дастасига қўл чўзиб, қошларини чимирган кўйи.

— О, афв этасизлар, жаноблар,— сезиларли киноя билан деди Карлос.— Тасодифан чиқиб кетди оғзимдан. Рост, ҳеч кимни камситмоқчи эмасдим.

— Унда тилингизни тийганингиз маъқул, ошна! Агар яна бир марта оғзингиздан ана шунақанги сўз чиққудек бўлса, тагин бошингиздан жудо бўлиб юрманг-а,— дағ-дага қилди Вискаarra.

— Бағоят миннатдорман ўзларидан, сеньор комендант,— дея жавоб қайтарди Карлос ҳамон кулганича.— Чоғимда, маслаҳатингизга қулоқ солганим тузук кўри-нади.

Комендант бунга жавобан бўралаб сўкинди, лекин Карлос унга эътибор бермади, зотан айни сонияда акасининг бемулоҳазаларча, телбаёна нияти ҳақида ҳозиргина хабар топган синглицси аравадан сакраб тушиб, жонҳолатда унинг ёнига отилган эди.

— О Карлос!— нидо солди у чавандознинг тиззасидан қучиб.— Наҳотки рост бўлса? Йўқ-йўқ, бўлиши мумкинмас!

— Нимани айтяпсан, сингилжон?— деб сўради Карлос кулиб.

— Ҳалиги, сен...

Қиз овози ичига тушиб кетиб, кўзлари билан қояга ишора қила олди холос.

— Албатта-да, Росита. Нимагаям шундай қилмас эканман? Уят-э, сингилжон! Хавотир олма. Ишонавер, буни ҳеч қанақанги қўрқадиган жойи йўқ. Илгарилариям шундай қилиб юрганман.

— Карлос, акажоним! Биламан, сен ажойиб чавандозсан, ҳеч зог тенглашолмайди сенга. Лекин ўзинг ўйлаб кўр, қандай хавфли бу... Вой меҳрибон худойим-а! Узинг ўйла...

— Суф сенга-е, синглим! Одамлар олдида уятга қўйма мени! Бориб онамдан сўра. Қулоқ сол, нима деркин у. Сираям хавотирлашиб, ваҳима қилиб ўтирмайди у.

Овчи шундай деганича арава томон юрди; синглицси ортидан эргашди.

Шўрлик Роситагина-я! Айни шу сонияда сени илк бора кўраётган бир кимсанинг икки кўзи сенда эди, ушбу кўзларнинг зим-зиё тубида учқун чақнаб кетди, ҳеч бир яхшиликдан дарагу далолат беролмасди бу учқун. Сенинг сарв қоматинг, сенинг парирўй чехранг, эҳтимолки, айнан сен чекаётган қайғу-ташвиш бахшида этадиган севги ўзи муҳаббат қўядиган малак учун фақат ҳалокат келтиришигина мумкин бўлган бир одамнинг юрагини тезроқ телишга мажбур этганди. Бу полковник Вискарранинг юраги эди.

— Анавини қаранг, Робладо!— оҳистагина шипшиди у ўз хизматчиси ва жамикн ярамас, бемаъни ишларининг иштирокчисига.— Анави ёққа қаранг! Фаришта-я, фаришта! Э, қарасангиз-чи, ахир! Чўлпоннинг ўзгинаси— менинг христиану аскарлигим қанчалик ҳақ бўлса, унинг Чўлпонга ўхшаши ўшанчалик ҳақ! Қани энди, осмоннинг қайси қаватидан учиб тушганикин-а, у?

— Худо ҳаққи, ҳеч кўрмаганман уни,— жавоб қайтарди капитан.— Балки у анави йигитнинг синглизидир. Худди шундоқ-да! Гапларига қулоқ солинг-а! Бир бировларини ака, сингил деб аташяпти. Ростдан ҳам чакки эмас экан-ку.

— Во дариго!— хўрсинди комендант.— Асл жавохир-ку бу! Бу ердаги бир хил, зерикарли ҳаёт аллақачон меъдамга уриб кетган. Янги эрмак топилгани яхши бўлди-да. Ана энди яна бирор ойга дош бера олсам керак чоғимда. Сизнингча қандай, бутун бошли бир ойга ярармикин, зериктириб қўймасмикин мени?

— Кўзим етмайдиёв... агарда иш бошқалари билан бўлганидай давом этса амримаҳал-ов бу. Наҳотки Инес аллақачон кўнглингизга урган бўлса?

— Хо-хо! У мени ҳаддан ортиқ, ёниб-ўртаниб севади, мен эсам бунга тоқат қилолмайман. Менга сал совуқроқ муносабатда бўладиган сипороғи маъқул.

— Агар ундоқ бўлса, бу оқ бадану олтинсоч қиз, чамамда, сизга кўпроқ ёқадиган, ўзлари боп экан. Ия, қаранг, кетишяпти-ку улар!

Зобитлар ўзаро суҳбатлашаётганларида Карлос билан синглизин кекса оналари ўлтирган аравага яқинлашгандилар.

Комендант, капитан ва яна талайгина томошаталаблар уларга эрганишди, атрофларини қуршаб, гапларига қулоқ сола бошлашди.

— Онажон, мени йўлдан қайтармоқчи бўляпти у,— Қарлоснинг овози эшитилди. У ўз ниятини онасига гапириб беришга улгуриб бўлганди.— Сизнинг розилигингизсиз ҳеч нима қилолмайман. Лекин қулоқ солинг, онажон, мен ваъда қилиб, оёқ-қўлимни ярим-ёрти тушовлаб қўйганман, шуни-чун ваъдамни адо этишни истардим. Ахир бу ор-номусга боғлиқ иш-ку, онажон.

Охирги сўзлар тўғридан-тўғри кампирнинг қулоғига баланд овозда, ишонарли ва салобатли айтилди — атидан онанинг қулоғи пича оғирроқ эди.

— Сени йўлдан қайтармоқчи бўлаётган ким?— деб сўради у бошини баланд кўтариб, атрофдагиларни кўздан ўтказар экан.— Қим ўзи?

— Росита, онажон.

— Росита рўмол тўқиб, каштасини тиксин — унинг иши шу. Сен эса, ўғлим, буюк ишлар қилишинг.. жасорат, мардимайдонлик кўрсатишинг мумкин. Ҳа, ҳа, жасорат, мардимайдонлик. Наҳотки томирларингда оқаётган қон отангнинг қони бўлмаса? Ана у — у жасорату мардимайдонлик кўрсатарди, ҳа... ха-ха-ха!

Бу аёлнинг ғалати, телбаёна кулгуси томошатабларни сескантириб юборди.

— Бор!— дея чинқирди у оппоқ соч тутамларини орқага силтаб ташлаб, қўлларини силкиганча.— Боравер, Қарлос, бизон овчиси, офтобда куйиб-қовжираган бу қуёнюраклар, бу қулваччаларга озод америкаликнинг нималарга қодир эканлигини бир кўрсатиб қўй! Қояга! Қояга бор!

Мазкур даҳшатингиз амру фармонни бергач, у арава ўриндиғига чўкиб, яна жим қолди.

Қарлос ортиқ ҳеч нима ҳақда сўраб ўтирмади ундан. Кампирнинг оғзидан ўқдай учиб чиққан наштарли сўзлар бу суҳбатни тезроқ тугатиш истагини уйғотганди йигит дилида: у яқинроқда турганлардан баъзи бировларнинг динг қулоғи ушбу сўзларни илиб олганини пайқаганди.

Зобитлар, руҳонийлар, алькальд ўзаро маънодор кўз уриштириб олдилар.

Қарлос синглисини аравага чиқариб қўйиб, у билан қучиб хайрлашди-да, эгарга сакраб миниб, водий бўйлаб от йўрттириб кетди. Бир оз нарироққа боргач оти жилвидан тортди-да, шаҳарлик сеньору сеньориталар жойлашган ўриндиқлар қаторига назар ташлади. У ер-

да олашовур ҳукмрон эди. Бу ердагилар бўлажак синовдан хабар топишган, улардан аксарияти овчини ушбу хатарли инъатидан қайтаришга ҳам тайёр эди.

Улар орасида, чамаси, юраги ёрилиб кетай-ёрилиб кетай деяётган хоним ҳам бор эди; қўрқув ва хавотирланиш ҳисси унинг кўнгил косасидан, худди Карлоснинг қалбидагидек, тошай-тошай деб турганди-ю, аммо атроф-теварагидагиларга буни ошкор этишга журъат қилолмасди. Сас-садосиз изтироб чекиш ва сабр-тоқат қилишга мажбур эди у.

Карлос биларди буни. У кўкрагида сақлайдиган оқ рўмолчани чиқарди, кимгадир сўнги бора «кечир мени» деяётгандай силкиб қўйди уни. Унга жавоб қайтардимми биров, йўқми — буни айтиш қийин, лекин орадан лаҳза ўтмаёқ оти бошини бурди-ю, қоя томон йўрттириб кетди.

Сеньор ва сеньориталар, қишлоқ сулувлари бу видолашув «саломни» кимга аталгани хусусида қандайин тахмину ўй-хаёлларга боришмади денг! Талай тахминлар қалаштириб ташланди, талай исмлар тилга олинди, миш-мишу фисқу фужурлар авж пардага минди. Карлос ким билан хайрлашганини барчалари орасида яккаю ягона хонимгина биларди, унинг қалби ишқ-муҳаббату хавотирланиш ҳисси-ла лиммо-лим эди.

VI БОБ

Кимники оти бўлса, бари водийдан юқорига, ясситоғлиққа олиб чиқадиган сўқмоққа қараб тўғри йўл солган овчининг изидан эргашди. Мазкур сўқмоқ тик ва кескин бурилишлар билан қоядан-қояга ўтиб юқорилаб борар, буёқлардан ясситоғлиққа кўтариладиган ундан бўлак йўлнинг ўзи йўқ эди. Қарама-қарши тошлоқ ёнбағирликда ҳам худди шунингдек йўл илон изи ҳосил қилиб юқорилаб кетган, ана шу жойда водийни кесиб ўтиш мумкин — кўплаб миль теварак-атрофда ясситоғликнинг бир томонидан иккинчисига олиб борадиган ягона йўл ана шу эди.

Водийни ясситоғликдан бор-йўғи бирор минг футча масофа ажратиб турарди-ю, аммо юқорига олиб чиқадиган сўқмоқ салкам бир милга чўзилиб кетганди; сайилу байрам ўйинлари ўтадиган жой қоя этадигидан бир неча миль берида эканлиги сабабли Карлосга отлиқлару

ушбу хавфли имтиҳонни қандоқ бўлмасин ўз кўзлари билан кўришга аҳд этган яна бир нечагина киши эргашиб борардилар, холос. Зобитлар, турган гапки, сўқмоқдан юқорига кўтарилиб бораётганлар орасида эдилар. Пастдагилар томошанинг энг қизиқ ҳамда энг тўлқинлантирадиган қисмини томоша қилишдан бенасиб қолмаслик учун қояларга яқинроқ бориш умидида олдинга қараб юрдилар.

Орадан бир соатдан кўпроқ вақт ўтди, пастдагилар эса ҳамон кутишяпти, аммо-лекин вақтларини зое кетказишмаяпти улар. Қартабозлар танга ўгириш ўйинига тушиб кетишди, олтину кумуш тангалар йилтиллаб қўлдан-қўлга ўта бошлади; энг ашаддий ўйинчилар орасида ҳар иккала миссионер тақсирлари ҳам бор эди; сулув сеньориталар эса ўзларининг севимли, осойиштага осонгина чус ўйинлари ила машғул эдилар. Қолган ярим соат фурсатни иккита бақуввату жангари хўроз (биттаси алькальдники, иккинчиси руҳоний отаники) жанги банд этди. Мазкур мусобақада черков намояндаси зафар қучди. Унинг кўк хўрози узун ва пўлатдай ўткир пихи билан алькальднинг самаи хўрозини нақ миясига зарба бериб — бир тепгандаёқ суробини тўғрилади-қўйди. Бу қизиқарли ҳамда кўнгилли томоша пастда қолганларнинг барига, ҳатто сеньориталарга ҳам — алькальддан ташқари, албатта — жуда-жуда ёқди.

Хўрозлар жанги тугади-ю, оломоннинг диққатини яна ясситоғликка кўтарилаётган одамлар тўдаси ўзига жалб этди. Улар ҳозир қояга етиб боришганди, хатти-ҳаракатларидан уларнинг бундайн кўз кўриб, қулоқ эшитмаган гаровнинг шартларини келишиб олаётганлари яққол тушуварли эди. Келинглар, биз ҳам уларнинг сафига қўшилайлик.

Бизон овчиси отида олдинга ўтиб бориб, ўзининг бундай қалтису таваккалона ниятини амалга оширадиган жойини кўрсатди. Тепадан, ясситоғликдан қуйироқдаги қоялар кўринмасди, кейин, агарда тик кесиб тушган ёнбағирлик четидан бирор юз одимча ортга чекинмасангиз, ҳатто минг футбол қуйида жойлашган тубсиз жаҳаннамдай туюлгувчи улкан водийнинг ўзини ҳам кўра олмайсиз. Бу ерда на қиялигу на ёнбағирлик бор. Токи тик кесиб тушиб кетган ёнбағирлик раҳигача кафтдек теп-текис, ям-яшил майса-гилам қоплаган бутун ясситоғликни. Ҳа, бу ер теп-текис, унда ўсган майса

худди чимдай калтаю қалин. От қоқиладиган бирон нарса — ҳеч қаерда биронта чуқурчаю ёки биронта тош парчаси кўринмайди. Ҳа, унга таҳдид қиладиган бундай фалокатдан ном-нишон йўқ.

Танланган жой, юқорида айтиб ўтганимиздек, худди денгиз соҳилидаги бурунга ўхшаб кетарди; у тош деворнинг бир зайлдаги текис маромига раҳна солиб, олдинга туртиб чиқиб турарди. Қуйидан, водийдан ана шу туртиб чиққан дўнглик яққол кўзга ташланарди. Бу ерда, тепада эса у ясситоғликнинг бамисоли тил янглиғ олдинга томон чўзилиб борадиган давоми экани англашилиб турарди.

Карлос аввало унинг энг чеккасигача бориб, заминни диққат билан кўздан кечирди. У худди кўнглидагидек яхши бўлиб чиқди: от туёғи сирғаниб-тойиб кетадиган даражада заранг ҳам, ботиб кетадиган даражада юмшоғу билқ-билқ ҳам эмасди.

Вискаarra, Робладо ва бошқалар Карлос билан бирга ўша ергача боришди. Танланган жойгача кўпчилик келишган эди-ю, аммо улар ваҳимали тубсиз жаҳаннам чеккасидан хийла берида туришарди. Гарчи улар шу атрофда, маҳобатлию қутқули манзара орасида талай йиллардан буён истиқомат қилиб келаётган бўлсаларда, тўпланганлардан аксариятининг бу даҳшатли «буруннинг» четига яқинлашиб, пастга қарашга юраклари дов бермаётган эди.

Овчининг оти ясситоғликнинг нақ милки-қирғоғида турар, Карлос мисоли канал қирғоғидагидек хотиржамгина маррани қаерга чизишни кўрсатарди. Отида ҳам безовталанишдан асар сезилмасди. Отнинг жуда яхши ўргатилгани ва бу иш унинг учун янгилик эмаслиги шундоққина кўриниб турарди. От дам-бадам бўйинини чўзиб пастга, водийга қарар, уёқда ўз жинсдошларига кўзи тушганида чўзиб-чўзиб кишнаб қўяр эди. Карлос уни мушкул синовга киришишдан олдин бу ерга ўрганиб, кўникма ҳосил қилсин деган мақсадда атайин қоя четида тутиб турган эди.

Лекин, мана, марра чизиги ҳам тортиб бўлинди; марра чизигини чуқурликка тушиб кетадиган тик қирғоқнинг лабгинасидаги охирги майса тупидан икки от танази узунлигидан камроқ масофа ажратиб турибди. Вискаarra билан Робладо оралиқ масофани бундан ҳам қисқартиришни талаб қилишга уриниб кўрган эди, бун-

га жавобан норозилик овозлари таралди ва ҳаттоки оқиштагина, босинқи: «Уят!» деган нидолар ҳам эшитилди.

Зобитларнинг мақсади нима эди ўзи? Томошабинлар тудасидан ҳеч ким буни билмасди-ю, лекин ҳаммалари уларнинг бизон овчисини нобуд қилишни истаётганларини ҳис этиб туришарди. Зобитлардан ҳар бирининг ўзи-ча важҳ-сабаби бор эди бунинг учун. Ҳар иккалаларини ҳам Карлосни кўргани кўзи йўқ эди. Уларнинг нафратланиш ҳамда кўролмасликларининг сабаби ёхуд сабаб-боислари яқингинада пайдо бўлганди, Робладоники ҳатто комендантникидан кейинроқ туғилганди. Сўнги соатлар давомида у шундай бир нарсани пайқадик, бу нарса унинг ғазабини қўзитди. У Карлоснинг оқ рўмолчани қандай силкиганини кўрди, курсию харраklar ёнгинасида экани туфайлидан эса мазкур «хайр» ишораси кимга аталгани кўриниб турган эди. Шунда унинг жисми-жонини ҳайрат, қаҳру ғазаб чулғаб олди-ю, Карлос билан қўпол ҳамда такаббуруна гаплаша бошлади.

Ушбу тахмин қанчалар ёвузонаю мудҳиш туюлма-син, илло овчи қоядан қулаб тушгудек бўлса, ҳар икковлари — Робладо ҳам, Вискарра ҳам — фақат хурсанд бўлишлари тайин эди. Албатта, бу ёвузона, мудҳиш иш бўларди-ю, аммо ўша замонларда ўша атрофлардагилар ана шунақанги одамлар эди, бунинг эса ҳеч қанақанги фавқулодда, ақлга тўғри келмайдиган ери йўқ. Аксинча, бундай ваҳшийлик — янада баттарин ғайринсоний майлу истак ва ҳаттоки хатти-ҳаракатлар — Янги Мексика осмони остида ҳозирги кунда ҳам мутлақо камёб нарса эмас.

Бошқалар қатори ясситоғликка кўтарилган чорвадор йигит ўйин ҳалол-виждонан, жами тартиб-қондаси бўйича олиб борилишини талаб қилиб туриб олди. Гарчи бадавлат бўлса ҳамки, бор-йўғи битта чорвадор бўлмиш йигит ниҳоятда жасур эди ва савлатидан ит ҳуркадиган мўйловдор зобитларга ўчакишиб Карлоснинг ёнини олиб, унинг ҳаққи-ҳуқуқини ҳимоя қиларди.

— Менга қара, Карлос! — деб қичқирди у ҳозирлик ишлари қизғин тус олган пайтда. — Чамамда, бу жинниликни қилишга ростдан ҳам тайёрга ўхшайсан-ку. Ростки сени бундай қилмасликка кўндиролмаган эканман, халақит ҳам бериб ўтирмайман. Лекигин, ҳеч бўлмаса, шу арзимаган нарсани деб жонингни таҳликага қўйиб

ўтирмагин. Мана менинг ҳамёним! Хоҳлаганингча тика-
вер бемалол.

У шундай деганича лиқ тула ҳамённи узатди овчи-
га — кўринишидан озмунча пул бор эмасди ҳамёнда.

Карлос бирор дақиқача жимгина тикилиб қолди ҳам-
ёнга. Бу пурсаховатона таклиф қувонтириб юборган эди
уни. Турқи-авзойидан ўспириннинг саховати уни қаттиқ
таъсирлантиргани шундоққина кўзга ташланиб турарди.

— Йуқ,— деди у ахийри,— бўлмайти, дон Хуан! Чин
дилимдан раҳмат сенга, лекин ҳамёнингни ололмайман...
Биттагина танга, ортиқ эмас, Комендантга битта олтин
танга тиксам дегандим.

— Хоҳлаганингча олавер.

— Раҳмат, дон Хуан! Фақат бир тилла. Ўзимда ҳам
битта бор — демак, жами иккита... Икки тилла. Ҳало-
лини айтсам, ҳеч қачон бунчалик катта пулдан гаров
ўйнамаганман! Эшитяпсизларми? Бечора бир овчи икки
тилладан гаров ўйнапти!

— Хўп майли, агарда сен хоҳламасанг, унда мен
ўзим шундай қилганим бўлсин... Полковник Вискаarra!—
баланд овоз билан комендантга мурожаат этди дон
Хуан.— Ўйлайманки, сиз гаровга тиккан пулингизни
қайтариб олишдан қайтмассиз. Карлос бир тилла тик-
япти, мен бўлсам ўн тилладан бас бойлашни таклиф
қиламан.

— Розиман,— қуруққина жавоб қилди комендант.

— Икки карра кўпроқ тикишга чоғлари қандоқ?

— Менинг чоғимми?— дея такрорлади Вискаarra
шоҳидлар қаршисида ўзи билан шундай гаплашаётган-
лари учун ғазабдан қутураёзиб.— Агар тақсиримнинг ўз-
ларига маъқул келса тўрт карра кўпайтирганим бўл-
син, тақсир.

— Бўпти, тўрт карра кўпайтирамиз,— ўша заҳотиёқ
қабул қилди бу таклифни дон Хуан.— Карлоснинг си-
новга дош беришига қирқ тиллодан гаров ўйнайман!

— Бас қилинг! Қани, пулни чиқаринг!

Олтин тангалар саналиб, гувоҳлардан бирига бериб
қўйилди, ҳакамлар сайланди.

Мана, барча тадорик ишлари тугатилди. Томошабин-
лар отларини буриб, четроққа, ясситоғнинг ичкарироғи-
га чекиниб, «бурун»ни батамом бизон овчиси билан
унинг оти ихтиёрига қўйиб бердилар.

VII БОБ

Одамларнинг кўзи Карлосда, унинг ҳар бир ҳаракати-ни кузатишяпти.

У аввало отдан тушди, кифтидаги ридосини ечиб, бир чеккага қўйди. Кейин шпорларини кўздан кечириб, тасмачалари етарлича маҳкам тортилганига ишонч ҳосил қилди. Белидаги шарфни туғрилаб, сомбреросини пешонасига бостириброқ олдинга сурди. Ўзига халал бермасин учун барқут чолворининг икки биқинидаги кўн қайтармасини тиззасининг кўзидан нақ тўпигигача пистонини қадади. Овчи пичоғи билан қамчисини дон Хуанга бериб қўйди.

Сўнгра у ана шу фурсат давомида худди ўзининг ақл бовар қилмайдиган ишни бажариши лозим эканини сезаётгандек бўйинини мағрурона эгиб турган оти билан машғул бўлди. Карлос биринчи навбатда узангиларни диққат-ла текширди, сўнгра мамлуклар нусхасидаги сўлоқмондай пўлат сувлуқни бирор-ярим дарз кетган ёриқ-пориғи йўқмикин деб назардан ўтказди. Нўхтанинг тела тасмасини роппа-расо талаб қилинганидек даражада тортиб маҳкамлади, кейин жилов тизгинини ниҳоятда диққат қилиб, энликма-энлик кўздан ўтказди. Тизгин ўввойи отнинг думидан тиғиз қилиб, моҳирона ўриб исалган эди. Агар у чарм бўлса узилиб кетиши ҳеч гап эмасди, мисоли тордек маҳкам ва қийишқоқ, эгилувчан, ўриб тўқилгани боис бундан қўрқмаса ҳам бўларди.

Навбат эгарга келди. Карлос уни ҳар томондан кўздан кечирди, узанги тасмаларини ва узангининг катта-конт ёғоч таглигини текшириб кўрди. Энг охириги, энг муҳим иши айилни кўздан кечириш бўлди. У ҳар иккала томондаги тўқани пича бўшатди, сўнгра эса, тиззасини тираганча, айилни иложи борича маҳкамроқ тортиди. У айилни шунчалик сириб тортидики, пишиқ тасма остига бармоғи учини суқиб киритиб бўлмаётди.

Бу эҳтиёт чораларини кўриш ҳеч кимни ажаблантирмади. Зеро бир тасмача чўрт узилиб кетса ёки тўқасидан бўшалиб хиёл сирғалиб чиқса борми — ана унда кўринг, довжурак азаматни абадий тун домига тортиб турибди-да.

Карлос ҳаммаси жойида эканига ишонч ҳосил қилгач, жилов тизгинидан тутди-ю, лип этиб эгарга минди-олди.

Даставвал у отни қоя ёқалаб, қирғоқдан бир неча фут бериоқдан, секин одимлатиб юргизди: ҳар икковлари—ҳам отнинг, ҳам чавандознинг кўзи ўрганиб, кўникиши керак эди хавфга. Кўп ўтмай у қорабайирни йўрғалатиб, сўнгра эса оҳиста йўрттира кетди. Ҳатто ана шу оҳиста йўрттираётганини кўришнинг ўзиёқ ваҳимали эди. Пастда кузатиб турганлар учун бу ажойиб, аммо қўрққинчи томоша эди.

Орадан пича ўтгач у отини ясситоғ ичкарисига буриб, шитоб-ла елдирди кетди-да,— қоя чеккасига қараб от солишни мўлжаллаган тезлигида,— тўсатдан тизгинни шунчалик қаттиқ тортдики, от оз бўлмаса ёнбошига гуппа қулаб тушаёзди. Яна елдириш-у, яна тўхтатиш. Қарлос отни дам қоя чеккасига, дам ясситоғ ичкарисига қараб солган кўйи ушбу машқни ўн-ўн икки марта такрорлади. Шубҳасиз, унинг оти бундан хийла тезроқ ела оларди. Бироқ, ҳозир уни кучи борича елдириш хусусида гап ҳам бўлиши мумкин эмасди. Чоғи келганича, жон-жаҳди билан елиб бораётган отни тубсиз жар ёқасидан ўзининг танаси бўйига икки баробар масофа берида таққа тўхтатиш (ҳатто унинг ҳаётини қурбон қилиш эвазига бўлгани чоғда ҳам) асло мумкин эмас. Қоқ юрагига қалдалган ўқ ҳам елиб бораётган отни бундай қисқа масофада таққа тўхтата олмаган бўлурди. Тузуккина елдириш — шундай аҳвол-шароитда бундан ортигини кутиб бўлмасди; ҳозирлик ишларини кузатиб турган ҳакамлар ҳам, Қарлос бу ҳақда уларнинг фикрларини сўраганида, шундай қарорга келишган эди.

Ниҳоят, у оти бошини қоя томон буриб, эгарда қулайроқ ўлтириб олди. Унинг жиддий, қатъиятли боқиши синовга киришиш фурсати етганидан далолат бериб турарди.

Шпорлар астагина қичади — от жойидан қўзғалди. Қўзғалди-ю, қарабсизки, кейинги сониядаёқ тўғри қоя чеккасига қараб йўртиб боряпти-да.

Ҳамма кўзлар тугал чавандозга игнадек қадалган. Жамики юраклар хавотирдан ҳаприққан, томошатаблар тош қотган; уларнинг норавон нафас олишларию туёқларнинг қаттиқ ясситоғ заминига гусур-гусур урилишигина эшитиляпти, холос.

Бу мубҳамлик кўпга бормади. От йигирма марталар олға сакрашда деярли қоя четига бориб қолди, марра чизигига етишига танаси узунлигига олти баробар масо-

фагина қолди, жилов тизгини эса ҳануз бемалол солла-
ниб турибди, Карлос тортмаяпти уни; у билади, тизгин-
ни тортди дегунча оти таққа тўхтайди. Маррага етмай
туриб бундай қилиш — ютқизди деган гап. Яна бир ол-
га сакраш... яна... ва яна...

— Воҳ! Маррадан ўтиб кетди... Ё тангрим! Ҳозир
учиб кетади у!— томошабинлар орасида ғовур кўта-
рилди.

Улар Карлоснинг оти елиб бора туриб маррани ошиб
ўтганини кўргандилар. Бироқ ўша ондаёқ табриклов ни-
долари янгради: «Viva!»— водийдан янгради қутловлар.
«Viva!»— дея қичқиришарди Карлосни ясситоғда куза-
тиб турганлар.

От афтидан тубсиз жаҳаннам чеккасидан пастга учиб
кетишга тайёрдек кўринган лаҳзада Карлос шартта жи-
ловни тортди-ю, отнинг олдинги туёқлари ҳавода муал-
лақ қотди. Орқадаги икки оёғига таянган қўйи бамисоли
ясситоғнинг қаттиқ, мустаҳкам заминига пайванд бўлиб
кетгандек эди. У тубсизлик ёқасидан бирор одим чама-
си берироқда шу тахлитда қилт этмай туриб қолган эди.
Ана шунда чавандоз ўнг қўлини кўтариб, сомбреросини
ечди-да, қутловларга жавоб маъносида уни силкиб, та-
гин кийди бошига.

Қуйидан қараб турганлар учун антиқаю ажойиб то-
моша эди бу. От ва устидаги чавандознинг куч ёғилиб
турган ва чиройли шакли-тарҳи жаҳаннам ёқасида, мо-
вий осмон сийнасида муаллақ ҳолда кўзга ташланиб
турибди десангиз, Чавандознинг қўлу оёқлари, от тана-
сининг ҳар бир бўртиғию ҳар битта эгик-букик жойи,
хаттоки эгар-жабдуқларигача яққол кўриниб турибди.
Оту чавандоз тубсиз жаҳаннам тепасида қилт этмай,
тош мисоли қотиб қолган қисқагина сонияда гўёки улар
бронзадан қуйилган суворий ҳайкалию қоянинг чўққи-
си эса унинг пойдеворига ўхшаб кетди.

Бу ҳолат бир лаҳзагина давом этди-ю, аммо ҳаво
«viva!» деган ҳайқириқлардан ларзага келган эди. Ке-
йин пастдан томоша қилаётганлар чавандознинг отини
қандайин чўрт буриб, қоя қирғоғидан ғойиб бўлганини
кўрдилар.

Синов тугади, хотин-халажларнинг атиги бир сония-
гина бурун кўксиларида безовга, гурс-гурс тепаётган
таъсирчан юраклари эндиликда тагин хотиржам ҳамда
бир маромда ура бошлаган эди.

VIII Б О Б

Бизон овчиси водийга қайтганида ҳамма бор кучила «viva» деб қичқирганча, рўмолчаларини силкиб қутлай кетди уни. Унга келганда эса, ёлғиз биттагина рўмолчани илғади холос, илло унинг учун бундан ортиқ ҳеч ниманинг кераги ҳам йўқ эди. Бошқаларни кўрмасди кўзи, кўришни истамасди ҳам. Ҳошияси турли бир парчагина муаттар исли батист унинг учун умид нишонаси, у янаям қалтису янаям хавфлироқ жасоратларга кўтариб боришга тайёр тугро эди. Қимматбаҳо тақинчоқлар безаган жажжигина қўлча рўмолчани баланд кўтариб, қувонч-ла силикиганча қутларди уни. У буни кўрди ва бахтиёрликдан терисига сизмай кетди.

У харрагу уриндиқлар олдидан бориб, арава ёнига келди-да, отдан тушиб, онаси билан синглисини ўпди. У билан орқама-орқа дон Хуан, унинг учун гаровга пул тиккан йигит ҳам етиб келди, шунда баъзи бировлар олтинсоч қизнинг нафақат акасига қараётганини пайқадилар — синглисининг меҳр тўла боқишларини акаси бошқа биров билан баҳам кўришига тўғри келарди, ўша бошқа биров эса чорвадор йигит эди. Ҳаттоки энг тўпори, калтафаҳм одам ҳам қизнинг боқишларига чандон бора нафису мулойимроқ нигоҳлар жавоб қайтараётганини пайқамай қолиши маҳол эди. Шак-шубҳа йўқким, бу муҳаббат эди ва улар бир-бировларининг дилидаги туйғудан бохабар эдилар.

Бадавлат ёш чорвадор бўлишига ва уни «дон» деб улуғлашларига қарамай, дон Хуан жамоат зинапоясида бизон овчисидан фақат бир поғонагина баландда эди, холос; мазкур поғонага кўтарилишида бойлиги ёрдам берганди. У маҳаллий оқсуяклар сирасига кирмасди, кейин, кўпда бунинг ташвишини ҳам чекмасди-ю, лекан довюррак, сергайрат йигит бўлиб, агар истаса томирида «мовий қон» оқаётларган билан яқинлашиш бемалол қўлидан келарди. Аммо-лекин, кўришиб турибдики, бунга сира-сира интилмас, ҳарҳолда бу йўлда никоҳдан фойдаланиш истагида эмасди.

Унинг бизон овчисининг синглиси билан қанчалик қизғину хумор нигоҳ-ла кўз уриштираётганини кўриб турган одам борки дон Хуаннинг аслзода хонимга уйланмаслигини бемалол олдиндан айтиб бера олиши мумкин эди.

Арава ёнида жам бўлган бир неча одам шу топда бахтиёр эдилар, шу боисдан улар ушбу воқеани ширинликлар билан, оршад— Эль Пасонинг аъло вноси билан нишонлашга аҳд этдилар. Дон Хуан сал ортиқчароқ сарф-харажатдан чўчимасди, иннакейин, чўнтагида комендантинг ҳаловатини бузиб, унга тинчлик бермай қўйган худди ўша ютуқ пул — нақд эллик тилла жинглик турган экан, нимага ҳам қўрқарди.

Ҳозирда комендант қош-қовоғи уйилиб, яқин-атрофда ўралашиб юрган эди; вақти-вақти билан у яқинроқ келар ва арава томонга сурбетларча тикиларди. У, турган гапки, Роситага тикилаётган эди. Ўзини бу ерда мутлақ ҳукмдорман деб билганидан талтайиб кетган полковник Вискаarra ўз ниятини яширишга ўрганмаган, устига-устак бунга ҳаракат ҳам қилмас эди. У ўз ҳайратини шунчалик уятсизларча ифода этардики, шу тобда бундан воқиф бўлмаган одам кам топиларди-ёв. Нигоҳлари тўқнашган пайтда бечора қиз қўрқа-писа ерга қарарди, дон Хуан бу машмашани пайқаганида йигит вужудини ғазаб ҳамда хавотиргарчилик чулғаб олди. У комендант Вискаrrанинг қанақанги одамлигини билар, ҳокимият қўлида бўлганидан унинг қанчалик хавфли эканидан ҳам хабардор эди. У, озодлик! Қанчалар ажойибсан асти! Қанчадан-қанча орзу-умидлар пучга чиқарди, муҳаббат зиммаси-чекига қанчадан-қанча аччиқ-аламли кўргилигу мусибатлар тушади, сен бўлмаган юртларда, мустабид зулмкорлар бегоналарнинг ҳаёт бўстонига бостириб киришга, жўшқин ҳис-туйғулари оқими йўлига тўғаноқ қўйишга ҳақли-ҳуқуқли ўлкаларда қанчадан-қанча юраклар тилка-пора бўлади!

Ўтлоқдаги ўйинлар ҳали-ҳануз давом этаётган эди-ю, бироқ улар илгаригидек қизиқиш уйғотмаётганди. Карлоснинг беқиёс жасорати, шуури вақтинча жамини бўлак нарсани хиралаштириб қўйган, бунинг устига ҳокимият намояндаларидан баъзиларининг таъблари тирриқ бўлиб қолган эди. Вискаrrа чимирилгандан-чимириллар, Робладо Каталанининг рашкида ўзини йўқотиб қўйгудек аҳволда эди. Алькальд билан ёрдамчисининг қовоғи тушиб кетганди: саман хўрозга тикиб икковлари ҳам катта-катта бой беришган эди. Иезуит отахонлар қартада ютқазиб қўйишган ва шу аснода христианча илоаткорлигу мўминликлари панд бераётган эди улар-

га. Елғиз шаҳар руҳонийсининггина кайфияти жойида бўлиб, хўрозини яна уриштиришга жон-жон деб тайёр эди.

Ниҳоят охирги ўйинлар — хўроз кўпқари эълон қилинди. Бу мусобақа ўйинларининг ғоятда қизиқарли тури, шу боисдан ҳам қарта ва бўлак хашаки эрмаклар тагин йиғиштириб қуйилиб, ҳамма кўпқарини томоша қилишга ҳозирланди.

Хўроз кўпқари — янги мексикаликларнинг ўзларига хос ўйинларидан. Уни тасвирлаб бериш қийин эмас. Мана бундоқ бўлади у. Хўрозни-чавандознинг қўли унинг бўйни ва бошига етадиган баландликда-кўндаланг شوҳга оёғидан осилади. Хўрозни дарахтга шундоқ қилиб боғланадики, ҳадисини олган одам эпчиллигу усталик билан ушлаб туриб бир тортса ечилиб кетади у; аммо бунини уддалаш унчалик ҳам жўн иш эмас, нега деганда хўрознинг бўйнига ям, бошига ям совун суртилади. Чавандоз дарахт ёнидан отини елдирганча ўтиши керак, кейин, биров хўрозни шоҳдан юлқиб олгани заҳоти қолганларнинг бари уни қува кетишади ва қандай бўлмасин хўрозни тортиб олишга ҳаракат қилишади. Белгиланган маррага етганидан сўнг у орқага қайтиб, яна таъқиб бошланган дарахт ёнига етиб келиши лозим. Баъзан улоқни олган одамга ярим йўлда қувиб етиб, ундан хўрозни тортиб олишади, кўпинча эса ўйинга берилиб кетиб, қизиқ устида бахти қаро хўрозни тилка-пора қилган ҳоллар ҳам бўлиб туради. Агарда омади чопган чавандоз хўрозни бус-бутун етказиб кела олса, ўшани голиб деб эълон қилишади. Иш шу билан тугайдики, у ўз ўлжасини севгилисининг оёқлари остига олиб бориб ташлайди, шунда севгилиси — одатда қишлоқ гўзалларидан бири бўлади бу — ўша оқшом қанотли ўлжасини қўлтиқлаган кўйи рақс тушади. Бу ҳол маъшуқанинг ўз хуштори диққат-эътиборини ниҳоятда қадрлашининг аломати бўлиб, қолган рақс тушувчиларнинг бари унинг севиклисининг эпчиллигию довураклигини ўз кўзлари билан кўриб, таъ олсинлар деган маънони англатади. Бу шафқатсизларча эрмак. Негаки, тилка-пора қиладиган бахти қаро хўрозлари бир жонивор эканини унутмаслик керак-ку, ахир! Аммо-лекин Янги Мексика ақлидан бирор кимсанинг хаёлига, ақалли бу шафқатсизлик-ку, деган фикр келмагандир-ов. Борди-ю, бошига шундай хаёл келган одам бўлгани тақдирда ҳам, албатта бу аёл киши бўлиши керак: сабабки, ўз эрлари ёхуд

ака-укалари қанчалик бағритош бўлсалар, мазкур мамлакат аёллари ўшанчалик раҳмдил-да, ахир. Аёллар хўроз кўпкариси Янги Мексикада одат бўлиб қолгани учун ҳам бу ўйинга кўникиб кетган ва унга тоқат қилиб келишади. Хўш деганингиздан, қани айтингчи, ўзининг шафқатсиз ўйинлари бўлмаган бирорта мамлакат топилармикан оламда? Башарти биз ўзимиздек одам бадбахт, таъқибга олинган шўрлик тулки орқасидан жонитанзимиз билан ўйнаб-қувнаб қувганимиздан кейин бир хўроз тепасида аза тутиб, ташвиш чекиб ўлтириш мантиққа тўғри келадиган оқилона ишмикин?

Хўроз кўпкарининг икки тури бор. Биттаси ҳозиргина тасвирлаб берганимиз. Иккинчиси ундан ёлғиз шу жиҳати билан фарқланадики, хўроз дарахтга осилмай, бўйнигача ерга кўмиб қўйилади. Чавандозлар худди ўшандай тартибда от сурадилар, фақат ҳар бирлари эгарда ўтирган жойида энгашиб, ерга кўмилган хўрозни суғуриб олишга ҳаракат қиладилар. Қолган шартлари худди боягидек.

Хулласи калом, дарахт шохига биринчи хўрозни осдилар, мусобақа қатнашчилари бир сафга тизилдилар—ўйин бошланди.

Бир неча киши хўрошни бошидан ушлашга уриниб кўрди, ҳатто бунга муваффақ ҳам бўлдилар-у, лекин совун бутун ишни пачавасини чиқарди.

Сержант улан яна бахтини синаб кўришга аҳд қилди, аммо полковник бу гал ҳам у томонда туриб бирон нима тикадими ё йўқми — буёғи қоронғи. Комендант бугун шундоқ ҳам таваккал қилиб талайгина зарар кўрган, мабодо кондан ундирилган озроққина ҳамда мутлақо ноқонуний ўлпон, яна-тағин расму таомилга биноан қарор топган даромад манбаъларидан унган кирими кўнглига пича таскину тасалли бериб турмаганида у кўрган зиёнига кўпроқ қуюнган бўлармиди. У вице-қироллик ҳукуматидан оладиган ақчасига пора олмай ҳам бемалол, ортиб-тортиб кун кечириши мумкин эди-да, ахир.

Ўзингиз илгарироқдан билганингиздек, маълум устунликка эга (бўйи баланд ва оти йирик) сержант хўрознинг бўйнидан ушлашга муваффақ бўлди. Кейинроқ маълум бўлишича, олдиндан бир қисим қум оливолган экан — ана шу нарса хўрозни дарахт шохидан юлқиб

узишига ёрдам берди-ю, у марра томон от йўрттира кетди.

Аммо, қатнашчилар орасида оти анча-мунча чопқирроқ чавандозлар ҳам бор экан, қисқаси, сержант орқага қайтадиган маррадаги устунни айланиб ўтмасиданоқ удабурон чўпон уни қувиб етиб, хўрознинг бир қанотини, иккинчи қанотини эса бошқа таъқибчи юлқиб олди, шундай қилиб сержант дарахт ёнига хўроздан қолган-қутган қисминигина кўтариб қайтди. Шу боисдан ҳам унга на «viva» садолари, на қарсақлар-ла қутлашларни эшитиш nasib этди.

Бизон овчиси Карлос бу мусобақада қатнашмади. У бугун етарлича шўхрат топганини, ҳам дўсту ҳам душман орттирганини билар, на унисю на бунисини кўпайтиришга уринаётган эди. Бироқ, томоша талаблардан баъзи бировлари уни гиж-гижлашга тушди — уларни шунчаки бу ажойиб чавандознинг маҳоратини яна бир бор кўргилари келаётганди, холос. У пича вақтгача, токи дарахтдан тагин иккита хўрозни юлқиб олгунларича кўнмай, тайсаллаб турди. Мана, боя айтиб ўтган чўпонимиз бир хўрозни бус-бутунлигича ўзининг кулиб турган маҳбубаси оёқлари остига келтириб ташлади.

Ана шунда Карлоснинг хаёлига янги фикр келиб қолди чоғи. У олдинга от суриб чиқди, унинг кейинги даврада қатнашишга тайёр экани кўриниб турарди.

— Энди яқин орада байрамларда қатнашолмайман,— деб қўйди у дон Хуанга.— Индинга даштга жўнаб кетаман. Шунинг учун бугун ҳеч қайси мусобақани ўтказиб юбормаслигим керак.

Буёғига ўйин бутунлай бошқача тус олди. Паррандани ерга кўмишди. Бўйни узун, тумшуғи ниҳоятда учқурлигига қараганда бу хўроз эмас, бу атрофларда бўладиган талай парранда турларидан бири — қордай оппоқ қарқара эди. Унинг ингичка, нозик бўйнига совун суртиб ўтиришмади. Бу галги ўйиннинг мушкул жойи шунда эдики, қарқарага хийла эркинлик берилган бўлиб, у бошини гоҳ ўнгга, гоҳ чапга силкиб, сира тутқич бермас, боши ёхуд бўйнига чанг солиш осон эмасди.

Мана, ишора берилди — чавандозлар отларини йўрттириб кетдилар. Карлос орқадагилар орасида эди, аммо яқинлаб борар экан, сарак-сарак қилиб биланглаб-буриллаётган оппоқ бўйин ҳануз жойида турганини кўрди. Йигит қушдан кўра эпчиллик қилиб уни юмшоқ қум

остидан зумда суғуриб олди-ю, қарқара тулпори ёллари узра оппоқ қанотларини силкиганча патрлай бошлади.

Қарлосдан ёлғиз тезликкина эмас, шунингдек, ҳар томондан йўлини тўсиб, устига бостириб келаётган улоқчилар тўдаси орасидан ёриб чиқиб кетиши учун ниҳоятда чаптастик ҳам талаб қилинарди. У дам олдинга ташланар, дам тўсатдан таққа тўхтаб, қайсидир орқасидан елиб келаётган чавандозни ўтказиб юбориб, шартта чап бериб кетарди. Ана шундай таҳлитда ҳаракат қила-қила, ахийри унинг қорабайири рақиблари қуршовини ёриб чиқди-ю, буриладиган белги — устун сари елиб кетди. Уни айланиб ўтган Қарлос гард қўнмаган ва заррача зиён-заҳмат етмаган ўлжасини баланд кўтарганича орқага учиб келаверди, томошабинлар эса уни гулдурос қарсақлар билан қарши олишди.

Тахмину фаразларнинг чеки-чегараси йўқ эди. Ўлжасини кимга тортиқ қиларкин у? Шу ўз давра-тоифасидан бирор қизни танласа кераг-ов, дейишарди тўпланганлар. Ҳа, бирорта қишлоқ сулуви ёки чорвадор қизини. Афтидан, овчи умум жамоат қизиқсинишини қаноатлантиришга ошиқмаётганга ўхшарди. Лекин орадан озроққина ўтгач, ҳаммани анг-танг қилиб қўйди: қушни осмонга қаратиб баландга итқитиб, қўйиб юборди. Қарқара мағрурона парвоз-ла юксақларга кўтарилиб, узундан-узун бўйинини олдинга чўзган кўйи водийнинг нариги чеккасига қараб учиб кетди.

Аммо-лекин Қарлос асираси билан хайр-маъзур қилишдан бурун унинг бир кўргандаёқ қарқараники эканини айтиб турадиган узун, ўргимчак тўри янглиғ тиниғу шаффоф патидан бир нечасини юлиб олган эди, ана ўша патларни боғлаб жига ясади. Шундан кейин шпори билан отини ниқтаб, ўриндиқлар томонга елдира кетди. У ерга етганида йигит чаққон бир ҳаракат-ла, эгарда ўлтирган жойида эгилиб, ўлжасини оёқчалар остига... Каталина де Крусеснинг оёқчалари остига ташлади.

Оломон оралаб ҳайрат нидолари таралди, ўша заҳотиёқ барча Қарлосни қаттиқ қоралашга тушди.

Бу қанақаси! Оддий бизон овчиси, ҳеч ким тапимайдиган-билмайдиган бир қашшоқнинг нотавон кўнгли бой-бадавлат одамнинг қизи табассум ҳадя этишини тусаб қоптими? Э йўқ, бу илтифот эмас — ҳақорат! Ўзларига намунча бинно қўймасалар бу кишим!

Нафақат сеньору сеньориталарнинггина қаҳрлари кел-

ганди. Қишлоқ гўзаллари ва чорвадорларнинг қизлари улардан кам ғазабга келмагандилар. Уларни менсимади, уларга эътибор ҳам бермади, уларни боплаб лақиллатди — яна ким денг? Ўз тенглари, ўз тоифаларидаги бир одам-а! У кишига, ордона, Каталина де Крусес керак бўлиб қолибди!

Каталинага келганда эса — нимаям қиларди, бу қилмиш унга ҳам ёқарди, ҳам ёқмасди; шунинг учун ҳам ёқмасдики, у ноқулай аҳволга тушиб қолган эди. У жилмайди, қизарди ва аранг эшитиладиган қилиб деди:

— Ташаккур сизга, кабальеро.

Лекинига у ўлжасини баланд кўтаришга бирон дақиқача ҳаяллаб қолди. Унг томонида ўлтирган отаси ғазабидан ўрнидан туриб кетди, чап ёнида эса — ундан кам ғазабланмаган хуштори. Хуштори бўлса нақ Робладонинг ўзгинаси эди.

— Сурбет! — деб ўдағайлади у, жиғани юлқиб олиб, ерга улоқтирди. — Беор!

Карлос эгарда ўлтирган жойида эгилиб жиғани ердан олди-да, уни шляпасининг зарҳал тасмачаси остига қадаб қўйди. Кейин, зобитга жангари қараш қилиб, бундай деди:

— Қизишманг, капитан Робладо. Рашкчи куёвлар кейин бепарво эр чиқадилар. — У Каталинага қараб жилмайди ва бутунлай ўзгача оҳангда қўшиб қўйди: — Миннатдорман сиздан, сеньорита!

У шундай деб сомбреросини олиб, чуқур таъзим бажо келтирди-да, отини буриб, йўрттириб нари кетди.

Робладо шамширини ярмигача яланғочлаганди; унинг «Жин урсин сени!» деб шанғиллаши дон Амбросионинг тиш ғижирлатиб гўлдираган лаънатлари аралаш Карлоснинг қулоғига етиб борган эди.

Капитан ҳар қанча кеккаймасин, кўпдаям довюрак эмасди, кейин, Робладо овчининг белида қинга солиғлиқ узун пичоқ — «мачете» осиглиқ эканини эътиборга олиб фақат дағдаға билан чегараланиб, Карлоснинг олислаб кетишига имкон бера қолди.

Бу воқеа бутун жамоатни ҳаяжонга солди ва кўпчиликда нохуш туйғу уйғотди. Бизон овчиси оқсуяқларнинг қаҳру ғазабини, демократларда рашк ҳамда ҳасадни кўзғади, хулласи пировард-оқибатда у кўрсатган барча ажойиб жасоратларидан кейин мусобақалар майдонини умумжамоатнинг суюкли арзандаси бўлиб эмас, тамо-

ман бунинг акси сифатида тарк этди. Унинг онаси, кампирнинг девонаваш телба-тескари гап-сўзлари оғиздан-оғизга ўтиб, бегона қабила намояндасига нисбатан нафрат уйғотди уларда — ана шу сабабдан ҳам унинг маҳорати эндиликда ҳайрату тасанно эмас, ҳасад ҳиссини қўзғата бошлади. Бу одамларнинг дўстона меҳрини қозониши учун шаккок америкалик аслида фаришта бўлмоғи лозим эди, зеро ер куррасининг ушбу олис бурчида мутаассиблик Етти Тепа шаҳрида¹ инквизиция авж паллага минган энг мудҳиш кунлардаги сингари қутуриб, жазавага тушган пайтлар эди.

Чамаси мусобақалар ортда қолиб, сайилу байрам охирлаб қолгани Қарлос учун яхши бўлди-ёв.

Яна бир неча дақиқадан сўнг ҳамма ҳаракатга тушиб қолди. Хачир, ҳўкизу эшакларни араваларга қўша бошладилар; чорвадорлар хотинларию қизлари билан каттакон яшикка ўхшайдиган араваларига чиқиб олдилар; аравакашларнинг бақириб-чақиришлари, қамчиларнинг чувиллаб-қарсиллаши, мойланмаган арава ўқларининг ёқимсиз ғичирлашу ғийқиллаши — жамикиси қўшилиб, мазкур ўлкада туғулмаган ҳар қандай одамни ҳайратга солгувчи ваҳшиёна, дўзахий концертга ўхшаб кетарди.

Орадан ярим соат ҳам ўтмай кенг ўтлоқ ҳувиллаб бўшаб қолди, ёлғизгина ҳамиша оч, қирчанғи койот — бўригина хўрак излаб дайдиб юрарди у ерда.

IX БОБ

Гарчи очик ҳаводаги мусобақалар тугаган бўлса-да, авлиё Иоан байрам давом этарди. Ҳали уй-уйларига тарқашдан олдин томоша қилишга арзигулик озмунча ўйин-томошалар бормиди. Яна черковга навбат келди: тагин гуноҳдан фориг этгувчи индульгенциялар, тасбеҳу муқаддас нарсалар сотила бошланди, тагин муқаддас сув пуркашга ўтилди — қайтатдан қарта ўйини курсисига ўлтирмоқлик учун авлиё оталарнинг хазинаси тўлмоғи даркор эди-да, ахир. Кейин, оқшом чоғи авлиё Иоанн шарафига намойиш издиҳоми ўтказилди (бугунги байрам ўшанинг шарофати ила ўтказилаётган эди-да

¹ Етти Тепа шаҳри — ривоятларга қараганда етти тепалик устида бунёд этилган Рим шаҳри.

асли). Унинг замбилга маҳкам ўрнатилган ҳайкалини олтмиш-етмиш чоғли азамат токи юклари оғирлигидан тишка-мадорлари қуригунича бутун шаҳарни айлантириб юравердилар; уларнинг аъзойи баданларидан шаррос тер қуйиларди.

Авлиёнинг ўзи бўлса чинакамига ғаройибу антиқа эди. Мум билан ганчдан ясалган, аллазамонларда туси сариқ бўлиб, ҳозирда ранги ўчиб кетган, ҳаммаёғи патлару ялтироқ иплар билан безатилган шоҳи ридога бурканган эди. Бу католиклар ясаган, аммо ҳиндулар усулига мослаб қиёфа берилган тимсол эди, зотан мексикаликлар динида рим-католик мазҳабига онд жиҳатлар қанча бўлса, ҳиндуларга хос томони ҳам ўшанча эди. Авлиё, афтидан, заҳмат чекавериб чарчаган кўринади: боши билан бўйинини бириктириб турадиган нимасидир бузилганга ўхшайди, бош кўкрагига оғиб қийшайиб қолибди, ҳайкални кўтариб бораётганларида авлиё худди оломонга бош силкиб қўяётганга ўхшарди. Бошқа ҳар қандай жойда унинг бунақанги беўхшов бош силкитганини кўриб мириқиб кулган бўлишарди, бироқ бу ер, дин аҳли ҳукмронлик қиладиган ўлка эса мутлақо бўлак олам эди. Черков хизматчилари ҳар қандай нарсага ўзларича маъно бериб, барини ўзларича таснифлаш фурсатини бой бермайдилар: тавфиқлию художўй қавмларига улар, авлиё бош силкиб таъзим қиларкан, издиҳом қатнашчиларига ўзининг алоҳида муруввату илтифотини изҳор этиб, тангрига манзур бўлгувчи ушбу ишларини маъқуллаётганини билдирыпти, деб тушунтирар эдилар. Боз устига десангиз, бу чинакам мўъжиза-ку, ахир. Миссия намояндалари — иезуит оталар ҳам, маҳаллий черков руҳонийси ҳам шундай деб таъкидлаб-тасдиқлашар эди — улар билан ким баҳслашиб, тортиша оларди? Уларга эътироз билдириш хавfli. Сан-Ильдефонсода черковга иноммасликка журъат эта оладиган кимсанинг ўзи йўқ. Ушбу мўъжиза черковнинг фойдасига иш бера бошлади, у художўйларнинг ғайратларига ғайрат, иштиёқларига иштиёқ қўшиб юборди. Ана шу боисдан ҳам авлиё Иоанни жомеъдаги меҳробсимон жойига келтириб, олдига қутича қўйиб қўйганларида қутичага ўша кунни кечқуруноқ қартага бой берилган озмунча песет, реал, квартильолар ёғилмади.

Таъзим қилувчи авлиёлару кўз қисувчи Биби Марямлар муқаддас черков учун мутлақо янги кашфиёт эмас.

Мексикалик дин аҳилларининг ҳам ўз кароматчи авлиёлари бор, ҳаттоки Янги Мексика, ушбу унчалик маълуму машҳур бўлмаган ўлкада ҳам шу тоифадаги алдамчилардан заррача қолишмайдиган муъжизаю кароматлар кўрсатувчи устаси фаранг зотлардан бир талайи топилади.

Энди мушакбозлик бошланди, мушакбозлик бўлган-даям қандайдир бир нақирга қиммат, жўнгина найранг-бозлик эмас — йўқ, негаки, янги мексикаликлар бунакаини ишларда унча-мунча нарсанинг фарқига борардилар-да, ахир. Мушакбозликка муҳаббат — айниб бораётган миллатнинг ўзига хос, илло унинг таназзулининг аниқ-тиниқ аломатидир.

У ёхуд бу халқнинг мушакбозлик, ракеталар учирини турли эрмакларга қанча порох исроф этганининг аниқ рақам — миқдорини қўлимга тутқазсангиз, мен шунда сизга ўша халқнинг жисмоний ҳамда маънавий тараққиётнинг қайси поғонасида турганини айтиб бераман. Мазкур рақам қанчалик ортиб бораётган бўлса, ўша халқ руҳан ва жисмонан ўшанчалик пастлаб кетган бўлади, зеро бу ерда ўзаро нисбаг акс мутаносибдир.

Бир куни мен Парижда, Иноқлик майдонида турардим, шунда одамларни лақиллатиш, уларда дориламонлик ҳамда шоду хуррамлик хаёлотини туғдирмоқлик учунгина уюштириладиган жўн, енгил-елпи томошалардан бирини берилиб, маҳлиё бўлиб томоша қилаётган бойлар ва камбағаллар оломонига кўзим тушиб қолди. Йитган озодликлари эвазига ана шу бемаънию таги пуч эрмак билан ҳақ тўлаётган эдилар уларга — одатда болакай ана шундай алданиб қўлидаги қимматбаҳо тошини бир ҳовуч ширинликка алмаштириб қўйганини билмай қолади. Улар шунчалик ҳузур қилиб, оз бўлмаса ҳайрат-ла тикилиб туришардики, асти қўяверасиз, мен эсам уларга боқиб туриб: қанчалик аянчли, бачкилашиб, ажодларидан бўйлари бирор футдан ҳам ориқроқ пайсаиб кетган-а булар, деб ўйлардим. Тикилиб қараб, хийла чақноқ, аммо маъною ўй-фикрдан маҳрум кўзларни кўрардим.

Булар бир замонлардаги улуғ миллатнинг намояндлари эдилар ва ҳали-ҳануз ўзларини ер юзида энг олди халқ деб биладилар. Асло ундай эмас, бу ўз-ўзини алдашдир. Улар мушакбозликни шунчалар берилиб, шунчалар ҳайрату сурур-ла томоша қилардиларким, эн-

ди ушбу халқнинг гуллаб-яшнаган, равнақ топган ва улуғворлик замонлари ўтиб кетгани, ҳозирда эса шашту шитоб-ла нишоб текисликдан қўйилаб бораётгани — та-наззулга юз тутиб, айниб бораётганига шубҳа-гумоним қолмади...

Мушакбозликдан сўнг фандангога рақс туша бошладилар Бу ерда ҳам яна ўша одамларни, ўша чехраларни, деярли ўша ясан-тусан либосларни кўриш мумкин эди. Ёлғиз сеньорлару сеньориталаргина кийимларини алмаштиришган эди, холос, яна-тагин баъзи бир қишлоқ соҳибжамоли дағал жун юбкаси ўрнига — бурмали гулдор хомсурп юбкасини кийиб олганди.

Капитул¹ Уйининг майдонга қараган кенг-қовул залида рақс тушишяпти. Бугунги байрам кунда бу ернинг эшиклари барча учун очиқ эди. Мексиканинг чегара шаҳарларида — синфий тафовут, маъмурларнинг истибдоду зуғумкорлигига қарамай — сайилу томошаларга тааллуқли барча нарсада жамиятнинг олий ҳамда қўйи қатламлари вакилларининг қоришиб-аралашиб кетишидек ўзига хос бир демократик тенглик сақланиб қолади; бундай ҳолни бўлак мамлакатларда ҳеч қачон учратолмайсиз. Бу ерга қадамранжида қилган инглизлар ва ҳаттоки америкаликларни ушбу нарса доимо ҳайратга солиб келган.

Рақслар залига хоҳлаган одамни киритадилар, ишқилиб кириш ҳақини тўласа бас. Майину нозик мовутдан антиқа либос кийган бадавлат кимса билан кифтма-кифт рақс тушаётган кўн камзул ва тиззага тушадиган бархит чалворли чорвадорни кўриш мумкин; давлатманд тижоратчининг қизи эса ўз қўли ила хамир қориб, рўмол тўқийдиган деҳқон қизи билан ёнма-ён ўйин тушади.

Комендант, Робладо ва лейтенантлар балга башанг ясаниб келдилар. Асо тутган алькальд ҳам шу ерда, соябони кенг шляпали руҳоний ҳам, ҳалпираб турган жуббали иезуит оталар ҳам, маҳаллий зодагонларнинг жамикиси ҳам шунда эди.

Бадавлат коммерсант дон Хосе Ринкон ҳам жуссадор рафиқаси ва доим уйқусираб, ланжу карахт бўлиб юрадиган тўрттала бақалоқ қизлари билан шу ерда; ра-

¹ Капитул — епископлик кафедраси қошидаги дин арбоблари коллегияси; шунингдек — черков музофоти қавм руҳонийларининг съезди.

фиқасию бутун хонадони билан алькальд ҳам; парижда модада — фрак ва цилиндрда — кийинган сатанг акалари билан бирга Эчеварианинг қизлари ҳам (бутун бал бўлича ёлғиз угина шундай кийинганди) шу ерда. Бадавлат мулкдор сеньор Хомес дель Монте қилтириқ хотинию бир неча тараша қизлари билан—улар яйловларида ўтлаб юрган сигирларидан айнан шу томонлари ила ажралиб турардилар — залда ҳозир эдилар. Соҳибжамол Каталина де Крусес, давлатманд кон эгаси дон Амбросионинг қизи ҳам даврани яшнатиб юрибди; отаси унинг ёнидан жилмай, уни бирон сония кўздан қочирмай кўриқляпти.

Мазкур олий насаб зотлардан ташқари бу ерда хийла пастроқ табақадаги одамлар ҳам: дон Амбросионинг конидаги хизматчилар, савдо-тижорат маҳкамаларининг идора ходимлари, водийдаги ёш чорвадорлар, кон қазувчилар, чўпонлар, бизон овчилари ва ҳаттоки арзонгаров серапели шаҳар камбағалларигача шу ерда эдилар. Ким йўқ эди денг-а бу балда!

Оркестр бандола¹, арфа ва скрипкадан иборат эди; палъс, болеро, коонуга рақс тушишарди. Парижда ҳам бундан яхшироқ рақс туша олмайдилар деса бўларди бемалол.

Қалта кўн камзул билан тиззагача тушадиган чолвор кийган пеонларни айтмайсизми, худди шу соҳанинг профессорларидек нафису чиройли рақс тушяптилар; калта юбкаю гулдор туфлили қишлоқ сулувлари эса зал бўйлаб бамисоли балет тушувчи раққосалардай чарх уриб, парвоз этишяпти.

Робладо одатича Каталинанинг ёнидан жилмас, деярли барча рақсга у билан тушаётган эди, бироқ қиз унинг елкасидаги зарҳал шокила-попукларга қиё ҳам боқмаётганди — қизнинг кўзлари гўёки бутун зал бўйлаб кимнидир излаётгандек жавдирарди. Унинг хаёли наришонлиги очик кўриниб турарди: Робладонинг гапларига деярли қулоқ солмаётган ва у билан бирга бўлиш яққол малол келаётган эди.

Вискарра ҳам кўзлари ила кимнидир излаб, уни тона олмаётганди; у одамларнинг бетига, жамики бурчакларга беҳуда тикилганича нари бориб, бери келар, вални тинмай айланарди.

Башарти у сулув малласоч қизни ахтараётган бўлса,

¹ Бандола — удга ўхшаш мусиқа асбоби.

унда омади келмаганди: қиз йўқ эди бу ерда. Росита мушакбозликдан кейин онаси билан уйга жўнаганди. Улар олисда, водийда туришар ва Карлос билан ёш чорвадор дон Хуан кузатувида йўлга тушишган эди. Аммо лекин иккала йигит рақс бўлаётган жойга қайтиш ниятида эдилар. Йўл кўп вақтларини олиб қўйиб, залга анча кечикиб етиб келдилар. Шул боисдан ҳам Каталанининг кўзлари атрофга олазарак боқаётган эди. Аммо уни Вискарра каби афсус-надомат кутмаётганди.

Залга икки навқирон йигит кириб келиб, оломонга қўшилиб кетган паллада фанданго рақси тугамаганди ҳали. Булар дон Хуан билан Карлос эди. Овчини бошидаги қора сомбреросида ҳилпираётган қордай оппоқ қарқара патларидан ясалган жиғасидан таниб олиш қийин эмасди.

Каталанининг нигоҳи энди безовталиқ-ла чеҳралар бўйлаб изғишни бас қилганди. Эндиликда бу кўзлар такрор ва такрор бир томонга тикилар, илло тўппа-тўғри ҳамда узоқ эмас, ўғринча қараб оларди — негаки, уни дарғазаб отаси билан рашкчи хуштори кузатишаётган эди-да, ахир.

Карлос юраги ўртаниб, алангаланиб турган бўлса-да, ўзини бепарво кўрсатаётган эди. Каталина билан рақс тушиш учун жонини фидо қилишга ҳам тайёр эди-я! Лекин у аҳвол-шароитни ниҳоятда яхши тушунарди. У Каталанини рақсга таклиф этди дегунича жанжал чиқишини биларди. Шул сабабдан ҳам бунга ботинволмади.

Ҳар замон-ҳар замонда бир туйқисдан назарида Каталина унга эътибор бермаётгандай, Робладонинг, сатанг Эчевариа ва бошқаларнинг сўзларини қизиқиш-латинглаётгандай туюлиб кетарди. Ҳа, Каталина ўз родини қойиллатиб ижро этаётган эди. Ушбу ижро Карлосга эмас, бошқаларга аталганди-ю, аммо у бундан беҳабар бўлиб, ўзини иззат-нафсига тегилган, ранжитилгандек ҳис қиларди.

Вужудини безовталигу хавотир чулғади, бироқ рақсга тушиб кетди бари бир. Рақс тушгани гўзал деҳқон қиз Инес Гонсалесни танлади, қизнинг эса у билан рақс тушишдан боши кўкка етди. Каталина бунга кўриб турган эди, ўз нағбатида у ҳам рашк наштари захрини тотгандай бўлди.

Бу ўйин бирмунча муддатгача давом этди. Ниҳоят

Карлосни зериктирди рақс тушаётган шериги, шундан сўнг ёлғиз ўзи ўриндиққа ўлтириб олди. Унинг кўзлари Каталанининг ҳар битта ҳаракатини кузатарди. Шунда маҳбубасининг унинг боқишларига жавобан туҳфа этаётган нигоҳида севги, икковларининг дил розлари бўлгани муҳаббат ифодасини ўқирди — ҳа, улар аллақачон қасам ришталари билан боғлаб бўлгандилар ўзларини. Шундоқ экан, нимага ҳам бир-бировларидан шубҳа гумон қилишлари керак, ахир?

Улар яна бир-бировларига ишонч ҳосил қилдилар, рақсдан тўлқинланиб кетганди улар, дон Амбросио эса тузуккина ичиб олган ва эндиликда қизини унчалик қисти-бастига олиб кузатмай қўйганди, оқибатда уларнинг нафақат юраклари, шунингдек нигоҳларида ҳам ишонч, дадиллик қарор топган — бир-бировларига бот-бот, дадилроқ термила бошлаган эдилар.

Хона бўйлаб жуфтлар давра ясаб айланар, вальс сардолари остида Карлоснинг ёнидан қуюн мисоли чарх уриб ўтиб кетишар эди. Каталина вальсга олифта Эчевариа билан тушаётганди. Қиз ҳар гал Карлоснинг ёнига айланиб келганида кўзлар учрашарди. Яна ва яна севгилиси ёнига қайтаётган испан қиз бирровгина боққан нигоҳида нималарни айтиб, нималарни туҳфа этмасди денг! Каталанининг кўзларидан Карлос ажойиб бир ҳикоятни ўқирди. Каталина давра ясаб, учинчи бора ёнидан ўтаётганида Карлос шеригининг кифтига ташланган қўлчасида қиз ниманидир тутганини пайқайди. Бу ямшиш баргчалар билан қопланган новда эди. Карлос билан тенглашган пайтида Каталина эпчиллик ила уни йигитнинг тиззасига ташлаб ўтди-ю, ошиқнинг қулоғи арағ эшитиладиган: «Туя!» деган шивирни илғади.

Карлос новдани, тўқ-яшил туя шохчасини дарҳол қўлига олди. Бунинг маъносини у тушунмай, яна ким ҳам тушунсин денг! У шохчани лабларига босди, кейин эса гул чекилган камзулига қадаб қўйди.

Каталина тагин ёнига етиб келганида икковлон ишқу ишончга тўлиқ нигоҳ-ла кўз уриштириб олишди.

* * *

Имиллаб тун ўтиб борарди, дон Амбросиони мудроқ босиб, боши қуйига тушиб-тушиб кета бошлади ва ахийри қизини олиб уйга жўнади; капитан Робладо уларни кузатиб борди.

Шундан кейин кўп ўтмай бу ердаги аслзодароғу бадавлатроқларнинг жамикиси тарқади; баъзи бирлар, Терпсихоранинг чарчоқ нималигини билмайдиган мухлис муҳибларигина токи қирмизи ёноқ Аврора — олам чароғи Капитул Уйининг панжарадор деразаларидан мўралагунига қадар рақс тушавердилар.

Х БО Б

Льяно Эстакадо ёхуд «Марказий Текислик» — овчилар салтанати, Муаззам Америка Текислигининг ўзига хос бурчакларидан бири. Бу узундан-узун, шакли-шамойили қўй почасига ўхшаб кетадиган дашти ясситоғлик бўлиб, атроф-теваракдаги ерлардан деярли минг фут юксалиб туради. У шимолдан жанубга томон тўрт юз миль чўзилиб боради, эни эса энг кенг жойида аранг уч юз милга етади. Бу майдон қарийб бутун Ирландияга тенг келади. У прерия — Америка даштларининг бошқа жойларига ўхшамайди, кейин, унинг ўзи ҳам бир хилда эмас. Шимолда қақроқ чўл эллик миллаб масофага чўзилиб кетган; ора-сира бирон туп дарахтни учратолмайсиз, баъзи ерларда эса пастак-пастак, мажмағил акаслар ўсади — бу жойларда унинг икки тури учрайди. Даштни унда-бунда ваҳимали, чуқурлиги минг фут келадиган ўтиб бўлмас жар-даралар тилишлаб ўтади. Уларнинг тик ҳамда текис ёнбағридан мутлақо чиқиб бўлмайди, тубларида аҳён-аҳёнда саёзгина кўлчалар учраб қолади, қоялар ораси ва тикёнбағирларига эса рамақижон заранглар жон-жаҳдлари ила тармашиб-ёпишиб олган.

Бу чуқурдан-чуқур дара, маълум жойлардагина бу жарликларга тушиб бориш ёки улардан ўтиш мумкин, бунақанги ўтиш жойлари тез-тез учрамайди — уларни бир-бировидан ўнлаб миль масофа ажратиб туради.

Ясситоғликда гоҳо кафтдек текис, саҳродек бўм-бўш жойлар юз миллаб чўзилиб кетади, бу жойларда ер шунақанги зарангки, гўё атайлаб шиббаланганми дейсиз: баъзи ерда эса ям-яшил майса-гиёҳ гилами тўшалган, акаслар гуркураган яйловлар ястанган; унда-бунда сайёҳ сув билан тўлган, гоҳ шапалоқдеккина, гоҳ хиёл каттароқ чўкма-чуқурларни кўради; қуримайдиган ҳақикий кўлчалар ҳам бор — уларнинг соҳиллари қиёқ ўтлар билан қопланган. Бу кўлчаларнинг деярли барининг суви у ёхуд бу даражада тузларга тўйинган; бир

хилларининг таркибида олтингугурт бор, бошқалари мутлақо шўр. Селу жалалардан кейин кўлу кўлчалар кўпайиб кетади, бу пайтларда уларнинг суви деярли чўчүк бўлади; аммо кимсасиз дашти ўлкаларда ёмғир ким ёгади, шу бонсдан узоқ қурғоқчилик палласида қарийб жами кўлчалар қуриб битади.

Льяно Эстакадонинг жанубий қисмида текис майдонларни деярли кўрмайсиз; шимолдан жанубга қараб кенгбар — эни салкам йигирма миль-қумлоқ адирлар минтақаси чўзилиб кетган; бу оқ қум тепа-уюмлари; улар дам юз футлар баландлигида турна қатор тизилиб кетади, дам алоҳида-алоҳида конуссимон юк-салиб туради; на дов-дарахт, на бута, на майса-гиёҳдан исар кўринади бирон ерда уларнинг мулойимтоб шакли-тарҳини ҳеч нима бузмайди, бир зайлдаги оппоқликларига биронта ёрқин доғ файзу руҳ бахш этмайди. Кейин, энг лол қолдирадиган жойи, геолог учун чинакам жумбоқ томони — ушбу тепа-адирлар орасида, ҳаттоки энг баландлари тепасида ҳам сув ҳавзалари, кўлчалар учрайди, уларда эса онда-сонда, ёмғирдан кейингина эмас, кўпинча сув бўлади. Ҳа, булар ҳақиқий лагуна — денгизнинг маржон ороллари билан ажралган саёз кўлчалари. Бу ерларда қамиш, оқ нилфия, қиёқ ўсади, демак, мазкур кўлчалар қурмайди, суви тугаб битмайди. Мундоқ қараганда эса, сув сақланиб қолишига бундан кўра яроқсизроқ жойни ўзи бормикан, деган хаёлга бориш ҳеч гап эмасдек кўринади.

Бунақанги қумтепалар Мексика қўлтиғи соҳилларида ҳам, Европа соҳил бўйларида ҳам учраб туради, уёқларда бу ҳолни тушунса бўлади; бироқ уларнинг бу ерларда, қитъанинг қоқ киндигида мавжудлигини табиат берган жумбоқдан ўзга нарса деб атаёлмайсан.

Ана шу қумлоқ минтақани бир ёки икки жойдангина кесиб ўтса бўлади, лекин от ҳар қадамда тиззаларига гача ботиб кетади, кейин, мабодо бу ерда сув бўлмаганида у шундай сафару саёҳатга бел боғлаш хавфли ёди.

Хўш, Льяно Эстакадонинг ўзи қаерда асти? Қани, Шимолий Америка харитасини ёйинг-чи. Сиз шунда Кэпедиен деб аталгувчи йирик дарёни кўрасиз; у Қояли тоғлардан бошланади, аввалига жанубга қараб, сўнгра шарққа томон, токи Арканзасга қўйилгунига қадар оқиб бораверади. Дарё шарққа қараб бурилар экан, ана ўша

ясситоғликнинг шимол ёқдаги чеккасини айланиб ўтади, у ер-бу ерда унинг тик девор янглиғ этагини ювиб, ялаб-юлқаб, гоҳи ерда эса ундан хийла олислаб кетади, ана шунда дарё қирғоғидан туриб, мазкур деворни тоғ тизмалари деб ўйлаш мумкин — саёҳатчилар кўпинча шундай хатога йўл қўядилар.

Льяно Эстакадонинг ғарбий чегараси хийла аниқроқ. Кэнедиен манбаларидан яна битта катта дарё сув олади — бу Пекос. Башарти харитага ишониладиган бўлинса, у ҳам жанубга қараб оқади, аммо жудаям тўғри эмас: Пекос бир неча юз миль давомида сезиларли даражада шарққа томон оғиброқ боради ва ана шундан кейингина жанубга қараб оқиб, Рио Грандега қўйилади. Пекос йўлига тўғаноқ бўлиб турган ясситоғликнинг ғарбий этагини буткул ялаб-сийпаб ўтади ва Қояли тоғлардан бошланадиган жамики дашт дарёлари каби шарққа қараб оқиш ўрнига жануб ёққа бурилиб кетади.

Ясситоғликнинг шарқий чегараси унчалик аниқ-тиниқ эмас-у, лекин, башарти ушбу чегара Пекосдан қандайдир уч юз милча наридан, Уошито, Ред-Ривер, Брасос ва Колорадоларнинг манбаларини кесиб ўтишини биллб олинса, унинг шакли-тарҳи хусусида унча-мунча тасаввур ҳосил этиш мумкин. Бу дарёларнинг ҳаммаси ва уларнинг кўп сонли ирмоқларининг бари Льяно Эстакадонинг шарқий ёнбағирларидан бошланади-ю, уларнинг шарқираб, шитоб-ла оқадиган сувлари ясситоғликни улкан-улкан афсонавий шакли-шамойилдаги кенг-кенг майдонларга нимталаб ўтади.

Жануб ёқда ясситоғлик тораийб, аста-секин пасая бориб, Рио Гранде этакларига қўйиладиган беҳисоб дарёю анҳорлар тўр ташлаган водийларга туташиб кетади.

Бу ўзига хос ўлкада ҳеч бир тирик жон зоти яшмайди. Ҳатто ҳинду ҳам узоқ ушланиб қолмайди бунда: у бир неча соатгагина йўл босиб келгани сабабли нафасини ростлаб олиш учунгина тўхтайтиди, холос, очлик ва ташналикка ўрганиб кетган ҳинду ҳам баъзи ерларда уни кесиб ўтишга журъат этолмайди. Льяно Эстакадони кесиб ўтиш жуда хатарли, бутун бошли ясситоғликни — тўрт юз миль чўзилиб кетган — сайёҳлар фақат икки жойидангина ҳаётларини таҳликага қўймай кесиб ўтишлари мумкин. Хавф-хатар сув танқислиги пардаси остида писиб ётади. Бу ерда ўту гиёҳ

мўд, илло йилнинг гоҳи палласида ҳатто яхши маълум йўлда ҳам олтмиш — саксон миль давомида бирон томчи сув топилмайди.

Қадим замонларда Санта-Фени Техасдаги Сан-Ато-нио-де-Бехар билан боғловчи ана шу икки ўтиш йўлидан бир «Испан сўқмоғи» деб аталган; сайёҳлар йўлдан адашиб кетмасликлари учун у ер-бу ерда устун, белгилар ўрнатилган. Бу жойларнинг номи ана шундан келиб чиққан.

Льяно Эстакадодан ҳозирда ҳам кам одам кесиб ўтади; уёқларда ёлғиз мексикалик бизон овчиларию ҳинду савдогарлари — коменчеросларнигина йўлиқтириш мумкин. Янги Мексикага кўчиб келганлар чоққина-чоққина тўда бўлиб йўлга чиқадилар ва бизон овлайдилар ёхуд ясситоғликнинг машриқ ёғидаги кўчманчи ҳинду қабилалари билан савдо қиладилар. Аслида бу ерда ов ҳам, савдо ҳам унчалик фойда келтирадиган нис эмасди-ю, лекин тасодиф ёхуд майлу қизиқсиниш ризқ-рўзини шунчалик хатарли ва гайриодатий усул билан топишга мажбур этгувчи ўзгача тонфадаги одамларга шуниси ҳам кифоя эди.

Мексиканинг мазкур чекка ўлкалари аҳли чегара минтақасидаги ўрмонларда жойлашган инглиз-америка кенту қишлоқлари истиқоматчилари ва овчиларига жуда-жуда ўхшаб кетади. Бироқ мексикаликларнинг қурол-яроғи, усти-боши мутлақо бўлакча, ов усуллари ҳам ўзгача.

Бизон овчисининг аслаҳа-анжомлари, ўрмон дарбадариники сингари, ниҳоятда содда-оддий. У унчалик чакки бўлмаган, гоҳо эса ажойиб отда ов қилади; ўқ-ёй, овчи пичоғи ва узун найза билан қуролланади. Ўт-очар қуролни у, одатдагидек, тан олмайди; бундан истисно кезлар ҳам бўлади-ю, лекин камдан-кам учрайди бундай ҳол. Анжомларининг асоси — лассо. Савдога келганда мол-буюм заҳираси унчалик кўп эмас, одатда ҳажми йигирма долларлик, ундан ортиқмас. Бир неча қоп йирик қилиб тортилган ундан пиширилган нон (прерия — даштда яшайдиган ҳиндулар жуда ёқтирадилар уни), чипта қопда маис-жўхори, ҳиндулар тақадиган унча-мунча безак-тақинчоқлар, бесўнақай, дағал серепелар, уйда тўқилган ёрқин рангли хонаки жун матодан бир неча лахтак — бор моли шундангина иборат, вассалом. Металл буюмлар билан деярли савдо

қилмайди у. Нега деганда унинг ўзи ҳаддан зиёд қимматга сотиб олади буларни, зеро бу буюмларни олисдан келтирадилар ва сира тап тортмай ҳаддан зиёд бож ҳақи қўшадилар. Уточар қуроолларни мутлақо сотмайди у — бепоён даштнинг бу томонларидаги ҳиндуларга қуроолни шарқдан келтирадилар; аммо испан қуроолларини — енгил пилтамилтиқ билан штуцер¹лар — команчерослар жанубий Мексика шаҳарларига қилган ўсқинларни пайтида қўлга киритадилар.

Қимматга тушадиган ва хатарли сафаридан овчи қуритилган бизон эти билан тери олиб қайтади; булардан бирини ўзи овда қўлга киритади, бошқасини ҳиндулардан ўз буюмларига алмаштириб олади.

Буюмлар эвазига от ҳам, хачир ҳам, эшак ҳам берадилар. Ҳиндулар беҳисоб пода-уюрларга, юз бошлаб молларга эга, бу жониворларнинг деярли жамида мексикаликлар тамғаси бор. Ўзгача қилиб айтганда, ҳиндулар уларни Рио Гранденинг қуйи оқими ёқаларида жойлашган кенту қишлоқлардан ўгрилайдилар, сунгра эса Рио Гранде бошланадиган ерларга элтиб сотадилар, яна-тагин мазкур савдо ишлари томонан қонуний ҳисобланади — ақалли ҳозирги кунларда аҳвол-шароит шундоқки, бунга қарши ҳеч нима қилиб бўлмайди.

Бизон овчилари даштга камдан-кам кўпчилик бўлиб тўдалашиб борадилар. Гоҳида улар кўпайишиб кетадилар, улар бола-чақаларини бирга олиб, худди ҳинду қабиласидай, жойдан-жойга кўчиб юрадилар. Аммо лекин аксар ҳолда бир-икки нафар овчи отлари, хачирлари ва хизматкорлари билан йўлга чиқади — бутун карвон шундангина иборат бўлади, холос. Дашти биёбоннинг ваҳший истиқоматчилари уларни одатдаги сайёҳларга қараганда камроқ безовта қиладилар. Команчерослар ва бўлак қабилалар уларнинг дашт сари нима мақсадда йўлга чиққанларини биладилар ва уларни хурсанд қарши оладилар. Қандоқ бўлмасин икки касбкорли, яримовчи-яримсавдогар бу одамлар ҳиндуларни кўпинча лақиллатиб кетадилар, уларга ёмон муомала қиладилар. Улар юк ортилган хачирларда ва хачир ёки ҳўкиз қўшилган араваларда юрадилар. Бундай арава-улов энг ибтидоий ҳаракатланиш воситасидир. У икки гилдиракли: гилдираклар теракдан чопилиб, мусти-

¹ Штуцер — милининг ичи резбали милтиқ.

мустаҳкам ёғоч ўққа ўрнатилган. Ушбу гилдираклар олдидан унчалик ҳам думалоқ эмас, кўпроқ чўзиқроқ ёки ҳатто, деярли чорқирра бўлади. Узундан-узон шоти ярава ўқидан олдинга қараб чўзилиб кетган, устига эса чорси яшикка ўхшаган чуқур мослама ўрнатилган. Бир неча жуфт ҳўкиз мазкур мослама-қурилмага жўнгина усулда қўшилган: олдинда шотига маҳкамланган кўндаланг таёқни ҳўкиз шохига боғланади. Ҳўкизларда на бўйи тўриғу на эгар-жабдуқ бор; ҳўкизлар бошларию шохлари билан кўндаланг таёқни итариб, қатор аравалар сафини олдинга жилдирадидлар. Ҳаракатга келгач ёғоч ўқ шунақанги ғийқиллаб, ғижирлай бошлайдики, буни ҳеч бир сўз билан таърифу тавсифлаб бўлмайди. Ҳар хил ёшдаги болалар билан тўла ва ҳаммалари бараварига бақириб-чақириб уйни бошга кўтараётган хонадондагина ана шундай ёқимсиз дўзахи шовқинни эшитиш мумкин, холос; ёхуд буни тасаввур этмоқлик учун чиққироқ маймунлар галаси ана шундай мусиқа билан қулоқларимизни батанг қиладиган Жанубий Мексикага йўл олмоғимиз даркор.

Х И Б О Б

Авлиё Иоани байрамидан тахминан бир хафталардан кейин чоғроққина бизон овчилари тўдаси Урмон кечуви яқинидан Пекосни кечиб ўтди. Тўда ҳаммаси бўлиб беш кишидан иборат эди: оқ тапчи, метис¹ ва уч нафар чинакам ҳинду, улар ўзлари билан эса бир нечта юк ортилган хачир, учта ҳўкизарава олгандилар. Ҳиндуларнинг юриш-туриши, букикроқ қаддилари, кифтларига ташлаб олган қамчилари ва оёқларидаги чориқлари — бари буларнинг тинч-осойишта ҳиндулар эканини айтиб турарди. Булар Карлос,— мазкур тўда орасидаги ягона оқ тапчи ва тўда раҳнамоси ёллаган пеонлар эди.

Метиснинг исми Антонио бўлиб, хачир ҳайдовчи, ҳиндулар эса ҳўкиз ҳайдовчилар эди; улардан ҳар қайсиси узун қамчи билан ҳўкизларни йўлга солиб ўз аравасини бошқариб борарди.

Карлос ўзининг ажойиб қорабайирида, қалин серапега бурканиб, олдинда йўл бошлаб борарди. Кишилик

¹ Метис — қурама.

ридосини уйда қолдирган эди: бундай олис ва оғир сафарга кийишга кўзи қиймагани, айни чоқда бунақаанги антиқа ридо ҳиндуларнинг иштаҳасини қитиқлаб қўйиши мумкин, у чоғда ҳиндулар уйлаб-нетиб ўлтирмай, эгасининг каллахомини шилиб олишлари ҳеч гап эмасди. Карлос нафақат ридоси, шунингдек нақшин гулли камзули, қизил шарфи билан барқут чолворини ҳам қолдириб, оддийгина кийиниб олганди.

Карлос мазкур сафардан кўп умидвор эди. Илгарилари сираям бунчалик мул-қул мол олиб бормагани даштга. Ҳар бирига тўрттадан ҳўкиз қўшилган учта аравагагина эмас, шу қатори бешта хачирга ҳам юк ортилган эди: араваларда — нон, жўхори, испан ловияси, чили қалампири; хачирларда — серапе, адёл-кўрпа, дағал жун матолар, баъзи бир хил ялтироқ тақинчоқлар, бир нечта уч тиғди ўткир испан пичоғи. Байрам мусобақаларида кўрсатган таваккалона матонатю эришган муваффақиятларигина Карлоснинг бунча кўп мол-буюм тўллашига ёрдам берганди. Бисотида бир тилласи бор эди, бунинг устига у икки тилла ютди, қўшимчасига эса чорвадор йигит дон Хуан Карлос сафарга яхшироқ, бақувватроқ ҳозирлик кўрсин учун қўярда-қўймай тагин беш танга қарз берганди.

Сафарчилар Пекосдан омон-эсон ўтиб, Льяно Эстакадонинг энг баланд нуқтасига қараб йўл олдилар — бу жой Урмон кечувидан олисда эмасди. Тепасига қараб аста-аста кўтарилиб борадиган дара уларни ясси тоғликка олиб чиқди. Кўз ўнгиларида теп-текис, бир маромдаги даштлик намоён бўлди: бирон ерда на биронта бута, на йўл босганда белги бўлгувчи бирон чиқиқ кўринади денг.

Аммо Карлосга йўл кўрсатувчи белги-аломатларнинг кераги ҳам йўқ эди. Оламда ҳеч бир кимса Льяно Эстакадони у билганчалик билмайди. У оти бошини жануби-шарққа бурди, карвон йўлга тушди яна. Карлос Луизиана, Ред-Ривернинг асосий тармоқларидан бири томонга қараб йўл солганди — кейинги йилларда у ерларда бизонлар сероб деб эшитганди. Карлос ўша томонларга бирипчи маротаба борапти; кўпинча у Техасда, Брасос ва Колорадонинг юқори ирмоқ-шаҳобчалари атрофларида ов овлаб, савдо қиларди. Илло бу дарёю ирмоқлар оқалиган ерларни ҳозир қудратли команчи қабиласи билан уларнинг иттифоқчилари — киа-

ва, липана, тонкебалар узил-кесил эгаллаб олган. Бу атрофларда ҳиндуларнинг бизонларни таъқиб этишларига ҳеч ким ҳалал бермас ва улар ўз ўлжаларини қушиб тиндирмасдилар. Жониворлар ҳуркаклашиб, одамни яқин йўлатмас, кейин, подалари ҳам сезиларли даражада сийраклашиб қолган эди.

Ред-Ривер ҳавзасида эса мутлақо бўлакча. Бу рақиблар тупроғи. У ерларда вақти-вақти билан вако, пана, осажлар ов қиладилар, ора-сира Льяно Эстакадодан шарқ томонларда кўчиб юрадиган кикапу, черок ва бошқа ҳинду қабилалари бўлуклари пайдо бўлиб қоладилар. Гоҳо иш қонли тўқнашувга ҳам бориб тақалади; узаро душман қабилалар бир-бировларидан олисроқда яшашга мажбурлар, ана шу боисдан гоҳ бир, гоҳ бошқа қабила ов мавсумини ўтказиб юборади-ю, бизонларни ҳеч ким безовта қилмайди. Маълумки, бетараф ерлар — адоват боиси бўлмиш ерларда бизонлару бўлак ов ҳайвонлари беҳад мўл, кейин, улар ўзга жойлардагичалик ҳуркак эмас.

Карлос бу гапларнинг барини билар, ана шунинг учун ҳам харитада кўрсатилганидек мутлақо Қояли тоғлардан эмас, Льяно Эстакадонинг шарқий ёнбағирларидан бошланадиган Ред-Ривернинг юқори оқими ҳавзасида ов қилиш тадоригини кўрган эди.

Карлос ҳам, метис Антонио ҳам бизон ови учун яхши қуроланганди, учала пеондан иккиси моҳир овчи эди. Ҳаммаларида ўқ-ёй, найза — ушбу қуроолар бундай ов учун ҳамиша қулай қурооллар. Шундоқ бўлса-да, арвалардан бирида ўточар қурол — америкача нусхадаги узун милли жигарранг милтиқ ҳам яшириб қўйилганди. Карлос уни тамоман бошқа ов учун асраб юрар ва уни моҳирона ишлата оларди. Бу қурол мексикалик бизон овчиси қўлига қандай тушиб қолди экан? Карлоснинг келиб чиқиши мексикалик эмаслигини эсланг-а. Бу қурол — оилавий ёдгорлик. У овчининг отасиники эди.

Биз Карлос ва унинг карвони изидан қадам-бақаддам эргашиб юрмаймиз, ҳувиллаган дашти-биёбон бўйлаб ўтадиган мазкур толиқтирарли саёҳатнинг ҳар бир одимини кузатиб ўлтирмаймиз. Илло шу нарсани айтиб ўтайликки, бир кун и овчилар кундузи сувсиз биёбондан етмиш миль масофани босиб ўтишларига тўғри келди. Аммо-лекин Карлос карвонни бир томчи ҳам сув топилмайдиган жойлардан биринчи марта бошлаб бора-

ётгани йўқ эди, у ана шундай шароитда қандай қилиб бирорта ҳўкиз ёки хачирни нобуд этмаслик ҳадисини оливолганди аллақачон.

У саёҳатни мана бундай ўтказарди. Энг охирги сув ҳавзасида ҳўкизларни қондириб суғорарди; кечга томон йўлга тушиб, тонг ёришгунга қадар юришарди; сўнг Карлос икки соат дам оларди, шунда жониворлар ўт-ўланлардаги шудринг томчилари кўтарилиб кетмасидан бурун мириқиб ўтлашарди. Кейин пешингача узоқ йўл босилиб, тагин нафас ростланарди — уч-тўрт соат, токи кечки салқин тушгунича; ана ундан сўнг карвон яна олға жидар ва ушбу кундузги сафар тун киргачгина ни-ҳоясига етарди. Чиуауа, оСнора ва Шимолий Мексика чулу саҳроларида ҳали-ҳозиргача ҳам шу тариқа сафар қиладилар одатда.

Қисқаси, Карлос бир неча кундан кейин ўз ҳамроҳлари билан баланд тоғликнинг шарқий ёнбағридан қуийлиб бориб, Ред-Ривернинг ирмоғи ёқасига тушиб келди. Бу ерда борлиқ манзара буткул бошқача эди — теварак-атрофда тўлқинсимон бепоён дашт ястанган. Борлиқ манзара — мулойим, силлиқ-равон; тепаси дум-думалоқ, ёнбағирлари қиялама тепалар ям-яшил водийлар-ла алмашинади, водийларда эса чашмалардан оқиб чиқаётган зилол сувлар офтоб нурида ярқираб кўзини қамаштиради. Ирмоқлар ёқалаб гоҳ у, гоҳ бу ерда тўптўп дарахтзорлар — абадий яшил эману булутлар тарвақайлаб қулоч керган, мағзи шириндан-ширин узунчоқ ёнғоқли хушқад пекану кумушранг тераклар кўкка бўй чўзган. У ер-бу ердаги тепачаларда азамат дарахтлар юксалиб турибди — улар бир-бирларидан нарироқда ўсган, наздингизда, инсон қўли билан экилганга ўхшайди. Қалин шох-бутоқлари тарвақайлаб улкан шамсия ҳосил қилган, елпиғичсимон оч тусли барглари ва шаббаларда осилиб турган қўнғиртоб узун кўзоқларини кўргандаёқ булар машҳур америка акаслари эканини биласиз-бласиз. Чашма ёнбошидаги сойликда бир туп қизил тут кўзга ташланыпти, ҳар жой-ҳар жойда хитойи дарахтлар оч бинафшаранг бўлиб чамандек гуллаб ётибди. Тепаю адирлар ҳам, водийлар ҳам кўм-кўк пастак бизонўт гилами ила қопланган, наздингизда гўёки яқингинада пичани ўриб олинган ўтлоқ янги, ширадор майса билан қопланаётганга ўхшайди. Ажойиб, сўлим жой-

лар! Бу ерлар бизонларнинг суюкли жойига айланганининг ҳеч бир ажабланарли ери йўқ.

Мазкур мунаввару жаннатмаъво улкага қадам босар экан, Қарлос тез орада бизонлар изига дуч келди: қасққа қарамасин, ҳамма ерда бизонлар топтаган сўқмоқлар, сувлоғу пўстлоғи ғажилган дарахтлар учрарди. Эртаси куни эрталаб у улкан поданинг қоқ ўртасига тушиб қолди: бизонлар оддий сигирлар сингари дала-ларда бемалол-хотиржам изғир ва бафуржа ўт чимдирди. Улар сираям ҳуркак эмасди, у яқинлашганида қочиб қолиш, яширинишни ҳатто хаёлларига ҳам келтирмасди.

Мана у кўзлаган ерига етиб келди. Бу унинг улкан, бой фермаси, унинг хусусий подаси эди — ҳа, шундоқ, бу ҳар қандай бўлак одам сингари унга ҳам тегишли пода — эндиликда Қарлос фақат бизонларни қулатиб, эту тери ғамлашга тушса бас.

Ҳиндулар билан савдо қилишга келганда эса, бу истиқболда турган юмуш эди. Қарлос ов мавсуми мобайнида неча марталаб учрашади улар билан ҳали.

Жамики даштда изғийдиганлар қатори — улар хоҳ траппер¹, хоҳ ҳинду бўлсинлар — Қарлос ҳам теграсини қуршаб турган табнат манзарасининг чиройини дарҳол ҳис этди, манзилгоҳ қургани сўлим бир гўшани танлади. Бу қалин майса-гиёҳ билан қопланган, пекан, тут, ёввойи хитойи дарахт соя ташлаб, тип-тивиқ, зилол сувли чашма жўш уриб турган пастлик эди.

Қарлос араваларни ана шу соя-салқин дарахтзорда тўхтатиб, чодир тикди.

ХИ БО Б

Қарлос овга киришди-ю, ови ниҳоятда бароридан келди. Дастлабки икки кун ичида йигирматадан кам бизонни қулатмади, барини манзилгоҳга ташиб олди. Қарлос билан Антонио жониворларнинг изига тушиб, уларни қулатишарди, икки пеон эса уларни сўйиб, ним-талашар ва арава-уловларда манзилгоҳга элтиб ташлашарди. Бу ерда бўлса учинчи пеон ишга тушарди: у этни тилишлаб, офтобда қуритарди.

Ов катта фойда ваъда қилаётган эди. Қарлос олиб

¹ Траппер — Шимолий Америкада тузоқ, қопқон қўйиб, мўйнали ҳайвонларни туғадиган овчи

кетишга чоги келганича эт тайёрлашига асти шубҳаланмасди, кейин, анча-мунча тери ғамлаб олишига ҳам. Бу молларнинг Янги Мексика шаҳарларида бозори чаққон.

Аммо овчилар учунчи куни бизонларнинг феъл-атвори ўзгарганини пайқадилар: улар бирдан безовта ҳамда чўчийдиган бўлиб қолди. Вақти-вақти билан ёнларидан катта-катта подалар ўтиб кетарди — афтидан бизонларни қўрқув босган ёки таъқибдан қочиб қутулаётгандек туюларди. Лекин уларни қўрқитаётган Карлос билан Антонио эмасди. Хўш, қўрқитиб қочираётган ким бўлди унда?

Карлос яқин-атрофда қандайдир ҳиндулар қабила-си ов қилаётганга ўхшайди деган мулоҳазага борди. У аслида ҳам ҳақ экан. Ушбу сўлим еодий бутунича кўринадиган тепага чиқиб, ҳиндулар қароргоҳига кўзи тушди. Водийнинг нақ нариги чеккасидаги сой ёқалаб элликка яқин вигвам¹ бамисоли чодирларда саф тортган эди. Вигвамлар конус шаклида бўлиб, ходача-таёқлар доира шаклида қиялатиб терилиб, учлари боғланган, шу тариқа ҳосил бўлган синчкорн нусха қурилманинг усти бизон териси билан ёпилган эди, вассалом.

— Бу ваколарнинг вигвамлари-ку!— деди Карлос ўша ондаёқ: унинг кўзи ўткир, пишиб кетган эди.

— Буни қаёқдан биласиз, хўжайини?— деб сўради Антонио. У ёш болалигидан бошлаб бутун умри даштда ўтган Карлосчалик тажрибага эга эмасди.

— Вигвамларидан кўрнниб турибди.

— Мен бўлсам команчилар деб ўйловдим. Худди шунақанги вигвамларни «бизон кушандалари» томонда кўргандим.

— Йўқ, Антонио,— эътироз билдирди Карлос.— Команчиларнинг вигвамида ходачалар зич қилиб терилиб, қир учигача тери билан ёпилади, дудбурон қолдирилмайди. Буларда бўлса, кўряпсанми, бутунлай унақа эмас. Йўқ, бу ваколарнинг вигвамлари. Тўғри, улар команчиларнинг иттифоқдошлари.

Худди шундай бўлиб чиқди. Ходачаларнинг учи зич жойлаштирилмаган, тутун чиқиб кетадиган туйнук қолган эди, шу сабабдан ваколарнинг вигвами конусга, бироқ учи кесик конусга ўхшаб кетар ва ана шу жиҳати билан команчилар вигваמידан ажралиб турарди.

¹ Вигвам — ҳиндулар бошпаваси.

— Баколар биз билан адоватда эмаслар,— деб қўйди овчи.— Уйлайманки, улардан чўчимасак ҳам бўлади. Имоним комил, улар биз билан савдо қилишади. Лекигин ўзлари қаёқда қолишдийкин?

Овчи қароргоҳни назардан ўтказаркан, у ерда на эркагу на аёллар, на бола-бақраю на ҳайвонлар — на бирон жонзот асари кўринаётгани туфайли ўз-ўзига шу саволни берганди. Лекин бу ташландиқ қароргоҳ бўлиши мумкин эмасди. Ҳиндулар бундай вигвамларни ташлаб кетмайдилар; ҳар қалай улар бунақанги ажойиб териларни қолдириб кетмайдилар. Йўқ, улар, чамаси, қаердадир шу яқин-атрофда бўлишлари керак: баланд тепа-адирлар оралаб бизонларни қувиб юрган бўлсалар ҳам ажаб эмас.

Қарлос топганди. Тепадан туриб қароргоҳни кузатишар экан, улар баланд ҳайқириқларни эшитишди, орадан бирор дақиқа фурсат ўтгач яқингина ерда, теналикларда каттагина бўлук — бир неча юз чавандоз кўринди. Улар аста илгарилаб келардилар-у, аммо терлаб-кўпириб кетган отлари оғир-оғир, ҳансираб нафас оларди — турган гапки, ҳозиргина улар кучлари борича олиб чопган. Ҳадемай улар кетидан бошқа, янада кўпсонлироқ бўлук пайдо бўлди. Бу осмонлатиб қўнғир-ранг юк — юнги ўсиқ териларга ўралган бизон эти ортилган от ва хачирлар эди. Ушбу карвонни аёллар билан ўсмир болалар ҳайдаб келишар, изма-из эса итлару болакайлар чуввос солганча югуришарди.

Улар қароргоҳга қарама-қарши тарафдан яқинлаб келишаётган эди, шу туфайлидан Қарлос билан Антонио вақти-соати етгунича кўзга чалинмай қолаверди.

Ҳиндуларнинг биринчи бўлуги вигвамлар оралиғида отдан тушди-ю, ўша ондаёқ аллақайсиларининг ўткир кўзлари тепа чўққисидаги овчиларнинг бошини илғади. Шу заҳоти огоҳлантирувчи қичқириқ янгради — кўз юмиб-очгунчалик фурсат ўтмаёқ ҳаммалари ўзларини яна от устига олиб, жанговар ҳолатга келиб бўлишганди. Икки ёхуд уч чавандоз ҳали қароргоҳга етиб келиб улгурмаган иккинчи карвон сари от қўйди, башқалари эса, чамаси, хавотирга тушиб қолганларидан нари-бери ўриб-келиб туришарди отларида.

Улар рўйрост ашаддий душманлари панелар пистириб келган бўлмасин деган хавотирга тушиб қолганлар.

Лекин Карлос дарҳол барҳам берди уларнинг ҳадик-хавфсирашларига. У шпори ила отини ниқтаб, тепалик чуққисига кутарилди-да, ҳиндулар кўзи ўнгида тўхтади. Сўнг ўзига яхши таниш бир неча белги-ишорани қилиб, овози борича: «Amigo!»— деб қичқирган эди, улар хотиржам тортишди. Ёш ҳинду олдинга от ўйнатиб чиқди ва тепага қараб йўрттириб келаверди. У бемалол гаплашса бўладиган жойгача яқинлаб келиб, тўхтади; улар қисман имо-ишора, белги-аломатлар, қисман бузилган, чала-чулпа испан тили ёрдамида гаплашарканлар, бир-бировларини жуда яхши тушундилар. Ҳинду отини ортга ҳайдади; ҳадемай яна қайтиб келиб, овчи билан шеригини қароргоҳга таклиф қилди.

Карлос шубҳасизки, бу илтифотни қабул этди, бир неча дақиқадан кейин қарабсизки, Антонио икковлари янги сўйилган бизон этидан тановул қилиб, қароргоҳ соҳиблари ила дўстона гурунглашиб ўтиришибди-да.

Новчадан келган, қадди-басти келишган сардор, кўриниб турибдики, айтгани-айтган, дегани-деган нуфузли одам эди; у Карлосни айниқса дўстона қарши олди ва унинг талай моли борлигини эшитиб ниҳоятда хурсанд бўлди. У эртага эрталабдаёқ Карлоснинг манзилгоҳига боришга ваъда бериб, ўз қабиласига йигит билан савдо қилишга рухсат этди. Овчи тахмин қилганидек булар даштда интиқомат қилгувчи энг олижаноб элатлардан бири бўлмиш мардонавор вако қабиласи экан.

Карлос ўз манзилгоҳига димоғи чоғу вақти хуш кайфиятда қайтди. Мана энди у мол-буюмларини хачирга алмашади — сардор ваъда қилди буни, даштга у ҳаммасидан бурун шу ниятда отланганди-да, ахир.

Эрта билан, ваъдалашилганига биноан, ҳиндулар сардорлари бошчилигида етиб келишди; овчи манзилгоҳ қурган чоғроққина сойлик эркагу аёллар, бола-бақралар билан тўлди. Тугуну бугчалар ечилди, буюмлар ёйиб қўйилди-ю, кунбўйи савдо авжга минди. Карлос ўз муштарийларининг беғараз, ҳалол одамлар эканига ишонч ҳосил қилди, кечга бориб эса, улар тарқашгач, бутун молу буюмлари сотиб бўлинган эди. Урнига бўлса нарироқда, водийда, боғлоқлик хачирлар ўтлаётганди, улар ўттиз бошдан кам эмасди. Буларнинг бари эн-

¹ Amigo — дўстим, ўртоқ (исп.)

дилликда бизон овчисиники эди. Саккиз тиллосини шамалга совурмаганди у!

Булар уйга қайтганида фойда келтирибгина қолмай, булда ҳам иш беради: ҳаммасига бизон териси билан доқланган эт ортади.

Ҳа, ҳа, сафари омадли бўлди. Карлос қўлга киритмак бойликларини хаёл қилиб, орзу қанотида парвоз эти бошлади, дилида ниҳоят соҳибжамол Каталинанинг қўлини сўраш ҳаққи-ҳуқуқига эга бўладиган кун ҳам этиб келадиган бўлди деган умид чироғи ёнди.

Башарти бойиб кетадиган бўлса, ҳаттоки дон Амброснодай зот ҳам унинг совчи қўйишига монелик қилмас кераг-ов. Уша тун Карлос, бизон овчиси ширин-ширин орзу-хаёллар сурди, хобида ҳам ажойибу антиқа тушлар кўриб чиқди.

XIII БОБ

Кейинги кун у янаям ғайрат-ла ов қилди. Энди ўлжаси қанчалик кўп бўлмасин, барини олиб кетиш имконига эга эди-да, ахир. Тери ёки қуритилган этни ортиқчасини даштга ташлаб кетишга тўғри келади деб чучимаса ҳам бўлади. Унинг энди, буёққа олиб келганлари билан қўшиб ҳисобланса, ўттиз бешта хачири бор, қўшимчасига учта араваси ҳам — бир неча юз долларлик, анча-мунча юкни олиб кетса бўлари уларда.

У ҳиндулардан ҳаттоки либос ўрнида ишлатаётган бир нечта терини харид қилишга ҳам муваффақ бўлганди. Буларнинг эвазига ҳиндуларга нимаики ёқса ўшани берганди. Ҳатто ўзининг ва одамларининг камчулларидаги тугмалару зарҳал лентачалар, сомбрероларининг ялтироқ тасмачалари — нимаки ялтироқ бўлса, барини тутқазди.

Карлос ҳамма нарчасини беришга тайёр эди, фақат қурол бундан мустасно, албатта. Кейин, қуроллари ҳиндуларни қизиқтираётгани ҳам йўқ эди. Уларнинг ўзларининг ўқ-ёй ва лассолари ҳам худди буларникидан қолишмасди, ўзлари қотириб ясашга уста эдилар. Ҳиндулар, албатта, милтиқни сотиб олишлари мумкин эди, лекин бу ёдгорлик бўлиб, Карлос уни ҳаттоки йигирма та хачирга ҳам алмашмасди.

Карлос овни тағин бир-икки кун давом эттирди.

У бизонлар соат сайян безовта, ҳуркак бўлиб бораётганини пайқади. Шунингдек, у бизон подалари шимоладан қочиб келаётганини ҳам кўриб турарди, ваколар эса унинг манзилгоҳидан жануброқда ов қиляптилар. Йўқ, жониворлар улардан қочмаяпти. Хўш, унда кимдан ахир?

Ҳиндулар билан савдо қилганидан кейинги учинчи кеча етиб келди; Карлос билан одамлари ухлаб ётишарди. Антонио пойлоқчиликда турарди, ярим кечада эса уни пеонлардан бири алмаштириши керак эди.

Метисни мудроқ боса бошлади. Бизонларни ҳайдай-вериб роса толиққанди у; ярим соатгина пойлоқчиликда туриш муддати қолганди, ўзини элита бошлаган мудроқни енгил учун охириги кучини ишга солиб, арабга чидаб турганида тўсатдан хачирлар ўтлаётган тарафдан пишқириқ эшитилиб қолди.

Антонио ўша замоноқ кўзини очди. У қулоғини ерга бериб, тинглай бошлади. Ўша томондан тагин пишқириқ эшитилди, эндиликда хиёл баландроқ, сўнгра уст-ма-уст, яна ва яна...

«Нима бўлди бу? Қойотлармикин? Балки айиқдир? Хўжайинни уйғотиш керак»,— ўйлади Антонио.

Антонио шарпа чиқармай Карлосга яқинлашиб, кифтидан оҳистагина туртди. Салгина қўл теккизишнинг ўзи кифоя эди — овчи милтиғини чангаллаганча санчиб турди ўрнидан. У ҳамиша бу қуролни ҳиндулар босқини хавфи туғилган пайтлардагина қўлга оларди; камондан эса фақат ов пайтида фойдаланар эди.

Икки оғизгина фикрлашиб олганларидан сўнг Антонио билан Карлос пеонларни уйғотишди-ю, бешовлашиб жангга ҳозирланишди. Улар чоққина уч бурчак қўтон шаклида жойлаштирилган аравалар панасидан чиқишмади. Араваларнинг баланд кажава-ёндорлари бемалол ёй ўқларидан пана қилувчи ишончли қалқон хизматини ўтар эди; гулхан қалашмаган эди, шу сабабдан манзилгоҳни четдан қараганда мутлақо пайқаб бўлмасди. Бундан ташқари, аравалар манзилгоҳни чет кўзлардан яшириб турган тутларнинг қуюқ кўлагаси пананоҳида эди; аммо-лекин аравалар панасидагиларга қаршиларидан ястанган дашт бинойидай кўриниб турарди. У ер-бу ерда қорайиб турган дарахтзорлар бўлмаганида бутн водийни — юқорию қуйи, жамики томонини буткул кўздан қочирмаслик мумкин эди. Бироқ, мазкур

кай эхторларда озмунча ганимлар яшириниб олиши ҳеч гап эмасди.

Овчилар чурқ этмай, сергак қулоқ солишарди. Бирор дақиқа ўтар-ўтмас назарларида бировнинг қораси кўриналардан юз ярдча нарироқда тушовлоглиқ ўтлаб юрган хачирлар уюри томон писиб бораётгандек туюлди. Бироқ ширава ёруғликда шунчаки кўзга кўринаётган бўлиши ҳам мумкин. Нима бўлганида ҳам бу қорани ниҳоятда имиллаб илгарилаётган эдики, ҳатто жондан жилмаётганга ўхшарди.

Ниҳоят, Карлос нималигини тузукроқ кўриши учун яқинроққа боришга аҳд қилди. У қўтондан чиқиб, хачирлар томонга эмаклади, кетидан эса Антонио. Қорайниб турган нарсага яқинроқ боргач, унинг ҳаракатланаётганини кўришди.

— Аповини қара-я! Нима бўлдийкин бу?— дея шивирлади овчи.

Шу пайт хачирлар яна пишқирди, бир хиллари худди биров чўчитиб юборгандек гусур-гусур ер тепина бошлади.

— Ўйлашимча, айиқ бу,— шивирлашда давом этди Карлос.— Ҳа, шунақага ўхшайди. Хачирларни шунақинги ўтакасини ёриб юбориши мумкинки, ана унда ушлаб бўлсан... Вараишлаган милтиқ овозиям бунчалик ҳуркитиб юбормайди-ёв.

У шундай деб туриб милтиғи оғзини баландлатди-да, қоронғилик имкон бергани қадар пишонга олиб туриб, тепкини босди.

Чамаси ўқ овози бутун дўзахий инсу жинсларни чорлаб чақиргандай бўлди. Бир йўла юзлаб чинқириқ чингради, юзлаб от туёқлари дупури босиб кетди водийни; уюр ҳаракатга келди; хачирлар баралла пишқириб-пишнаб, тушов-қозикларда юлқиниб-тиширчилай кетди. Мана улар арқону тушовларни тилка-пора қилиб, жон ҳилпида сойликдан ўқ мисоли қоча бошлади. Орғларидан эса қоронғуликда аранг кўзга чалинаётган суворилар от қўйганларича уларни қичай кетишди. Карлос ҳайратдан эс-ҳушини йиғиб улгурмасиданоқ хачирлару қиндуларнинг қораси ҳам кўринмай, гумдон бўлишди-қўйишди.

Хачирлар гўё асли-тагида бўлмагандай. Ҳозиргина шу ерда бутун бошли уюр ўтлаётган эди — мана энди иқалли бирортаси қолмади.

— Қочиб қолмишди!— ғулдиради Карлос.— Бечора хачирларим... Барини ҳайдаб кетишди, бирортасиниям қолдирмай!.. Қум минг лаънат бу алдоқчиларга!

У кафандўздлар ўзи хачирларини сотиб олган ҳиндулар — ваколар эканига заррача шубҳа қилмаётганди. Бунақанги воқеалар даштда кўп содир бўлиб туришини биларди у; савдогарларни тез-тез худди шу йўсин талаб турадилар, улар ўша битта хачирни уни ўғирлаб кетган худди ўша ҳиндулардан мажбуран икки марта-лаб сотиб олишга кўникиб кетганлар.

— Лаънати алдоқчилар!— дея такрорлади Карлос жиғибийрони чиқиб.— Ана шуни-чун ҳам жа сахий ва мард бўлиб кетишган экан-да! Булар ғирт қўрқоқчасига иш тутиб, мени шунчаки кафангадо қилиб, молларимни ўғирлашга тил бириктириб олишган экан. Очиқ-часига тортиб олишга ботинишолмабди-да. Минг лаънат-э! Мана энди хароб бўлдим мен!

Ҳам ғазаб, ҳам қайғу-алам акс этиб турарди унинг охирги сўзларида.

Овчи ҳақиқатда ҳам мушкулу аянчли аҳволда қолганди. Уни яқиндагина самоларга парвоз эттирган жамики орзу-умидлари бир зумда чилпарчин бўлди-қўйди. У бисотида бор будидан айрилди, нима мақсадда мазкур сафарга отланган бўлса, баридан жудо бўлди. Йўлда қанчадан-қанча қийинчиликлару хавф-хатарларни бошдан кечирмади — бари, бари беҳуда кетди. У икки қўлини бурнига тиқиб, илгаригисидан бешбатар қашшоқлашиб қайтади энди,— шахсан ўзининг беш бош хачириям бошқаларига қўшилиб ғойиб бўлганди-да, ахир. Ҳўкизлари, садоқатли тулпорю аравалари — бисотида қолгани мана шуларгина, холос. Орқага қайтиш учун зарур бўлган озиқ-овқатларинигина ортишга аранг ярайди булар; ҳеч қанча бошқа юк, бирорта тери бойлами, йўлакай ўзи ва одамлари қоринларини тўйдиришларидан ортиқча бир парча эт олиб кетолмайдилар.

Талончилар от солиб кетган томонга бақрайганча тек туриб қолган дамда Карлоснинг хаёлидан ана шу ўй-фикрлар ғизиллаб ўтди. Овчи уларни қувишга уриниб ҳам кўрмаётган эди. Бу бефойдагина эмас, айни чоқда хатарли ҳам эди. Ўзининг ажойиб тулпорига уларга етиб олиши мумкин эди, аммо уларнинг найза-

ларига кўксини қалқон қилиб риҳлатга юз туттиш учунгина, холос.

— Лаънати алдоқчилар!— яна такрорлади у, сўнгра ўрнидан қўзғалиб, орқасига, қўтонга қайтди-да, кўкизларни буёққа ҳайдаб келиб, араваларга маҳкамлаб боғлашни буюрди: ҳиндуларнинг биронта кейинда қолган тўдаси уларга ҳужум қилиб қолиши мумкин эди-да, ахир.

Ухлаш хавfli бўлгани сабабли Карлос билан ҳамроҳлари қайтиб ётишмади ва мижжа қоқмай, ҳушёр тонг оттиришди.

XIV БОБ

Бу кеча Карлос учун кулфатлию мусибатли, қайғули ўй-хаёллар билан кечган кеча бўлди. Бор будидан айрилгач, адоватли кайфиятдаги ҳиндулар орасида қолган, улар ният-ўйини ўзгартиб, ношуд овчиларни гумдон қилмоқ учун яна орқага қайтишлари мумкин эди. Уни уйдан, умуман олганда, оқ танлиларнинг истаган қишлоғу кентидан юз миллаб масофа ажратиб турар, бунинг устига ҳали ушбу улкан дашту биёбонни босиб ўтиши даркор эди. Кўнгли ғашу дили вайрон эди: уйда нималар кутаётган экан уни? Ахир у бисотидаги бор молу-дунёсидан жудо бўлди, қайтиб боргач, эҳтимол барчага роса кулги бўлар. Бунинг устига дегангиз, айрилган бойлигини қайта қўлга киритишига, кўрган зарарининг ўрни тўлиб кетишига тариқчалик умид йўқ. Ҳукумат, шубҳасиз, унингдек арзимас бир одамнинг қасдини олишга бўлук йўлламайди икки дунёда; борди-ю испан аскарлари ҳатто хоҳлаган пайтларида ҳам буёқларга етиб келолмайдилар бари бир. Келин, Вискаarra билан Робладолар уни деб аскар жўнатиб бўпти! Йўқ, буюмларини қайта қўлга киритишдан умидвор бўладиган жойи йўқ. Уни шафқатсизларча таллидилар, бунга тан беришдан ўзга иложи йўқ. Олдинда ниса мубҳаму нохуш, рушноликсиз истиқбол кутяпти!

Тонг ёриша бошлади дегунича ваколлар қароргоҳига оқола олади — уларни очиқчасига мунофиқликда айбонлашдан қўрқмайди. Лекин бу ёрдам берармикин? Ин-ийкейин, у ҳиндуларни илгариги манзил қурган жойларидан топармикин ўзи? Асло, аксинча, уни талаш

ниятига тушганларидаёқ бошқа жойга кўчиб ўтган бўлишлари керак.

Уша тунда унинг хаёлига неча-неча марталаб бемаъни ўй-фикрлар келди. Қўлдан кетганини қайтариб бўлмайдикун-я, аммо ўч олиш мумкин-ку. Ваколларнинг ҳам ғанимлари бор. Баъзи қўшни қабилалар улар билан адоватда; Карлос пане қабиласи уларнинг қудратли душмани эканини билади.

«Қисматим аччиқ экан,— деб ўйларди Карлос,— лекин интиқом лаззатбахш-ку! Хўш, борди-ю, панеларни ахтариб топиб, ниятимни ўшаларга айтсам, найзам, камониму содиқ милтиғим сизларнинг ихтиёрларингда, десам-чи?.. Бу қабила билан учрашмаганман сира, уларни яхши билмайман-у, лекин билгимда қувватим бор, шунинг учун ҳам ҳозир, интиқом ўтида ёнаётган эканман, улар менинг ёрдамга узатган қўлимни қайтаришмас дейман. Одамларим нариги дунёга бўлсаям бирга боришади мен билан, буни биламан. Тўғри, улар тагнос, тинч-ювош қабиладан, аммо нафсониятларига текканларида қандоқ олишиш ва қасд олишни биладилар».

— Ҳа, шундоқ, панеларни ахтариб топганим бўлсин!

Охирги сўзларни у деярли қаттиқ, қизишиб ва ишонч-ла айтди. Карлос кўп бош қотириб, иккиланиб ўлтиришга ўрганмаганди, шу сабабдан ҳам унинг аҳди-қарори қатъий эди. Бунинг ҳайрон бўладиган жойи ҳам йўқ эди: у билан шунчалик қабиҳона ҳамда шафқатсизларча муомала қилдилар, мабодо икки қўлини бурнига тиқиб қайтгудек бўлса уни шунчалик қайғулию аянчли истиқбол кутмоқда эдиким, бошига бундайин бахтсизликни солганларни қилмишларига яраша жазосини беришни жони-жаҳони билан истаётганди, шу билан бирга айрилган бойлигининг бир қисмини қайтариш умиди ҳам ҳали-ҳозирча мутлақо сўнмаганди — мана нима мажбур этганди уни ана шундай аҳду паймонга. Хуллас, Карлос шундай қарорга келган ва буни ҳамроҳларига айтишга тайёр бўлиб, оғиз жуфтлай деб турган эди ҳамки, афтидан қандайдир ўз ўй-фикрларига батамом берилиб кетган Антонио олдинроқ тилга кириб қолди.

— Ҳеч қанақанги ғалати нарсани пайқамадингизми-сиз, хўжайин?— деб сўради у.

- Қай пайтда, Антонио?
- Хачирлар қочиб кетаётганида.
- Хўш, нима экан ўша?
- Ҳалиги, бу фирибгарларни ҳаммасиям отда эмас-ди, армиларидан кўпроғи пиёда эди.
- Рост, мен ҳам пайқагандим.
- Гап мундоқ, хўжайин, команчиларнинг мустанг-ушорларини қайдоқ ҳайдаб кетишларини неча марта талаб кўрганман, улар доим отлиқ бўлишарди.
- Хўш, нима бўпти? Булар команчилар эмас, ваколар-ку, ахир.
- Шундоқ, хўжайин. Лекин мен ваколар ҳам бари бир команчилардан: улар ҳақиқий чавандоз ва ҳамниша фақат отлиқ ҳаракат қилишади, деб эшитганман.
- Ҳа, тўғри бу,— дея жавоб қилди овчи ўйчан.— Очиғини айтганда, бу ерда бир гап бор.
- Бошқа ҳеч қанақа ғалати нарсани сезмадингизми, хўжайин, ҳалиги, босқин пайтида?— дея сўзлашда давом этди метис.
- Йўқ, Антонио. Жудаям алам қилиб кетганди, ишайкейин десанг, бундай кулфатдан ўзимни йўқотиб довдираб қолгандим. Ҳеч нимани сезиб, пайқамабман. Хўш, яна нима гап?
- Ҳалиги, улар фақат овозлари борича қичқириб-иша қолишмай, яна-тағин нақ қулоқни тешгандай ҳайқиршидиям, энг асосийси эса — ҳуштак чалишди. Натотки эшитмаган бўлсангиз?
- У-ҳў! Хўш, сен-чи, эшитдингми?
- Аниқ эшитдим. Эшитгандаям бир марта эмас.
- Мени қулоқларим қай гўрда қолган экан?— дея сўзини ёзғирди Карлос.— Бунга ишончинг комилми, Антонио?
- Сираям шубҳаланманг, хўжайин.
- Овчи бир-икки дақиқа жим қолди, бутун эс-ҳушини жимлаб ўйга толди, қўққисдан, худди ўз-ўзи билан сўзлашаётгандай, тилга кирди:
- Бу, эҳтимол... Бу, балки... Ҳа, ойт ичаман! Бу...
- Нима, хўжайин?
- Панеларинг ҳуштаги!
- Мен ҳам шундай деб ўйлаяпман-да, хўжайин. Команчилар ҳеч қачон ҳайқириб, ҳуштак чалишмайди. Кейин, кивалар ҳам. Ваколарнинг бунақанги ишора берганларини умримда эшитмаганман. Балки булар

панелардир? Устига-устак улар пиёда эдилар. Булар панелар бўлиши керак.

Карлоснинг ўй-фикрлари дарҳол ўзга йўналишга юз бурди. Антонио ҳақ бўлса ажаб эмас. Ҳуштак — панеларни бўлак жамки қабилалардан ажратиб турадиган ишора аломати. Бундан ташқари, пиёда кафандўзларнинг бу қадар йирик тўдасининг пайдо бўлиши — уларнинг яна бир ўзига хос хусусият-аломатлари. Карлос жанубдаги қабилалар ҳеч қачон бундай ҳарбий усулни қўлламасликларини биларди. Панелар ҳам чиннакам, туғма чавандозлардан-у, лекин ўзларининг жанубга уюштирган босқинларига кўпинча от миниб қайтиш умидида пиёда чиқадилар. Деярли ҳаммиша шундай бўлади ҳам.

«Бундан чиқди ваколари бекордан-бекор айблаётган эканман, — ўйларди Карлос. — Талончилар улар эмас, панелар экан-да!»

Аммо шу пайт янги шубҳа пайдо бўлди унда. Йўқ, ҳарҳолда ваколар ўғирлаб кетишган. Улар жўрттага панеларга ўхшаб ҳуштак чалишган, уни лақиллатиш учун. Улардан бир қисми пиёда бўлиб олган, бинобарин, қароргоҳлари шундоқ яқингинада. Утакаси ёрилиб ҳуркиб кетган ҳачирлар арқонларини узиб тирақайлаб қоча бошлагандан кейин ҳиндулар ҳам худди ўша томонга қараб ғойиб бўлдилар-ку, ахир.

Эртага олдиларига борган чоғидаям, турган гапки, улар, яқин-атрофда панелар пайдо бўлиб қолишди, ҳачирларни ўшалар ҳайдаб кетган, дейишади. Ҳачирларни кўролмайди у, албатта: жониворларни тепа-адирлар ортида бир ерга яхшилаб яшириб қўйишлари тайин.

— Йўқ, Антонио, — деди у ана шуларни атрофлича ҳаёлдан кечириб чиққач. — Душманларимиз ҳар қалай ваколар.

— Адашяпсиз-ов, деган умиддаман, хўжайин.

— Ўзим ҳам умидвор бўлишни хоҳлардим-а, ошнам. Кеча кечқурун уларни дўст ҳисоблагандим. Уларни бизга душманлигига ишонч ҳосил қилсам, дилим қаттиқ ранжийди-да, ўзиям... Лекинига, худди шундоқ бўлиб чиқади деб қўрқаман.

Шунга қарамай, ҳарҳолда Карлоснинг тўлиқ имони комил эмасди бунга; у ўй сураркан, миясига ваколар ҳимоясига хизмат этгувчи янги бир далил келиб қолди. Ҳамроҳлари ҳам бу ҳолатни пайқашди.

Сўнги бир неча кун давомида бизонларнинг қайси томондан қочиб келаётганини ҳаммалари кўриб-билиб туришган эди. Улар шимол томондан жанубга қараб олиб-югуриб қочиб ўтишаётганди, баски шундоқ экан, уларнинг яққолу ошкора безовталанаётгани таъқибчилар яқиндалигини тасдиқлайдиган аломат эмасмиди, ахир? Ваколарга келганда эса, улар доимо Карлос манзилгоҳидан жануброқда ов қилишаётганди-ку, ахир. Афтидан шимол ёқда ов қилаётганлар қандайдир бошқа ҳиндулар кўринади. Эҳтимол панелардир улар.

Карлос янги дўстларидан шошмашошарлик билан шубҳа қилишда қойиб-ёзғирди ўзини. Шубҳа-гумонлар қийнаётган эди уни. Балки тонг бу шубҳа-гумонларига барҳам берар.

Тонг ёриша бошлади дегунича у ваколар қароргоҳи сари йўл олади ва ҳаммасини аниқлайди ёки, ақалли, улар билан очиқчасига гаплашади.

Дашт узра тонг ёриша бошлагани замоноқ Антонио синчков нигоҳла ерни тўрт томонга қараб кўздан кечирришга киришди, унинг ўткир кўзлари туйқисдан ўт орасидаги аллақандай нарсага тушди. Яқиндагина хачирлар ўтлаб юрган жойдан хиёл нарида алланарса қорайиб кўринди. Эҳтимол бу дрок¹ ёки бирорта бутадир? Э-йўқ, ўхшамайди, шакли-тарҳи бошқача. Ўсимликдан кўра кўпроқ бирорта ҳайвон ётганга ўхшайди... балки баҳайбат бўридир? Ўша жойга яқин ерда кечаси нимадир қимирлагандай туюлган, Карлос унга қараб ўқ узган эди.

Антонио ана шу ғалати нарсага кўзи тушгани заҳотиёқ Карлосга кўрсатди уни, шундай қилиб икковлари энди, тонги ғира-ширада уни тузукроқ илғаш ҳаракатига тушиб қолишди.

Тобора кун ёришиб ўша нарсанинг шакли аниқлаша борар, дақиқа сайин овчиларнинг қизиқсиниши авжга минарди. Уларга қолса аллақачон яқинроқ боришган бўларди-я, лекин ҳиндулар қайтиб қолишлари мумкин дея хавфсираш ҳали-ҳануз тарк этмагани боисидан эҳтиёткорлик қилиб қўтондан чиқишмаётган эди.

Бироқ, орадан тагин озроқ вақт ўтгач, улар чидаб туришолмади: ниҳоят уёқдаги нима эканини билишлари керак-ку, ахир! Дилларида гумон уйғонган ва буни текшириб кўришни истаб қолишган эди улар. Карлос билан

¹ Дрок — сариқ гулли, дуккакли чўл ўсимлиги.

Антонио аравалар оралаб ўтиб бориб, ўша ғалати нарса томонга қараб юришди.

Улар яқинроқ бориб, бу ҳиндунинг жасади эканини кўришди, илло унчалик ажабланишмади — афтидан, айнан шуни кутишган эди чоғи. Ҳинду ўт устида ер тишлаб ётарди; кўздан кечиришиб, биқинидаги жароҳатни кўришди; жароҳатдан кўп қон кетганди. Бу ўқнинг изи эди — Карлос хато отмаганди.

Икковлон энгашиб, яхшироқ кўздан ўтказиш учун жасадни ағдарди. Ҳинду тўлиқ жанговор қиёфада эди: белигача яланғоч, башараси билан кўкрагига бир қарашдаёқ душман кўнглига ваҳима соладиган қилиб бўёқ суртилганди. Карлосни ҳаммасидан кўпроқ ёввойиннинг бош кўриниши ҳайратда қолдирди. Қулоқларининг орқаси — энсаси ва чаккаларидаги сочи қиртишланган, тепароғи калта қилиб қирқилган, фақат энг тепасидагина узун кокил қолдирилган; уни ўриб, бошдан-оёқ патлар қадалган ва кокили елкаларига тушиб турибди. Қиртишланган чаккалари оч-қизил бўёқ билан бўялган, ёноқларига ҳам кўкрагига ҳам шундай бўёқ суртилган. Бу мурданинг кўриниши ваҳимали эди: кўкариб-бўзарган терисида ёрқин доғлар қизариб турибди, лаблари бўздай оқариб кетган ва кўзлари шишадай қотиб қолган.

Карлос миқ этмай бир неча дақиқа кўздан кечирди уни, кейин ўгирилиб, ҳамроҳига маъноли қараб турди-да, ҳиндунинг қиртишланган боши ва оёғидаги мокасинини кўрсатиб, ушбу кашфиётидан ошкора, мамнун ҳолда деди:

— Пане!

ХУ БО Б

Ўлган ҳинду, шубҳасиз, пане қабиласидан эди. Унинг соч-кокиллари, мокасинининг бичими ва танасидаги жанговар бўёқлар шундан далолат бериб турарди.

Карлос у пане бўлиб чиққанидан хурсанд эди. Бунинг сабаби бор эди. Биринчидан, ваколарнинг хоин бўлиб чиқмаганлари қувонтирарди уни; иккинчидан, талончилардан бирини гумдон қилганди; ва ниҳоят, барига панелар айбдор эканига ишонч ҳосил этгач, унда ўғирлаб кетилган хачирларидан ақалли бир қисмини қайтариш ва

буни ваколар кўмагида амалга ошириш умиди қайтадан туғилганди.

Бунинг ҳеч қандай ақл бовар қилмайдиган ёхуд ажабланадиган жойи йўқ эди. Юқорида зикр этилганидек, ваколар билан панелар бир-бирларига ашаддий ёв. Ваколар панеларнинг қаердадир яқин-орада эканини билиб қўйсалар бас, ана унда албатта ғанимларнинг изига тушадилар — Карлос шубҳа қилмайди бунга. У ҳам чоққина тудаси билан таъқибда қатнашади, борди-ю, панелар тор-мор қилинса, эҳтимол хачирларини қайтариб олар.

Овчи ҳозироқ ваколар қароргоҳига қараб от солиб, уларга панелар уруш сўқмоғига чиққанларини хабар қилиб, шундан сўнг ушалар билан биргаликда умумий душманлари изига тушишни истаб қолди.

Аммо шу пайт унинг ҳам, Антонионинг ҳам эсига тушиб қолди: ахир панелар ваколар манзил қурган томонга қараб от солиб кетишган эди-ку! Қароргоҳгача бўлган масофа эса икки милдан ошмайди, шунинг учун ҳам панелар ҳатто тун чоғида уларни пайқамай қолишлари даргумон-ов. Хўш, борди-ю панелар ваколарни ғафлатда қолдириб, ҳозир улар билан жанг қилиб ётган бўлсалар-чи?

Ҳа, тамоман бўлиши мумкин, мумкингина эмас, таъин гап бу. Панелар нақ вақтида улгура олардилар, ҳужумга ўтиш учун вақт ҳам ниҳоятда қулай эди. Хачирларини ярим кеча бўлмаёқ ҳайдаб кетишган эди. Шундан кейин улар шак-шубҳасиз ваколар қўналғасига йўл солиш ва айнан одатда босқину талончилик қилинадиган соатда — ярим кеча билан тонготар палла оралиғида етиб боришган.

Карлос ваколарни огоҳлантиролмай қоламанми деб чўчиётган эди. Унинг дўстлари аллақачон нобуд бўлган бўлишлари мумкин. Буёғи қандоқ бўлмасин, ҳаялламай уларнинг қароргоҳига жўнашга аҳд қилди овчи.

Карлос Антонио ва пеонларга ўз манзилгоҳларини сўнги иложу имкониятлари қолгунича ҳимоя қилишни буюриб, уқ-ёйи билан милтиғини ола солиб, от елдириб кетди. Кун эндиғина ёришиб келаётганди, лекин овчи ваколарнинг қўналғасига элтадиган сўқмоқни билганидан сира қийналмай йўл топиб борарди. У эҳтиёт бўлиб бораркан, йўлда учраган ҳар битта чакалагу дарахтзорни олисдан диққат-ла кузатар, ўзи ошиб ўтадиган тепа-



ларнинг чуққисно ҳар битта ёнбағирликка синчков на-
зар ташларди.

Бундай эҳтиёткорлик асло ортиқча эмасди. Панелар
яқин-атрофда бўлишлари ҳеч гап эмас — эҳтимол ҳануз-
гача Карлоснинг манзилгоҳи билан ваколар қўналгаси
оралиғидаги йўлнинг ўртасида пистирмада туришгандир
ёки тепаю адирлар орасида дам олишаётгандир.

Овчи бир ёки икки ганим билан тўқнашиб қолиши-
дан унчалик хавфсирамаётганди. У садоқатли оти панд
бермаслигини, бирор ҳинду зоти уни қувиб ета олмасли-
гини биларди. Аммо уни бир йўла ўнлаб рақиблари
қуршаб олиши мумкин, ана унда ваколарнинг вигвам-
ларига етиб боролмайди. Карлос бундай эҳтиёткорлик
ила олга силжиётганининг сабаби ана шунда эди.

У зўр бериб осудалигу сокинликка қулоқ соларди.
Ҳар бир товушни илғаб олар ва ичида нималигини аниқ-
лаб борарди: ана, эманнинг шаббалари орасига биқиниб
олган ёввойи курка «ғулуғулулаб» қўйди; қоқ қуруқ
дўнгликда каклик қанотларини қоқди патирлатиб; ки-
лик пишқирди; чўл суғури майину позиккина садо бер-
ди. Буларнинг бари яхшигина таниш товушу овозлар эди,
шундай бўлса-да, бари-бир ҳар гал Карлос жойида тек
қотиб, сергак қулоқ соларди. Бошқа вазиятда у буларга
эйтибор ҳам бермаган бўларди-ю, аммо ҳиндуларнинг
ҳайвонлар ва қушларга тақлид қилишда устаси фаранг
эканликларини билганидан бу товушлар ҳақиқий ёки
сунъийлигини аниқлашга уриниб, қулоғини динг этарди.
У панеларнинг кечаси ўтган изларини кўриб борарди.
Ўт-ўланлар устида қолган изларнинг мўллигига қараган-
да бу йирик бўлинма эди. Сойни кечиб ўтаётганида Кар-
лос қумдаги мокасин изларини кўриб қолди. Демак, ҳин-
дулар орасида (гарчи аксариятлари ҳозирда ўғирлаган
хачирларини миниб юрганлари шубҳасиз бўлса-да) пиё-
да қолганлари ҳам бор эканда ҳалиям.

Шу тариқа Карлос буёғига яна ҳам эҳтиёткорлик би-
лан бораверди. У ваколар манзилига элтадиган йўлнинг
ярмига бориб қолибди ҳамки, панеларнинг излари ҳа-
мон ўша тарафга қараб кетганди. Наҳотки шундай таж-
рибали жангчилар ваколар қароргоҳини пайқамаган
бўлсалар? Албатта пайқамай иложлари йўқ. Олдинига
улар ваколарнинг вигвамларидан Карлоснинг манзил-
гоҳига қараб кетган йўлкани кўришган, албатта, сўнг

вигвамларни ўзини ва аллақачон бостириб боришгандир балки... эҳтимол...

Овчининг хаёллари қўққисдан чўрт узилди. Олисдан аллақанақанги товушлар: қутқули қийқириғу наъралар, узлуксиз баланд, аммо тушунарсиз ғовур ҳамда беҳисоб овозлар ғувури эшитилди. Ана шу шовқин-сурон орасидан гоҳ чуввос, гоҳ шодиёна қийқириқ, гоҳ қулоқни тешгудек қаттиқ ҳуштак янграр, зафар тантанаси ёхуд, эҳтимолки, интиқом нашидасидан дарак бериб дашт бўйлаб олис-олисларга таралар эди.

Карлос мазкур ҳайқириқ ва наъралар нимани англайтишини биларди: жангу жадал, даҳшатли, қирғинбарот жанг шовқин-сурони эди бу!

Шовқин-сурон худди Карлос чиқиб бораётган тепалик ортидан келаётган эди.

У отини ниқтаб тепа кифтига етиб борди-да, қуйига, водийга тикилди. У ерда жанг авжида эди.

Карлоснинг кўз ўнгида қонли олишув кетаётган дала тўлалигича намоён бўлди. Олти юз чоғли қизил танли сувори дашт узра от сурарди; ана, улар найзаларини ўқталганча бир-бирларига қараб отларини елдириб боришяпти, ана, олисда турган кўйи кетма-кет камон тортиб, ганимлари устига дўлдай ўқ ёғдирыптилар, анави ёқда эса бетма-бет рўнара бўлиб, яккама-якка олишувга киришганлар қирон келтиргувчи томагавкларини ишга солдилар. Бировлари бутун бошли бўлугу бўлинмалари билан, узундан-узун найзаларини шайлаганча ёвга ҳамла қиляпти, бошқалари қочиб жон сақляяпти, бир хиллари отидан айрилиб, пиёда жанг қилишяпти. Баъзилари тўп-тўп дарахтлар орқасига биқиниб олишган, душманнинг орқасидан камондан ўқ узиш ёки курагига найза санчишга қулай фурсат келиб қолди дегунича биқинган жойларидан отилиб чиқишяпти, хулласи калом, бу хунрезлик баҳсининг охири-ниҳояси кўринмайди.

На биронта варанглаган ўқ овози эшитилар, на бирон кимса жангчиларни жангга йўллаб мугуз чалар, на дўмбира-ноғоралар гумбурлар, на тўп-замбаракларнинг гумбур-гумбури янграр, на ракеталар париллаб ёнар, на кўк сари кўкимтир-оқиш тутун булутлари ўралади, аммо ушбу белги-аломатларсиз ҳам янглишмасди киши: бу даштнинг ўзига хос мусобақалари бўлмиш жангари ўйинлар эмас, балки ҳақиқий жанг эди. Ваҳшиёна қийқириқлару янада ваҳшиёнароқ ҳуштаклар... Шиддаткор ҳам-

лалар... Қутуриб, ёвузона ҳайқиришлар, музаффарона таптана ҳамда интиқом нидолари... Эгасиз қолган отларнинг пишқиришию кишнашлари... Ҳамма ёқда ер тишлаган ҳиндуларнинг жасадлари, қонга беланган бошлари офтобда қип-қизариб ётибди — ғанимлари аллақачон уларнинг калла хомларини шилиб олган... Қонга бўялган найзаю пичоқлар... Ҳа, ҳеч қандай шубҳа бўлиши мумкин эмас: бу ерда жанг, ҳаёт-мамот жанги кетяпти. Жанг майдонида ваколар билан панелар тўқнаш келганлар, мана улар жончиқарга олишиб ётибдилар.

Карлос бир қарашдаёқ фаҳмлади буни, бирор дақиқача жангни кузатиб тургач, у бир қабиланинг жангчиларини иккинчисидан ажрата бошлади. Панелар тўлиқ жанговар қиёфаю либосда эдилар, уларни ўриб қўйилган кокилларидан таниб олиш мушкул эмасди. Ваколар орасида эса (душманлар уларни ғафлатда қолдирганлари шубҳасиз эди) кўпчилик одатий овчилик либосида — калта камзул кийган, тиззаларига кўн тиззабанд тақиб олган эди. Бироқ ваколардан баъзилари ҳам худди рақиблари сингари ечиниб олган эди, илло Карлос уларни ҳилпираб турган қуюқ сочларига қараб панелардан осонгина ажратиб турарди.

Карлоснинг миясига келган дастлабки фикр — олга от суриб, жангга киришиш бўлди: ваколар тарафида, албатта. Жанг сурони уни қитиқлаб, қизиштириб қўйган, уни яқингинада кафангадо қилган талончиларни кўриб тургани эса бетийиқ интиқом истак-иштиёқини кўзитиб юборган эди. Талайгина панелар ҳозир ўзлари ҳайдаб кетган унинг хачирларини миниб юришибди, қисқаси, Карлос хачирларидан лоақал бир нечтасини қайтариб олишга жазм этди.

У энди отини ниқтаб, жангга ташланишга чоғланган ҳам эдики, бирдан жанг майдонида ҳамма иш ўзгарди-ю, у жойида қола қолди. Панелар чекина бошладилар.

Улардан аксарияти оти бошини буриб, орқа-олдига қарамай қочишга тушди.

Ана шунда Карлос пастга қараб, панеларнинг уч жангчиси тўғри у турган ерга қараб отларини учириб келаётганини кўрди. Бўлуқнинг катта қисми ҳали жанг қилаётган ёки дашт бўйлаб тўзиб кетганди, лекин бошқалардан ажратиб қўйилган ўша учови тўғри унга қараб от елдириб келишаётган эди.

Овчи отини дарахт орқасига ҳайдади, уни пайқамаган уч сувори жуда яқинлаб келиб қолди.

Худди шу пайт уларнинг кетидан ваколарнинг жанговар наъраси янгради-ю, Карлоснинг қочқинларни қувиб келаётган икки вако чавандозга кўзи тушди. Қочқинлар ўгирилиб қараб, рақиблари атиги икки кишигина эканини кўришгач, отларини орқага буриб, жангга ташланишди.

Биринчи дапқир ҳамладаёқ таъқибчилардан бири ҳалок бўлди, шунда иккинчиси уч нафар душман билан бетма-бет қолди, Карлос ваколар сардорини таниди, бу ўша эди.

Яқин-атрофда қамчи чирсиллагандай бўлди — Карлос тепкини босганди, шунда панелардан бири гуппа отдан қулади. Қолган икки шериги қай томондан ўқ узилганини билолмай, ғанимлари сардори устига бостириб бораверди; бироқ, у душманларини яқинроқ келишларига йўл қўйиб бериб туриб, ғанимларидан бирига човут солди-ю, томагавки билан калласини қоқ иккига бўлиб ташлади. Аммо остидаги оти сардорни нарига суриб кетди-ю, у отини буриб улгурмасиданоқ учинчи пане, моҳир жангчи, орқасидан етиб бора солиб кураги ўртасига узун найзасини санчди; найза танани буткул тешиб ўткир учи кўкрагидан буёққа чиқиб турарди. Сўнгги ўлим олди наъраси-ла отдан гуппа ерга қулади марди-майдон хинду.

Унинг душмани ҳам ўша ондаёқ ҳалок бўлди. Карлос камондан узган ўқ сардорни қутқариб қололмади-ю, лекин унинг қасосини олди. Камон ўқи панега нақ найза санчиб турганида бориб теккан ва у найза дастасини маҳкам чангаллаганича ўз қурбони билан баб-баравар қулаган эди ерга.

Майса устида ёнма-ён чўзилиб ётган бу икки жасаднинг кўриниши даҳшатли эди, аммо Карлос уларни кўздан кечириб ўлтирмади. Жанг майдонининг нариги чеккасида ҳануз шиддатли жанг борарди, шу боисдан Карлос отини ниқтаб, олишувнинг энг қалин жойи сари учуриб кетди.

Аммо-лекин панелар аллақачон кўплаб сара жангчиларидан айрилган, бундан ваҳимага тушиб қоча бошлаган эдилар. Карлос музаффар вако бўлуклари сафида улар ортидан қувишга тушган, дам-бадам чекинаётган талончиларга қарата милтиқдан ўқ узар эди. Кейин,

бирорта тасодифий тўда ўзининг манзилгоҳига бориб қолишидан хавотир олиб таъқибни бас қилди-ю, ўша ёққа от қўйди.

Манзилгоҳда ҳаммаси жойида экан. Антонио билан пеонлар аравалар панасига биқиниб, ҳар қандай ҳамлини қайтаришга шай бўлиб ётишган экан. Ўз шерикларидан ажраб қолган ҳиндулар ёнгиналаридан ўтиб кетган ҳоллар ҳам бўлибди-ю, лекин ниҳоятда қўрқиб, эсхоналари чиқаёзганидан овчиларга ҳужум қилиш хобихотираларига келарди дейсизми уларни.

Бу ерда ҳамма иш жойида эканига ишонч ҳосил қилган Карлос тагин отини буриб, орқасига, ҳозиргина бўлиб ўтган жанг майдонига томон елдириб кетди.

XVI БОБ

Карлос ваколлар сардори ҳалок бўлган жойга яқинлашаркан, кўплашиб айтилаётган марсия қулоғига чалинди.

Янада яқинроқ боргач, отдан тушиб тор доира шаклида жасадни қуршаб олган жангчиларни кўрди у. Бу ҳалок бўлган сардорнинг жасади эди. Бошқалар, душманни узоқроқ таъқиб этганлар энди-энди тўпланаётганди, даврага қўшилаётган ҳар бир киши ўша ғамгину маъюс марсияга жўр бўларди.

Овчи ҳам отдан тушди ва даврага тақалиб келди. Бир хиллар уни ҳайрат тўла нигоҳ-ла қарши олди, лекин бошқалари, жанг пайтида овчининг ўзларига ёрдам берганидан хабардорлари унинг ёнига келиб, у билан қўл олишиб омонлашардилар. Сўнгра бир кекса жангчи Карлосни қўлидан тутиб, давра ўртасига олиб ўтди-да, индамай сардорнинг қотиб қолган бетига ишора қилди — бу билан у овчига сардорлари ҳалок бўлганини маълум қилаётган эди.

На у, на жангчилардан бошқа бирортаси содир бўлган ушбу фалокатли воқеада Карлоснинг ҳам қандайдир иштироки борлигини биларди. Ҳаёт қолганлардан ҳеч зог сардор ҳалок бўлган олишувнинг шоҳиди бўлмаганди. Мазкур очиқ майдончани ҳар тарафдан баланд-баланд дарахтлар қуршаб тургани боисидан дашт томондан кўринмасди у, ушбу қонли олишув чоғида эса жанглар бу ердан олисларда бораётган эди. Ана шунинг

учун ҳам қария Карлосга янгиликни етказяпман деб ўйлади, у ҳам чурқ этиб оғиз очмади.

Карлос индамасликка индамади-ю, лекин жасуру довюрак жангчиларнинг саросимага тушиб қолганини кўриб турганди: ерда ҳалок бўлган беш ҳиндунинг жасади ётибди-ю, аммо-лекин улардан бирортасининг бош териси — каллахоми шилиб олинмабди-я! Бунинг маъноси қандоқ бўлди? Уч пане ва икки вако — сардор билан яна бир жангчи — ўлдирилган. Улар бир-бирларини бир-варакай ўлдириб, ҳаммалари яна айни ўша дақиқада бараварига ҳалок бўлишлари мумкин эмас-ку, ахир? Йўқ, бундай бўлиши мумкин эмас. Бир пане билан бир вако сал нарироқда, бошқа учтаси ёнларида ётибди, улар қандай ўлим топган: сардор найза танасини тешиб ўтганича, кушандаси эса найза дастасини маҳкам тутганича унинг орқасида ётибди. Сардор ҳануз қонга бўялган томагавкини чангаллаганча ётибди, иккинчи паненинг қоқ икки палла бўлган калласининг жароҳати мазкур томагавкининг охирги зарби қаерга тушганини кўрсатиб турибди.

Ушбу манзаранинг туб маъно-мазмуни ҳиндуларга кундай равшан, бунда ҳеч бир сир-синоат йўқ эди. Аммо уларнинг сардорлари қотилини ким ўлдирган — мана нимани тушуна олмаётганди улар. Бу ерда беш жангчи ер тишлабди, лекинга мазкур қонли тўқнашувда қатнашиб омон қолган яна биров бўлиши керак.

Мабодо у пане бўлганида ваколар сардорининг каллахомини шилиб олмай туриб қочиб қолармиди? Бундай ўлжа уни бир умр шон-шухратига чулғаши турган гап эди-ку, ахир! Борди-ю, бу вако бўлса, хўш, ким ўзи у ва қаёққа ғойиб бўлди?

Ана шу саволлар оғиздан-оғизга кўчарди-ю, бирор кимса жавоб беролмасди уларга. Бироқ баъзи жангчилар ҳали таъқибни давом эттиришяпти — балки ўшалар биров нимани билишар? Ҳозирча эса улар қайтмаган экан, ҳалок бўлган сардор тепасида яна марсия янграй бошлади.

Ниҳоят, довюрак жангчиларнинг бари жам бўлиб, сардорнинг атрофида давра қурдилар. Кекса жангчилардан бири олдинга чиқди-да, сўзламоқчи эканини англаувчи ишора қилди. Орага пашша учса эшитилгудек жимлик чўкди-ю. у сўзлай бошлади:

— Ваколар! Биз қувонмоғимиз лозим эди, аммо қал-

бимизга ғам-қайғу чағи солди. Ғалабамизга беқиёс му-
сибат соя ташлади. Биз отамиз, биродаримиздан жудо
бўдик! Бизнинг шавкатли, суюкли сардоримиз ҳалок
бўди. Бошимизга оғир мусибат тушди! Ажал унга тан-
танга онда, унинг забардаст дасти душманнинг бошини
қоқ икки палла қилиб турган соғиясида чағи солди.
Унинг жангчилари қалбини ғам-алам эгаллади, бу қай-
ғу-алам эл-элатининг юрагидан узоқ йиллар ўчмайди!
Ваколлар! Сардоримизнинг қасди олинган. Кушандаси
оқлари остида ётибди — ажал элчиси бўлмиш камон
ўқи унинг танасини тешиб ўтиб, унинг қонига беланган.
Қани, ғанимми қулатган қайси бирингиз?

Шундай дея у, худди жавобини кутгандек, пича жим
турди.

— Ваколлар!— давом эттирди сўзини у.— Суюкли сар-
доримиз ҳалок бўлди, дилимизни ғам-қайғу босди. Илло
унинг қасди олинганини билишдан хурсандмиз. Мана
у — манфур қотил, унинг каллахоми шилиб олинмаган
ҳали. Ушбу ўлжага муносиб хизмат кўрсатган жасур
жангчи ким? Қани, олдинга чиқиб, шилиб олсин уни!

У тағин жим қолди — яна ҳеч ким на сўз, на бирон
ҳаракат билан жавоб қилди унинг чақирғига.

Карлос ҳам ҳамма қатори жим турарди. У жангчи-
нинг сўзларини тушунмаётган эди, зеро у овчи билмай-
диган вако тилида гапирётган эди. У кекса жангчининг
ҳалок бўлган сардор ҳақида, сардорнинг ғанимлари тўғ-
рисида сўзлаётганини фаҳмлаб турганди-ю, бироқ ай-
тилганларнинг аниқ маъноси қоронғи эди унга.

— Биродарлар!— дея яна сўзлай бошлади кекса
жангчи.— Ўша баҳодир камтар экан, кўрсатган жасорат-
лари ҳақида миқ этмаяпти. Баҳодир жангчининггина қў-
лидан келган бу иш. Шундоқ экан, қани, ўша мардимай-
дон тан олсин, буни айтишдан чўчимасин асло! Ваколлар
ўзларининг суюкли сардорлари қасдини олган жангчи-
дан миннатдор бўладилар.

Орага тағин жимлик чўкди-ю, сукунатини нотикнинг
овозигина бузди янгитдан.

— Биродар жангчилар!— овозини баландлатиб қиз-
гин давом эттирди у сўзини. — Мен, ваколлар миннатдор
бўладилар, дедим. Қулоқ беринглар, буюғига мапа бун-
доқ гапларим бор сизларга!

Барчалари имо-ишора билан тинглашга тайёр экан-
ликларини билдиришди.

— Бизда, ўзларинг билгандек бир одат бор — қабиламиздаги энг довюрак одамни сардорликка сайлаймиз. Мен сардорни шу тобдаёқ, ана шу ерда — ҳалок бўлган сардоримизнинг қонига бўялган жанг майдонидаёқ сайлашни таклиф қиламан. Таклиф қиламанки, мана шу жасоратни кўрсатган одам янги сардоримиз бўлсин. — Шундай деб у ўлдирилган пане жасадини кўрсатди.

— Сардорнинг қотилидан ўч олган одамни йўқлайман мен ҳам! — деган овоз эшитилди.

— Мен ҳам! — дея қичқирди яна аллаким.

— Мен ҳам! Мен ҳам! — бирин-кетин хитоб қилишарди жангчилар.

— Ана шунда биз тантанавор суратда қасамёд қиламизки, ушбу ўлжа ҳақли равишда кимга тегишли бўлса, — дея нотик паненинг каллахомини кўрсатди, — ўша вако элатининг сардори бўлади!

— Қасамёд қиламиз! — бир оғиздан ҳайқиришди давра қуриб турган жангчилар, ҳар қайсиси қўлини кўксига қўйиб,

— Бас, етар! — деди кекса жангчи. — Вако қабиласининг сардори, садо бер! Ўз элатинг қаршисига чиқ!

Орага қабристон сукунати чўкди. Ҳар бир жангчи бошқаларнинг афтига сиичиклаб тикилар, ҳаммаларининг юраклари гурсиллаб тепар, барчалари янги сардорни қутлашга тайёр эди.

Ўзини қандайин шон-шарафу юксак мартаба кутаётганини тасаввур ҳам қилмаётган Карлос хиёл четроқда турар ва ўзининг қизил танли дўстларини қизиқиш-ла кузатар эди. Кекса жангчининг нимага даъват этаётганини фаҳмламаётган ҳам эди. Бироқ, ёнида турган ҳинду испанчани билар экан, ана ўша ниҳоят Карлосга жангчилар нимани кутишаётганини тушунтирди. Карлос камтарона тарзда ўз эътирофу иқрорини эълон қилишга оғиз жуфтлаган ҳам эдики, даврадаги жангчилардан бири хитоб этиб қолди:

— Яна нимани кутяпмиз ўзи? Агар қамсуқумлик ўша жангчининг тилини боғлаб турган бўлса, унинг қуроли айта қолсин буни. Ана қаранглар, унинг камон ўқи ҳанузгача қотилнинг танасига қадалганча турибди-ку. Уни тамғаси бор. Балки тамғаси айтиб берар жангчининг исмини?

— Ҳақ рост! — деди кекса жангчи тўлқинланиб. — Камон ўқидан сўраганимиз бўлсин!

Шундан сўнг олдинга бир қадам ташлаб, паненинг таъинидаги камон ўқини суғуриб олди-да, уни баланд кўтарди.

Ҳамманинг кўзи ўқнинг учидаги найзага қадалди-ю, ўша ондаёқ бараварига таажжуб нидоси янгради: ўқ нидоси маъдан эди. Бирор вако зоти ҳеч қачон бундай шарҳани ишлатмаганди.

Ўша лаҳзадаёқ жамки саволу ҳайратга тўла кўзлар Қарлосга, бизон овчисига қаратилди. Улим келтирган ўқни унинг қўллари йўллаганини тушунди барчалари; аллаким эса учинчи паненинг милтиқ ўқидан ер тишлаганини кўриб, ўз кашфиётини баралла маълум қилди. Бу ҳол уларда узил-кесил ишонч ҳосил қилди.

Ҳа, шундоқ, шубҳа бўлиши мумкин эмас: уларнинг сардорлари қасдини оқ юзли олган!

XVII БОБ

Эндиликда жангчиларнинг нимани суриштириб ётганларини билиб олган Қарлос олдинга чиқиб, испанчадан унча-мунча хабардор ҳинду кўмагида сардорнинг қандай ҳалок бўлгани ва мазкур ҳалокатли олишувда ўзининг қанчалик иштироки борлигини икки оғизгина қилиб гапириб берди.

Унинг сўзларига жавобан маъқулловчи ғовур янгради, ёш жангчилардан энг қизиққонлари овчи томон отилиб, қўлини маҳкам қисиб, қизгин миннатдорчилик билдира кетдилар. Эндиликда ўзларининг соғ-омон қолганлари эвазига айнан Қарлос олдида бурчли эканликларини деярли барчалари билиб олгандилар. Негаки, кечаси милтиқдан узилган ўқ овози ваколари хавфдан огоҳ этганди-да, ахир. Агарда у бўлмаганида панелар қароргоҳни ғафлатда қолдириши тайин эди, ана унда, ким билсин, бу кун қандайин оқибат-ла тугарди? Худди ана ўша милтиқ овози эшитилгани учун ҳам панелар ўзлари сира кутмаган қаршиликка учраган эдилар-да; уларни жувонмарг қилган ва омон қолганларини шармандаларча чекинишга мажбур этган ҳам ўша ўқ овози бўлган эди.

Овчининг ўзлари тарафда жанг қилаётганини ва душманларини ўлдираётганини кўрганларида ваколарнинг қалби миннатдорлигу қувонч туйғуларига тўлганди; энди бўлса, оқ юзли жангчи яна суюкли сардорлари

қасдини олганини тушунгач, улар ўз сезги-туйгуларига шунчалик эрк бердиларким, ҳаво бир неча дақиқа ҳайратлию ҳаяжонли ҳайқириқлардан титраб, ларзага келиб турди.

Ҳаяжонланиш бир оз пасайгач, кекса сардор тагин олдинга чиқди. Барча уни бағоят ҳурмат қилар ва кўришиб турибдики, ҳамиша сўзига қулоқ соларди. Унинг бу галги сўзлари Карлосга қаратилди.

— Оқ танли жангчи!— деди у.— Мен вако қабила-сининг жасур жангчилари билан гаплашдим. Сенинг олдинда кўп жиҳатдан қарздор эканликларини ҳаммалари тушуниб-фаҳмлаб туришибди, кейин, уларнинг миннатдорчилигини сўз билан ифодалаб бўлмайди. Биз бу ерда ҳозиргина нима хусусида кенгашиб олганимизни сенга тушунтиришди. Мана шу ерда, ҳалок бўлган сардоримиз тепасида, унинг қасдини олган одам бизнинг сардоримиз бўлади, деб қасамёд қилдик. У пайтда биз ўша мардимайдон жангчи — оқ танли биродаримиз бўлиб чиқади деб ўйламаган эдик. Ҳозирда эса буни биламиз, локигин шу нарсани деб қасамимизни бузиб, сўзимиздан қайтармидик? Йўқ асло! Буни хаёлимизга ҳам келтиролмаймиз. Қулоқ сол: ўз қасамимизни яна бир карра таптана билан такрорлаймиз!

— Қасамимизни такрорлаймиз!— жангчилар даврасидан акси садодай янгради бу ҳайқириқ, айни чоқда ҳар бири қўлини кўксига қўйди.

— Оқ танли жангчи!— сўзини давом эттирди нотик. — Бизнинг оптимиз муқаддас. Биз сенга таклиф этаётгандан юксакроқ шараф йўқ жангчи учун. Ушбу шон-шараф, илтифот тошини чинакам жангчигина кўтара олади. Кучсиз, ночор одам, ҳаттоки у машҳур сардорнинг авлоди бўлган тақдирдаям, ҳеч қачон бошқармаган мард вако элини. Ушбу шарафли мартабани сенга таклиф этишдан чўчимаймиз биз. Агарда уни қабул этсанг, бошимиз осмонга етади. Эй мусофир! Биз ўзимизнинг оқ танли сардоримиз билан фахрланамиз, зеро сен, гарчи оқ танли бўлсанг ҳам, ҳақиқий жангчисан! Биз сени ўзинг ўйлаганингдан кўра яхшироқ биламиз. Биз сен ҳақингда иттифоқчиларимиз, команчилардан эшитганмиз, ҳа-ҳа, бизон овчиси Карлос тўғрисида эшитганмиз. Биламиз: сен — улўғ жангчисан, локигин биз шу қатори ўз ўлкангда, оқ танли одамлар орасида сен ҳеч ким эмаслигингни ҳам биламиз. Тўғри сўзлимиз

учун бизни кечирасан-у, локигин рост эмасми ахир бу? Биз сенинг халқингдан нафратланамиз: негаки сенинг биродар-ҳамжинсларинг зolim ҳукмрон, ё қул. Буларинг барини биродарларимиз команчилардан билиб олганмиз, ишнакейин, улар сен тўғрингда кўп нарсаларни гапириб беришган. Шундай қилиб, сени кимлигини биламиз биз. Бу аτροφларда пайдо бўлганигда-ёқ таниганмиз сени ва сени кўришдан хурсанд бўлганмиз. Биз сен билан худди дўстимиздай савдо қилдик. Эндиликда эса сени ўз биродоримиздай қутлаймиз, сени башарти сени ўша қадр билмас халқинг билан боғлайдиган ришта-муносабатлар бўлмаса, миннатдорлигига заррача шубҳа йўқ халқ оиласига қўшил, деймиз. Биз билан қол, бизга сардор бўл!

Қария сўзини тугатар экан, узлуксиз акс-садо таралгандай бўлди: давра қуриб турган жангчилар олдинкетин унинг сўнгги сўзларини такрорлаётган эдилар; кейин нақ сув қуйгандай жимжит бўлиб қолди ҳаммаёқ.

Карлос шунчалик таажжубда қолганидан дарҳол жавоб беролмади. Уни ҳайрон қолдирган нарса фақат ўзига хос тарзу услубда таклиф этилаётган ушбу фавқуллодда шон-шарафгина эмасди — кекса жангчининг унинг ҳаётидан бунчалик яхши хабардорлиги лол қилиб қўйган эди овчини. У ҳақиқатан ҳам команчилар билан савдо қилар, улар билан дўстона муносабатни давом эттирар команчилардан баъзи бирлари гоҳи-гоҳида ҳатто Сан-Ильдерфонсога бориб ҳам турарди. Аммо лекин ёввойиларнинг ижтимоий шароитининг туб моҳият-ҳолати маъносига бу қадар етиб бора олганлари галати туюлмайдими ахир? Ахир бу ҳақиқат: Карлос ўз халқи орасида хўрланган, таҳқир этилган одамдай бир гап-ку... Бироқ, буларнинг бари қанчалик галати ва ҳайрон қоларли бўлмасин, ушбу хусусда бош қотиришга фурсати йўқ эди шу тобда: жангчилар жавоб кутншмоқда эди.

Нима жавоб қилсин? Четга чиқариб қўйилган, орзумидлари пучга чиққан унингдек одамга тўсатдан мазкур таклиф қабул қилса арзигундек туюлиб кетди. Ўз уйида аҳволи қулдан бир баҳя фарқ қилади, холос: бу ерда эса раҳнамолик қилади — бир оғиздан сайланган ҳукмдор.

Гарчи ваколарни ёввойи деб атасалар-да, чинакам жангчи улар, уларда юрак бор, одамшаванда улар, ўз-

лариям ҳақиқий одам. Улар исботладилар буни. Онаси билан синглиси унинг тақдиру қисматиға шерик бўладилар, лекин Каталина... Каталина ҳақдаги ўй бутун шубҳа-гумонларига барҳам берди-ю, ортиқ бош қотирма. Қўя қолди.

— Саховатли жангчилар!— дея гап бошлади у.— Менга кўрсатаётган илтифоту марҳаматларингиз қанчалик беназир эканини чин қалбимдан ҳис қилиб турибман. Сизлардан қанчалик бениҳоя миннатдор эканимни айтишга муносиб сўз тополмай турибман. Шу сабабдан сизларга қисқа ҳамда очиқчасига жавоб бераман. Ҳа, ўз ўлкасида беобрў эканим, қашшоқларнинг қашшоғи эканим рост, лекигин мени қадрдон тупроғим билан боғлаб турган ришталар бор — бу қалб ришталари, улар мени орқага қайтишга мажбур этипти. Сўзим тамом, вако жангчилар!

— Бас!— деди кекса жангчи.— Кифоя, довюрак мусофир! Нимага бундай қарорга келдинг деб қисталашигига олиб ўтирмаймиз биз. Башарти сен бизга сардор бўлмаган чоғингда ҳам, дўстимиз бўлиб қоласан. Сенга озроққина бўлса-да миннатдорчилик билдиришга имкониятимиз бор. Сен бизнинг ғанимларимиздан озор топиб, бисотингдан айрилдинг, аммо биз сенинг хачирларингни топдик, улар яна сеники. Сендан тагин бир нарсани ўтинамиз: бизнинг кулбаларимизу дастурхонимиз жўнгина, локин бир неча кун биз билан қолиб, меҳмонимиз бўл. Розимисан?

— Қол!— баравар такрорлашди жангчилар.

Шундай қилиб, Карлос ўша заҳоти қабул этди таклифни.

Бир ҳафтадан сўнг бизон терию қоқ гўшт ортилган элликка яқин хачир Льяно Эстакадонинг шарқий ёнибағридан аранг кўтарилиб, мазкур ҳувиллаган ясситотлик бўйлаб шимоли-ғарб томонга йўл олди. Хачирлардан бирига мишиб олган ҳайдовчи метис эди. Қизил танли пеонлар ҳайдаб келаётган ҳўкизлар хачирлар кетидан тортиб борарди учта аравани; ғилдираклар шунчалик зўр ғижирлардики, ҳатто акас буталари оралаб писиб келаётган бўриларни ҳуркитиб юбораётган эди. Олдинда қорабайир тулпорда чавандоз йигит савлат тўкиб келаяпти; у дам-бадам орқасига бурилиб, кетидаги ажойиб хачирлар уюрига мамнун қараб-қараб қўяди. Бу Карлос эди.

Ваколар ҳақиқатан ҳам қўли очиқ халқ экан. Қаби-
ла ҳалок бўлган сардорларининг учини олган одамга
қилаб хачирни устига юкланган юки билан тортиқ қил-
ганди. Аммо бу ҳали ҳаммаси эмасди. Овчининг кўкра-
гида, камзули чўнтагида ноёб бойлик солинган тўрва-
ча ётибди — бу ҳам ваколар совғаси, яна-тагин улар
ва меҳмонларига бунақанги совғани охириги марта ҳадя
қилмаётганларини айтишди. Тўрвачадаги нима эди ўзи?
Тангами, қоғоз пулми, қимматбаҳо тошларми? Йўқ,
бор-йўғи қум, ҳа, қум-у, лекин сариқ, ялтироқ қум. Ол-
тин эди бу!

ХVIII БОБ

Байрам кунининг эртасига қалъада чоғроққина туш-
лик зиёфат берилди. Комендантнинг бир неча буйдоқ
ошвалари — маҳаллий ҳазилкаш-чистончилар, шу қа-
торда Эчевариа сатанг ҳам таклиф этилганди. Меҳмон-
лар орасида руҳоний тақсирлари ҳам, миссионер ота-
хонлар ҳам борийди; бу икковларининг бутун фикри-
хаёли зиёфат дастурхонида — уларнинг ўрнида бўлса
истаган франчисколик ҳам шундай қилиши аниқ эди.

Улфатлар аллақачон мексика пазандалиги маҳсулот-
ларидан озмунчасини: мол гўшти, жаркоп, қалампир-
нинг жамики туридан тотиниб улгурган, ҳозирда зиёфат
камзуллар ечилиб, вино — канарио дейсизми, херес ва
недро дексименес дейсизми, мадераю бордо дейсизми,
бари хилидан — дарёдай қўйиладиган авж палласига ет-
ган эди: столга анвойи турдаги шишалар териб, қалаш-
тириб қўйилганди; кучлироқ ичимликни ёқтирадиганлар
учун чирпитларда олтинранг каталон ҳамда мараскино
ичимлиги қўйиб қўйилганди. Нимасини айтасиз, ко-
мендантнинг ичимлик хазинаси чакки эмасди. У бу ер-
да фақат ҳарбий комендантгина эмас, шунингдек, юқо-
рида зикр этганимиздек бож тўпловчи ҳам эди — бош-
қача қилиб айтганда, божхона мутасаддиси вазифасини
ижро этарди, шул боисдан ҳам бот-бот саватда шампан
шуд дўжна-дўжна бордо виноси сифатида озроқ-озроқ
совға-салом келиб турарди унга.

Меҳмонлар тузукқина ичиб улгуришганди. Руҳоний
ўз рутбасига қарамай, ҳаммага ўхшаб оддий одамга
айланганди; иезуит отахонлар хирқаю тасбеҳларини

унутган, мартабаси улуғроғи — отахон Хоакин роҳиб бўлишидан илгари бошдан кечирган беҳаё саргузаштларидан ҳикоя қилиб, меҳмонларнинг кўнгилларини хушнуд, димоқларини чоғ этиб ўлирарди. Эчевариа Париж, оқбилак оғимчалар ҳақидаги латифалар, ўзининг беҳисобу бесаноқ саргузаштларидан сўзлаб берарди.

Испан зобитлари мезбон сифатида, ўз-ўзидан равшанки, кўпдаям сергаплик қилишмаётган эди; аммо шуҳратпараст комендант, худди зарҳал попукли погонни илк марта таққан ўспирин лейтенант сингари ўзини тутиб туролмай, такрор ва такрор Севилья гўзаллари устидан қозонган беҳисоб ғалабаларини эслаб қоларди. У апельсинзорлар билан бурканган ўша шаҳарда поли билан узоқ турган ва Андалусиянинг мазкур дурдонасидан завқланиб, унга таҳсин ўқимоқдан чарчамасди.

Робладо Гавана гўзалларини афзал кўрар ва кварталонкаларнинг ўзларига хос жайдари, аммо шукуҳли ҳусни-жамолини оғиз кўпиртириб мақтагани-мақтаган эди. Гарсия Гвадалахара қиз-жувонларининг жажжи оёқчаларининг шайдоси эканини айтди, аммо-лекин бу кўҳна испан шаҳри Гвадалахара эмас, балки Мексиканинг айнан шу номдаги бой-бадавлат вилоятини тилга олаётган эди. У илгари ўз қисми билан худди ўша ерда жойлашган эди.

Улар ниҳоятда хушмуомалалигу боодоблик ила сўзлашни талаб этадиган жабҳа — аёллар хусусида шу тариқа қўполдан-қўпол ва беадабларча вайсардилар. Уч нафар черков хизматчисининг ҳозирлиги уларни тийиб, оғзиларига қопқоқ бўлолмаётган эди. Аксинча, иккала иезуит отахон билан руҳоний ўзларининг ишқий алоқалари хусусида бошқалар сингари ношоён сўзларла беҳаёларча мақтанишарди, зотан учовларининг ҳам гуноҳлари дастурхон теграсида жам бўлган бошқа улфатлариникидан заррача кам эмасди. Одатдагидек шароитда улар бир қадар ўзларини тутиб туришлари, вазминлик намоён этишлари мумкин эди, аммо бу ерда, бир неча бор қадаҳ бўшатилганидан сўнг, ушбу тийиқлигу вазминлик изсиз ғойиб бўлганди; мазкур даврада улар қатрача уялиб-тортинишмаётган, ҳозир бўлганлардан ҳеч бири, ўз навбатида, улар олдида тирноқчалик андиша, навозиш қилмаётган эди. Уларнинг ясама авлиёсифатлигию тавозелари содда-аноийи деҳқонлар ва

соддадил пеонларгагина аталган, холос. Дастурхон устада эса табаррук отахонлардан гоҳ бири, гоҳ бошқаси аҳён-аҳёнда ўзига тақводорона тус берарди, илло ҳавил тариқасидагина, қайсидир сўзлаб бераётган саргушитига ўткирлик ҳамда жозибадорлик бахш этиш ниятидагина шундай қиларди. Умумий суҳбат тобора тартибсиз, пойинтар-сойинтар тус ола бошлади, шунда алликим ҳаммаларини нафасларини ичига тушириб, гунг қилиб қўйган исмини айтиб қолди. Бу бизон овчиси Карлоснинг исми эди.

Бу исми эшитганида ҳозир бўлганлардан баъзи бирларининг турқи ўзгариб кетди. Робладо чимирилди; Вискарранинг башарасини буриштириб юборган ҳис-туйғулар қоринмасини аниқлаб, фаҳмлаб олиш осон бўлмасди шу тобда; иезуит отахонлар билан руҳонийга ҳам овчининг исмини эшитиш ҳуш келмади чоғи.

Карлосни тилга олган одам Эчевариа эди.

— Ор-номусим ҳақи онг ичаманки, бунақанги но-бакорликни ҳатто республикачи Парижда ҳам кўрмагандим-а! Аллақанақанги жин ургур савдогар, бир пайрига арзимайдиган нотавон, эт билан тери сотадиган пандавақи... қисқа қилиб айтганда ўзлари битта этфуруш, ўша жин чалгур бизонлар кушандасилар-у — тўсатдан юрак ютиб... Parbleu!

Эчевариа аслида испанчалаб гапирса ҳам, у ҳамиша французчалаб сўкар эди. Шунда хиёл одоблироқ, силлиқроқ чиқади.

— Кўз кўриб, қулоқ эшитмаган сурбетлик! Тоқат қилиб бўлмайди бунга!— деган овозлар янгради.

— Менимча эса, соҳибжамол хонимнинг унчалик жаҳли чиқмади-ёв,— деб гап қистирди столнинг пойгак томонида ўлтирган қўполроқ йигитча.

Унга бараварига эътироз билдира кетишди. Робладо ҳаммадан баландроқ тортишишга тушди.

— Дон Рамон Диас,— дея мурожаат этди у йигитчага, — сиз шунчаки ҳеч нимани кўриб, пайқамадингиз. Мен хонимнинг ёнида тургандим, шуни-чун унинг қандай жигибийрони чиқиб кетганини (бу гирт ёлгон эди, Робладонинг ўзи ҳам биларди ёлгонлигини) биламан, нейин, отасини ҳам....

— Ҳа, ҳа, отасини қўяверасиз, албатта!— дея хитоб

¹ Parbleu — жин ургур! (Франц.)

қилди дон Рамон кулиб.—Унинг қанчалик ғазаби қайнаб кетганини ҳамма кўрди. Бу мутлақо тушунарли. Ҳа-ҳа-ҳа!

— Қим ўзи ўша Карлос?— деб сўради меҳмонлардан бири.

— Ажойиб чавандоз,— дея жавоб берди дон Рамон. — Бу фикримга комендантимишнинг ўзлариям қўшилсалар керак.

Ушбу қўполу дадиллона сўзларни айтар экан, Вискаррага қараб сирли ишшайиб қўйди. У эса бунга жавобан чимирилди.

— Озмунча пул ютқазмадингиз унга, тўғриямасми?— дея сўради руҳоний Вискаррадан.

— Фақат Карлосга эмас,— жавоб қилди комендант — шериги, иккинчи қўпол нухага. Чамамда, икковлари ошна кўринади. Энг бемаъни томони шундаки, қора халқдан бирор кимса билан гаров ўйнаргансан, кейинги сафар ютарман деб умид қилиб бўлмайди асти. Негаки, улар билан оддий кунларда учрашмайсан-да, ахир.

— Лекинига ўша кимакан ўзи?— деб сўради яна бошга меҳмон.

— Ўзи ким дейсизми? Э, шунчаки бир бизон овчиси, вассалом.

— Шундоқ денг! Наҳотки унинг тўғрисида бошқа ҳеч нимани билмасангиз? Унинг сочи малла — бу жуда ғалати, нега деганингизда, сочи оқ-малла мексикалик бўлмайди-ку, ахир. Мабодо креол эмасми у? Балки бискайликдир.

— Унисиям, бунисиям эмас. Айтишларича, америкалик у.

— Америкалик?

— Унчалик ҳам тўғри эмас бу: отаси америкалик бўлган. Мана, тақсирим унинг ҳақида сўзлаб беришлари мумкин.

Шундай қилиб руҳонийдан бизон овчиси ҳаётидан баъзи бир тафсилотларни сўзлаб бериб улфатларнинг вақтини хушлашни ўтиндилар. Унинг отаси, айтганларидек, америкалик бўлган. Бу ғалати одамнинг бир замонлар мазкур водийга қаердан ва қандай йўл билан келиб қолгани, шу ерда ўртоқлашиб қолишга аҳд этгани қоронғи эди. Янги Мексиканинг кенту қишлоқларида бунга ўхшаш воқеалар камдан-кам учрарди. Яна ҳам таажжубланарли жиҳати — америкалик ёлғиз эмас-

ди: ёнида америкалик аёл, Карлоснинг онаси, авлиё Иоани байрами куни умумжамоат диққатини тортган кампир ҳам бўлган. Тақводору табаррук оталарнинг келгиндини ёки аёлини христианликка жалб этиши йўлидаги жамики уринишларидан наф чиқмаган Кекса траппер (Карлоснинг отаси траппер бўлган) қандайгина худобехабарларча, шаккогона яшаган бўлса, ўшандайича оламдан ўтган, шаҳар аҳлининг бари унинг бевасининг иблис билан алоқаси борлигига имони комил экан. Бу ҳол черков учун иснод эди, шул боисдан ҳам иезуит отахонлар оқ-малла сочли оилани аллақачонлароқ қувғин қилган бўлардилар-а, аммо Вискаррадан аввалги комендант нима сабабдандир унга ҳомийлик қилиб, серғайрат черков аёнларининг эзгу ниятларини жиловлаб келган.

— Илло, кабальеролар, бундайин худобехабар шаклоклар хавфлидирлар!— дея хитоб қилди иезуит Вискаррага қараб оларкан.— Уларнинг қалбида жамоат тартибига таҳдид солгувчи исёнкорлик уруғи униб етилади. Ушал оқ-малла сочли овчи уйига қайтган кезларда шундай кимсалар ила алоқада бўлиб, борди-келди қиладирким, уларни мундоқ тузук-қуруқ кузатолмайсан ҳам. Уни доим анави шубҳали тагнослар билан бирга кўришаркан, ўшалардан баъзилари унинг хизматида экан.

— Шундоқ денг, тагнослар билан муомала қиладими ҳали?— деган овоз эшитилди.— Хавфли шахс эканку унда! Овчидан кўз-қулоқ бўлиб туриш керак унда.

Кейин сўз овчининг синглисига бориб тақалди. Суҳбатдошларнинг барчаси озми-кўпми унинг ҳуснини мақташди, уларнинг гапларини эшитаркан Вискарранинг турқи-таровати дақиқа сайин ўзгара борди. Суҳбат бу аблаҳни меҳмонлар таҳмин этишлари мумкин бўлганидан кўра чандон бора кўпроқ фикру хаёлини банд эта бораётганди, қисқаси, қандай ҳаракат қилиш режаси аллақачоноқ тайёр эди.

Унинг хизматкорлари ва шотирлари соҳибларининг насткашу мунофиқона ниятларини амалга ошириш йўлида аллақачон ишга киришгандилар.

Бизон овчисининг синглиси тўғрисида ҳангомаллашиб олишгач, улфатлар бошқа маҳаллий гўзалларни саранини — саракка, пучагини — пучакка ажратишга ўтишди. Дёллар хусусида гаплашмай, яна нима ҳақда гаплашар-

дилар денг-а! Уларнинг тезда суҳбатлари ибтидосига қайтганларининг ажабланадиган жойи йўқ эди, янги-янгидан бўшатишган вино қадаҳлари таъсирида мазкур суҳбат яна ҳам «жозибали», ранго-ранг тус олди.

Улфатчилик шу билан тугадики, баъзи бировларнинг бутунлай кайфи ошиб қолди; алламаҳал бўлиб қолганди, меҳмонлар хайр-маъзурга тушишди шунда бир хилларни ҳатто уйигача элтиб қўйишга тўғри келди. Иезуит отахонлар билан руҳонийга аскарлардан қўшиб жўнатдилар, зеро уювлари ўлгудек ичган, илло бу биринчи марта бўлаётгани йўқ эди.

ХІХ Б О Б

Комендант билан ошнаси Робладо ёлғиз қолишди; қадаҳларни бошқатдан тўлатиб, қўлларига сигара тутган кўйи суҳбатни давом эттиришди икковлон.

— Шундай қилиб, Робладо, сиз чиндан ҳам йигитчанинг севгиси бир ёқлама эмас деб ўйлайсизми? Мен ҳам шу фикрдаман, акс ҳолда у бундай беорларча қўполликка ботинолмасди.

— Энди бунга бутунлай имоним комил бўлди,— дея жавоб қайтарди капитан.— Кеча оқшом холи жойда учрашганларига шубҳам йўқ. Крусеслар уйига яқинлашиб қолганимда бировнинг қорасига кўзим тушди: у худди ҳовлидаги аллаким билан гаплашаётгандай ихота панжарага суяниб турарди. Мен бўлсам уни дон Амбросионинг оғайниларидадан биридир деб ўйлабман. Яқин бориб қолганимда ўша одам панжарадан узоқлашиб, сакраб отга минди. У елкапўшига ўралиб олди, шуни-чун афтини кўролмадим. Лекин отни танидим. Кўз олдингизга келтиринг-а, бу кеча бизон овчиси миниб юрган қорабайирнинг ўзгинаси эди! Ичкари кирдим-да, хўжайинлардан ким бор, деб сўрадим; хизматкорлар: хўжайин конда, сеньорита эса ўз хонасига кириб кетди, бугун ҳеч кимни қабул қилмайди, деб жавоб беришди. Жин урсин! Мен ўзимни йўқотиб қўйдим, уларга нималар деганимни ҳам эслолмайман. Сира ақлга сиғмайди-я! Ҳар қалай ўша гадовачча у билан зимдан танишиб олган — менинг аскар эканим қанчалик ҳақ бўлса, бу гап ҳам ўшанчалик ҳақ.

— Ҳа, сира ишонгинг келмайди! Хўш, буёғига нима қилмоқчисиз, Робладо?

— Хе, буёғига боплаб ўзим ғамини ейман-а хонимни! Эндиликда яхшилаб кўз-қулоқ бўлишади унга. Дон Амбросиога унча-мунча шама қилиб шипшиб қўяман. Ахир менинг сиримдан хабардорсиз-ку, полковник! Хонимнинг сепи — коп, мени нақ оҳанграбодай ўзига тортиётган нарса мана нима. Лекинига рақибим аллақанақанги бир бизон овчиси бўлиб чиққани қанчалик бемаъни гап-я!

Робладо хохслаб кулиб юборди, бироқ кулгиси ясама ва ғамгин чиқди. Шу пайт иттифоқо бошига янги фикр келиб қолди.

— Виласизми, Хоакин тақсирлари малласочнинг оиласини хуш кўрмайди-ку, ахир,— сўзини давом эттирди у.— Бугунги шамаларидан фаҳмлаб олдим буни. Башарти черков аралашгудек бўлса кўпдаям шов-шувсиз кутуламиз-қўямиз ўша овчидан. Иезуит отахонларимизга унинг шаккоклигини исботлаб берсак бас, ана унда тақсирларимиз уни Сан-Ильдефонсодан қувгин қилишади. Тўғрими?

— Ха, албатта,— совуққина жавоб қилди Вискарра пинодан ҳўплаб.— Мабодо ўша овчи қувгин қилинадиган бўлинса, қадрдоним Робладо, яна баъзи бировни ҳам қувишга тўғри келади. Тиканларига қўшиб атиргулниям юлқиб ташлаймиз-ку, унда. Гапимга тушуняпсизми ўзи?

— Батамом.

— Мен эсам буни мутлақо истамайман, ақалли ҳозирда. Орадан пича ўтгач биз бутун тикан-пикани, бутасию илдиз-пилдизигача қўшиб атиргул билан ҳам жон-жон деб хайр-маъзур қилишга тайёرمىз-да!— қаҳ-қаҳ урганча сўзини пиҳоясига етказди Вискарра.

— Ҳа, айтмоқчи, муваффақиятларингиз қандоқ, полковник? Уйида бўлдингизми уни?— деб сўради капитан.

— Йўқ, қадрдон, қўл тегмади. Унинг уйи яқин эмаслигини унутманг. Кейин, токи акаси узоқроққа кетмагунича ташрифни умуман қўятурмоқчиман. Акаси йўқлигида кўнглини овлаш хийла қулайроқ бўлади.

— Узоқроққа кетгунича? Бу нима деганингиз?

— Бу, овчи яқин-орада даштга жўнайди, деганим. Эҳтимол, ҳаттоки бир неча ойга. Уёқда бизон овлайди, ҳиндуларни лақиллатади... хў-ўш, шунга ўхшаш ва ҳоказолар.

— У-ҳў! Буёғи чаккиямас.

— Кўриб турибсизки, азиз дўстим, шошилишнинг асти ҳожати йўқ. Сабр қилинг — олдинда етарлича вақтимиз бўлади. Имоним комилки, то бизнинг жасур бизон овчимиз сафардан қайтгунича режаларимизни қотириб бажаришга улгураемиз. Сиз бой конларни қўлга киритасиз, мен эсам...

Гап шу ерга етганда эшик оҳиста тиқиллади-ю, улар сержант Хомеснинг овозини эшитишди; у, комендант билан гаплашсам бўладими, деб сўраганди.

— Кираверинг, сержант! — қичқирди полковник.

Шундан сўнг хонага башараси дағал, қаҳри қаттиқ сувори кириб келди; туриш-турмушидан унинг ҳозиргина отдан тушгани кўриниб турарди.

— Хўш, қалай, сержант? — деб сўради Вискарра у яқин келгач. — Гапираверинг! Капитан Робладо олдида ҳамма нарсани гапираверишингиз мумкин.

— Улар энг чеккадаги, водийнинг нариги бошидаги уйда туришаркан, полковник; бу ердан ўн миль, кам эмас. Улар уч кишигина экан: она, сингилу акалари — ўша, ўзлари байрам чоғида кўрган йигит. Хизматкорлари тагнослардан, ё уч, ё тўрт киши, улар ов пайтида овчига ёрдамлашишар экан. Унинг бир нечта хачири, ҳўкизлари билан аравалари бор экан — бор ҳўжалиги шу. Булар ов учун керак экан. У ҳозир ҳам овга ҳозирлик кўряпти — уч-тўрт кундан қолмай жўнаб кетаркан. Эшитишимча, у бу гал узоқ муддатга кетармиш, иннайкейин, аллақайси янги йўл билан, Льяно Эстакадо орқалимиш.

— Льяно Эстакадо орқали?

— Менга шундай дейишди.

— Тағин нима гаплар бор, сержант?

— Ҳеч қанақа, полковник. Фақат қизнинг севгилиси бор экан — байрамда сиз билан гаров бойлашиб, сиз талайгина ютқизган ўша йигит.

— Воҳ, жин ургур! — деб юборди Вискарра зумда қорайиб кетар экан. — Гап буёқда экан-да! Ўзим ҳам шундоқ бўлса керакдир-ов, деб ўйлагандим-а. Қаерда тураркан у?

— Уларга яқин жойда. Ўзининг ранчоси бор экан, бадавлат йигит дейишди уни, чорвадор сифатида, албатта.

— Сержант, ўзингизга каталон виносидан стаканга қўйиб олинг.

Сувори аскар қўл узатиб, чирпит шишани энгаштириб, стаканни тўлғазди-да, зобитларга эҳтиром-ла таъзим қилиб, бир кўтаришда бўшатди уни.

Кейин, ортиқ кераги йўқлигини фаҳмлаб, қўлини чеккасига қилиб, чиқиб кетди.

— Нимаям дердик,— деди полковник,— кўриб турибсизки, чаккиямас, сизнинг ишларингиз юришиб кетинти.

— Ўзлариники ҳам,— деб жавоб қайтарди Робладо.

— Унчалик эмас.

— Сабаб?

— Анави хуштори, ўша чорвадор ёқинқирамай турибди. Пулдор у, устига-устак қўрқоқлардан эмас — чамамда, оз ташвиш орттирмайди-ёв менга. У яккама-якка олишувга чақирса бўладиганлардан эмас — ақалли мен учун, менинг мартаба-рутбамга муносибмас бу. Аммо у туб ерлик, овчига ўхшаган келгинди эмас, ерликлар билан қони бир, бу ерда уни ҳамма яхши кўради. Ростки у бу ишга алоқадор экан, иш тамоман ўзгача тус олади... Дарвоқе, бари бир гўр эмасми-я! Ҳали шу пайтгача камина муваффақиятсизликка учраган ҳол бўлганмас. Хайрли тун, капитан!

— Хайрли тун!— жавоб қайтарди Робладо.

Шундай деб улар стол ёнидан баравар қўзғалишиб, ўз хобхоналарига тарқалишди.

XX БОБ

Ранчо ва асиендолар дарё ёқалаб Сан-Ильдефонсодан деярли ўн милча чўзилиб кетган эди. Шаҳар яқинида кўпроқ эди улар; лекин оқим бўйлаб қуйи томонга қанча узоқлашишса, улар ўшанчалик сийраклашиб, истиқоматчилари ҳам тобора камбағаллаша борарди. Бадавлатроқ фермерлар билан чорвадорлар жангари ҳиндулардан қўрқишар ва қалъага яқинроқда иморат солишни маъқул кўришар эди. Камбағаллик эса бир хилларни аксинча довюрак бўлишга, нақ чегара ёқалаб жойлашишга мажбур этарди. Мана неча йиллардирки Сан-Ильдефонсо кентига ҳеч ким ҳужум қилмаётгани сабабли талай майда фермер ва чорвадорлар шаҳардан саккиз, ҳатто ўн миллар нарида ўрнашиб олгандилар.

Бошқа бари ранчолардан ярим милча нарироқда ёл-

ғиз кулба — энг охирги, мазкур водийдаги шаҳардан энг олис уй танҳо турарди. Гүё у шаҳар гарнизони қўриқлайдиган майдон чегарасидан сиртла жойлашганга ўхшарди, зеро бирор соқчилик бўлинмаси қорасини ҳам кўрсатмас эди бу атрофда. Уй эгалари тақдирга ёки апачилар одатда Сан-Ильдефонсога босқин қилиб турадиган ҳиндулар қабиласининг марҳаматига ишонадилар чоғи: уй ҳеч нима билан ҳимоя қилинмаган эди улардан. Эҳтимол бу кулбани айнан бошқа жамики ранчолардан шунчалик олисда ва танҳо жойлашгани мухофаза қилар.

У йўлдан хиёл чеккароқ ҳамда нақ дарё қирғоғида эмас, пича берироқда, қоя кўлагасида турар, қоя билан туташиб, унинг пинжига кириб кетаётганга ўхшарди.

Мазкур қашшоғона кулба, водийдаги жамики уйлар, водийдагина эмас, деярли бутун Мексикадаги каби шиб-балаб, офтобда қуритилган палахса-палахса лой — хом ғишдан тикланган эди. Шу услубда солинган энг олди иморатлардан аксариятининг олд томони оппоқ — демак, қаердадир яқин-атрофда гипс-ганч қатламлари бўлиши керак. Баъзи уйларда, эгалари ўзига бино қўйган, инжиқроқларнинг деразаларига ойна солинганга ўхшайди. Аслида ҳам шундоқ, фақат ойна ўрнига худди ўша гипсдан шишага ўхшаб йилтирайдиган юпқа тахта-пилакчалар солинган — уни Янги Мексиканинг турли бурчакларида айни шу мақсадда ишлатадилар.

Ҳозирда сўз бораётган ранчонинг на деразаси бор, на оқланган эди. У нақ соябондай олға туртиб чиққан қоянинг остигинасида турар, унинг қорамтир деворлари деярли қоя этаги ила туташиб-бирлашиб кетганди; бир неча кўндаланг ёғоч беламаклар билан тўсилган икки туйнук дераза хизматини ўтарди; ана шу туйнуклардан ичкарига бир оз ёруглик тушиб турарди.

Аммо-лекин одатда ланг очиқ турадиган эшиги бўлмаганида ичкари деярли тимқоронги бўлиши турган гап эди.

Водийдан ўтадиган йўлдан бу уй аранг кўзга чалинарди. Ўткинчи сайёҳ ҳеч қачон уни кўра олмасди, ҳаттоки ҳиндунинг ўткир кўзи илғамай қолиши ҳеч гап эмасди уни. Антқа иҳота уни бегона кўзлардан яшириб турарди — дарвоқе, ҳали ер куррасининг ушбу узоғу овлоқ чеккаси наботот олами билан ноошино кимса учун антиқа эди бу кўкат иҳота. Мазкур иҳота чил ус-

туссимон кактуслар сафидан таркиб топганди. Бу ўсимликни — бир текисда тарам-тарам қилиб ариқчалар тушириб рандаланган, йўғонлиги олти дюму бўйи олтидан ўн дюмгача келадиган устунчаларнинг ўзгинаси дейишди. Улар ёнма-ён, деярли бир-бирига тақалиб, ёғоч девор мисоли турар, бунинг устига тўрт томонга шамалоқдек найза-тиканларини ўқталиб ҳурпайиб олганидан ораларидан айтарли ҳеч нима кўринмасди. Вақти-соати отанда мазкур кўкат устунчаларнинг учлари ажойиб — бамисоли мумдан ясалган — гуллар билан қопланади, кейинроқ эса гуллар ўрнида ярқиллаган хушбўй мевалар пайдо бўлади.

Ана шу ихотадан ичкари киргандан кейингина чоққина ранчони кўриш мумкин эди; гарчи кулбанинг деворлари беўхшову дағал бўлса-да, гирди ўралган, фарқда гулга бурканган ажойиб боғча кимнингдир ғамхўр куллари заҳмат чекишидан далолат бериб турарди. Кактус девордан сўнг бошқа ихота — хом ғиштдан терилган настаккина оддий девор қоя этагига бориб тақаладиган майдончани ажратиб туради. Бу кораль — чорва учун қўтон, унинг бир бурчагида чоғроққина омборхона ёхуд отхонага ўхшаш иморат қурилган. Гоҳида ушбу коралда беш ёки олти хачир билан ўн чоғли ҳўкиз туради, отхонада эса — ажойиб тулпор. Бироқ ҳозир у ер бўш, ҳеч бир жондор йўқ. От, хачирлар, ҳўкизлар эгалари билан олис дашти биёбонга кетган.

Уларнинг эгаси — Карлос, бизон овчиси. Бу ўшанинг уйи; у қари онасию сулув синглиси билан шу ерда яшайди. Болалик чоғларидан бери шу уйда яшаб келади у.

Шунга қарамай улар ушбу водий ва шаҳарда ҳаминша бегона бўлиб келишади. На испанлар, на ҳиндулар ўзимизники деб қаторларига қўшишади. Улари ҳам, булари ҳам бир-бирларидан қанчалик фарқ қилсалар, бу оиладан ўшавдан кам фарқ қилмайдилар. Иезуит ҳақ гапни айтганди: Карлос ва унинг қардошлари ҳақиқатан ҳам америкаликлар эди. Ота-онаси водийга жуда илгари келиб қолишганди, уларнинг асли-таги қаерлик эканини ҳеч ким билмасди; уларнинг шарқ томондан келганлари, Улуғ Текисликни кесиб ўтганларинигина билардилар, холос. Улар шаккоқлар эди, мўътабар дин аёнлари уларни ўз қавмлари сафига қўша олмадилар. Башарти собиқ ҳарбий комендант ҳомийлик қилмага-

нида иезуит отахонлар уларни аллақачонлар қувиб-солган ёхуд бирон иложини топиб, бошқа бирон йул билан суробини тўғрилаб қўйган бўлардилар-а бу оилани. Бунинг устига авом халқ ҳамиша икковлари олдида қапдайди хурофий қўрқув ҳис этарди. Кейинчалик ушбу ҳис-туйғу бутунлай Карлоснинг онасига қаратилди ва янгича шакл касб этди: уни жодугар, алвасти деб ҳисоблашар, унга дуч келиб қолганларида шоша-пиша чуқиниб олишарди. Бироқ, бундай ҳол камдан-кам рўй берарди, зотан кампир деярли одамлар кўзига чалинмас эди. Авлиё Иоанн байрамига уни жонидан ортиқ суядиган онаси билан синглисини ўйнатиб овунтиришни жуда-жуда истаган Карлос олиб борганди.

Оилани қуршаган ётсирашда маълум даражада уларнинг келиб чиқишлари америкалик экани сабабчи эди. Ижтимоий келиб чиқиши испан мексикаликлар билан инглиз-америкаликлар бир-бировларига биз ҳикоя қилаётган замонлардан талай-талай даврлар илгаритдан бўён шубҳа, адоват ила қараб келардилар. Миллий адоват заминида дунёга келган мазкур ҳис-туйғуларни дин аҳллари иложи борица рағбатлантириб, макру ҳийлалар билан авж олдириб келарди. Содир бўлажак воқеалар Мексика узра соя ташлаб, дарвоза қоқа бошлаган эди; Америка Флоридани ҳам, Луизианани ҳам ўз таъсири қаноти остига олишга киришганди аллақачон. Бу воқеаларнинг асл маъноси узоқни кўра биладиган энг мулоҳазали кишиларгагина аён эди, албатта, аммо ҳаммани ирқий адоватдек ҳалокатли ҳис-туйғу чулғаб олганди.

Атрофдагиларнинг бари бизон овчисининг оиласига нисбатан салбий фикрда эди, шу боисдан ҳам бу оила водий аҳли билан деярли муомала қилмас, аралашмасди.

Карлос ва унинг хонадондагилар асосан америкаликларга бошқаларга қараганда хийла камроқ адоват ила қарайдиган маҳаллий ҳинду аҳоли — камбағал тагнослар билан алоқа қилардилар.

Карлоснинг кулбасига қадамранжида қилгудек бўлсак, аввало бўйрада ўтириб, шолрўмол тўқиётган очмалла сочли Роситага кўзимиз тушарди. Унинг тўқувчиллик дастгоҳи бор-йўғи қўполдан-қўпол бир нечта ёғоч қисмлардангина иборат. У шунчалик оддий-жунки, дастгоҳ дейишга тил ҳам бормайди уни. Шунга қарамай, ҳар гал қизнинг чаққон бармоқлари текканида дирил-

лаб кетадиган параллель ҳолатда таранг тортилган кў-
кимтир узун-узун иплар ҳеч қанча ўтмай аллақайсидир
шарҳлик гузал ғамза билан бошига ташлайдиган ажой-
иб шолрўмолга айланади. Водийдаги бирорта чевар
шолрўмолни бизон овчисининг сингличалик қотириб
тўқиймайди. Успирилар орасида Карлосга тенг кела-
диган чавандоз бўлмаганидек, тирикчилигию кунига яра-
тган мазкур санъатию маҳорати бобида Роситага ҳам
баравар келадигани йўқ эди.

Кулбада атиги иккитагина хона — деярли шу қабил-
даги жамики кулбаларниқидан икки баравар кўп бу.
Саксининг қалби-руҳиятидаги назокату хушодоблик туй-
ғуси ҳали кучли, Карлоснинг оиласининг ҳаёт тарзи ҳам
ҳишдуларниқидан бўлакчароқ.

Хоналардан каттароғи ошхона, бу ер ёруғу файзли-
роқ, нега деганингизда ичкарига очиқ эшикдан ёруғлик
тушиб туради. Бу ерда меҳробга ўхшаб кетадиган чоғ-
роққина ўчоқни, шакли кўзани эслагидиган беш-олтита
сопол хурмани, ичи ўйилган қовоқдан ясалган бир не-
та пиёла ва косачаларни, маис нон — зогора ясаладиган
оёқлари калта-калта, сип-силлиқ тош столчани, бир
нечта бўйра ва бизон пўстакларини (одатда ўлтирилади
унда), қопда жўхори, боғ-боғ қуритилган гиёҳлар, қизил
ва кўк калампир шодаларини кўрасиз, бор бисотлари
шу, холос.

Бу бутун водийда азиз-авлиёларнинг тимсоли кўзин-
гини қувнатмайдиган яккаю ягона хонадон бўлса ке-
раго-ов. Бу ерда ростдан ҳам бидъатчи-шаккоклар исти-
қомат қилади чоғи.

Аммо ҳаммадан бурун ўчоқ олдида трубка чекиб ўл-
тирган кампирга тушади кўзингиз. Жуда ғалати-да, бу
кампир, кейин, турган гапки, қисматиям ғалати унинг,
лекин у ўз ўтмишини ҳеч бир кимсага ёрилган эмас ҳа-
ли. Этсиз, дағал юз бичими, оқарган, аммо ҳануз қуюқ,
ҳурпайган сочлари, кўзининг ўтдек чақнаб туриши —
бутун турқи-туси ғалати унинг. Нафақат омию нодон
одамларгагина беихтиёрий равишда гўёки у ҳаммадан
мутлақо бошқача қилиб кўриниши мумкин эди. Шунинг
учун ҳам водий аҳлининг уни жодугар деб ҳисоблаши-
нинг ҳайрон қоладиган жойи йўқ эди.

Росита ерда тиззалаб олганди, қўлидаги чоққина моки арқоқ бўйлаб чаққон бориб-келарди. У куйлаяпти, куйлаганда ҳам олис Америка ўрмонларида туғилган, унга онаси ўргатган шўхчан қўшиқни майину қўнғироқдай овоз-ла куйлаяпти; кейин қадимий романтик испан қўшиғини бошлади — эҳтимол бу «Бурғучи»дир; мазкур ажойиб куй-оҳанг ҳаттоки замонавий «Севмайди...» қўшиғида ҳам ўзининг жозибасини йўқотмаган. «Бурғучи» Роситанинг севимли балладаси бўлиб, бандола чалиб, унинг гитара овозини эслатгувчи торлари садоси жўрлигида куйлай бошлаганида тингловчи чинакамга ҳузур қилиб эшитар, сел бўларди.

Ҳозир эса у вақтни ўтказиш, иши осовроқ кўчиши учун куйлаяпти, бу сафар мусиқа чалмаётган бўлса-да, кумуш қўнғироқ садосидай овози ҳеч қандай музикасиз ҳам майину тиниқ жаранглаяпти.

Онаси трубкасини четга қўйди-да, Роситага ўхшаб, ишга тутинди. У шолрўмол тўқиш учун чархда ип йигирарди. Башарти Роситанинг тўқув дастгоҳи ниҳоятда содда-жўн бўлса, чарх ундан беишбаттар содда — шунчаки бетиним чириллаб айланиб турган урчуққина эди, холос. Кампир ана шу оддий механика ёрдамида шунақанги равон, сип-силлиқ қилиб ип эшардики, ҳақиқий ип йигирадиган машина ҳам ундан ўтолмасди.

— Шўрлик Карлос! Бир, икки, уч, тўрт, беш, олти... олтига чизик тортдим — йўлга чиққанига аллақачон олти кун бўпти. У ҳозир Льяно Эстакадода бўлса керак, ойи. Илойим иши ўнгидан келсин, ҳиндулар ҳам яхши кутиб олишсин-да.

— Хавотир олма, қизгинам. Довюрак ўғлоним отасининг милтиғини ола кетди, кейин, уни ишлатишнинг уддасидан чиқади. Ҳа, уддасидан чиқади. Карлосдан ташвишланмай қўя қол!

— Лекин у сираям бормаган-ку, буёққа, ойи. Тагин бирдан душман қабилаларга йўлиқиб колса-чи?

— Ташвиш қилма, қизгинам, қўй! Карлоснинг ҳиндулардан қўрқинчлироқ душманлари бор, улар шу ерда, яқингинамизда. Қуёнюрак қулваччалар! Улар бизни кўришолмайди... Шу ерлик испанлар ҳам, креоллар ҳам ёмон кўришади бизни... Ҳе испан кўппаклари! Улар бизни сакс бўлганимиз учун кўришолмайди.

— Қўйинг, унақа деманг, ойи! Ахир ҳаммалариям душман эмас-ку, бизга. Дўстларимиз ҳам бор.

Росита дон Хуанни ўйлаганди шу тобда.

— Оз, жудаям кам... Шулариям камдан-кам келишади бизни кўргани. Ҳе, зормидим уларга — пешонамди ўғлим бор-ку, ахир! Ундан азиз, ундан яқин, одамимиз борми, дунёда? Ўзи меҳрибон, юраги мардона, биланги бақувват! Қани, ким тенг кела олади менинг Карлосим билан? Болагинам кекса онасини яхши кўради, ҳа, гилати кекса онасини... Анави пиёнисталар, ҳа, ўшалар гилати деб ўйлашади муштипар онасини. Шунга қарамай у кекса онасини севади. Шундоқ бўлгач, дўстларини нима кераги бор онасига?

У қаҳ-қаҳ уриб кула кетди, ушбу кулгида шунчалик севинчу шодлик оҳанглари янградиким, бундан унинг ўз ўғли билан қанчалар фахрланиши ошкор бўлди-қўйди.

— Қанча юк олиб кетганини айтмайсизми, ойижон! Илгарилари ҳечам бунча кўп олиб кетмасди. Шунча пулни қаёқдан олдийкин-а?

Росита қаердан олганини аниқ билмасди-ю, лекин пкасига қарзга пул бериб турган дўсти айнан ким экинлигини қалбан сезаётгандек эди.

— Вой худойим!— деб сўзини давом эттирди у.— Агарда омади келиб ажойиб молларини ҳаммасини тюзуккина сотса, жуда бойиб кетади-да. У бутун бошли хачир уюрини ҳайдаб келади. Тезроқ қайта қолсайди-я у!

Бир, икки, уч... олти. Ҳа, чизиқлар энди олтигагина бўпти. Қани энди бу тахтачани ҳаммаёғи, ҳар иккала томони ҳам чизиққа тўлиб бўлган бўлса... қанийди-я!

Шу гапларни айтаркан, Росита деворда осиглиқ турган энсизгина кедр тахтачага тикилди. Тахтачада йўниб чизилган олтига чизиқча кўзга ташланарди. Бу Роситанинг ҳам соати, ҳам календари эди: ҳар куни, токи Карлос қайтмагунича, тахтачада биттадан чизиқча қўшилади, шу йўл билан синглиси акаси кетганидан бери қанча вақт ўтганини ҳаммиша билиб туради.

Росита чизиқчалар олтига эмас, балки еттита бўлиб қолишини тасаввур этишга уриниб кедр тахтачага бир-икки дақиқача тикилиб туриб қолгач, яна тўқишга киришди.

Кампир эса бу пайтда урчиқни қўйиб, ўчоқда турган

сопол хурманинг қопқоғини олди. Хурмадан булут ми-соли буғ кутарилди-ю, хонани хушбўй ҳид тутиб кетди: кампир испан пиёзи билан қизил қалампирга ўлдирилган сур бизон гўшти қиймасидан димлама пишираётган эди.

— Димлама тайёр, қизим,— деди у ёғоч қошиқда этдан олиб, тотиб кўрар экан.— Қе, тамадди қилиб олайлик.

— Хўп бўлади, ойн,— жавоб берди Росита дастгоҳи ёнидан қўзғалаётиб.— Мен бирпасда тортилье тайёрлайман ҳозир.

Тортилье — бу фақат иссиғида ейиладиган зоғора нон, аниқроғи, у иссиқ, тўғри товадан олиб ейилганида мазали бўлади, шу сабабдан уни энг охирги пайтда, дастурхонга ўлтирилаётганда ёки тўғридан-тўғри овқатланаётганда пиширилади.

Росита хурмани четроққа суриб, товани ўт устига қўйди. Бошқа хурмада қайнаётган маис — жўхори пишибди. Росита уни ўчоқдан олиб, ёнгинасига, тош столчага қўйди, кейин узунчоқ — бу ҳам тошдан ясалган — жўва билан эзилиб пишган жўхорини ҳаш-паш дегунча қордай оппоқ хамирга айлантирди-қўйди. Хурмани нарироқ суриб, жўвани бир чеккага қўйди-да, қирмизи тусли бармоқчаларини хамирга суқди. Хамирдан зоғора кулчага зарур бўлганича олди-да, зувала ясаб, кифти билан шапатилаган эди, япасқи, юпқа кулча ҳосил бўлди. Ана энди уни қайноқ товага ташлашу ўша заҳотиёқ ағдаришгина қолганди, орадан тагин бир лаҳза ўтгач — қарабсизки, тортилье тайёр-да.

Бунинг бари ниҳоятда чаққонликни талаб этарди, лекин Росита ҳаммасини шундай моҳирона бажарардики, унинг тортилье пиширишда устаси фаранг экани яққол кўриниб турарди.

Идишда зоғора хийла уюлиб қолгач, Росита пиширишни бас қилди; онаси димламани тақсимчаларга аллақачон сузиб бўлганди, шу тариқа икковлари тамадди қилишга киришишди, овқат устида улар на пичоқ, на санчқи, на ҳаттоки қошиқ ишлатишди. Зоғора ҳам иссиққина, хоҳлагандай букласа бўларди, мексикаликлар ранчосида мутлақо ортиқча саналмиш маданий олам жиҳозлари вазифасини ана шу қуймоқсимон зоғора кулчалар адо этмоқда эди.

Ўзларининг камтарона таомларини тамадди қилиб

булишлари биланоқ қулоқларига аллақандай ғалати, хотаниш товуш чалинди.

— Нима бу — нидо солди Росита, дик этиб ўрнидан туриб, қулоқ соларкан.

Ланг очиқ эшик билан деразадан яна ўша товуш «бостириб кирди» хонага.

— Э, бу карнай-ку!— деди қиз.— Аскарлар келишган бўлса керак.

У эшикдан мўралаб қаради, сўнг чопқиллаб ихота ёнига бориб, яшил устунчалар оралигидаги очиқ жойдан ташқарига қарай бошлади. Ҳақиқатан ҳам аскарлар экан. Нарироқда, икки қатордан сафланганча, уланлар бўлинмаси водий бўйлаб қуйи томонга қараб боряпти. Куролларининг ялтираши ва найзалари учидаги байроқчалар уларга қувноқ ҳамда жозибали тус берарди. Роситанинг кўзи тушган сонияда улар отларини буриб, сафларини ўзгартирган, бир қаторга тизилишганча, ихотага қараб, кўкат девордан юз одимча нарида тўхташди. Уларнинг ранчо рўпарасида бежиз тўхтамаганлари аён эди.

«Нима керак экан уларга бу ерда?»— ўша заҳотиёқ хаёлига шу фикр келди Роситанинг. Уланлар бўлинмалари водийдан тез-тез ўтиб турарди-ю, лекин юқорида айтиб ўтганимиздек йўлдан четда жойлашган кулбага ҳеч қачон яқинлашмас эди. Аскарларни буёққа нима бошлаб келди экан?

Росита бу саволларга жавоб топа олмай, кулбага югурди, онасини саволга тутди. Бироқ онаси ҳам жавоб топиб беролмади унга; шунда қиз яна ихота ёнига қайтиб, тагин тирқишдан мўралай бошлади.

Шу пайт чавандозлардан бири, бошқаларга қараганда башангроқ кийингани — зобит экани кўриниб турибди — сафдан ажралиб, кулбага қараб от чоптириб келарди. Ана, жуда яқин келиб қолди у, ана отини шундоқ ихота деворнинг ёнгинасида тўхтатди-да, кактуслар тепасидан ҳовлига мўралади.

Роситага жигали шляпаси билан афтигина кўринди-ю, лекин қиз уни ўша заҳотиёқ таниди. Бу авлиё Ноани байрами куни ўзига беҳаёларча тикилган зобитнинг ўзгинаси эди. Унинг қаршисидаги кимса комендант Вискаarra эди.

Иҳота девор тепасидан мўралаётган зобитга шапа-лоқдеккина боғчадаги гуллар орасида турган қиз яққол кўринаётган эди. У эшикка томон чекиниб, ўзини кулба ичкарасига олаёзган ҳам эди, бироқ у қутуриб ҳуриётган ва нотаниш одамга ташланишга шай турган Бизонни — нақ айиқполвондай келадиган бўрибосарни чақираман деб орқасига ўгирилди.

Унинг овозига итоат этиб ўрганган ит ириллаганча кулбага югуриб кирди. У ниҳоятда норози эди, важоҳатидан тишларини бегона отнинг почаларида синашга тайёр экани кўриниб турарди.

— Ташаккур сизга, гўзал сеньорита,— деди зобит.— Шунчалик саховат кўрсатиб, каминани бу баджаҳл кўппакдан ҳимоя қилдингиз. Қани энди мен бу хонадонда ёлғиз шу жонивордангина қўрқсам эди-я.

— Яна нимадан қўрқасиз, сеньор?— ҳайрон бўлди Росита.

— Сизнинг кўзларингиздан, сулув қиз. Кўзларингиз бу кўппакнинг ўткир тишларига қараганда минг карра хавфлироқ, улар мени аллақачон жароҳатлаб бўлган, Росита лоладай қизариб, тескари қаради.

— Кабальеро,— деди у,— сиз буёққа бир бечора қиз устидан кулгани келмаган бўлсангиз керак. Сўрасам бўладими, нима ишингиз борийди?

— Ҳеч қанақа ишим йўқ, соҳибжамол Росита шунчаки сизни кўргим келди... Йўқ, йўқ, кетманг! Ишим бор, ҳа, ишим... Биласизми, томоғим қақраб кетди, бир қултумгина сув ичиб, уни ҳўллаб олсам. Бир қултумгина сувингизни аямассиз ахир, соҳибжамол Росита?

Энди у суҳбатни чўрт узиб, ичкарига кириб кетишга шай турган қизни қандай бўлмасин тўхтатиб қолишга уриниб шоша-пиша, пойма-пой гапира бошлаганди. Вискаarra сираям чанқамаганди, сирасини айтганда, сув ичгиси ҳам йўқ эди, аммо меҳмондўстлик таомили қизни сув олиб чиқишга мажбур этарди, албатта, ана унда кўпроқ нарсага эришар балки.

Унинг хушомадгўёна сўзларига ҳеч нима деб жавоб қайтармаган Росита ичкари кириб кетди-ю, ўша заҳотиёқ қовоқ косада лим-лим сув олиб чиқди. Иҳота девордаги кўча эшик хизматини ўтовчи очиқ жойга бориб,

қўлидаги сувни Вискаррага узатди-да, сувни ичиб, одинни қайтариб беришини кута бошлади.

Илтимоси шунчаки бахона эканини билдириб қўйишни истамаган комендант ўзини зўрлаб бир неча қултум хўплади, кейин қолган сувни сешиб юбориб, косани Роситага узатди. Қиз уни олмоқчи бўлиб қўл узатган эди, Вискарра қовоқ косани маҳкам ушлаган, ҳирсли кўзларини қадаганича Роситага лўқ бўлиб тикилиб тура берди.

— Эй дилбару дилрабо сеньорита,— деди у ахийри,— беқийс саховат кўрсатдингиз-да! Чиройли қўлчангизни ўйсам бўлармикин?

— Нималар деяписиз, тақсир? Косани беринг, ўтинман.

— Э-йўқ, олдин сувнинг ҳақини тўлайман. Розимисиз?

Шундай деб у косага олтин танга ташлади.

— Керакмас, сеньор, пул олмайман. Ахир, шунчаки одамгарчилик бурчимни бажардим, холос. Менга олтин тангангиз керакмас,— дея гапни калта қилди у қатъий.

— Дилрабо Росита! Сиз менинг қалбимни забт этдингиз, шундоқ экан, нега энди унга қўшиб биттагина олтинни ҳам олақолмайсиз, ахир?

— Гапингизга тушунолмай қолдим, сеньор. Илтимос, пулингизни олинг-у, косани беринг.

— Уни фақат тангаси билангина қайтараман.

— Унда ўзингизга олақолинг косани, сеньор,— деди қиз, кетгани чоғланиб орқасига бурилар экан.— Ишим қолиб кетди.

— Йўқ-йўқ, тўхтанг, сеньорита!— хитоб этди Вискарра.— Яна битта илтифот кўрсатсангиз. Сигарамни тутатиб олгани ўт сўрамоқчийдим. Мана, олинг косани! Мана кўринг, бўм-бўш у. Олтин танга бермоқчи бўлганим учун авф этарсиз-а, мени?

Вискарра қизни ранжитиб қўйганини кўриб турарди, шунинг учун ҳам узр сўраш билан унинг кўнглини тинчлантириш умидида эди.

Росита унинг қўлидан қовоқ косани олиб, янги илтимосини адо этгани кулбага қараб юрди.

Бирор дақиқадан сўнг хокандозчада ўчоқдан озроқгина чўғ кўтариб чиқди.

Ташқари эшик олдига етганида зобитнинг одан тушиб, уни устунга боғлаётганини кўриб ажабланди.

— Йўлда толиқиб қолибман,— деди у Росита ҳокандозчани узатганида.— Офтоб ҳам шундоқ қиздирыптики! Агар ижозат этсангиз, ичкарига кириб, пича дам олволардим.

Ушбу янги илтимос қизга ёқмади-ю, аммо йўқ деёлмасди у, хулласи комендант бирор дақиқадан сўнг шпорларини шилдиратиб, қиличини жаранглатганча кулбага кирди.

Росита орқасида чурқ этмай келарди. Онаси ҳам кириб келган кимсага бирор оғиз сўзни раво кўрмади — ўз бурчагида ўтираркан, зобитга заррача эътибор бермади, ҳатто ўша томонга қайрилиб қараб ҳам қўймади. Кўппак дағдағали ириллаганича атрофидан айлана бошлади, бироқ ёш соҳибаси койиб қўйди уни; ит яна бўйрага узанди, аммо ғазабкор чақнаётган кўзларини чақирилмаган меҳмондан узмади.

Вискарра ичкарига кирди-ю, бир хил бўлиб кетди. Ўзининг ташрифи ёқмаганини кўриб турарди у. Роситанинг оғзидан биронта хушмуомала сўз чиқмади, кейин на кампир, на кўппак бирои ишора-ҳаракати билан меҳмондўстлик аломатини кўрсатди. Аксинча, ҳамма-ҳамма нарса комендантга ўзининг бу ерда номатлуб меҳмон эканини аниқ-тиниқ, сезиб-пайқаб туришга мажбур этаётганди.

Аммо Вискарра бу тоифадаги одамлар ҳис-туйғулари билан ҳисоблашишга ўрганмаган эди. У бундайларнинг ўзини хуш кўриши ёки хуш кўрмаслигига эътибор ҳам бермасди, айниқса ўз ҳузур-ҳаловатига ҳалал берган пайтларида; шунинг учун ҳам у сигарасини ўт олдириб, худди ўз уйидадек бамайлихотир курсига чўқди.

Бир муддат жимгина чекиб ўлтирди.

Бу орада Росита тўқув дастгоҳини сурди-да, унинг рўпарасида тиззалаб, гўё хонада бегона одам йўқдек, ишга киришди.

— У, жуда антиқа экан-ку бу!— дея хитоб қилди зобит, ўзини гўё қизнинг иши жуда қизиқтираётганга солиб.— Бу шолрўмолни қандай тўқишларини бир кўрсам деб юрардим кўпдан... ахир бу шолрўмол-ку, тўғриямасми? Худо ҳақи, жуда қизиқ экан! Демак, мана шундоқ тўқилар экан-да, у. Бир кунда битказа оласизми уни, сеньорита?

— Ҳа, сеньор,— деган лўнда жавоб олди.

— Манави калава оддий ил, тўғрими?

— Ҳа, сеньор.

— Гулларини чиройлилигини қаранг-а! Ҳзингиз Ҳйлаб топганмисиз буни?

— Шундай, сеньор.

— Қарасам, ҳақиқий санъат экан-ку бу! Бу иплар қандоқ тўқилиб қолишини тушуниб, билиб олишни истардим-да.

У курсидан турди-да, дастгоҳга яқинлашиб, тиззалади.

— Ҳақиқатан ҳам жуда усталик билан Ҳйлаб топилган ихтиро экан-да! Биласизми нима, азизам Росита, менгаям Ҳргатсаингиз-чи шу касбни. Майлими?

Кампир шу дамгача ерга қараганича, қимир этмай Ҳлтирган эди, аммо нотаниш кимсанинг қизи исмини тилга олганини эшитганида сесканиб тушиб, унга қайрилиб қаради.

— Мен ҳазиллашаётганим йўқ,— сўзини давом эттирарди айни чоғда у,— ахир, жуда зарур, фойдали касбда бу! Менга ҳам Ҳргатиб қўёлмайсизми?

— Йўқ, сеньор,— деган қисқа жавоб бўлди.

— Йўқ деманг-э, унақа! Жуда унақанги зеҳни пастлардан эмасман! Ҳйлашимча, Ҳрганиб оламан... Чамамда, фақат манави нарсани олинадиде,— у энгашиб, қўлини бармоқлари қизнинг бармоқларига тегадиган қилиб моки устига қўйди,— кейин уни мана бундоқ қилиб иплар орасидан Ҳтказиш керак... тўғрими?

Ана шунда у, худди вужудини бетийиқ ҳирсу эҳтирос чулғаб олгандек, чамаси Ҳзини йўқотиб қўйди-ю, тўсатдан овозини пасайтириб, чўғдай қизариб кетган қизга тикилганича сўзлашда давом этди:

— Росита, гўзал малагим! Сизни севаман мен... Биттагина бўса олай, соҳибжамолим... атиги биттагина бўса!

Шундай деди-ю, қиз Ҳзини олиб қочишга улгурмасиданоқ маҳкам қучоқлаб, чиппа лабларидан Ҳпди.

Қиз қичқириб юборди, бунга жавобан қаттиқ, ғазабкор ҳайқириқ янгради.

Ушбу дақиқагача ҳануз қилт этмай Ҳлтирган кампир Ҳгирган жойида энгашиб, қаддини букканича сакраб турди-ю, бамисоли йўлбарсдай зобитга ташланди. Қўз очиб-юмгунча унинг узун, қоқсуяк бармоқлари зобитнинг томоғидан ғиппа бўғиб олди.

— Қоч, жодугар, йўқол!— деб бақириб юборди у қу-

тулишга уриниб.— Йўқол деяпман! Булмаса нақ чопиб ташлайман сени, лаънати... Қоч деяпман сенга!

Кампир эса тинмай шанғиллар, қўйиб юбормасди сира; у зобитнинг томоғига чанг солар, заррин кокилли погонларини юлқилар, қўлига нима илинса йиртиб-тортқилар эди.

Лекинига унинг тирноқларига қараганда ҳайбатли бўрибосарнинг қозиқ тишлари ўткирроқ экан, ит ҳам ўша заҳотиёқ жойидан ирғиб туриб, зобитнинг оёғини ғарч тишлаб, шувақанги ғажий бошлаган эдики, у жони борича додлаб юборди:

— Тур кет, йўқол!.. Ҳой! Сержант Хомес! Ёрдам беринглар! Ёрдам беринглар!

— Маана сенга, мана, разил ачупино!— дея бобилларди кампир.— Итвачча! Испан кўппаги! Чақира қол ўшаларингни, қуёнюрак малайларингни!.. Баҳодир ўғлоним қайда қолди-я? Эргинам нега ўлиб кетди-я! Бу марази кўппак хонадонимизни оёқ ости қилди, ҳақоратлади-я... Улар бўлишганда омон кетолмасдинг, кўппак! Йўқол, қоранг ўчсин!..

— Лаънати манжалақи! Итингни ол, итингни ол деяпман!.. Ҳай, қаёқдасиз, Хомес! Тўппончаларингиз қаёқда? Отиб ташланг бу махлуқни! Тезроқ! Тезроқ бўлинг!

Шамширини ишга солганча, ботир комендант ниҳоят оти ёнига етиб олди. Сержант Хомес уни муҳофаза қилиб турди.

Вовилларнинг оёғини ит тузуккина ғажиган эди, шунга қарамай у, ҳар қалай, бир амаллаб эгарга олди ўзини.

Сержант иккала тўппончасини бўшатди, аммо итни пойлаёлмади. Душман сон жиҳатидан устун эканини кўрган ит орқасига бурилиб, югурганча уйга кириб кетди.

Вовиллаган овоз ортиқ эшитилмай қолди, лекин комендант отига миниб олганида ичкаридан истехзоли қаҳқаҳа эшитиларди. Бу кулги кумуш қўнғироқ садосидай жаранглаб чиқаётганди: комендант оч-малла сочли гўзал Росита уни масхаралаб кулаётганини дарров тушунди.

Комендантнинг аламини чеки-чегараси йўқ эди, шу топда у ўз бўлугига мазкур ранчони забт этишга жон-жон деб буйруқ беришга тайёр эди, ана унда ўша кўппакнинг бошини талаб қилган бўларди; фақат бир нар-

ей—у чоғда аскарлар ўзининг шармандаларча қочиб қолгани сабабини билиб қолишларидан қўрқишгина тийиб турарди комендантни. Бундайин таҳқирланишни у мутлақо истамасди.

Хулласи, у бўлиммаси ёнига қайтиб, буйруқ берди-ю, ҳаммалари йўлга тушиб, шаҳарга қайта бошлашди.

Вискаarra уланлар бўлиммаси олдида узоқ юра олмади; қалбига ўрмалаб кирган кек-алам ва умидсизлик томоғидан буға бошлади, қисқаси, сержантга аллақанлай кўрсатмалар бериб, ўзи от елдирганча илгарилаб кетди.

Роситанинг уйи томон бораётган ҳаворанг ридоли суворининг (Вискаarra чорвадор йигит дон Хуанни ташиган эди) кўриниши, шубҳасизки, аччиғи қўзиган комендантга тинчилик бера олмасди. Вискаarra тўхтамади ҳам, таплашмади ҳам лекин ўқрайганча Хуанни бошдан-оёқ чамалаб чиқди-ю, йўлига кетаверди.

У шу кетишда тезликни пасайтирмади, қалъа дарвозаси қаршисидагина жиловни тортди.

От ҳансираб, икки биқини оғир-оғир тушиб-чиқиб турарди — хўжаси ич-этини кемираётган бутун қаҳризаҳрини шу шўрликка сочиб, аламини ундан олган эди.

XXIII БОБ

Ташқарида ҳаммаёқ тинчиши биланоқ Росита зипиллаганча уйдан чиқиб, ихота орасидан мўралади. У яна карнай чалинганини эшитган ва чақирилмаган меҳмонларнинг жўнаб кетишганига ишонч ҳосил қилмоқчи бўлган эди.

Шунда у уланларнинг анча нарига бориб қолганларини, водийнинг нариги чеккасига қараб кетаётганларини кўриб қувонди.

У югургилаганича кулбага қайтиб, бу орада тагин ўз жойига ўтиб, бамайлихотир трубка тутатиб ўлтирган онасига хабар қилди.

— Пасткаш разиллар!— шанғиллади кампир.— Жўнаб қолишларини ўзим ҳам билгандим. Қари кампир билан битта итга бас келолмайдиган ҳоли бор экан-ку... Оҳ, ботир Карлосгинам шу ерда бўлганида-я! У анави кеккайган ачупинонинг таъзирини бериб, унақанги но-

чору нотовонлардан эмаслигимизни кўрсатиб қўярди-я! Ҳа, ҳа! Карлос кўрсатиб қўярди унга!

— Қўйинг, ўйламанг энди буни, ойижон. Менимча, улар энди қайтиб келишмайди. Қўрқмас Бизон билан икковинглар утакасини ёриб юбординглар уни. Тап тортмай ташланганини қаранг-а, барака топкурни!.. Э, уёқ-буёғига қарамабман ҳам — балки яралангандир,— деб қўшиб қўйди у шоша-пиша хонага алаингларкан.— Бизон! Бизон! Кел буёққа, жониворгинам, кел! Келатқол, бир нарса бераман сенга, баҳ, баҳ. Ботиргинам!

Ит ўзига яхши таниш овозни эшитиб пана жойидан чиқиб келди-да, думини ликиллата кетди.

Росита энгашиб, қўлини бароқ жунлари орасига суқиб, танасини пайпаслаб, кўздан кечира бошлади ит-ни, у ўқ тегиб қон чиққан жойи йўқмикин деб чўчиётган эди. Омадига сержант яхши мулжалга ололмаганди. Итнинг бирорта ҳам жойига жароҳат етмаган, ҳаттоки тирналган ериям йўқ, кейин, ёш соҳибаси атрофида қандай ирғишлаб-айланаётганига қараганда, у соппасоғ, кайфияти чоғ эди.

Бу бизон жуда яхши ит — Янги Мексиканинг аслида ўзи ярим бўри-ю, лекин қўй сурувларини бўрилардангина эмас, йиртқич мексика айиқларидан ҳам бемалол қўриқлайдиган ажойиб овчаркаларидан бири эди. Жаҳонда Янги Мексика овчаркасидан ўтадигани йўқ, бизон эса ўша зотнинг энг олди намояндаларидан бири эди.

Соҳибаси итнинг соппа-соғлигига ишонч ҳосил қилгач курасига чиқди-да, оёғи учига кўтарилиб, деворга қоқилган михдаги қандайдир ғалати нарсани олди. Бу аллақандай камонсимон қийшиқ колбасалар шодасига ўхшарди. Бироқ колбаса эмасди, Бизон кўзлари чақнаб, хурсанд гингшишга тушганидан унинг бу нарса нима эканини жуда яхши билиши, унинг нуқтаи назаридан қаралса, колбасадан заррача кам жойи йўқлиги равшан кўриниб турарди. Ҳа, Бизонга ушбу нарсанинг сирини очиб ўлтиришнинг ҳожати йўқ — сур бизон эли қандай нарсалигини билади у. Ит қоқ бизон этини яхши кўрарди, мана у ўзига теккан бир бўлак гушти шундай ҳафсала билан ғажир экан, буни кутилганидан ҳам аълороқ даражада исбот қилди. Ҳалигача қўрқувни тарқаманган сулув Росита яқин-атрофда ҳеч ким йўқлигига ишонч ҳосил қилгани тагин иҳота олдига борди.

Бу гал бировнинг қораси кўринди; лекин уни аниқроқ кўргач, қиз заррача кўрқмади. Ҳаворанг ридоли, қашамдор жабдуқли от минган йигитга кўзи тушганида мутлақо ўзгача туйғуни ҳис этди: энди кўнгли бутундай жойига тушиб, хотиржам тортди.

Бу сувори чорвадёр йигит дон Хуан эди. У тўғри ташқари дарвозага қараб келди-да, қизни кўриб, хушмуомалалик билан, дўстона саломлашди:

— Салом, Росита!

Қиз ҳам дўстона, мулойимгина жавоб қилди:

— Салом, дон Хуан!

— Онангиз, сенъоританинг аҳволлари қандоқ?

— Раҳмат, дон Хуан! Ҳамишагидай.— Шундай дея Росита қувнаб кулиб юборди.

— Нимага куляпсиз, Росита?— ҳайрон бўлди дон Хуан.

— Мардимайдон аскарларни кўрмадингизми йўлди?— деб сўради қиз кулги орасида.

— Бўлмасам-чи, кўрдим. Ҳозиргина йўлда бутун бошли уланлар полкини кўрдим, шаҳарга қараб кетишини. Комендант бўлса улардан олдинроқда от елдириб кетяпти. У, худди орқасидан апачлар қувиб келаётгандай, отини жони борича учириб кетяпти. Мен ростдан ҳам уларни ҳиндуларга тўқнаш келиб қолишиёди деб ўйладим: нега десангиз, ўша жанобларга дуч келганларида доим мана шунақанги жуфтакни ростлаб қолишларини биламан-да, ахир.

— Зобитларини турқи-таровати қанақа? Кўзга ташлангундек ҳеч нимани пайқамадингизми?

— Назаримда, пайқагандайман. Шу, тиканли буталарни оралаб ўтганга ўхшайди чамамда. Айтмоқчи, бирровгина кўзим тушиб қолди унга — шунчалик от елдириб ўтиб кетди. Лекигин менга нақ еб қўйгундай ўқрайиб қаради. Кўриниб турибдики, у олтин тангаларини ҳанузгача унутолмаяпти, эсингиздами, авлиё Иоанн байрами кунини менга ютқизган эди-ку? Ҳа, ҳа, ҳа!.. Лекин, азизам Росита, нимага куляпсиз ахир? Нима, аскарлар бу ерга келишдими? Бир гап бўлганими ўзи?

Шунда Росита унга комендантнинг ташрифи — унинг ичгани сув, сигарасини тутатиб олгани ўт сўраганини, кейин қандай уйга киргани, Бизоннинг эса унга ташлашиб, шармандаларча орқасига қайтишга мажбур қилгани, ит қоғиби олган комендантнинг отига аранг мингани

нию орқа-кетига қарамай қочиб қолганини гапириб берди. Аммо энг муҳим тафсилотлар ҳақда чурқ этмади. Қиз Вискарранинг таҳқирловчи сўзларию ҳақоратлари ва бўса олгани тўғрисида оғиз очмади. Буни эшитса дон Хуан жаҳли чиқиб, ўзини йўқотиб қўймасин тағин деб чўчиди у. Суюклисининг қизиққонлиги ва эҳтиётсизлигини биларди-да, ахир. Бунақанги янгиликларга хотиржам қулоқ солиб туrolмайди — дарров қизишиб кетади, шундоқ бўлгач, уни деб тағин бошига бир бало орттириб юрмасин. Мана шунинг учун ҳам Росита бўлиб ўтган можаронинг асли сабабини сир тутинишга аҳд этганди. Хулласи калом, қиз содир бўлган машмашанинг кулгили жиҳатинигина айтиб бераётган ва айни чоғда ўзиям чин дилдан, мириқиб кулаётган эди.

Аммо-лекин дон Хуан билиб олган шу озгина нарсанинг ўзиёқ йигитни ушбу воқеага анчагина жиддийроқ ёндашишга ундарди. Вискарра келибди, олдин ичгани сув, кейин сигарасини тутатгани чўғ сўрабди, ичкарига кирибди... Буларнинг бари ғалати, лекин сираям кулгили эмас-ку, дея ўйларди дон Хуан. Ундан кейин ит ташланибди унга, қошиб олибди... Уни уйдан қувиб чиқаришибди, боз устига, шармандаларча, бунинг устига уланлар бўлинмаси кўзи олдида-я!.. Вискарра, кекчи, мақтанчоқ, гердайган Вискарра, ҳиндулар билан бўлган юзлаб жанглар — асли-тагида йўқ жанглар — қаҳрамонидек улуғ лашкарбоши тўсатдан битта итдан мағлуб бўлиб ўтирса! Йўқ, хаёлидан кечирарди дон Хуан, бу мутлақо кулгили эмас. Вискарра ўч олади, ҳеч бўлмаганда бор кучи, жон-жаҳди билан шунга эришишга ҳаракат қилади.

Дон Хуанни бўлак нохуш ўй-фикрлар ҳам исканжага ола бошлади. Комендантни бу кулбага етаклаб келган нима? Бу уйни, унинг, дон Хуаннинг наздида оламнинг маркази бўлиб туюлгувчи ушбу овлоқдаги танҳою сўлим ошиёни қандай топиб келдийкин у? Йўлни ким кўрсатди экан унга? Уланларни йўлдан бурилиб, одатдаги қатнов йўлларини ўзгартиришларига нима мажбур этдийкин.

Ана шундай саволларга кўмиб ташлаган эди дон Хуан ўзини. Бу ҳақда Роситадан сўраш — ўзи сир сақлашни маъқул билган туйғу: рашк туйғусини ошкор этиш деган гап эди.

Ҳа, айни шу сонияда унинг ич-этини рашк кемирмоқ-

да эди. Турган гап, Росита Вискаarraга сув берган, сигарасига — чўғ... эҳтимол ичкарига таклиф қилгандир уни. Мана, ҳозир ҳам у қувнаб-яйраб турибди, кутилмаган қадамранжидаси учун Вискаrrадан сираям аччиқланаётгани йўқ.

Шуларни ўйлар экан дон Хуаннинг дарди-дунёси қоронғи бўлиб кетди-ю, севгилисининг шўх-шодон кулгисига жўр бўла олмади.

Аммо Росита уни ичкарига таклиф қилиши билан кайфияти ўзгариб, яна аслига қайтди-қолди. Отдан тушиб, Роситанинг кетидан боғча оралаб бориб ичкари кирди.

Қиз дастгоҳи олдига чўкиб, яна ишга тутинди, йигитга эса унинг ёнига чўкка тушиб, хоҳлаган нарсасидан сўзлашига рухсат этилди. Қиз вақти-вақти билан мокини тўғрилаш ёки чувалиб-чалкашган ипларни чуватишда ёрдамлашиб туришига эътироз билдирмади унга; бундай пайтда қўллари тез-тез тўқинишиб турар ва чигални ёзиш учун зарур бўлган фурсатдан бурунроқ ажралишаётгандай туюларди.

Лекин буни ҳеч қайсилари пайқамаётган эдилар. Роситанинг онаси кундузги уйқуга кетган, Бизон эса, мабодо бир нимани кўриб-пайқаган тақдирида ҳам, бари бир ҳеч кимга ҳеч нима айтолмасди — у фақат думини ликиллашиб, гўеки хатти-ҳаракатини батамом маъқуллаётгандек, дон Хуанга мулойимгина қараб-қараб қўяётган эди.

XXIV БОБ

Вискаrrа ўзининг ҳашамдор уйига етиб келгач, аввало вино келтиришни буюрди. Мана, винони келтирдилар, дилихуфтонликда қадаҳ кетидан қадаҳ кўтараверди. У аламини шаробдан олмоқчи эди, қисқагина муддатга дарди-аламини унутгандек ҳам бўлди.

Шароб ичган пайтингда кўнглинг юмшаб, энгил тортгандек бўласан киши, илло вақтинчаликка. Фирт маст бўлиб, учиб қолгуничалик ичиш мумкин, аммо кўпга борадими бу? Рашк ҳамда ҳасад яна уйғонади, уйғонганда ҳам, ҳеч қанча ўтмай — ҳа, ҳа, кайфинг тарқаб, ҳушингга келиб улгурмасингдан эртaroқ. Дунёда бор жамики узумни сиқиб тайёрланган шароб рашкчи одам-

нинг дарди-аламини буткул унутишга камлик қилади.

Вискарранинг қалбини жамики бетизгин эҳтиросу туйгулар тилка-пора қилаётганди. Бунда муҳаббат ҳам — аниқроғи, мазкур фаҳш зот муҳаббат деб атагувчи туйғу ҳам — рашк, ҳам, ўзига нисбатан қилинган, бундаин қўпол муомала оқибатида туғилган қаҳру ғазаб ҳам, иззат-нафси таҳқирлангани ҳисси ҳам му-жассам, бари қоришиб кетган эди: ахир у зарҳал попукли погонлари ҳамда ҳурпайма жиғаси бор экан, ўзини даҳлсиз зот деб ҳисобларди-да; аммо бунинг бари пучга чиқиб, ҳафсаласи пир бўлган эди.

Бу ҳафсала пир бўлишию ноумидлик Вискарранинг эндиликда ошиқлик ҳамда хушторликни қандай қилиб янгитдан бошлашига сира ақли етмаётганлиги боисидан зўрайиб бораётганди. Мабодо яна борадиган бўлса унда тагин ўшандай кўнгилсизликни, йўқки, бундан ҳам бешбаттарроғини бошдан кечиришига тўғри келар балки.

Зар уқаю заррин гул чекилган либос уни қанчалик бежамасин, қандайин нуфузлию эътиборли зот бўлмасин, у оч-малла сочли қизга бунинг бир пақирлик аҳамияти йўқ — бу кундай равшан. У Вискарра илгари диққат-эътибори, илтифотига муяссар этиб юрган қизлар, водийдаги қорақўз хонимларнинг жамикисига ўхшамайди мутлақо. Нега деганингизда, улардан хоҳлаганингиз у берган олтин тангани бирор оғиз сўзсиз, ҳаттоки қизаринқирамай ҳам олиши тайин эди — ҳа, ҳа, бирортаси рад этмаган бўларди-ёв!

Шундоқ, эндиликда унинг учун ранчо йўли берк. Хўш, унда қиз билан қаерда учрашадия қаерда кўради уни? Шаҳарда аҳён-аҳёнда бир кўриниб қолади у, акаси уйда бўлмаган пайтларни ҳисобга олмаганда, ҳеч қанақанги ўйин-кулги сайилларига келмайди. Шундай бўлгач, хўш қаерда ва қандай кўради уни? Тузатиб бўлмас, ноилож аҳвол, ўйламай, бемулоҳаза қўйилган хато одимни тўғрилашнинг ҳеч бир чора-иложи йўқ. Борди-ю, бу қиз монастирга қамаб қўйилган бўлса, ўшанда ҳам аҳвол қайтага бунақанги мушкул бўлмасди. Э нимасини айтасиз, тариқчалик умид йўқ! Ана шундай мулоҳаза юритарди Вискарра.

Башартики хаёлидан ушбу фикрлар кечаётган бўлса ҳам, ҳарқалай, чинданда умид қолмаганига ишонмаётган эди у дилида. Йўқ, дарров ортга чекиниб қўя қо-

дини ниятида эмас у! Наҳотки у, қалбу юраклар кушандаси Вискарра қандайдир ярим гадо бир қизнинг юрагини забт этолмаса! Э-йўқ, у ҳали-ҳозиргача муваффақиятсизлик нималигини билмайди, бу гал ҳам билмайди уни! Ёлғиз мағрурлик майл-ихтиёрининг забти биланоқ истагига эришиши мумкин эди-ю, лекин мазкур иштиёқ-хўтиросини аланглатадиган бўлак важлар ҳам борийди. У қаршиликка учради, ниятини амалга ошириш осон бўлиб чиқмади — ана шулар оқибатида унинг ғайратшижоатию саркашлиги авжга мина борди.

Бунинг устига эса, рашкни айтишг — мазкур туйғу ҳам унинг иззат-нафс ҳиссини савалай кетди.

У дон Хуандан рашк қила бошлади. Вискарра уни ўшанда, байрам куни пайқаганди. У йигитни бизон овчиси ва синглиси даврасида кўрганди. Уларнинг қандай суҳбатлашаётганлари, ичаётганлари, қувнаб-яйрашаётганларини кўрган эди. У ана ўшандаёқ рашк қила бошлаган эди-ю, аммо бу ҳозирда унинг ич-этини тирнаб-таталаётган рашк олдида ҳеч гап эмасди. Негаки у ўшанда осонгина ва дарров ғалаба қиламан деган ширин орзуда эди-да. У куни кўнгли хотиржам эди, ҳозиргидек эмасди — ҳозир эса, у муваффақиятсизликка учраган, обрўси бир пул, тупроқ билан тенг бўлиб турганида яна ўша рақибига йўлиққан эди... У таниш ранчога қараб бораётганди. У ерда уни, ҳеч шубҳасиз, қувончла кутиб олишган, бор гапни айтиб беришган... Ана шунда ҳаммалари биргалашиб уни, Вискаррани майна қилиб, кулишган. Кейин... во дариг! Ана шу ўй-фикрга исти тоқат қилиб бўлмасди!

Шунга қарамай комендант ўз ниятидан қайтишни хаёлига ҳам келтирмаётган эди. Яна қандайдир йўличораси бордир ахир, бу чора майли ғирром-ноинсофона бўлсин, майли қабиҳу разилона бўлсин, ишқилиб хаёлга келса, ўйлаб тополса бас... Вискарра бу жабҳада совуққонлик билан мулоҳаза юритадиган одам зарур эканини ҳис этди. Ҳа айтмоқ-чи, Робладо қаёқда қолдийкин?

— Сержант! Капитан Робладога айтишг, унда гапим бор.

Капитан Робладо бундай ишларда энг муносиб шерик. Аёлларга муносабатда икковлари ҳам ғирт разил одам, лекин Вискарра ўзини бир оз хуштавозероқ, олижанобона-масхарабознаороқ кайфиятда тутарди. У ал-

даб-авраб йўлдан уришга уста эди. Худди дон Жуанга ўхшаб учраган ҳар бир жозибали аёлнинг хушторига айланар ва ғалабага эришишини тамоман табиий деб ҳаёл қиларди; Робладо эса ҳар қандай чора-тадбирдан ҳазар қилмас, ишқилиб улар тезроқ мақсадига етказса бўлгани эди. У агарда фойдаси тегса-ю, хавфли бўлмаса, куч ишлатишга ҳам тайёр эди. Икковларидан ярамас, маразроғи Робладо эди, албатта.

Ўз диди-билгисича иш тутиб муваффақятсизликка учраган комендант эндиликда Робладо қандай маслаҳат бермасин, барига тайёр эди. Ҳеч шубҳасизки Робладо унга маслаҳат бериши тайин эди: бу капитан маданий олам кишиларининг, шунингдек ёввойи ҳиндуларнинг ишқ-муҳаббат жанглари майдонида от суриш йўлларию усулларини жуда яхши билар эди-да, ахир. Буни қарангки, Робладонинг ўзи ҳам айнан шу қабилдаги ишда маслаҳатга муҳтож эди. У соҳибжамол Каталинанинг қўлини сўраган, дон Амбросио розилик берган, лекин сеньорита ҳаммани ҳайратда қолдириб кўнмаганди. У капитан Робладога тегишни узил-кесил рад этмаганди. У чоғда ўз оёғига ўзи болта урган бўларди-ю, дон Амбросио, чамаси, ҳаялламай ўз оталик ҳукми-амолини ишга соларди. Шу боис Каталина ҳали турмуш қуришга ёшман деган баҳона билан отасидан бу ишни кейинроққа қолдиришни сўради. Робладонинг эса тўйни кейинга суришни ўйлагиси ҳам йўқ эди, тезроқ бойиб олишга сабри чидамаётган эди. Илло дон Амбросио қизининг ўтинчини инобатга олганди — капитанни хавотирга солиб қўйган томони айнан мана шу эди.

Эҳтимол дон Амбросио комендантнинг таъсири билан ўз қарорини ўзгартириб, у истаган тўйни тезлаштирар? Ана шунинг учун ҳам бордию бошлиғи унинг олдида бурчли бўлиб қолса Робладо бағоят хурсанду бахтиёр санарди ўзини.

Комендант ҳузурига келгач, Робладо унинг бўлиб ўтган ҳангомалар ҳақдаги батафсил ҳикоясини тинглади.

— Қадрдоним полковник, ишни нотўғри томонида бошлабсиз. Шунча тажрибангиз, шунча маҳоратингиз бўла туриб-а... э, қойил-э! Сиз худди кабутархонага шўнғиган бургутдай ташланибсиз-ку, уларнинг устига! Қушларни хиёлгина чўчитиб қўйсангиз борми, бас, ин-

ларига кириб биқиниб олади улар. Уша ранчоларига тираям бормаслигингиз керак эди.

— Ахир унда қизни қандоқ кўрардим?

— Ўз уйингизда ёки бирор бошқа жойда ўзлари маъқул кўрган ерда.

— Иложи йўқ-ку буни! Улақолса келмасди у!

— Сизнинг таклифингиз билан, албатта, келмасди— буни биламан.

— Хўш, унда қандоқ қилиш керак эди?

— Вой-бўй, наҳотки шунчалик соддасиз? Нима бало, оламда қўшмачи-даллоллар борлигини ҳеч эшитмагансиз дейман?— Робладо шундай деб хохолаб кулди.

— Э-ҳа, албатта... Лекигин, ишонинг, уларга ҳеч ниним тушмаган.

— Бўлмасам-чи! Ўзингизнинг нозик таъб-услубингизга ишониб бундайларни мутлақо кераги йўқ деб ўйлайсиз. Лекин эндиликда ўшаларнинг ёрдамига таянишингизга тўғри келади. Жудаям фойдаси тегадиган нусхаларда ўзиям, гапимга ишонаверинг: вақтингизни тежашади, ташвишу оворагарчиликлардан халос этишади, иннайкейин деганингиздан, устамасига ишнинг муваффақиятли чиқишини осонлаштиришади. Ҳали ҳам вақт ўтганича йўқ. Маслаҳатим шу. Хўш, деганда, бордию бу гал ҳам ишингиз ўнгидан келмаса, ихтиёрингизда яна битта йўли қолади...

Бу ярамасларнинг бундан-буёнги суҳбатига қулоқ солиб ўлтирмаймиз. Улар ўзларининг қабиҳона режаларини ипидан-игнасигача муҳокама қилиб чиққанларини айтиб ўтишимизнинг ўзи кифоя деб ўйлаймиз. Шаробдан симира-симира, токи ҳаммаси атрофлича пухта ўйлаб чиқилиб, ўйлаган режаларини амалга оширишгина қолгунига қадар ушбу масала устида бирор соатдан мулроқ вақтларини ўтказдилар.

Мазкур режа амалга оширилди ҳам, аммо натижа тамоман улар кутганча бўлмади. Далла ролини ижро этган «хоним» Росита билан тез орада танишиб олди-ю, бироқ унинг муваффақияти Вискарранинг муваффақиятидан ҳам шубҳалироқ эди. Йўқ, буни шубҳали деб ҳам бўлмасди — бунда ҳеч қанақанги шубҳа қолмаган, ҳаммаси ойдин эди.

У Роситага ўзининг нима ниятда келганига шама қилган заҳотиёқ қиз бор гапни онасига айтиб берди, шунда комендант эвазига қутулиб қолган тирналиш-

жароҳатлар унинг элчиси чекига тушган тирналаш-жароҳатлар олдида ип эшолмай қолди. Мабодо шафқат тилаб ёлбормаганида борми, қутуриб кетган Бизондан омон қолиши даргумон эди.

У қонундан мадад сўраши ва она-боладан қасос олиши мумкин эди, лекин унинг касбининг ўзи шунақанги бўлгани туфайли бу «хоним» таҳқиру ҳақоратлар аламини жимгина ютиб кета қолишни маъқул кўрди.

XXV Б О Б

— Хўш, Робладо, энди нима қилдик?— деб сўради комендант.

— Ўзингиз-чи, ўзингизни ақлингиз етмай турибдими, қадрдоним полковник?

— Ҳа энди, сал етинқирамайроқ турибди-да,— деб жавоб қайтарди Вискарра, гарчи нима қилишни жуда яхши билиб турган бўлса-да. Яқингинада ўйлаб, дилига тугиб қўйганди буни. Мазкур фикр миясига омади юришмаган биринчи кунидек, қалбини қаҳру ғазаб ҳамда нитиқом иштиёқи ўртай бошлаган пайтдаёқ келганди. Кейин ҳам такрор-такрор бостириб келаверганди хаёлига. Берган саволи эса бутунлай ортиқча эди, зеро комендант Робладонинг жавоби қандоқ бўлишини, у «Куч ишлатинг», дейишини олдиндан биларди.

Худди шундай бўлди ҳам, Робладо айнан шу сўзларни айтди.

— Лекин қандоқ қилиб?

— Бир неча аскар билан борингда, кечаси олиб келаверинг ҳам. Бундан осони бор эканми? Бу жиззаки ойимчани аввал-бошдаёқ шундоқ қилиш керак эди. Чўчиманг, ҳеч қанақанги фалокат юз бермайди, бало ҳам урмайди унга. Ундайлар учун ҳеч қандай қўрқинчли жойи йўқ сира. Бу синашта усул, бунақанги воқеаларни эшитганман, кўрганман. Қафолат бериб айтаманки, овчи қайтиб улгурмасиданоқ қиз барига кўниб, қойилмақомчасига тақдирга тан бериб бўлади.

— Борди-ю, ундоқ бўлмаса-чи?

— Хўш, мабодо ундай бўлмаган чоғдаям, нимадан қўрқасиз?

— Бемаъни гаплар, ғийбату фисқи-фужурлар тарқалади...

— Вой-бўй, осмон узилиб, ерга тушаркан-ку! Қўлингиз азизим полковник, бу гал негадир юраксизлик қилиясиз, Тўғри, сиз ишни анча пачава қилиб қўйдингиз, лекин буёғига ҳам ўшандақа қўпол ҳаракат қиласиз деган гап эмас-ку мутлақо. Уни кечаси олиб қочиш мумкин. Бу ерда ҳеч кимнинг киришига рухсат этилмайдиган хонадонларингиз бор. Агарда зарур бўлса, ҳатто анавиларидан... билиясизми?.. Деразалари лўғидан фойдаланиш мумкин. Ҳеч қанақанги жодугару пфсунгар ҳам ҳеч нимадан хабар тополмайди унда. Унингиз ишонадиган одамлардан танланг. Бутун бошли бўлинмани эргаштириб боришнинг ҳожати йўқ, беш-олтита олтин танга ўша олиб борадиган одамларингизни оғзи-тилини боғлаб қўяди. Рост, буни кўйлак ўғирлашдан қийин жойи йўқ. Биттагина кўйлакни ўғирлаш — бор гап шу, вассалом!

Шундай дер экан, разил ўзининг ушбу қўпол қиёсидан ва ундан ҳам қўпол ҳазилидан мамнун ҳолда хоҳлаб кулди, комендант эса унга жўр бўлди.

Шунга қарамай Вискарра ҳали-ҳозирча бу охириги чорани қўллашга ботинмаётган эди. Бунинг боиси эса олиҳимматлик ҳисси эмасди асло. Гарчи у Робладо сингарни ўтакетган разил бўлмаса-да, шу тобда уни тийиб турган нарса мутлақо андиша ёхуд инсоф эмасди. Вискарра умр бўйи кимгаки зулм ўтказган, ёмонлик қилган бўлса, ўшанинг ҳиссиётию туйғуларига совуқ-қонларча бепарволик билан қараб келган, бу унинг одатига айланган эди, мана ҳозир ҳам у қалбини, ўша қиз кейинчалик бахтли бўладими ёки бахти қароми, деган ўй-хаёлгина банд этгани сабабдан иккиланаётгани йўқ эди. Йўқ, у бундайин фикр-ўйлардан йироқ эди. Уни юраксизликда айблар экан, Робладо ҳақ эди. Полковник аслида ҳам журъатсизлик қилаётганди. У шунчаки қўрқаётган эди, холос.

У қандайдир жазо тортишига тўғри келиб қолишидан қўрқаётгани йўқ эди. Ўзи ўша даражада нуфузлию қудратли зот, бўлажак қурбонининг уруғлари эса хавфсизрашига арзимайдиган ниҳоят даражада паст табақа одамлари эди. Озроққина устомонона сиёсат ишлатилса бас — ҳеч қандай айбу гуноҳсиз бу одамлар ўлимга маҳкум этилардилар-у, мазкур ҳол одил суд ҳукмидек

қўринади қўяди. Айниқса ҳозир, ҳиндулар ғалаёнию креоллар¹ инқилоби испанларнинг Америкадаги ҳукмронлигига таҳдид қилиб турган пайтда бировга хоинлик айбини тақаб, уни қамоққа тиқиш ва ўлдириб юборишдан осони йўқ.

Вискаarra чинакамига яккаш гап-сўз бўлишу ғийбатлардангина чўчиётган эди. Бундай очиқ-ошкора ўғриликни узоқ сир тутиб бўлмайди. Эртами ё кечми барибир қандайдир миш-миш тарқалади, ана шунда, турган гапки, бундай жанжалли можаро шов-шувини ҳамма илиб кетади, бутун оламга жар солади, бутун шаҳар ғийбатга тушади. Бундан ҳам бешбаттарроғи бўлиши мумкин. Гап-сўзлар Сан-Ильдефонсо сарҳадларидан чиқиб, олий хонадонга, шахсан вице-қиролнинг қулоғигача етиб бориши мумкин-ку! Ҳақиқатан ҳам комендант айнан ана шунисидан қўрқаётган эди.

Йўқ-йўқ, вице-қирол қасри ўша замонларда юксак ахлоқ-одоб намунаси бўлгани сабабдан эмас. Йўқ, у ердагилар ҳар қандай мустабидлик ёхуд разолат кўришигига хийла муруватпарварона муносабатда бўлишлари ҳам мумкин эди — бари ими-жимиди қилинсагина, албатта. Аммо-лекин куппа-кундузи қилинадиган босқинчиликка (ақалли чишакам сиёсий жиҳатини олган тақдирда ҳам) панжа орасидан қарашлари дарғумонов. Ҳа, шундай, Вискаarra эҳтиёткорликка риоя қилишга мажбур унинг етарлича асосу сабаблари бор эди. Ўз хийла-найрангини сир сақлай олишига кўзи етмас, бунга ишонмасди. Қизни ўғирлашида ўзига ёрдам берадиган муттаҳамлардан бирортаси бир куй эмас, бир кун уни сотиб қўйса-чи? Тўғри, булар ўз аскарлари бўлади, борди-ю, бирон кори ҳол юз берса, у қўл остидагиларни ўз билгича жазолайди-ку, лекин бундан нима ўзгаради? Ахир бу от ўғирлаб кетиб бўлиганидан кейин отхонани қулфлаб қўйган билан баб-бараваар гап-ку!

Қумакчилари ҳатто уни сотмаганлари тақдирда ҳам,

¹ Креоллар — Лотин Америкасидаги дастлабки европаларнинг авлодлари. Мустамлакаларнинг иқтисодий тараққиёти йўлига Испания тўғаноқ қилаётган тўсиқлардан, мустамлака маъмуриятидаги олий мансабдор испанларнинг зуравонлигидан норози бўлган креоллар XIX асрнинг биринчи ярмида испан ҳокимиятига қарши бош кўтардилар. Бу кўзғолонлар испанларни қувиб, Лотин Америкасида мустақил республикаларга асос солишга олиб келган.

ҳаммасини ими-жимиди, сир сақлаб бўладими? Аввало унинг ғазабга келган акаси хавfli бўлиб қолади. Рост, ҳозир у сафарда, аммо яна қизнинг рашкчи жазмани ҳам бор, иннайкейин, акасиям қачондир қайтиб келадик-ку! Ана унда ҳаммалари қизни у — Вискарра ўғри-лаб кетганини тушунади. Унинг кулбага қадамранжи-ласи, қўшмачи-далланинг келгани, қизнинг ўғирлаб ке-тилиши — мана шуларнинг бари қиёсланиб, жами унинг масобига битилади. Акаси шунақа акаки, бунинг усти-га қайлиғи ҳам, икковлари ўз шубҳа-гумонларини ютиб, жимгина юрадиганлардан эмас. Иккаласини гумдон иилиб қутулса ҳам бўлади-ку, лекин у чоғда ҳеч нима-га қарамасдан, таваккалига иш кўришга тўғри келади, бу эса ниҳоятда хатарли.

Вискарра ичида ана шуларни ўйлаётган эди, капи-тан Роблагога ҳам шуларни исботлаётганди. Исботла-ганда ҳам капитан уни бу фикрию бу йўлдан қайтариш-ни хоҳлаётгани сабабдан эмасди, йўқ, лекин у икков-лашиб бирорта хавфи камроқ чорасини топармиз деган ниҳоятда эди, зотан комендант қандоқ бўлмасин ўз мақ-садига етишни истарди.

Хулласи калом улар излаган нарсаларини топишди. Бу фикр, албатта анча-мунча тадбиркору сурбетроқ ка-питанинг калласига келди. Қўлидаги қадаҳни столга дўқ эткизиб қўяркан, қўққисдан хитоб қилди у:

— Топдим, Вискарра! Худо ҳаққи, топдим!

— Ростданми? Тасанно!

— Агарда истасангиз, ўша соҳибжамолингиз билан сурункасига йигирма тўрт соат ишрат қилишингиз мум-кин, яна десангиз энг уччига чиққан гийбатчиам ёмон раёлга бормайди асти. Жилла қурса ҳозирча ҳеч нима-дан чўчимасангиз ҳам бўлади. Жин урсин, қандай ажой-иб фикр-а!.. Нақ бизга керагининг ўзгинаси-я!

Намунча қийнайсиз одамни, капитан! Нима чора топдингиз ахир? Тезроқ гапира қолсангиз-чи!

— Шошмай туринг, олдин бир қултумгина шаробдан итиб олай. Роса устомонлик билан ўйлаб топилган усул-да, ўзням! Қиттак отвормасам бўлмайди бунинг шаро-фатига.

— Ундай бўлса ичинг, ичаверинг! — хурсанд кайфи-ятда деди Вискарра шаробдан қўяр экан, ошinasининг ҳаёлига қандай ажойиб фикр келганини билишга сабри чидамай.

Робладо қадаҳни бир кутаришда сипқарди-да, комендантга яқинроқ ўлтириб, овозини пастлатганча ўзининг янги режасини батафсил баён этди. Чамаси бу режа Вискаррага жуда ёқиб тушди. У охиригача тинглаб: «Қойил!»— деб қичқирганча, бағоят ёқимли хушxabар эшитган бир қиёфада ўрнидан сапчиб туриб кетди.

Хурсандликдан оғзи қулоғига етиб, бир неча дақиқа мобайнида ҳаяжон ичра у бурчакдан бу бурчакка бориб-келиб турди-да, сўнг хандон уриб кулиб юборди.

— Оббо сиз-ей, йўл топишга устаси фаранг лашкарбошининг ўзгинасиз-да!— деди у жушиб.— Нақ Конденинг¹ ўзиям бунақанги йуриғини ўйлаб тополмаган бўларди! Ё Биби Марям! Бундан моҳирона дона суришни икки дунёда ўйлаб тополмайсан киши, сизга сўз бериб айтаманки, капитан, ижросини кечиктириб ўлтирмаймиз.

— Кечиктиришни нима кераги бор? Нега энди ишга шу заҳотиёқ киришмаймиз?

— Тўппа-тўғри... Келинг, ҳозироқ ушбу кўнгилли томошага тайёргарликни бошлаб юборамиз.

XXVI БОБ

Айни шу пайтда афтидан қалъа коменданти билан унинг капитанига ўйлаган режаларини амалга оширишларига халал бериши лозим бўлгандек туюлган воқеалар рўй берди. Лоақал шундай деб тасаввур этиш мумкин эди. Юқорида зикр этганимиз суҳбатдан кейин бир кеча-кундуз ўтмаёқ шаҳарга, шунингдек бутун водийга жангари ҳиндулар ҳамласи хусусида овоза тарқалди. Айтишларича, ҳиндулар — улар апачларми, ютлар ёки команчиларми, буни ҳеч ким билмасди — Сан-Ильдефонсо яқинида батамом жанговар қиёфада пайдо бўлишган эмиш.

Бу, ҳеч бир шак-шубҳасиз, улар кентнинг хоҳлаган қисмига ҳужум қилишлари мумкин деган гап эди. Кейин янги, янада жиддийроқ овозалар тарқади: ҳиндулар ясситоғликда, шаҳарга жуда яқин жойда бир нечта чўпонга ҳамла қилишган эмиш; чўпонлар қочиб қутулиб

¹ Конде Луи де Бурбон (1621—1686), Улуғ лақабига мушарраф бўлган француз саркардаси.

қолишган эмиш-у, бироқ итларини ўлдириб, қўй отарларини тоққа — талончиларнинг ишончли қалъаларига ҳайдаб кетишганмиш.

Бу галги хабарлар хиёл аниқроқ эди. Ют қабиласи ҳиндуларининг Пекос дарёсидан шарқда ов қилиб юрган бўлинмалари ҳужум қилганмиш. Улар ўз уйлари, Дель Нортенинг бошланиш жойларига қайтишдан олдин талайгина бойлик орттириш ҳирсида ана шу босқинга аҳд қилган бўлишлари керак. Чўпонлар уларни иниц-таниқ кўриб, чаплаган бўёқ-безакларидан ютларини дарров танишибди.

Чўпонларга айнан ютлар ҳужум қилгани анча-мунча ҳақиқатга яқин келарди. Таос дарёси ҳавзасидаги яшнаган водийнинг кенту қишлоқларига яқингинада босқин қилганлар худди ўшалар эди. Ютлар Сан-Ильдефонсонинг бойликлари ҳақида эшитганлар, ана шунинг учун ҳам бўёққа ҳужум қилганлар. Команчилар ва апачлар эса Сан-Ильдефонсо билан тинч-тотув яшашини, мана бир неча йилдирки, Коагуила ва Чиуауа вилоятларини талон қилганларидан бери босқиндан тийилиб келяптилар. Сан-Ильдефонсо аҳли мазкур қабилаларнинг сулҳни бузишларига баҳона бўладиган иш қилганлари йўқ, бунинг устига ҳиндулар ҳам бирон-бир душманона ниятни билдирувчи биронта ҳаракат-уришнишни намоён этмаётган эдилар.

Қўйлар ҳайдаб кетилган кундан кейинги кечада хийла йирикроқ ўғрилик содир бўлди. Бу ҳол кентнинг ўзида бўлди. Водийнинг қўйи тарафдаги этагида жойлашган чорва фермасидан талайгина қорамол подасини ҳайдаб кетдилар. Подачилар ҳиндуларнинг молларни қандай ҳайдаб кетаётганларини кўришибди-ю, аммо кўрқиб, омон-эсон жуфтакни ростлаб қолганларидан хурсанд бўлиб, фермага келиб яшириниб олишибди.

Ҳали-ҳозирча бирор кимсани ўлдирмагандилар, негаки, талончиларга ҳеч ким қаршилиқ кўрсатмагандида, ахир. Кейин, ҳиндулар ҳали уй-хонадонларга ҳам босқин қилмаётган эдилар. Эҳтимол бу чоққина бўлинмадир, холос, лекин яна ким билади дейсиз — бўлинма ёнига бошқа бўлуқлар келиб қўшиллар, ана шундан сўнг улар чандон хавфлироғу қалтисроқ ҳаракатларга ўтиб қолишар.

Водий аҳлининг ҳам, шаҳарликларнинг ҳам дилларига гулгула тушиб қолди. Қаёққа қараманг, ваҳима

ҳукм сура бошлади. Четроқ, овлоқроқ ранчоларда тура-диганлар кечаси уйларини ташлаб, шаҳардан ёҳуд йирик асиендолардан паноҳ излаб қолишар эди. Қош қорайиши билан асиендоларнинг дарвозалари беркитилиб, ясси томлар — асотейларда то тонг отгунча қадар қорувулар кезиб, пойлоқчилик қилиб чиқишар эди. Аҳли жамоат вужудини ваҳима чулғаб олганди; ҳиндулар босқини мутлақо ногаҳоний бўлгани туфайлидан ҳам ваҳима айниқсанги кўчайиб, газак олиб бораётганди — узоқ вақтлардан буён улар билан яхши муносабатда эдилар-да, ахир.

Одамларнинг ташвишу хавотирга тушиб қолганларининг ҳайрон бўладиган жойи йўқ, бунинг учун уларда ҳамма асослар бор эди. Улар бу ёввойи жангчиларнинг ҳужум пайтида шафқатсизликларининг чеки-чегараси бўлмаслигини жуда яхши билардилар: ҳиндулар эркак зоти борки жамини ўлдирадилар, фақат ёш қиз-жувонларга, шунда ҳам ўзлари билан олиб кетиб, мушфиғу бахти қаро асирага айлантириш учунгина шафқат қилдилар. Сан-Ильдефонсо фуқароси буларнинг баридаи яхши хабардор эди — сабабки, худди ўша кезларда уларнинг қон-қардошлари ва ёр-биродарларининг абадулабадга жудо бўлган минглаб ҳамшаҳару ҳамқишлоқлари ҳиндулар қўл остида бандилик жабру ситамларини тортиб ётар эдилар-да. Шундоқ бўлгач, ҳаммаёқда даҳшату саросималик ҳукм сураётганининг ажабланадиган ери йўқ эди.

Комендант, афтидан, мудом сергак эди. У ўз сувориларига бош бўлиб, атроф-теваракда изғир, ҳатто тоғлар оралиқларига кириб борар эди. Кечалари соқчи бўлинмалари водийнинг бу бошидан-у бошига танда қўйиб, айланиб юарди. Аҳолига мабодо ҳиндулар ҳужум қилиб қоладиган бўлса, эшик-дарвозаларни тамбалаб, ҳар хил нарсалар билан тўсиб, ташқарига чиқмаслик тавсия этилган эди. Қисқаси жамиул жамоат ўз ҳимоячиларининг саъй-ҳаракати, ғайрат-шижоатига таҳсин ўқи-моқда эди.

Кун сайин комендантнинг шон-шухрати ортиб борарди. Ўзининг қанчалик жасуру довюрак эканини барчага намоиш этиши учун илк бор чинакамига бир имконият туғилган эди — ахир у буёққа келганидан бери ҳиндулар Сан-Ильдефонсога ҳали бирор марта ҳужум қилганлари йўқ эди-да. Ундан олдинги лавозимдоши

вактида ҳиндулар бу ерларда бир неча маротаба пайдо бўлганлар ва бундай кезларда қўшинларнинг «ваҳшийлар»ни таъқиб этиш ўрнига, токи ёв қўлига тушган жаминки мол-ҳолни ҳайдаб, водийдан ғойиб бўлгунига қадар қалъа-қўрғонда биқиниб ўтиргани ҳамманинг ёдида. Йўқ, янги комендант тамоман бўлакча ҳаракат қилмапти. Қандай мард зобит экан-а, бу полковник Вискарра!

Ҳаяжону гулгула бир неча кун давом этди. Бироқ, ҳиндулар шу пайтгача бирор кимсани ўлдирмагани, биронта аёлни ўғрилаб кетмагани ва фақат кечаларигина пайдо бўлаётгани боисидан барча, чамаси улар жуда камчилик, шунчаки бир ҳовучгина босқинчилар тўдасигина бўлсалар керак, деган қарорга келди. Акс ҳолда эса улар аллақачоноқ куппа-кундузи кўринишга ботинган ва умуман анча-мунча каттароқ талафот етказишган бўларди.

Ана шу кунлар мобайнида бизон овчисининг онаси билан синглиси ўзларининг ҳеч бир кимса қўриқламаётган овлоқ ранчоларида яшаб келишди, дарвоқе, бутун водийни излаганда уларнинг оиласига қараганда ҳиндулардан камроқ қўрқадиган бирорта оилани топиш маҳол эди-ёв. Авваламбор, ҳаётнинг ўзи уларни юраксизроқ ҳамсояларини ваҳимага соладиган хавфу хатарларга деярли эътибор бермасликка ўргатган эди. Социян, кўриниб турибдики, ҳиндулар кўпроқ бойликни ўлга киритишга тиришаётибди, шу бонсдан бундайини наишшоқ кулба уларни ўзига жалб этиши эҳтимолдан йироқ. Водийнинг хиёлгина юқорироғида бой-бадавлат ранчолар оз эмас. Йўқ, ҳиндуларнинг бундай камбағаллар кулбасига ҳамла қилишлари даргумон.

Бундайин ишонч учун яна битта муҳим асос бор — бу оилавий сирга ўхшаш нарса эди. Қарлос жамики қўшни қабилалар билан савдо қилар, ҳиндуларга маълуму машҳур одам бўлиб, уларнинг қарийб жами сардорлари билан дўстона муомалада эди. Ҳиндулар ҳам у билан яхши муносабатда эдилар; ахир у америкалик эди-да. Ҳиндуларнинг америкаликларга муносабати ўша замонларда, ундан кейинроқ ҳам шундоқ эдики, америкаликларнинг ҳатто ниҳоятда кам сонли трапперлар ёки тижоратчи тўдалари ҳам айни пайтда мексикаликларнинг улкан карвонларига ҳамла қилиб, уларни шафқатсизларча талон-тарож қиладиган апачлар ва коман-

чилар ерларидан ҳеч нимадан хавфсирамай ўтиб-қайтиб юраверишарди. Орадан талай вақтлар ўтганидан кейингина бу қабилалар саксларни ҳам жонларидан ёмон кўриб қолдиларким, бунинг учун эса неча-неча марта-лаб ҳиндуларга нисбатан ваҳшиёна шафқатсизлик кўрсатган оқ танлиларнинг ўзлари айбдор эдилар.

Карлос эса ҳиндулар билан савдо қилар экан, ўзининг чоққина ранчосини, туғишганларини ҳеч қачон унутмасди, онаси билан синглисига эса ҳамisha, мен йўғимда ҳиндулардан қўрқманглар, деб тайинлар, ҳиндулар сизларга қўл теккизишмайди, деб ишонтирар эди.

У ёлғиз хикариллар — тоғда, Санта-Федан шимоли-шарқ томонда истиқомат қиладиган кичиккина, аянчли қабила билан ош-қатиқлиқ қилмасди. Бу қудратли апачлар қабиласининг шохобчаларидан бири эди-ю, аммо ўзларини алоҳида тутар ва уларнинг жанубнинг буюк босқинчи-талончилари — мескалери ҳамда «бўри кушандалари» билан муштараклик жиҳатлари кам эди.

Ана шу сабабдан ҳам жажжи Росита билан онаси ўша кунлари водийни оралаб қолган овозларга нисбатан бутунлай хотиржам бўлмаса ҳамки, ҳарҳолда қўшниларига қараганда хиёл камроқ қўрқув билан қараётган эдилар.

Дон Хуан улардан муттасил хабар олиб турар ва ҳар гал вақтинчаликка ўз уйига кўчиб ўтишга кўндиришга уринарди: унинг уйи катта, кўнгилдагидек мустаҳкамланган, соҳиби хонадон ва кўплаб пеонлари қўриқлашади уни. Аммо Роситанинг онаси, унинг хавотирланишини эшитганда кулиб қўя қоларди, кейин Росита ҳам унинг таклифини рад этарди, албатта — қизнинг наздида бу ноқулай ҳамда кўпдаям одоб-таомилга тўғри келмайдигандек кўринарди.

Водийда ҳиндулар пайдо бўлибди деган овозлар тарқалганидан кейинги учинчи кеча яқинлашиб келмоқда эди. Она билан қиз дастгоҳ ва урчиқни қўйиб, ерга тўшалган тўшакларига узанаман деб турган эдилар ҳамки, Бизон тўсатдан бўйрада ётган жойидан сапчиб турди-ю, ғазабкор ириллаганича эшикка қараб отилди.

Ириллаш вовиллашга айланди, вовиллаганда ҳам шунақанги жазавага тушиб вовиллардики — бундан эшик орқасида бегона одам тургани дарҳол аён бўлди. Эшик зичлаб ёпилиб, тамбалаб, ғалақаси солиб қўйил-

ган эди-ю, аммо кампир, ҳатто, ким бу, деб сўраб ҳам ўтирмай, ғалақани суриб, уни очди.

У остонада кўринар-кўринмас ҳиндуларнинг ваҳшиёна ҳайқириқлари янграб, зилдай сўйил зарби уни ерга чалпак қилиб қулатди. Итнинг жонини жабборга бериб қилаётган ҳамлаларига қарамай, ваҳимали буёқлар чаплаб, пару патлар қадаб олган бир нечта ёввойи қийқириб, қуролларини силкиганча ичкарига ёпирилиб кирди. Орадан беш дақиқа ўтмаёқ улар қўрққанидан додлаётган қизни кўтариб чиқишди-да, хачирга миидириб боғлашди.

Ёввойилар ҳиндулар учун заррача бўлсин қийматга эга кўринган арзимасгина буюмларни олиб, ранчога ўт қўйиб юборишди-ю, шоша-пиша от йўрттириб кетишди.

Росита ўзи чандиб боғланган хачир устида ўлтирган жойида ёнгин алангасини кўрди, ўғрилар ўзини кўтариб чиқаётган пайтда эса онасига кўзи тушганди — остонада чалқанчасига қимир этмай ётар ва жони узилиб бўлганга ўхшарди. Мана энди уйлари аланга ичида, аллақачон томлари ловиллаб ёняпти!

— Бечора ойижоним! — алам ичра пичирларди қиз. — Эй худойим! Ойижонимга нима бўлади энди?..

Карлоснинг ранчосига бостириб киришган айни бир пайтда ёки салгина кейинроқ дон Хуаннинг уйи қарши-сида ҳам пайдо бўлишди ҳиндулар; аммо-лекин озроқ ҳайқириб-қийқиришиб, болохона-шийпон ва дарвозага қарата камонлардан бир нечта ўқ узишиб, ғойиб бўлишди.

Дон Хуан дўстларидан хавотирга тушиб қолди. Ҳиндулар фермасидан узоқлашганлари заҳотиёқ уйдан астагина чиқиб, қоронғида пайқашмас деган умидда ўзига яхши ошно ранчо сари йўл олди.

У тўхтамай бораверди. У пиёда бораётган эди-ю, бироқ қуролланган, ё Роситани ҳимоя қилиб қолиш, ё ҳалок бўлишга аҳд этиб, кучи борича югураверди.

Бир неча дақиқадан сўнг у ранчо эшиги қаршисида турарди, ана шунда ловиллаб ёнаётган томдаги аланга шуъласида кампирнинг беҳуш жасадини, унинг даҳшатли, мурдадай кўкаринқираган афтини кўриб даҳшатга тушди.

Олов ҳали кампирга етиб келмаганди, лекин яна сал фурсат ўтгундек бўлса — тамом, у ёниб кетарди.

Дон Хуан уни богчага олиб чиқди, кейин жонҳолатда, куйиб-ўртаниб Роситани чорлаб ахтара кетди.

Аммо, қиз жавоб бермасди. Аланганинг чирсиллаши, тун шамолнинг уфуриши, тоғ бойқушининг «хув-хув» сию дашт бўрисининг улишигина жавоб бўлди унинг хавотирли нидосига.

Ниҳоят, ҳеч қандай умид қолмагач, дон Хуан чалқанча ётган жасад ёнига қайтиб, уни кўздан кечиргани ёнига тиз чўкди. Уни ҳайратда қолдириб, кампир ҳали тирик экан, йигит сув томизиб лабларини ҳўллаганидан кейин у аста-аста ҳушига кела бошлади. Даҳшатли зарба гангитиб, ҳушидан кеткизган экан, холос.

Дон Хуан уни даст кўтарди-ю, қалбини дард-алам тирнаган кўйи ўзига жуда яхши таниш сўқмоқ билан уйига жўнади.

Эртасига эрталаб тунги воқеалар ҳақидаги мишмишлар бутун Сан-Ильдефонсога таралиб, кишилар юрагига янаям кўпроқ ваҳима солди. Комендант барчанинг кўзи ўнгида кўп сонли бўлинманинг олдида шаҳар бўйлаб от ўйнатиб ўтди. Узундан-узоғу тумтароқли гап-сўзлар ва бемаънию беҳуда нари-бери кезинишлардан кейин уланлар гўёки ҳиндуларнинг изига тушгандай бўлдилар.

Бироқ, қош қорайишидан бирмунча вақт бурунроқ сувори аскарлар одатдагидек маълумот билан қайтдилар:

— Ҳиндуларни қувиб етиб бўлмади.

Уларнинг изларидан нақ Пекосгача бордик, деб ахборот бердилар. Ҳиндулар дарёдан кечиб ўтиб, нарига, Льяно Эстакадога қараб кетибдилар.

Ушбу охирги хабар водий аҳлини бир қадар тинчлантирди: агарда ҳиндулар ўша томонларда ғойиб бўлишган бўлса, босқин ва талончиликлар тугабди-да, деб ўйлаш мумкин эди. Улар, аниқ гап, ҳаммалари билганларидек, қаердадир ўша ёқларда ов қилиб юрган қабилadoшларига қўшилишга қарор берганлар.

XXVII Б О Б

Оқшом олди Вискарра ўзининг башанг кийинган уланлари билан водий юқорисига ўтиб кетди: улар ҳиндуларни таъқиб қилиб қайтаётган эдилар.

Орадан кўп деганда бирор соатча муддат ўтгач, йўлда чангга беланган, чарчаб-толиққан бошқа суворилар тўдаси кўринди; бу тўда ҳам худди бояги тарафга қараб борибверди. Буни ҳатто суворилар тўдаси деб аташ эҳтимолдан йироқроқ эди: унда юк ортилган хачирлар бор эди, кейин, ҳўкизлар бир нечта аравани тортиб келарди. Фақат биргина одам от минганди; энгил-боши ва бутун кифаси унинг карвоннинг эгаси эканини очиқ-ойдин кўриб турарди.

Олис йўл чавандоз билан отини толиқтириб қўйган, икковлари чангга беланган, аммо бари бир суворини ташлаб қийин эмасди: бу Қарлос — бизон овчиси эди.

У уйига яқинлашиб қолганди. Ана шу чанг-тупроқ йўлдан тағин беш миль юрилса бас — қаршисида қашшоғона кулбасининг эшиги очилиб турибди-да. Яна бир соат — ана унда кекса онаси, азиз синглизини қучоғига отилишади, у ҳам меҳрибонларини бағрига босиб, сулиб-эркалайди.

Қанчалик ногаҳоний хурсандчилик бўлади уларга бу! Турган гапки, яқинлари унинг шунчалик тез қайтишини кўтишмаяпти.

Қанчалар хурсанд қилади у меҳрибонларини! Ахир уни жуда-жуда омади келганди-да. Қулинг ўргилсин хачирлар, олам-жаҳон юк — буларнинг бари чинакам бойлик-ку, ахир! Роситага мана энди янги кўйлак — дағил қўлбола матодан эмас, шойи, четдан келтириладиган ҳақиқий шойи кўйлак, кейин, елкапўш ҳам, заррин туфлича ҳам олиб беради, иннайкейин у кейинги байрамга нозик ипак пайпоқ ҳам кийиб чиқади... Дўстидон Хуанга муносиб қайлиқ бўлади синглизини. Онажонинини эса жўхори шарбат билангина кифояланиб қолмайди: чой, қаҳва, шоколадли шарбат — қай бирини хоҳласа, ўшани ичади.

Кулбалари жудаям путурдан кетиб, тўкилай деб қолган, уни бузиб ташлаб, ўрнига янги иморат солиш керак... Йўқ, яхшиси қорабайрига отхона бўлиб қолақолсин, янги уйни эса ёнига қуриш мумкин. Хачирларни сотганидан кейин тузуккина ер олиб, хўжалигини оёққа турғазса ҳам бўлади.

Хўш, Карлоснинг чорвадор бўлишига ва ерини ижарага беришига ёки унда ўзи яйлов ўрнида чорва боқса нима халал беради? Бу хийла эътиборли, шарафли касби кор-ку; ана унда Сан-Ильдефонсода энг паст тоифа-

даги одам бўлмайди. Худди шундай қилиши керак. Лекин олдинга ясситоғликка тағин бир марта бориб, вако дўстларини зиёрат қилиб келиши керак — ахир улар ваъда беришди-ку... У, уларнинг ваъдаси унинг бутун орзу-умидлари кошонасининг баайни пойдевори-ку!

Роситага шойи кўйлак, кекса онасига қимматбаҳо ичимликлар олиб бериш, янги уй, яйлов — булар хусусида орзу қилиш қанчалар нашидали-я! Аммо Карлоснинг яна битта, энг эзгу орзуси бор, у бошқаларининг барини сояда қолдириб, босиб кетаётган эди. Агарда у ваколари юртига яна бир марта бориб қайтса, ушбу орзусини ҳам рўёбга чиқара олади.

Карлос ўзи билан Каталинани ажратиб турган бирдан-бир тўғаноқ — ўзининг камбағаллиги эканига ишонарди. Негаки, қизнинг отаси, очигини айтганда, даламандлардан эмасди. Тўғри, ҳозирда бадавлат-у, лекин бундан атиги бир неча йиллар муқаддам Карлос қатори қашшоқ кон қазувчи эди. Илгари улар қўшни эдилар, кейин, ўша замонларда дон Амбросио болакай Карлосни жажжи Каталина билан дўстлашишга мутлақо номуносиб деб ҳисобламас эди.

Хўш, борди-ю, бизон овчиси ҳам бойиб кетадиган бўлса, у чоғда нима монелик қила олади унга? «Албатта, ҳеч нима, — ўйларди Карлос. — Мабодо мен унинг ўзимнинг ундан камбағал эмаслигимни исботлай олсам, Каталинани менга беришга рози бўлади. Нимага ҳам бермас экан? Онамининг айтишича, менинг томирларимда ҳам хоҳлаган олижаноб идальгонинг томиридаги қон оқаётган экан, заррача кам жойи йўқ экан унда. Башарти ваколари рост гапирган бўлсалар, яна битта сафарга отланса — Карлосда, бизон овчисиди ҳам қон соҳиби дон Амбросионикига теппа-тенг олтини бўлади-кўяди-да!»

Қайтишда бутун йўл бўйи ана шуни ўйлаб келди у. Ҳар куни, ҳар соатда у хаёлий қасру кошоналарни қуриб келаверди. Бирор соат йўқ эдики, у Роситага шойи кўйлак, онасига чой, қаҳва, шоколад харид қилмагани у янги ранчо қуради, яйлов сотиб олар, Каталинанинг отасига олтинларини кўрсатиб, қизнинг қўлини сўрарди. Ҳа-ҳа, ҳавойию хаёлий қасру кошоналар денг!

Уйига яқинлашгани сайин мазкур қувончли рўёлар тобора амалга ошадигандек туюлиб, овчининг чеҳраси эса бахтиёрликдан ял-ял ёниб боради эди. Аммо-лекин

қидемай бу чехрага даҳшат чанг солиб, уни буткул ўз-
га қиёфага солади...

Тезроқ онаси ва синглиси дийдорига етишдек лаз-
ватни тотиш истагида у бир неча бор олдинга от суриш-
га чоғланди-ю, бироқ ҳар гал ўзини босди.

— Йўқ,— деб пичирларди у.— Хачирларнинг ёнида
бўлганим тузук. Шуниси салобатлироқ! Ранчонинг ол-
дига борганда қатор сафга тизиламиз. Ушанда улар
мени биров билан бирга келибди, хачирлар ана ўшани-
кидир, деб ўйлашади. Ҳаммаси меники, деганимда, ме-
ни ҳақиқий ҳинду бўлиб кетибди-ю, ўзининг довурак
хизматкорлари билан жанубдаги вилоятларга босқин
уюштирибди-да, деб хаёл қилишади.

Шундай хаёл кичираркан, Карлос мамнун кулиб
қўйди.

«Росита, сингилжоним!— ўйларди у.— Мана энди у
дон Хуанга тегадиган бўлди. Ана энди розилик берсам
ҳам бўлади. Шундоқ бўлгани маъқул. У довурак, мард,
мен яна даштга кетганимда Роситани ҳимоя қила ола-
ди. Туғри, бу энг охирги сафарим бўлади. Тағни бир
мартагина бориб қайтсам кифоя— ана ўшанда мени
оддийгина бизон овчиси Карлос деб эмас, балки сенъор
дон Карлос деб атайдиган бўлишади».

Хаёлидан бойиб кетиши, ўзини «дон Карлос» деб
аташлари хусусидаги ўй кечар экан, яна кулиб қўйди у.

«Ҳеч кимни учратганим ғалати бўлди-ку!— деб
ўйлади у кейин.— Йўлда бирон жон зоти кўринмаса-я!
Ҳали бутунлай қош қорайганича йўқ, қуёш қоя ортига
ботиб кетмаган бўлса. Одамлар қай гўрга ғойиб бўлиш-
дийкин? Йўлда эса анча-мунча яп-янги от излари кўрин-
ишти... Э-ҳа! Бу ерда аскарлар бўлишибди-ку! Яқинги-
нада водийнинг юқорисига қараб ўтиб кетишибди... Ле-
кин ҳеч жойда ҳеч зот кўринмаётгани шунинг учун
эмасдир-ку, ахир. Бирорта орқада қолган аскар ҳам
кўринмайди ақалли! Агарда мана шу излар бўлмаса,
Сан-Ильдефонсога ҳиндулар ҳужум қилган деган хаёл-
га боришим ҳеч гап эмасди. Аммо-лекинига, мабодо
ростдан ҳам апачлар пайдо бўлган бўлсалар, бизнинг
комендантимиз ўша мўйловдорлари билан ўла қолса
қалъадан бунчалик олислашишга журъат этолмасди,
ҳа, уни яхши биламан!.. Йўқ ҳарҳолда буёғи ғалати
бўлди-ку! Ҳеч нимага ақлим етмай қолди. Балки бугун

бирорта байрамдиру, ҳаммалари шаҳарга кетишгандир?»

— Антонио, дўстим, сен ҳамма байрамларни биласан. Бугун бирорта байрам куними?

— Йўқ, хўжайин.

— Унда бутун халқ қаёқда, ахир?

— Мен ўзим ҳам тушунолмапман, хўжайин. Ақалли бирорта одам учрай демайди-я...

— Ана, мен ҳам шунга тушунолмапман-да... Эҳтимол яқин-атрофда ҳиндулар пайдо бўлиб қолишди-кин? Сен нима деб ўйлайсан?

— Йўқ, хўжайин, буёққа қаранг-а! Манави уланларнинг изи. Ўтиб кетганларига бирор соатча бўлган. Уланлар юрган жойда ҳиндулар бўлмайди.

Антонио буни шундай оҳангда айтиб, Карлосга шундай қараш қилдики, овчи унинг ўз-ўзидан мутлақо бошқача маънода тушуниш мумкин бўлган сўзларини аслича фаҳмлашда янглишмади. Антонио, башарти бу ерга уланлар келган бўлса, ҳиндулар бош суқишга ботинолмайдилар, демоқчи эмасди мутлақо, бутунлай аксини айтмоқчи эди. «Уланлар пайдо бўлганлари туфайли ҳиндулар йўқ бу ерда» эмас, балки «ҳиндулар кўринмагани учун уланлар келишган бу ерга» — мана нима демоқчи эди у.

Карлос унинг гапига тушунди ва бунга жавобан хоҳлаб кулиб юборди — негаки, унинг ўзи ҳам худди шундай ўйлаётган эди-да, ахир.

Йўлда боягидек ҳеч ким кўринмасди, бу ҳол Карлосни хавотирга сола бошлади. У ҳали-ҳозиргача ўз яқинлари бошига мусибат тушган деган хаёлга борганича йўқ эди-ю, бироқ ушбу кимсасизлик, ёлғизлик фикритуйғусини уйғотаётган ва кўнгилни ғаш қилиб, қандайдир хосиятсиз нарсадан далолат бераётгандек туюларди.

Шу тариқа Карлоснинг кўнглига ғашлигу маъюслик ўрмалаб кириб, уни буткул забт этди, эндиликда овчи уни эплаб жиловлаёлмай қолди.

У ҳали бирорта ранчонинг ёнидан ўтганича йўқ. Юқорида зикр этилганидек, уларнинг уйи, агарда водийнинг қуйи томонига қараб юриладиган бўлинса, энг одоқдаги ранчо эди. Лекин водий аҳли ўз отару подаларини яшам қўйироқда боқарди-ку, айнан шу соатларда эса мол-

қолини уйга ҳайдаётган бўларди одатда. Ҳозир бўлсан мол-ҳол, на чўпон-чўлиқ кўринади.

Ўулнинг ҳар икки биқинидаги одатда чорва ўтлаб юрадиган яйловлар бўм-бўш. Бунинг маъноси нима бўлди экан?

Буни кўрганида юраги безовталаниб, дилига хавотир дорида; бу ширава хавотир токи ўзи бурилиши зарур ерга етгунича болалаб, газак олиб бораверди.

Мана, ниҳоят, бурилишга ҳам етиб келди. У уйига олиб борадиган йўлга бурилди, абадий яшил эманзорни ортда қолдирди — ҳозир ранчосини кўради у.

Қарлос беихтиёр отининг жиловини тортди-ю... эгарда ўлтирган жойида ҳайкал мисоли қотди-қолди; оғзи киёл очилган, ҳаракатдан тўхтаган нигоҳи даҳшатли эди.

Уй кўринмаётган, уни кўм-кўк кактус девор пана қилиб турган эди-ю, аммо девор тепасида аллақандай мудҳиш қоп-қора чизиққа кўзи тушган, ҳовлида эса тепага аллақандай ғалати дуд буралиб кўтарилаётган эди.

— Ё одил эгам! Нимаси бўлди бу?— нидо солди у титроқ овоз билан, бироқ ўша ондаёқ, сира иккиланмай отининг икки биқинига шпорларини шундай қададики, тулпор мисоли ўқдай учиб кетди.

Мана уни иҳотадан ажратиб турган масофа ортда қолди ҳам, овчи отдан сакраб тушиб, ичкарига қараб отилди.

* * *

Ҳадемай бутун карвон етиб келди. Антонио иҳота ортига югурди.

У ерда, ҳали совуб улгурмаган, ёнғиндан қорайиб кетган деворлар орасида, курсида хўжайини чалқайиб ўлтирарди. Қарлоснинг жингалак сочли боши эгилган; у бошини иккала қўли билан чангаллаб олган, бармоқлари титраб-қалтирар эди.

Одим шарпасини эшитиб кўзларини кўтарди, аммо бир лаҳзагагина.

— Ё тангрим! Онажоним... сингилгинам!..— такрорларди у. Боши яна ҳам бўлди, у энтика-энтика, оғир нафас оларди. Бу дам — шафқатсизона, чидаб бўлмас изоб истироблар дами эди. У даҳшатли ҳақиқатни ҳақиқий воқеани кўнгли сезиб, ҳис этиб турарди.

XXVIII БОБ

Даҳшатли зарбадан асосан қаттиқ шикастланган Карлос бир неча дақиқагача бу сарҳушлигу лолликни қувишга уринмади ҳам.

Аллакимнингдир дўстона қўли кифтига тегиб, бошни кўтарди у. Тепасида дон Хуан энгашиб турарди.

Дон Хуаннинг афтидан унинг Карлосдан кам изтироб чекмаётгани кўриниб турибди. Демак, умид қиладиган жойи йўқ. Шундай бўлса-да, Карлос беихтиёр сўради:

— Онам? Синглим?

— Онанг меникида,— деб жавоб берди дон Хуан.

— Росита-чи?

Дон Хуан жавоб бермади, унинг ёноқларидан ёш юмаларди.

— Қўй, дўстим,— деди Карлос дон Хуаннинг унинг ўзидан оз таскинга муҳтож эмаслигини кўриб,— қўй, керакмас... Ҳар қандай оғир мусибат бўлгандаям билишни истайман! У ўлдими?

— Йўқ, йўқ!.. Ишонаманки, у ўлмаган!

— Уни ўғирлаб кетишдимиз?

— Минг афсуски, шундай!

— Ким?

— Ҳиндулар!

— Ҳиндулар эканига ишончинг комилми?

Карлос шундай деб сўраркан, кўзлари алланечук галати чақнаб кетди.

— Имоним комил мутлақо. Мен уларни ўз кўзим билан кўрдим. Онанг...

— Онам! Унга нима бўлди?

— Ҳозир у бежавотир жойда. Ёввойилар остонада қарши олибди, уни сўйил билан уришибди, шунда ҳушидан кетиб қолибди-ю, ортиқ ҳеч нимани кўрмабдиям, билмабдиям.

— Росита-чи?

— Уни ҳеч ким кўрмабди. Шубҳасиз, уни ҳиндулар олиб кетишган.

— Улар ҳиндулар эканига аминмисан ўзинг, дон Хуан?

— Аминман. Улар худди бир вақтда менинг уйимга ҳам ҳужум қилишди. Улар бундан илгарироқ молларимни ҳайдаб кетишганди, ана шунинг учун пеонлардан

биттаси пойлоқчиликда турганди. Ўша ҳиндуларни олис-даноқ пайқаб қолди-ю, дарвоза-эшикларни тамбалаб, димога тайёрланишга улгурдик. Улар бизнинг ҳушёр турганимизни кўриб, тез орада қайтиб кетишди. Мен бўлсам ўша заҳотиёқ уйдан чиқиб, аста буёққа келавердим, нимага деганингда онанг билан синглингдан хавотирда эдим. Келсам, том аллақачон ланғиллаб ёнаётибди, онанг остонада ҳушидан кетиб ётибди. Росита бўлса йўқ! Ё Биби Марям, у ғойиб бўлибди-я!

У яна йиғлаб юборди.

— Дон Хуан!—қатъий оҳангда деди Карлос.—Сен мен ва оиламнинг дўсти, биродарим эдинг. Биламан, мендан кам изтироб чекмаяпсан. Кўзёшининг ҳожати йўқ! Қара, менинг кўзларим қуппа-қуруқ ҳозир. Бошқа бир томчи сеш тўкмайман, эҳтимол, токи Роситани халос этмагунимча... ёки унинг ўчини олмагунимча мижжа қоқмасман ҳам. Ҳаялламай ишга киришиш керак! Ўша ҳиндулар ҳақидаги бари билганларингни гапириб бер менга... Тезроқ бўл, дон Хуан! Бари, барини билишни истайман!

Дон Хуан ўша уч-тўрт кун орасида оғиздан-оғизга кўчиб юрган турли хил овозаю миш-мишларни батафсил гапириб берди, шунингдек, ҳиндуларнинг ҳаракатларини ҳам: уларни яситоғликда биринчи марта қандай кўриб қолганларини; уларнинг чўпонларга қандай дуч келганларию қўй сурувларини қандоқ ҳайдаб кетганларини; уларнинг водийда пайдо бўлганларию подасига ҳамла қилганларини — баайни унинг подаси талафот кўрганди; сўнгра ундан кейинги, Карлос билиб олган нарсаларини ҳикоя қилди.

У Карлосга яна аскарларнинг қандайин ғайрату шижоат-ла ҳаракат қилаётганларини, ўша машъум куни эрта-саҳарда талончилар изидан борганларини, ўзининг одамлари билан аскарларга қўшилмоқчи бўлгани, аммо комендантнинг бунга кўнмаганини ҳам сўзлаб берди.

— Кўнмади?— қайтариб сўради Карлос.

— Ҳа, аскарларга фақат халақит берасизлар, деди бизга. Ўйлашимча, мендан ранжигани сабаб бўлди-ёв бунга. У мени ўшанда, байрамда ёмон кўриб қолгандида, ахир.

— Шундай де. Яна нима?

— Уланлар яқингинада қайтишди, бирор соатча бўлди. Ҳиндулар Пекосдан кечиб ўтиб, Льяно Эстакадога томон кетишган; жойгача изларидан бордик, дейиш-

ди. Ҳиндулар кўриниб турибдики, Улуғ Текисликлар тарафга от солиб кетишган, шуни-чун у ёғига кетларидан қувиш бефойда экан. Аскарлар шундай дейишяпти. Одамлар эса ёввойилар гумдон бўлишганидан, эндиликда ҳеч нарсадан хавотир олмасликларидан бахтиёру хурсандлар. Мен ҳиндуларни қувгани бўлук тузишга уриниб кўрдим, лекин ҳеч ким жонини хатарга қўйишни хоҳламади. Шунда ўзимнинг пеонларим билангина, бу ишончсиз иш бўлса-да, таъқибга чиқмоқчи бўлиб турувдим, лекин, худога шукрки, сен қайтиб қолдинг мана.

— Эй худо, ишқилиб изларидан қувиб боргани фурсат ўтиб қолган бўлмасин-да. Гарчи, ҳалиги... Улар ярим кечада бостириб келишди дедингми? Ахир ёмғир ҳам ёғгани, шамол ҳам бўлгани йўқ-ку — излари бамисоли шудринг томчиларидай аниқ-таниқ туради, қани энди ит бўлса... Ҳа-я, Бизон қаёқдайкин?

— Меникида. Эрталаб йўғийди, биз уни ҳиндулар ўлдиришган ёки ўғрилаб кетишган деган хаёлга борган ҳам эдик; лекин одамларим уни шу ердан, ранчодан топишибди. У ҳаммаёғи ифлос, найза билан шунақанги жароҳат етказилган, ярасидан қони оқиб ётган экан. Афтидан, ҳиндулар уни ўзлари билан ола кетишган, лекин йўлда жуфтакни ростлаб қолган у.

— Қизиқ... жуда қизиқ... Шўрлик Роситагинам! Бечора сингилгинам-а! Қаердасан ҳозир ўзи? Қаерда?.. Бирор кун кўрармиканман сени?.. Ё танграм! Ё парвардигор!

Бир муддат Карлос яна тушқунликка тушиб, боягидек ноумид ҳолатда сарҳуш қотди.

Аммо туйқисдан сакраб турди-ю, муштларини қисганича, кўзлари ёниб.

— Дашт ялангликлари бепоён, манфур талончиларнинг излари билинар-билинемас, лекин Карлоснинг, бизон овчисининг кўзлари ўткир!— дея қичқириб юборди. — Топаман сени, бир умр изласам ҳам, бари бир топаман сени!.. Қўрқма, Росита! Қўрқма, суюкли сингилгинам! Ердамга етиб бораман сенга! Агарда сени хафа қилган бўлсалар—қолларига вой, сенга озор берган кабиланинг ҳолига вой?!— Сўнгра дон Хуанга ўгирилиб, бундай деди у:— Қош қорайиб бўлди. Бугун ҳеч нима қиллолмаймиз. Дон Хуан! Дўстим, биродарим! Бошла мени онамининг ёнига...

Ғаму мусибат сўйлашадиган тилнинг ўз лутфи-лато-

фати бор, бизон овчисининг сўзлари ана шу назм лато-
фати ила буткул йўғирилган эди. Аммо бу назмона лато-
фат портлови тез сўнди-ю, у яна бешафқат воқеликка
қайтди. Таъқиб муваффақиятли чиқишига кўмаги тега-
диган жамики чораю жиҳатлар ҳушёрлик, ақл-идрок-ла
мушоҳада этилиб, моҳирона тадбирлар кўрилди. Қурол,
ислаҳа-анжомлар, от — тонг-саҳарда йўлга тушмоқлик
учун Карлос буларнинг ғамини еб, таппа-тахт қилиб
қўйди. Икковларини кузатиб бориш лозим бўлган —
ўзининг ва дон Хуаннинг хизматкорлари учун ҳам от-
лар шай қилиб қўйилди.

Хачирларга озиқ-овқат ва олис йўл босиш учун зар-
ур бўлган ҳамма нарсалар ортилди, зеро Карлос то-
снингисини халос этиш ёки ўчини олиш хусусида ичган
қасамини адо этмагунича қайтмасликка қарор берганди.
У кичкинагина тўсиқдан ҳам чўчийдиган таъқибчилар
тонфасидан эмасди. У «ҳиндуларга қувиб ета олмадик»
қабилидаги ахборот билан қайтмоқчи эмасди. У талон-
чилар изидан дунёнинг нариги чеккасига бўлса ҳам,
қаерда бўлмасин ҳиндуларнинг қалъа-қўрғонларигача
етиб боришга қатъий аҳд қилганди.

Дон Хуан бутун қалбию вужуди билан унинг измида
эди, зотан у Карлосдан оз манфаатдор эмасди таъқиб
натижасида, ғам-қайғуси ҳам овчиникичалик беҳудуд
эди.

Унинг ёнида йигирма чоғли пеон бор эди, ҳаммала-
ри содиқ тагнослардан бўлиб, гарчи уруш буларнинг
касби корию иқтидори эмасди-ю, бироқ ўзлари ниҳоятда
ўрганиб қолган хўжайинларига хайрихоҳ, астойдил хиз-
мат қилишга интилиш эса уларни ҳақиқий жангчига ай-
лантирар эди.

Ишқилиб талончиларни қувиб етсалар бўлгани, жанг-
нинг қандай оқибат билан тугашига келганда эса, сира
кўрқадиган жойи йўқ. Мазкур тўда ҳақида маълум бўл-
ганларига қараганда у унчалик катта эмас ва кўпда
хавфли кўринмайди. Акс ҳолда ўғрилар бунчалик арзи-
мас ўлжага қаноат қилиб, водийдан жўнаб қолмасди.
Агарда уларга ўз қабилалари сафига бориб қўшилмас-
ларидан бурун қувиб етилса ҳамма иш яхши тугаши мум-
кин ҳали. Уларни талаб олган моллари билан асир-
ларини қайтариб беришга мажбур қилишди ва эҳтимол-
ли, ўзлари айбдори бўлган жамики мусибату уқубатлар
қимматга тушар уларга. Шундай қилиб, энг муҳими —

вақтдан ютиш; шу тариқа таъқибчилар тонг ёриша бошлаши биланоқ йўлга тушишга қарор бердилар.

Уша куни Карлос туни билан мижжа қоқмади, дон Хуанни бўлса ҳар замон-ҳар замонда бир нафасгагина кўзи илиниб, беҳаловат мудроқ элтарди. Икковлари ҳам ечинишмади, ўринга ҳам ётишмади. Карлос ҳанузгача етказилган зарбадан тўлиқ ўзига келолмаган ва уйқусида алаҳсираб ётган онаси тўшаги тепасида ўлтирар эди.

Овчи миқ этмай, ўйга толганча ўлтирарди. У хаёлан иложию имкони бор жамики режаю тахминларни бирмабир ғалвирдан ўтказаетган эди. Қайси қабиладан бўлиши мумкин бу тўда? Бу апачлар ёки команчилар эмас. Уйга қайтаётганида буларниям, уларниям учратди. Улар дўстона тутдилар ўзларини ва Сан-Ильдефонсо аҳли билан бирор тўқнашув бўлганини бирон оғиз сўз-ла шама қилганлари ҳам йўқ. Иннайкейин, бундан ташқари, на уларию на булари бунақанги камсонли тўда бўлиб ҳаракат қилмасликлари аниқ. Карлос ўғрилар команчилар ҳам, апачлар ҳам эмаслигидан афсусланарди. Башарти улардан қай бири бўлгани чоғда ҳам, ўғриланган қиз унинг синглиси эканини билганлари заҳотиёқ асирани қайтариб беришарди, бунга шубҳаси йўқ эди. Аммо ундай эмас, на уларининг, на буларининг алоқаси бор бунга. Хўш, унда кимлар бўлди? Ютларми? Дон Хуаннинг айтишича, водийдагиларнинг барчаси аминмиш бунга. Мабодо шундоқ бўлса, умид узмаслик керак: Карлос мазкур қудратли ҳамда жангари қабила авлод-шаҳобчаларидан бири билан савдо қилиб келади. У ҳатто ютларнинг баъзи сардорлари билан дўстона муносабатда, лекин улар ҳозир бу ерда эмас — шимолдаги кенту қишлоқларга уруш очиб, ўша ёқларга кетишган.

Шунда унинг фикру ўйи яна хикарилларга қайтарди. Бу қўрқоқроқ ва бераҳм қабила, иннайкейин, унга ашаддий душман қабила. Улар овчининг каллахомини қўлга киритсалар хурсанд бўлардилар. Борди-ю, синглиси хикариллар қўлига тушган бўлса, ҳолига маймунлар йиғлайди-да. У тақдирда Роситани нималар кутаётганини ўйлаганини ўзидаёқ Карлоснинг аъзойи бадани қалтираб муштларини жонҳолатда ғижимлаганича сапчиб туриб кетди ўрнидан.

Тоғ яқинлаб қолди. Пеонлар аллақачон туриб, қуролланиб олишганди. Эгарлоғлиқ оту хачирлар ҳовлида кутяпти, шунда дон Хуан ҳамма нарса тайёр деб хабар қилди. Карлос хайрлашгани онаси ёнига борди. Онаси унга ўринга яқинроқ энгаш деб ишора қилди. Қампир ҳам ниҳоятда заиф-қолсиз эди: у кўп қон йўқотган ва қийналиб, аранг эшитиладиган қилиб гапирарди.

— Болагинам,— деди у Карлос энгашганида,— қайси ҳиндуларни таъқиб қилгани отланаётганингни биласанми ўзи?

— Йўқ, ойижон,— деб жавоб қилди Карлос,— лекин хикариллар, бизнинг душманларимизмикин деб чўчиб турибман.

— Айт-чи, ўшалар соқол қўйишадими? Қимматбаҳо узуклар тақишадими?

— Йўқ, ойижон. Нега бунақа деб сўраяпсиз? Уларда соқол йўқлигини ўзингиз биласиз-ку ахир!.. Шўрлик онагинам-а,— деб шивирлади у дон Хуанга,— шундай даҳшатли зарбадан кейин ўй-хаёллари ҳам чалкашиб кетадиган бўп қопти.

— Изларига қараб бор!— сўзини давом эттирди Карлоснинг онаси, унинг охириги гапини эшитмай.— Изларидан бор... Эҳтимол сени... .. га олиб борар,— деб ўғлининг қулоғига алланимани шипшиди.

Карлос, худди эшитган нарсаси лол қолдиргандек, сесканиб кетди.

— Нима!— деди у.— Шундай деб ўйлайсизми, ойижон?

— Гумоним бор, фақат гумонгина... Лекин сен излардан бор, улар сени... Излардан бориб, ўзинг ишонч ҳосил қил!

— Сираям шубҳаланманг, ойижон, қотириб текшириб кўрганим бўлсин!

— Йўлга чиқишдан олдин қизишмасликка, эҳтиёт бўлишга сўз бер!

— Қўрқманг, ойижон! Эҳтиёт бўламан.

— Агарда шу тўғри бўлса...

— Агар шу тўғри чиқса, тезда қайтаман. Илоё ўзи паноҳида асрасин сизни, ойижон! Қоним қайнаб боряпти... Ортиқ пайсалга сололмайман! Ҳа, ўз паноҳида асрасин сизни! Хайр!

Бирор дақиқалардан сунг Карлос ва дон Хуан раҳнамолигидаги суворилар сафи кенгбар дарвозадан тизилишиб чиқиб, водийдан олисларга элтувчи йўлга бурилди.

XXIX БОБ

Суворилар бўлуги йўлга тушганида ҳали тонг ёришиб бўлмаганди, бироқ бу суворийлар ҳаддан зиёд шошилишди деган гап эмасди. Карлос кечқурун уланлар ўтган йўлдан қоронғида юрса ҳам бўлишини биларди: уланлар орқага бурилган жойга етиб борганларида эса етарлича кун ёришиб улгуради.

Дон Хуаннинг ранчосидан беш милча нарида йўл иккига айриларди: бири жанубга қараб кетарди — Карлос кеча кечки пайт ўша ёқдан келганди; иккинчиси чапга бурилар, кейин деярли тўппа-тўғри Пекосга, дарёни кечиб ўтса бўладиган жойга қараб борарди. От туёқлари изи кеча сувори аскарлар чапга бурилганларини кўрсатиб турарди.

Кун бутунлай ёришиб кетди. Энди ана шу топталган, яхши таниш йўлдан бемалол от елдириб борса ҳам бўлади. Бироқ овчи йўлга туёқларнинг аниқ-таниқ изига қарамаяпти — у йўлнинг икки биқинидаги ерни диққатла кўздан кечириб боряпти, ана шу боисдан астароқ илгарилашга тўғри келяпти.

Йўл четию марзаларидаги изларга қараганда яқингинада пода ўтган бу ердан. Шак-шубҳасиз бу дон Хуаннинг ўғирлаб кетилган подаси, эллик бошча. Карлос, изларга қараганда подани бу ердан икки кун олдин ҳайдаб ўтишган, деди ва бу гапи дон Хуаннинг буқа-ҳўкизларини ўғирлаб кетишган кунга тўғри келди.

Бўлук ҳадемай водийни орқада қолдириб, Пекос оқадиган текисликка чиқиб борди. Улар энди етиб олишларига икки милча қолган дарёга қараб тўғри йўл солишга чоғланиб туришган ҳам эдики, олдинда югургилаб кетаётган Бизон тўсатдан шартта сўл томонга бурилди. Карлоснинг ўткир кўзлари ит югуриб бораётган ердаги изларни илғади. Бу излар уланлар қолдирган излардан ажралиб, шимол тарафга кетган эди.

Бизоннинг ўша томонга бурилгани Карлосга ҳам дон Хуанга ҳам галати туюлди: у ёқда на йўл, на сўқмоқ бор эди; ит шунчаки бирор жониворнинг изидан чолиб бо-

раётганга ўхшади. Бизон аввалроқ ҳам ўтгандир балки бу йўлдан?

Карлос изларни кўздан кечиргани отдан тушди.

— Тўрт оту бир хачир!— деди у дон Хуанга.— Отлардан иккитасининг фақат олдинги икки оёғи тақаланган, қолган иккитаси билан хачирга умуман тақа урилмаган. Ҳаммасининг устида чавандози бор. Хачир олдинда юрган... юк ортилган бўлиши ҳам эҳтимолдан ҳолимас. Йўқ!— деб қўшиб қўйди у яна пича тикилиб туриб.— Бу юк ташийдиган хачир эмас.

Овчининг мана шуларнинг барини аниқлашига беш дақиқа ҳам кетмади. Бу нарса деярли ҳамма ҳамроҳларига — эҳтимолки Антониодан ташқари барчаларига— бир муъжизадек кўринди. Аммо-лекинга Карлос бирорта майда-чуйда тафсилотда ҳам янглишмаган эди. У изларни яна бир неча дақиқа синчиклаб кўздан кечирди.

— Вақти тўғри келяпти,— деб мурожаат этди у дон Хуанга тағин.— Улар бу ердан кеча саҳарда, ҳали шудринг кўтарилмасдан ўтишган. Сенинг уйингни олдидан ярим кеча бўлмасдан бурунроқ жўнаб кетишганмиди? Бунга аминмисан ўзи?

— Аминман,— деб жавоб қилди чорвадор.— Ёнаётган кулбаларингдан онангни топиб, уйга етиб келганимда аллақачон ярим кеча бўлганди. Бунга ишончим комил.

— Тағин битта савол. Сенингча қандоқ, дон Хуан, уйингга бостириб борган ҳиндулар тахминан неча киши эди? Кўпмиди? Ё каммиди?

— Менимча, кўпчилик эмасди. Дарахтлар панасида неча кишилигини кўролмадим. Ҳайқириқни кўтаришганида эса бир йўла икки-учтагина овозни ажрата олдик. Изларидан ҳам тўда жуда кичикка ўхшайди. Балки худди ўша ҳиндулар олдин сизларнинг ранчоларингга ўт қўйиб, кейин менинг уйимга бостириб келишгандир. Бунга етарлича вақтлари бор эди уларнинг.

— Мен ҳам айнан ўшаларнинг ўзи бўлиши керак деб ўйлаб турибман-да,— деди Карлос ҳамон туёқ излари узра энгашган кўйи.— Манавилар худди ўшаларнинг изи бўлса керак.

— Сенингча, айнан ўшалармикин-а?— қайтариб сўради дон Хуан.

— Шундоқ.. Ана, қарагин-а! Ғалати-я, тўғримасми?

Шундай деб Карлос югурганча яна ёнларига қайтиб, ғингшиб-вовиллай бошлаган Бизонни кўрсатди: унинг мазкур янги излар бўйлаб йўрғалашга сабри чидамаётгани очиқ-ойдин кўриниб турарди.

— Жуда ғалати-ю,— деб жавоб қайтарди дон Хуан.
— Афтидан у бу ерларда илгариям бўлганга ўхшайди-ку.

— Эҳтимол,— деди Карлос.— Лекин буни кейинроқ аниқлармиз. Олдин ўша довурак полвонлар қаёққа қараб кетишганини кўрайлик-чи. Буни катта йўлдан бурилишдан аввал билиб олсак дейман. Қани йўлга, тезроқ!

Улар отларни ниқтаб, йўлдан чоптириб кетдилар. Овчи боягидек ҳаммадан олдинда борарди. Кейин, ўзлари кетаётган йўлдан яна биронта из ажралиб кетган-кетмаганини текшириб, икки биқинидаги ер-тупроқни худди илгаригидек зийраклик ила кузатиб борарди у.

Вақти-вақти билан дарҳақиқат йўлни тасодифий ёлғизоёқ суқмоқ кесиб ўтиб қолар, аммо унинг эски эканлиги, сўнги пайтларда эса ундан бирорта сувори юрмагани кўриниб турарди. Шу боисдан ҳам Карлос уни тузукроқ кўздан кечириш учун оти жиловини тортиб ўлтирмай, тўғри ўтиб кетаётган эди.

Йигирма дақиқаларда бўлук Пекос қирғоғига етиб бориб, кечув ёқасида тўхтади. Суворилар ҳам шу ерда тўхтаганлари, дарёни кечиб ўтмай, орқага қайтганлари яққол кўзга ташланиб турар эди. Бироқ, пода билан уни ҳайдаб борган суворилар нариги қирғоққа икки кун илгарироқ кечиб ўтган эканлар — Карлос шундай деди. Уларнинг излари қирғоқдаги чуқинди-балчиқ устида аниқ-тиник кўриниб турибди.

Карлос саёз жойдан нариги соҳилга ўта бошлади. У бир қарашдаёқ бу ердан бирор аскар ўтмаганини, фақат қирқ ёки эллик бош қорамолдан иборат пода ҳайдаб ўтилганини кўрди.

Карлос нафақат лой-балчиқ соҳилнигина, шунингдек қаршисида намоён бўлган текисликни ҳам узоқ ва синчиклаб кузатиб чиқди, кейин дон Хуан билан қолганларга ҳам буёққа ўтинглар дея ишора қилди.

Дон Хуан ёнига етиб келганида Карлос ишонч-ла деди:

— Омадинг боракан! Молларингни қайтариб олишинг мумкин.

— Хўш, нимага бундай деб ўйлаяпсан?

— Нимага деганингда, молларинг бор-йўғи бир кунгина илгари ўтган бу ердан. Подани тўрт нафар отлиқ ҳайдаб кетяпти. Ўтган вақт ичида пода узоқлаб кетолмайди унчалик.

— Буларни қаёқдан билад қолдинг?

— Ҳе, унчалик қийин эмас бу,— хотиржамгина деди овчи.— Сенинг молларингни, анави изларни кўряпсанми, ўша отлиқлар ҳайдаб кетишган...— У изларни кўриб, сўзини давом эттирди:— Бутун подани ҳув анави тизма оралиғидан топсак ҳеч гап эмас.— Шундай деб Карлос тик кесиб тушган тепалар тизмаси — ясситоғликнинг тикка тушган қирғоғидан водийнинг ичкараси томон чўзилиб кетган Льяно Эстакадо тармоқлари томонга ишора қилди. Бу ердан, кечувдан ўн милча нарида эди у.

— Хўш, унда ўша ёққа борамизми?— деб сўради дон Хуан.

Карлос дарров жавоб бермади. У ҳали, аниқ бир фикрга келмагани ва қайси йўлни танлашни тарозуга солиб кўраётгани англашилиб турарди.

— Ҳа,— бафуржа ҳамда жиддий оҳангда деди у ниҳоят.— Ҳаммасини охиригача текшириб кўрган маъқул. Балки менинг бу даҳшатли гумонларимни бари хатодир. Кейин, у ҳам янглишгандир эҳтимол. Ҳар иккала из бир-бировига қўшилиши мумкин-ку ҳали.

Буларнинг бари деярли ўзича ғўлдираб айтганди у, гарчи дон Хуан унинг сўзларини эшитган бўлса-да, нима дётганини тушунмаган эди. У, нималар деяпсан ўзи, деб сўрашга чоғланган ҳам эдики, овчи тўсатдан отини ишқтади-ю, шерикларига орқада қолмасликни ишора қилиб, ўғирланган пода изидан йўрттира кетди.

Бирор соат ҳам ўтмай улар чуқур дарага етиб бордилар. Водийнинг бир қисми худди шу ерда бамисоли денгиз қўлтиғидай баланд ясситоғликнинг тармоқлари орасига ёриб кириб борган эди. Улар ана шу ўзига хос дарага кирдилар-у — қаршиларидан ғаройиб манзара намоян бўлди. Бутун дарани қора қузғуну сор босиб кетган эди. Уларнинг юз-юзлаб галалари қояларни қоплаб ўлтирар, ҳавода чарх урар, алланимадандир хурсанд бўлаётгандай ҳайбатли қанотларини қарсиллатиб силки-

ганча дарра тубида сакрашгани-сакрашган эди. Дашти койотлару бўрилар ҳам, этхўр айиқлар ҳам шунда; улар дарада изгишяпти ёки талашгани ҳеч бир ваз бўлмаса ҳам,— овқат ҳаммаларига етиб ортарди,— олишиб-талашишга тушишяпти. Бир неча ўнлаб ярим-ялангоч қилиб ғажиб-кемирилган скелет-қобирғалар сочилиб ётибди ерда, яқинроқ бориб қараб, дон Хуан ва чўпонлари ўз подалари қолдиғини танидилар.

— Айтгандим-ку, сенга шу ерда деб, дон Хуан,— деди Карлос ҳаяжондан овози ҳирқираб,— лекин бундай бўлишини сира кутмагандим. Жуда маккорона ўйланган бу! Негаки ҳукизу буқалар бу ердан омон-эсон қутулиб чиқиб, уйга қайтишлари мумкин эди-да, ахир, ана унда... Ҳа манфур пасткаш-а! Онам ҳақ экан — бу ўша! Ўша бу!

— Ким, Карлос? Нима тўғрисида гапиряпсан?— деб сўради дон Хуан ушбу ғалати, пойма-пой хитоблардан боши қотиб.

— Ҳозир сўрама, дон Хуан! Яқин-орада ҳаммасини тушунтириб бераман сенга... Яқин-орада, лекин ҳозир эмас. Қаллам ғовлаб кетди, бамисоли жаҳаннам ўтида ёняпти, юрагим ҳам... Тез орада, ҳа, яқин орада! Ортик сирли жойи қолмади. Ҳаммасини билдим! Аввал-бошдаёқ шубҳага боргандим-а ўзимам... Уни ўшанда, байрамда кўргандим-а... Унга қандай қараганини пайқагандим, вой аблаҳ-а!.. Вой золим-а! Шошмай тур, ўша юрагингни юлиб оламан ҳали кўксингдан!.. Кетдик, дон Хуан!.. Антонио! Дўстлар! Орқамдан! Изларидан борамиз. Аппа-аниқ кўришиб турибди у. Қаёққа олиб боришини биламан. Ҳа-ҳа, биламан! Олға!

Шундай деб шпорларини оти биқинига нуқиганича орқага кечув томонга елдира кетди овчи.

Дон Хуан ва бошқа ҳамроҳлари ҳайрон бўлганларича унинг кетидан от қўйишди.

Кечувда тўхташмади улар. Карлос отини тўғри дарёга солди, бутун бўлук унга эргашди. Улар излари шимога бурилган жойда ҳам тўхтамадилар. Бизон олдинга отилган, аҳён-аҳёнда овоз бериб қоларди; суворилар у билан изма-из от йўрттириб борар эдилар.

Ҳали бир миль илгариламаслариданоқ излар кескин бурилди — эндиликда у шаҳарга қараб кетганди.

Дон Хуан ва пеонларнинг юзларида ҳайрат акс этди, шунда, аммо овчи заррача ажабланмади. Нега деганда

қудди шуни кутган эди-да, у. Йўқ, унинг афтида ҳайрат-
лан асар ҳам кўринмади. Бу чеҳрада мутлақо бўлак ал-
ланима, ундан чандон бора даҳшатлироқ нарса намоён
бўлганди.

Карлоснинг кўзлари ич-ичига ботиб кетган ва, бами-
соли ичида лаҳча чўғ лангиллаётгандек, чақнаётган эди.
Тишини-тишига босди, оқариб кетган лабларини маҳкам
қимтиди, шу туришида ўй ўйлаётганга ўхшарди, эҳти-
молки аллақачон аллақандай таваккалона қарорга кел-
гандир ҳам. У изларга деярли қарамаётибди, эндиликда
бўлни излашини ҳожати йўқ. Қаёққа бораётганини яхши
билди.

Сўқмоқ ботқоқ пастликни кесиб ўтарди. Ундан чоп-
ганча бораётган Бизон бутунлай сарғиш лойга беланди.
Кеча кечқурун югурганча кириб келганида ҳам бароқ
юнглирига айнан мана шундай лой ёпишиб қолган эди.

Дон Хуан дарҳол эътибор берди бунга.

— Ит олдин ҳам келган бу ерга!— деди у.

— Билаган,— жавоб қайтарди Карлос.— Билаган...
ҳаммасини билаган! Ҳеч қанақанги сир-пири қолмади
буни. Сабр қил, дўстим! Сен ҳам ҳаммасини билиб ола-
сан ҳали, лекин ҳозирча қўйиб бер, мен пухталаб ўйлаб
олай. Ортиқ ҳеч нарсага вақтим қолмади.

Излар ҳамон шаҳарга томон элтарди. Улар водийга
қайтди, қия ёнбағирликдан ясситоғликка кўтарилиб, эн-
ди ясситоғнинг тик қирғоғига деярли параллель тарзда
кета бошлади.

— Хўжайин!— деди Антонио Карлосга етиб олиб.—
Булар ҳиндулар отининг изи эмас. Мабодо ҳиндулар
уларни ўғрилаб олишган бўлмаса, албатта. Бу ерда
инкита ҳарбийлар оти бўлган. Мен бу изларни билаган.
Кейин, оддий эмас — зобитларнинг оти, тақасидан таниб
турибман.

Карлос буни эшитганда зиғирчалик ажабланмади,
бирон оғиз сўз билан жавоб ҳам қайтармади метисга.
Чамаси у ўз ўй-хаёлларига ғарқ эди.

Антонио, хўжайин эшитмади ёки тушунмади гапим-
га, деб ўйлаб, яна бир карра такрорлади айтганларини.
Шундан кейингина Карлос унга қаради.

— Қадрдоним Антонио,— деди у,— нима, мени кўр
деб ўйлаяпсанми? Ё аҳмоқ дебми?

Бу сўзларни у жаҳлу ғазабсиз айтди. Антонио ту-

шунди-ю, оти жиловидан тортиб, қолганлар қаториги қўшилди тағин.

Улар дам отларини йўрттириб, дам чарчаган отлар пича ўпкасини босиб олиш учун уларни секин одимлаганича илгарилаб боришаверишди. Улар шу тахлитда излар бўйлаб боришарди, излар эса тўғри шаҳарга элтарди.

Ниҳоят йўл иланг-биланглаган кўйи ясситоғликдан қуйига, водийга томон тушиб борарди. Карлос авлиб Иоанн байрами куни ўзининг чавандозлик санъатини кўрсатгани худди ана шу сўқмоқдан кўтарилган эди. Тепада, пастга қиялаб тушиш бошланадиган жойда Карлос ўз бўлугига тўхташни буюриб, ёлғиз дон Хуаннинг кузатувидагина олдинга туртиб чиққан қоя четига яқинлашди — бу жой Қиз ўлган қоя деб аталади. Ушанда у айнан мана шу ерда тўхтатган эди отини.

Улар жарлик ёқасига боришди. Бу ердан бутун водий ва шаҳар кўриниб турарди.

— Ҳув анави уйни кўряпсанми?— деб сўради овчи, бошқалардан четда, отличлар билан шаҳар орасидаги масофанинг ўртасида қад ростлаган ҳашаматли бинони кўрсатиб.

— Қалъаними?

— Ҳа, қалъани.

— Кўряпман. Нимаиди?

— У ўша ерда!

Х Х Х Б О Б

Айни ўша пайтда асотеяда аллаким уёқдан-буёққа юриб турарди. Асотеянинг икки томонида биттадан соқчи навбатчилик қилаётган бўлса-да, бу одам соқчи эмасди; соқчилар карабин билан қуролланган, уларнинг боши ва кифти қалъанинг кунгурадор миноралари тепасида кўзга ташланиб турар эди.

Уёқдан-буёққа бориб-келаётган одам зобитлардан бўлиб, асотеянинг у сайр қилиб юрган қисми зобитлар истиқоматгоҳининг тепасига жойлашган ва томнинг қолган қисмидан бутун шинакли кунгура билан баб-баравар бландликдаги девор-ла, ажратилган эди. Шу билан бирга бу жой дахлсиз жой эди — у ерда оддий аскарлар

нинг қўпол одими товуши камдан-кам эшитиларди. Бу қилъанинг юқориги саҳнидай бир гап эди.

Зобит шу тобда хизматини адо этмаётган бўлишига қирамай, башанг ҳарбий либосда эди, мундирининг бичим-андозасидан бир қарашдаёқ мазкур жангчининг шаддий сатанглардан, қачон қараманг ўзини тўлиқ формада кўз-кўз қилишни яхши кўрадиган олифталардан жани якқол англашилиб турарди. У пару патлари товланадиган товус мисоли заррин уқаларию ҳашамдор мундирига маҳлиё бўлиб юрарди. У дам-бадам тўхтаб, оёғидаги ярқироқ этигига кўз ташлаб, оёқлари башангу келишганлигини назардан ўтказар ёхуд оппоқ, териси позик бармоқларидаги узукларга суқланиб қараб-қараб кўярди.

Шуларга қарамай у мутлақо чиройли ҳам, қаҳрамон ҳам эмасди, лекин бу ҳол ўзини бир йўла ҳам гўзаллик тангриси Аполлон, ҳам жасорат маъбуди Мирриҳдай тасаввур этишига халал бермасди.

У испан қўшинлари полковниги, қалъа қўшинлари кўмондони эди, зеро мазкур зобит Вискарра жанобларидан ўзга кимса эмасди.

Ўзининг ташқи қиёфасидан буткул мамнун бўлмиш кўмондон, кўриниб, турганидек, қандайдир бошқа нарсдан норози эди. Чеҳрасидаги кўлкани ҳаттоки ярқироқ этигию оппоқ момиқ бармоқларига суқланиб боқишлари ҳам тарқата олмаётган эди. Қандайдир ўй унга тинчлик бермаётган, эзиб, ҳатто гоҳ-гоҳ титраб кетиб, атрофга бежо аланглаб қўйишга мажбур этаётганди.

— Ахир бу туш-ку, холос,— гўдранди у.— Нимага ўйлаб ётибман буни асти? Фақат туш-ку, ахир.

У ана шундай қовушмаган, узук-юлуқ жумлаларни гўдраганча оёқлари остига тикиларди, кўзларини ердан узиб, бошини кўтарганида эса ногаҳон Қиз ўлган қояга қараб олди. Дарвоқе, йўқ, ногаҳон эмас: ахир ўша қоя ҳам кирганди-да, тушига, шу боисдан нигоҳи ўйлари нидан эргашган эди айни сонияда.

Нигоҳи баайни қоя тепасига тушган лаҳзада Вискарра худди қаршисида даҳшатли рўё-шарпани кўргандек сесканиб кетди-ю, беихтиёр кунградор деворга суяниб қолди. Ранги бўздек оқариб, чакаги шалвиллаб осилиб тушди, у тез-тез, энтикиб-энтикиб нафас ола бошлади.

Бундай ҳаяжон, безовталанишга нима сабаб бўлганди? Олисидаги қоя чўққисига эҳтимол, оқиштоб осмон

сийнасида яққол кўзга ташланган чавандознинг қорасидир бу? Ушбу манзаранинг нимаси шунчалик кўрқитиб юбордийкин комендантни? Унинг эса ўтакаси ёрилаёзган эди. Қани, унинг ғудранишига қулоқ солиб кўрайлик-чи.

— Ё тангрим! Эй парвардигор, бу ўша! Ушанинг оти... Уша!.. Худди тушимда кўрганимдек... Бу ўша! Унга қарасам юрагим орқамга тортиб кетяпти! Қараёлмайман...

Зобит бир сонияга тескари бурилиб, қўллари билан юзини беркитди.

Бир сония — кейин у яна бошини кўтарди. Нақ эҳушидан айрилаёзган комендантни тагин ўша томонга қарашга қизиқсиниш эмас, кўрқув мажбур этди. Чавандоз ғойиб бўлибди. Жарлик тепасида оқариқираган осмон сийнасида на оту на одамзод — бирор қорайган доғдан нишона кўринади.

— Балки, яна кўзимга шундай кўринаётгандир? — ҳамон титраган кўйи ўз-ўзидан сўради кўрқоқ. — Ҳа, кўзимга кўрингандир... Уёқда ҳеч зог йўқ, ҳарҳолда... Қаёқдан ҳам улгурарди у? Бу ердан юз миллар узоқда бўлса! Шунчаки кўзимга кўринган, вассалом! — Шундай деб қаҳқаҳлаб кулиб юборди у. — Нималар бўляпти ўзи менга, қани энди сабабини билолсам. Ўша кўрқинчли туш бошимни ғовлатиб қўйди. Ҳа, жин урсин! Энди бу ҳақда ўйламаганим бўлсин-а!

Нохуш ўйлардан чалғитади деган хаёлда у илгаригига қараганда тезроқ бориб-кела бошлади уёқдан-буёққа. Аммо ҳар гал орқасига бурилаётиб ихтиёрсиз равишда қоя томонга қараб, жарликнинг бутун теварақ-атрофларини синчковлик-ла кузатиб чиқар, боқишларида эса кўрқув акс этарди. Бироқ чавандоз — ё рўё — ортиқ кўринмасди. Вискаarra бўлса аста-секин ўзига келиб, тинчлана бошлади.

Тош зиналардан дўпир-дўпир одам шарпаси эшитилди. Аллаким зинадан чиқиб келаётибди.

Ана, боши, кифти, кўринди-ю, асотейга Робладо чиқиб келди.

Вискаarra икковлари сўрашишди, бундан ўша куш улар ҳам кўришишмагани англашилиб турарди. Аслини олганда, икковлариям яқингинада туришган эди. Киборлар учун кўплайм кеч демаса ҳам бўлади бу паллани, негаки улар барвақт ётмайдилар-да, ахир. Робладо ҳо-

иргина нонушта қилган ва асотейга гавана сигарасини ҳузур қилиб тутатгани чиқиб келаётган эди.

— Жуда ғалати «томоша» бўлди-да ўзиям!— деб хо-
лолади у сигарасини тутатаётиб.— Ростини айтяпман!
Башараму танамдаги буёқни аранг кеткиздим-да, ўзим
ҳам. Иннайкейин, ўша бўкиришу ҳайқиришлардан то-
могим бўғилиб қолди — бир ҳафта ичида овоз қаёқдан
ўл жойига келарди! Ҳа-ҳа-ҳа! Ҳеч қачон бирорта қизни
бунақанги мушкул ва хаёлга келмайдиган антиқа усул
билан бўйин эгдириб, қўлга киритилган эмас-а! Чўпон-
ларга ҳужум қилиб, қўйларини ҳайдаб кетиб, тўрт то-
монга тўзитиб юборилди, ҳўкизларини ҳайдаб бориб,
худди қушхонадагидек сўйиб ташланди, кампирни бўл-
са калласига бошлаб тушириб, уйига ўт қўйилди... Шун-
дан кейин ҳам уч кун мобайнида уёқдан-буёққа танда
қўйилди, ҳиндуча кийиниб олиб, то овоз хириллаб қол-
гунча ҳайқириб-қийқирилди... Қанча-қанча ташвишу ово-
рагарчилик—шуларнинг бари қандайдир битта оддийгина
қизни, учига чиққан жодугар кампирнинг қизини деб қи-
линди-я! Ҳа-ҳа-ҳа! Қараб турсанг, худди шарқ эртаги...
дейлик, «Минг бир кеча»нинг бир бобининг ўзгинаси.
Аммо-лекинига, фарқи қизни ҳеч қандай сеҳргар ёки
жаҳонгашта рицарь халос этолмайди, холос,— деб тагин
хохолаб кулди Робладо.

Унинг нутқи, эҳтимолки китобхон аллақачон англаб
етган сирни: яқингинадаги «ёввойилар» босқини Робла-
до билан Вискарранинг бизон овчисининг сингисини
яширинча ўғирлаш йўлида ўйлаб топган қилмиши эка-
нини фош этиб қўйганди. Қўш ва ҳўкизларни ҳайдаб
кетган, дон Хуаннинг асиендосига ҳужум қилган, Кар-
лоснинг ранчосига ўт қўйиб, Роситани ўғирлаб кетган
«ҳиндулар»: полковник Вискара, капитан Робладо,
сержант Хомес ва Хосе исмли оддий аскар — полковник-
нинг яна бир ишончли тобеси ҳамда итоаткор хизматко-
ри — мана шулар эди.

Улар бор-йўғи тўрт киши бўлиб, аввал-бошданоқ
ушбу қабиҳона ишин амалга ошириш учун тўрт киши
кифоя деб тахмин қилган эдилар. Водийда таралган
мишмишлару ваҳима бу тўрт кишини тўрт юз кишига
етказиб қўйган эди. Бунинг устига, сирдан қанча кам
одам хабардор бўлса, ўшанча яхши эди. Робладо ана
шундай эҳтиёткорона ҳамда айёрона режа тузган эди.

Амалда ҳам ғоятда устамонлик билан ҳаракат қилди

улар. Уйин бошидан-охиригача ниҳоятда пухта ўйланиб, аъло даражада, моҳирона ижро этилди. Душманони кайфиятдаги ҳиндулар пайдо бўлганлари ҳақдаги хабарнишончи чиқсин учун чўпонларга биринчи марта тепада, ясситоғликда ҳужум қилдилар. Қалъадан разведкага аскар юборилди, аҳолини эҳтиёткорликка чақирдилар — буларнинг бари шубҳа-гумонларни ошириб, ваҳимани газак олдириш учун қилинган ҳаракатлар эди. Шундан кейин ҳукизлар ҳайдаб кетилганида ҳеч бир кимса водийда ёввойи ҳиндулар пайдо бўлганига шубҳа қилмай қўйди. Мазкур босқинчилик қабиҳона уйин қатнашчиларига бир йўла икки қуённи қулатишларига ёрдам берди: ўзларининг асосий мақсадларини амалга ошириш билан бирваракайига чорвадор йигитдан муртадларча ўч олдилар.

Унинг ҳукиз-буқаларини дарага ҳайдаб бориб, уша ерда сўйиб ташлар эканлар, бундан икки нарсани мўлжал қилган эдилар. Аввало улар йигитга зарар етказётганларидан хурсанд эдилар-у, бироқ асосийси — борди-ю, молларни тақдир тақозосига ҳавола қилиб қўйиб юборгудек бўлсалар, бари бир, пода йўлни топиб, яна фермага қайтиб боради деб қўрққандилар. Агарда, гўёки, ҳиндулар ўғирлаб кетган пода қайтиб келса, бу нарсаси шубҳа уйғотиши турган гап эди. Ҳозир, улар чавақлаб ташлангач эса, токи бирор кимса тасодифан «қасоблик» содир бўлган ерга бориб қолмагунига қадар бўрию ўлаксахўр қузғунлар ўз ишини қилади-ю, суяк-саёқларигина қолади, ана унда истаганча шубҳа-гумон қилишаверишсин. Шундоқ бўлиши эҳтимолдан ҳоли эмасди ҳам. Негаки, ҳиндулар босқини туғдирган ташвишу хавотиргарчилик давом этиб турар экан, бирор одамнинг бу жойларга бош суқишга журъат эта олсини даргумон эди-да, ахир. У жойларда на бирорта бошпана, на йўл бор эди, бу атрофлардан аҳён-аҳёнда ҳиндуларгина ўтиб туришарди, холос.

Ҳатто иш интиҳосига етиб, ниҳоят жабрдийдани ўғрилаганларидан кейин ҳам, қизни тўғри қалъага олиб келганлари йўқ: ҳаттоки уни ҳам чалғитишлари керак эди-да, ахир. Хуллас, у оёқ-қўли боғлоқ қизни хачирга ортишди-да, уни муттаҳамлардан бири ҳайдаб кетди, қизга ўзини қайси йўлдан олиб кетаётганларини кўриб боришига токи йўл шаҳарга буриладиган ергача — имкон беришди. Бурилишга келганда эса кўзларини кўчи

тасма билан боғлаб, қалъага худди шу ҳолатда келтиришди, шу тариқа қиз ўзини узоққа олиб кетишдими, охири дам олишга рухсат этган жойлари қаеру қандай жой эканини билмасди, албатта.

Ушбу иблисона томошанинг ҳар бир саҳна, ҳар бир кўришиши шунчалик нозиктаъблиқ билан ўйланган ва шунчалик моҳирона ижро этилган эдиким, бу капитан Робладонинг қалбига бўлмаган тақдирда ҳам, ақлига шараф келтириши тайин эди. Мазкур томошадаги бош қаҳрамон ҳам унинг ўзи эди.

Дастлабига Вискарага қандайдир шубҳа-гумонлар қутқу солиб турди; йўқ, уни виждони эмас, балки ўзининг ношудлиги ва сири фош бўлишидан қўрқиш қайтариб турди бу йўлдан. Ахир буни катта зарари тегиши мумкин эди-да, унга. Борди-ю, бундай ёвузона режа-ўйнинг миси чиқиб қолгудек бўлса, бу хабар кўз юмиб-оч-гунча бутун мамлакатга ёйилади. Ана унда адоий тавом бўлди деяверинг уни.

Робладонинг пасткашона режа-ўйлар билан йўғрилган сўзамоллиги бошлиғининг ожизона қаршиликларидан устун келди; ушбу режага розилик берган экан, буни ниҳоятда қизиқарли ҳамда мароқли деб топди у. Ҳиндулар хусусидаги аҳолини ваҳимага солган масхарабозларча мурожаатлару уйдирмалар, айти чоғда шунчалик мардона ва ғайрат билан иш тутаётган комендант шаънига ёйилаётган мақтовлар — буларнинг бари бир зайлда ўтаётган зерикарли аскарый ҳаёт жараёнида кўнгилга хуш келдиган эрмак бўлиб чиқди. «Ёввойилар» босқини давом этган шу бир неча кун мобайнида комендант билан капитаннинг кулги ва хурсандчиликка сабаб бўлгувчи омиллардан камчилик ерлари бўлмади. Улар жамики ишни шу қадар уддабурролик ила бажардиларким, талончиларнинг охирги босқини ва Росита ўғрилаб кетилган куннинг эртаси эрталаб Сан-Ильдефонсода бирор кимсада — башарти зобитларнинг ўзлари билан икки ёрдамчиларини ҳисобга олинмаса, албатта — бу ишларнинг барига чинакам ваҳший ҳиндулар айбдор эканига заррача шубҳа қолмаганди.

Айтмоқчи, биргина одамнинг кўнглига — кекса онанинг кўнглига шубҳа, ҳа-ҳа, фақат шубҳа дориган эди. Ҳатто Роситанинг ўзи ҳам ҳиндуларнинг қўлидаман деб ўйлаганди... мабодо у умуман ўйлашга қодир бўлса, албатта.

XXXI БОБ

— Ҳа, қулинг ўргилсин масхарабозлик бўлди-да, худо ҳаққи.— деб қаҳқаҳ урганча давом эттирди сўзини Робладо сигарасини бурқситганча.— Бу жин ургур олоқ жойга келиб қолганимиздан берига сираям бунақанги эрмакни кўрмагандим. Нимаям дердим, чегарада хизмат қилиб туриб ҳам эрмак топса бўларкан, фақат усталик билан иш тутиш керак, холос. Қанчалик ташвишу қанчалик оворагарчилик орттирмади-я, бу иш бизга! Лекигин, қадрдоним комендант, гап орамизда қолсин-у, буни эндиликда бемалол айта оларсиз — шунчалик оворагарчиликка арзирмиди бу иш?

— Шундай қилганимиздан ниҳоятда афсусдаман,— деб жавоб берди комендант бағоят жиддий оҳангда.

Робладо унинг бетига тикиларкан, суҳбатдошини бунчалик қош-қовоғи осилган ва ғамгин ҳолатда биринчи марта кўраётган эди. Сигара билан андармон бўлиб, шу пайтгача буни пайқаманган эди у.

— Шунақа денг ҳали!— ажабланди у.— Нима булди ўзи, полковник? Кўринишингиз ҳозирги аҳвол-шаронтингизга мутлақо мос тушмайди. Ахир ўзлари бир неча соат фурсатни бағоят хушкўнгиллик билан ўтказишлари керак эди-ку! Ёки биронта ишқал жойи чиқиб қолдимиз?

— Бари ишқал.

— Нима дедингиз? Ахир унинг ёнида бўлгандирсиз?

— Бир дақиқагина, шунисиям етиб-ортади менга.

— Гапингизга тушунолмайд қолдим, қадрдоним полковник.

— У телба экан.

— Қанақасига— телба?

— Ҳа-ҳа, ашаддийси тағини. Шунақанги алжирадики, буни кўриб раҳим келди. Тезроқ қочиб қолганидан хурсанд бўлдим. Хосе ўша ерда қолди, унга кўз-қулоқ бўлиб турибди. Унинг нималар деб алжираётганига тоқат қилолмадим. Ишонинг, тирноқчалик ёнида бўлиши истаги қолмади менда.

— Бе, бари арзимаган гап!— деди Робладо.— Биринки кундан сўнг ўзига келиб қолади. У ҳалиям, ёввойиларнинг қўлидаман, булар мени ўлдириб, бошимнинг терисини шилиб олишмоқчи, деб ўйлаётган бўлиши керак. Ўзига келиши биланоқ уни бемалол бундай эмаслигини ишонтира оласиз. Унга ҳақиқатни айтса бўлади, меним-

ча, ҳеч чўчийдиган жойи йўқ буни. Бари бир бор гапни айтишингизга тўғри келади, қанчалик тез бўлса шунчалик яхши: кўникиши учун ихтиёрида кўп вақти бўлади. Ҳозирда у мусту-мустаҳкам тўрт деворли шишагина хонингизда, бу деворларнинг эса на кўзи, на қулоғи бор, шундоқ бўлгач, бемалол бекорчиликка эрмак қилаверишиг. Ҳеч ким билмайди ҳам, ҳеч кимнинг хаёлига келмайди ҳам. Ҳамманинг фикри-хаёли ҳиндуларда, ҳа-ҳа-ҳа! Айтишларича, унинг хуштори дон Хуан бўлук тўплаб қизил танлилар кетидан таъқибга тушмоқчи эмиш.— Робладо яна хохолаб кулди.— Ҳеч нима қилолмайди бари бир: обрў-эътибори йўқ қатори, на унинг подаси, на жодугарнинг қизи билан неча пуллик иши бор одамларнинг. Унинг ўрнида бошқа биров бўлганида эди, ишлар бошқача тус олиши мумкинмиди. Сир очилиб қолмасайди деб қўрқадиган жойимиз йўқ ҳозир. Мабодо бизон овчисининг ўзи қайтиб қолганида бошқа гап...

— Менга қаранг, Робладо...— тўсатдан унинг сўзини бўлди комендант, шунда унинг овозида кўникилмаган ҳаяжон сезилди.

— Хўш?— сўради капитан Вискарага ажабланиб қарар экан.

— Мен туш кўрдим... даҳшатли туш! Мени ваҳимага солаётган нарса қизнинг алжирашлари эмас, мана шу. Минг лаънат-э! Қандай даҳшатли туш-а!

— Маъзур тутадилар-у, комендант, сиздай жасур жангчи одам қаёқдаги аҳмоқона тушдан хавфсираб ўтирса-я! Хўш, қани, нималар кирибди тушингизга? Мен тушни таъбирлаб беришни қотириб ташлайман-да. Ишонтириб айтаманки, тушингизга энг аъло таъбирни эшитасиз-да, каминадан.

— Эшитинг бўлмаса, жуда жўн, оддийгина туш. Мен Қиз ўлган қоя тепасида турган эмишман. Бизон овчиси Карлос билан яккама-якка турганмишман, у ҳаммасидан хабардормиш, мени сингисининг ўчини олгани ўша ёққа олиб борган ҳам ўша эмиш. Қаршилик кўрсатгани мадорим йўқ эмиш, у мени нақ жарнинг ёқасига судраб борганмиш. Назаримда, икковимиз бир-биримизга ёпишиб, бирпас олишибмиз, кейин эса у мени қучоғидан бўшатиб, тепадан жарга итариб юборган эмиш. Мен бўлсам пастга тушиб кетаётган эмишман, тушиб кетаётган эмишман... Тепада бўлса овчи турганмиш, ёнида сингиси, қоянинг шундоқ туртиб чиққан жойида бўлса ана-

ви даҳшатли қари жодугар, оналари турганмиш-у, кам-пир ваҳшиёна, телбаларча қаҳқаҳлаганича чапак чалармиш нуқул, қўллари эса узундан-узун қоқсуяк эмиш... Шундаям мен пастга қулагандан-қулаётган эмишман-у, жарнинг туби эса кўринай демасмиш... Вужудимни охири-кети кўринмайдиган ваҳимали туйғу эгаллаб, бўғзимга чанг солиб ётибди десангиз! Худди ана шундай даҳшат ичра босинқираб уйғониб кетдим. Бу тушим эканига ҳатто ишонгим келмас, тушимдаги ҳис-туйғулардан сира қутулолмас, буларнинг бари аслида туш эканига шонч ҳосил қилолмас эдим... Қандай даҳшатли туш-а!

— Ҳа, илло тушгина, холос. Таъбири эса...

— Шошилманг, Робладо! Ҳали ҳаммасини сўзлаб берганимча йўқ сизга. Бирор соатдан сўнг... э йўқ, қандайдир чорак соатдан кейин мен бу ерда, кўрган тушим устида бош қотириб юрардим, шунда бехосдан ўша ёққа, қояга қарабман. Уёқда, нақ қоя чеккасида бир чавандоз турибди, оқаринқираган осмон сийнасида аниқ кўринаётганди у, бу қуйиб қўйгандек бизон овчисининг ўзгинаси эди! Отиниям, чавандозниям танидим — унинг эгарда қандоқ ўлтиришини яхши эслайман. Мен, кўзимга шундай кўриняпти, деган қарорга келиб, бирров, ҳа, бирровгина кўзимни буриб, кейин тагин қарасам, чавандоз аллақачон ғойиб бўлибди-да! Зумда ғойиб бўлибди... Уйлашимча, шунчаки кўзимга кўринган. Уёқда ҳеч зоғ бўлмаган-у, ҳалиги тушимдан кейин шунчаки кўзимга кўринган.

— Бўлиши мумкин,— деди Робладо ошнасини тинчлантирмоқчи бўлиб.— Жудаям бўлиши мумкин ва мутлақо табиий бу. Биринчидан, бу ердан, сиз билан биз турган жойдан, тўппа-тўғрисига олганда, ўша қоянинг чуққисигача бемалол уч миль келади. Бундай олис масофадан туриб ўша чавандозни бошқа ҳар қандай суворидан ҳечам ажрата олмайсиз — иложи йўқ бунинг. Иккинчидан, ўша Карлос ҳозир менинг сигарамнинг учидан кам деганда беш юз миль нарида, бир нечта қўланса бизон териси-ю, бир неча ўн фунт сур гўшти деб ўзининг қимматли жонини хавфу хатарга қўйиб юрибди. Умид қиламизким, унинг баъзи соҳибжамолларимизни ҳайратга соладиган малла сочили каллахомини терисининг туси мис рангли ошналаридан бирортаси шилиб олгай зора. Сизнинг тушингизга келганда эса, қадрдоним комендант, нимаям дердик, бундан кўра табиийроқ нар-

си борми ўзи! Шунга ўхшаш туш кўрмаслигингизни иложиям йўқ эди-да. Байрам куни унинг ўша қояда қандай важоҳат-ла от ўйнатганини эслагансиз, унинг синглиси тўғрисида ўйлагансиз, кейин, фикримча, сеньор Карлос мабодо бу ишлардан хабар топиб, сиз унинг қўлига тушиб қолсангиз овчи бошимни силаб-сийпамаса керагов, деган шубҳага боргансиз — ана шуларнинг бари миянгизга бир йўла бостириб келган-у, ўша хунук тушда мужжасамини топиб, қорилиб-қоришиб кетган. Кампир ҳам худди шундоқ: мабодо, у тўғрисида сиз ўйламаган бўлсангиз, мен эса ўшандан буён, остонада бошига туширганимдан берига хаёлимдан нарига кетмайди у. Ушандаги турқи-тароватини бир кўрсангиз эди-я, бир умр ёдимдан чиқмайди бу!

Шундай деб қаҳ-қаҳ уриб кулди нобакор. Буни эслаш уни кўпдаям кулгисини қистатмаётган эди-ю, бироқ у Вискаррани тинчлантирмоқлик учун бўлиб ўтган бутун воқеаларни шунчаки арзимас бир эрмак қилиб кўрсатишга уринаётганди.

— Шуям гап бупти-ю!— дея сўзини давом эттирди у.— Туш-а! Оддий битта туш-да. Бас, бас, қадрдон дўстим, хаёлингиздан чиқариб ташланг уни!

— Ундай қилолмайман, Робладо. Бу мулоҳаза-ўйлар — худди ўз соямдек гап: улардан қутулиб бўлмапти. Кўнглим сезиб турибди, негадир ғаш у. Бу қизни ўша ифлос кулбасида ташлаб келганим яхши эди-я! Худо ҳақи, қани энди у яна уйига бориб қолсайди! Токи ундан қутулмагунимча кўнглим жойига тушиб, тинчлана олмайман. Олдин уни яхши кўриб қолгандим, энди бўлса кўрарга кўзим йўқ бу телбани.

— Қўйинг-қўйинг, дўстим! Ҳадемай бошқача гапириб қоласиз. У яна ёқиб қолади сизга...

— Йўқ, Робладо, йўқ! Уни ўйласам нафратим қўзиб, жирканиб кетавераман — нимагалигини билмайман-у, лекин шундоқ. Ё худо, ўзинг халос эт мени ундан!

— Бунинг қийин жойи йўқ, ҳеч кимга зарар етмайди бундан. Қандай келган бўлса, худди ўшандай уйқуга қайтиши мумкин. Тағин ўшанақанги томошадан бир пардасини ижро этамиз-у, бирон жон зоти фаҳмига ета олмай қолади буни. Агарда сиз ростдан ҳам жиддий гапираётган бўлсангиз...

— Робладо!— дея хитоб қилди комендант капитанининг қулидан тутиб.— Умримда бундан кўра жиддийроқ

гапирмаганман. Айтигчи менга, уни уйига шов-шувсиэ қандай жўнатса бўлади? Тезроқ айта қолинг, юрак-бағримни тирнаб-ўртаётган бу даҳшатли туйғуга ортиқ чидаёлмайман!

— Нимаям қилардик,—дея гап бошлади Робладо,—яна бир марта ҳиндулар қиёфасига киришимиз керак, кейин...

У сўзини тугатолмади. Вискарра «воҳ» деб инграб юборди. Кўзлари нақ косасидан чиққудек ўйнаб кетган, лаблари кўкариб, пешонасига нўхатдек-нўхатдек тер томчилари қалққан эди.

Бунинг маънисини нима бўлдийкин? Вискарра шу тобда асотейнинг ташқи чеккасида турар, у ердан қалъа дарвозасига келадиган йўл яққол кўзга ташланар эди. У ўша ёққа, кунгурадор девор ортига тикилганча қўли билан алланимани кўрсатарди.

Кунгуралардан анчагина нарида, деярли асотейнинг ўртасида турган Робладо комендантнинг ёнига ташланди-ю, ўша тамонга қаради. Йўлда теру чангга ботганча бир чавандоз от елдириб келарди. У шунчалик яқинлаб қолган эдики, Робладо уни юзидан ҳам таниди. Вискарра уни илгарироқ таниган эди. Бу бизон овчиси Карлос эди.

XXXII БОБ

Карлос қоя чўққисидан айтган гап соддадил дон Хуанни ҳангу манг қилиб қўйди. Шу дақиқагача у ҳиндуларни таъқиб этаётганларга заррача шубҳа қилмаётган эди. Ҳатто изларнинг орқага, водийга қайтишидек ғалати ҳолни кўрганида ҳам кўзи очилмаганди. У, ҳиндулар яна кимнидир талагандир уёқда, деган хаёлга борган ва водийга тушишимиз биланоқ бу ҳақда эшитиб қолармиш деб ўйлаган эди.

Карлос унга қалъани кўрсатиб: «У ўша ерда!»—деганида дон Хуан олдинига ҳайрон бўлди, кейин эса чиндан ҳам ишонмади.

Бироқ, овчининг яна биттагина сўзи билан бир неча лаҳзалик мулоҳаза ишончсизлиги барҳам топишига кифоя қилди. Даҳшатли ҳақиқат дон Хуаннинг ақлу онгини чақмоқ мисоли ёритиб ўтди; негаки Вискарранинг ўша байрам кунини ўзини қандай тутгани унинг ҳам ёдиди.

ди-да, ахир. Шу заҳотиёқ комендантнинг овчининг уйи-да пайдо бўлиши ва бўлак воқеа-ҳолатлар ёдига келди-ю, Карлос янглишмаётганини фаҳмлади.

Дон Хуан бир неча дақиқагача тили калимага келмай туриб қолди — хаёлига ёпирилиб келган фикрлару нужудини забт этган ҳис-туйғулар бағоят изтиробли эди. Ҳа, ҳар қачонгидан изтироблироқ эди! Баайни шу сонияда у ҳатто севгилиснинг ҳиндулар қўлига тушганига қаттиқ ишонган пайтида ҳам бунчалик изтироб чекмаётган эди. У пайтда ҳиндуларнинг асирларга нисбатан ор-номус хусусидаги ўзига хос таомил-қоидалари Роситанинг даҳшатли қисматга чап бериб, қутулиб қолишига имкон бериши ва бу орада қайлиқ билан ака бир бўлиб қизни қутқариб олишларидан умидвор эди. Энди-чи, орадан шунча вақт ўтиб кетди-ку! Вискаррани билмасаям гурга эди-я... Ё халлоқ!.. Бу даҳшатли фикр эди, у навқирон чавандозни ўтирган эгариди бир чайқалиб кетишга мажбур этди. У бир неча одим нарига ўтиб, отдан сакраб тушди, гандираклаб кетиб, тоқат қилиб бўлмас аламу қайғу исканжасида ўтириб қолди.

Карлос ҳануз қояда турар ва қалъа томонга тикиларди. Чамаси, қандай ҳаракат қилиш режасини тузаётган эди. У кунгураддор деворлар тепасидаги соқчиларни, теварак-атрофда тентираётган тўқ қизилу зангори тус мундирли аксарларни кўриб турарди. Акс садоси қоядан-қояга учиб-қўнаётган отлиқ аскарлар карнайининг даъваткор нидоси эшитилиб турарди унга. Шунда аллакимнинг — зобитлардан — асотейда нари-бери бориб-келиб турганига кўзи тушди. Мана у тўхтади-ю, Карлосни кўриб қолди...

Худди ана шу сонияда Вискарра қоядаги кўринишининг ўзиёқ ўтакасини ёриб юборган чавандозни илғаган ва бу чавандоз, турган гапки, мутлақо кўзига кўринган руё эмасди.

— Эҳтимол бу ўша ёвуздир?— деди Карлос ўзи-ўзига, зобитга тикилганча.— Шунақага, ўшанинг ўзига ўхшайди. Эҳ, қани энди мана шу ерда туриб пойлай олсам эди-я, уни!.. Локин сабр қилиш, ҳа, сабр қилиш керак! Илло ўч олмай қўймайман ундан!

Шундай деганича тизгинни тортиб, отини дон Хуаннинг ёнига ҳайдади. Улар бундан буёғига қандай ҳаракат қилишни маслаҳатлашиб олишди. Антониони ҳам чақиринди-да, Карлос унга Роситанинг қалъада асира эка-

нига ишончи қатъийлигини айтди. Антонио бирор янгилик эшитгани йўқ бу билан, у аллақачон барини фаҳмлаб етган эди. Ахир у ҳам, хўжайинига ўхшаб, байрамда қатнашган ва унинг ўткир кўзлари ўша хотирда қолган кунги ҳеч бир нарсани эътибордан соқит қилмаган эди. Вискарранинг ўшандаги хулқи-атворини у ҳам пайқаган ва таъқибчилар бу ерда, қоя ёнида тўхтамасларидан анчагина бурунроқ ҳиндуларнинг яқинидаги босқинлари замиридаги жамики сир-асрору жумбоқларининг тагига етган эди. У ҳаммасини билади, хўжаси тушунтириб вақтни кеткизиб ўлтирмаса ҳам бўларди.

Аммо улар на сўз, на вақтни беҳуда кеткиздилар. Ака билан ошиқ йигитнинг ғоятда безовта тепиб турган юраги тоқат қилолмасди бунга. Айни шу сонияда ҳар иккалалари учун азиз бўлган қизга хавф таҳдид қилиб тургандир балки, эҳтимол у ҳозир манфур ўғридан ўзини ҳимоя қилаётгандир, мабодо ўз вақтида етиб боришса уни қутқариб қолишар!

Ана шу мулоҳазалар ҳар қанақанги мўлжал-режадан муҳимроқ эди. Сирасини айтганда, қандай режа бўлиши мумкин бу ерда? Ўзларини сездирмай, яширинча, қалъа теварагида махфиёна тентираб, қулай пайтни пойлашар балки... Қанақанги қулай пайтни? Беҳуда кутиш билан бир неча кун ўтиб кетса-чи! Кунлар-а! Ўзи на бирон соат, на бирон дақиқа кечиктириб бўлмайдиган пайтда-я! Ақалли бирон сонияни ўтказмай ҳаракат қилишлари керак ҳозир.

Лекин, қандай ҳаракат қилишлари керак? Фақат очиқ-ошкора — бошқа ҳеч қандай чора-йўлини топишолмади улар. Хўш, наҳотки Карлоснинг ўз синглисини қайтариб беришларини талаб қилишга ҳақи йўқ?!

Борди-ю, уларни алдасалар, ҳийла-найранг билан лақиллатиб, талабларини рад этсалар-чи?.. Турган гап, бундан бошқача жавоб олишолмайди. Бу фикр икковларини ҳам даҳшатга солди.

Хўш, нима қилиш керак унда? Агарда у қабиҳона ёвузликни айтиб, ҳаммага жар солишса-чи, балки ёрадами тегар. Умумжамоат уларни ёқлайди... Эҳтимол, бундан ҳам бошқачароқ бўлар. Балки водий аҳли, гарчи ўзлари мутеъ, зуғум остида бўлсалар-да, қалъа атрофида тўпланишиб, баралла талаб қилишар... Балки асирани халос этса бўлар ҳали... Бири кетидан иккинчиси қувалашиб келарди шундай ўй-мулоҳазалар.

— Башарти қутқара олмасак,— деди Карлос тишларини ғижирлатиб,— унинг қасдини оламиз. Майли, буйинимга сиртмоқ таҳдид қилиб турса ҳам, мабодо синглимин бадном этган бўлса, барибир тирик қолмайди у! Онт ичман!

— Мен ҳам онт ичман!— дея қичқирди дон Хуан, қиличи дастасига чанг соларкан.

— Хўжайин! Икковинглар ҳам қулоқ солинглар!— деди Антонио.— Биласиз, мен қўрқоқлардан эмасман. Мен сизга кўмакчиман, қуролим ҳам, ҳаётим ҳам сизнинг измингизда. Аммо даҳшатли иш бу. Эҳтиётсизлик қилсак бекорга нобуд бўламиз, холос. Сал эҳтиёткорроқ бўлиш зарур.

Учовлари жим қолишди. Ҳеч қайсилари тузукроқ чора топиша олмаётганди.

Ҳақиқатан ҳам вазият бениҳоят мушкул эди. Қаршиларида қалъа, унинг деворлари ортида — эҳтимол қайсидир хилват бир хонасида — бизон овчисининг сингси бандилик азобини чекиб ётибди. Ака синглиси ўша ерда эканини билади, бироқ уни озод қилиш қанчалик машаққат бўлади!

Роситани ўғрилаган ёвуз аввало тонади, бу ерда йўқ у, деб ишонтиришга уринади. Мабодо у қизни қўйиб юборса, бу ўз айбига иқрор бўлгани-ку, ахир. Хуш, Карлос-чи, қандай далилу исботлари бор унда? Гарнизон искарларининг, шубҳасиз, ҳеч нимадан хабарлари йўқ, ушбу қабиҳона ишда ёрдамлашган икки ёки уч ярамасини мустасно қилганда, албатта. Борди-ю, Карлос шовқин кўтаргудек бўлса, комендантга тақалаётган бундай пйбловга шаҳарликлардан ҳеч бири ишонмайди. Овчинини кулги қилишади ва, турган гапки, қамашади, қаттиқ жазоланади у. Башарти у ҳаттоки далил-исботларни рўқач қилган чоғида ҳам, ҳукмрон мулкдорлардан қай бири адолатни қарор топтиришда ёрдам берарди? Куч ҳам, қонун ҳам — ҳарбийлар қўлида, бу ерда номигагина мавжуд бўлган почору нотавон граждонлик маъмурияти, шак-шубҳасиз, унинг ёнини олишдан кўра рақиб томонига ўтишни афзал билади. У ҳеч киму ҳеч қасқдан адолат кутмаса ҳам бўлади. У ўз даъво-айбловини ўзи мурожаат этадиган одамлар ҳеч қачон тушуниб етмайдиган ҳамда эътиборга олмайдиган далил-исботлар билангина таъкидлай олиши мумкин, холос. Вискаarra мабодо у умуман сабабини тушунтириб беришдек ил-

тифот кўрсатгудек бўлса, албатта, орқага, шаҳарга қараб олиб келган изларга ойна-осонгина бирор жавоб топади, Карлоснинг қўяётган айбловини эса телба одамнинг валдирашига чиқаради. Ҳеч ким уларнинг гапни ишонмайди. Айнан, разилона қабоҳат бўлганлиги вадан ҳам ушбу ёвузлик ақлга тўғри келмайдиган ёлғонги ўхшаб кетади.

Карлос ва ўртоқлари буларнинг барини жуда яхши тушунардилар. Уларнинг ёрдам кутадиган, умид қиладиган жойлари йўқ эди. Маъмурлардан ҳеч бири ёрдам қўлини чўзмайди ва жонларига оро кирмайди.

Овчи бирмунча муддат жим, ўйга толиб қолди; ниҳоят яна тилга кирди — энди бошқача оҳангда сўзлай бошлади. Кўриниб турибдики, кўнглида қандайдир режа, қандайдир умид туғилди.

— Дўстларим! — деди у. — Тўппа-тўғри, очикчасига бориб жавоб беришни талаб қилиш керак, бошқа ҳеч қандай чорасини тополмаяпман. Кейин, буни ҳозироқ, ҳаялламай бажариш зарур. Синглимни қутқаришга уринмай, бирор соат бекор туришга сабрим чидамайди. Нима бўлдийкин деб юрак ҳовучлаб турган пайтда бир соат кутиш... Э-йўқ! Кечиктириб бўлмайди. Унча-мунча нарсани ўйлаб қўйдим мен. Эҳтимол бу жудаям унақанги эҳтиёткорона режа эмасдир-ку, локин ортиқ ўйлаб, мулоҳаза қилиб ўтиргани вақт йўқ. Қулоқ беринглар!

— Қулоғимиз сенда?

— Қалъа дарвозаси олдига ҳаммамиз биргалашиб боришимизни ҳожати йўқ. У ерда юзлаб аскарлар бор, бизнинг ихтиёримизда эса йигирма нафар тагнос, гарчи улар шердай мард бўлсалар ҳам, бундай олишувдан наф чиқмайди: кучлар ҳаддан ташқари нотенг. Мен бир ўзим бораман.

— Бир ўзинг?

— Шундоқ. Умид қиламанким, уни кўришга муваффақ бўларман. Менга ортиқ ҳеч ниманинг кераги йўқ. У — Роситанинг зиндонбони ухлаётганида эса бандини халос этиш мумкин. Демакким, у уйқуга кетади.

Бу сўзларнинг тагида кўп маъно бор эди, шу вадан ҳам сўзлаётган йигит қўлини беихтиёр тасмаси остига қистириғлиқ пичоғи сопига қўйган эди.

— У уйқуга кетади, — такрорлади Карлос, — агарда қисмат кулиб боқиб, омадим келиб қолса, тез орада

уйқуга кетади. Уёғига нима бўлади — менга бари бир: бўлганича бўлар! Борди-ю, синглим бадном қилинган бўлса, ўламанми ё тирик қоламанми — нима фарқи бор менга? Локин унинг қасдини оламан.

— Қандай қилиб учрашасан у билан?— деб сўради дон Хуан.— Сени қабул қилишни хоҳламайди у. Эҳтимол, кийимингни ўзгартириб олганинг маъқулдир? Ана унда, чамамда, тезроқ кўришга муваффақ бўларсан баъки.

— Йўқ! Кийимимни алмаштириб, қиёфамни ўзгартиришим осонмас — барибир сочим билан теримнинг туси сирни фош қилиб қўяди. Иннайкейин, кўп вақтни олади бу. Ишонавер, енгилтаклик қилиб бемулоҳаза иш тутмайман. Унга қандай қилиб рўпара бўлишни ўйлаб қўйдим, ҳар қандай шароитда ҳам уни кўраман деган умидламан. Борди-ю, урдасидан чиқолмасам, ҳозирча шовшув кўтариб ўтирмайман. Нима мақсадда борганимни у разиллардан бирортаси билмайди. Ана ундан кейин сен нимани маслаҳат берсанг, ўшани қиламан. Ҳозир бўлса ортиқ кутолмайман. Нимадир қилишим керак. Менимча, шу топда уёқда, асотейда юрган ўша, мана шунинг учун ҳам бошқа кута олмайман, дон Хуан. Агарда ўша бўлса...

— Хўш, биз нима қиламиз унда? Наҳотки сенга бирор ёрдам беролмаймиз?— деб сўради дон Хуан.

— Эҳтимол... агарда қочишимга тўғри келиб қолса. Қани кетдик, мени қаерда кутишларингни кўрсатаман. Тезроқ! Ҳозир ҳар бир дақиқа бир кунга тенг. Бошим, худди ўт қалагандек қизиб, лангиллаб кетяпти. Кетдик!

Карлос сакраб эгарга миши-ю, тикка қўйига тушадиган сўқмоқдан водий сари ҳайдади отини.

Водийга тушгач, йўл қалъа томонга бурилган ерда бошлаб бир миль чамаси қалин пастак дарахтлару буталарни оралаб борарди; бу жойдан ўтадиган бошқа йўл йўқ эди.

Аммо мазкур чакалакзорда мол-қоллар топтаб очган сўқмоқлар ҳам бўлиб, ана ўшалардан юриб чакалакзорларни кесиб ўтиш ҳам мумкин эди. Бу сўқмоқларни илгарилари шу ерда, яқингина жойда яшаган Антонио ихши билар эди. Ўшанақанги сўқмоқлардан бири бўйлаб чавандозлар девор тепасидаги соқчилар кўзига кўринмай қалъадан ярим милча берироққача боришлари мумкин эди. Антонио бутун бўлукни худди ўша ерга

бошлаб борди. Ҳадемай улар чакалакзор чеккасига етиб олишди, Карлоснинг буйруғи билан шу ерда, чалакзордан чиқмай, отларидан тушишди.

— Ҳамманглар шу ерда қолинглар,— деди овчи дон Хуанга.— Агарда уёқдан омон-эсон жунаб қолишга муваффақ бўлсам, тўғри шу ёққа от елдириб келаман. Борди-ю, отдан айрилсам, бари бир мени кўрасизлар яна. Унчалик узоқ бўлмаган бу масофани кийикдай чаққон босиб ўтаман, ҳеч зот етолмайди менга. Қайтганимдан сўнг эса, буёғига қандай ҳаракат қилишимиз кераклигини айтаман сизларга.

Шу пайт Карлос тўсатдан дон Хуаннинг қўлини шиппа ушлади-ю, чакалакзор этаги сари судраб кетди:

— Қара, дон Хуан! Бу ўша! Худо ҳаққи онт ичаман, бу ўша!

Карлос қалъанинг ясси томини кўрсатди — кунгурадор девор тепасидан аллакимнинг боши билан елкалари кўришиб турарди.

— Ҳа, бу комендант,— деди дон Хуан, асотеядаги одамни у ҳам таниган эди.

— Бас, етар! Гап сотиб ўтиришга вақтим йўқ!— хитоб қилди овчи.— Ё ҳозироқ, ёки ҳеч қачон! Агарда қайтиб келсам, буёғига нима қилиш кераклигини биласизлар. Борди-ю, қайтмасам — демак, ё қўлга тушган, ё ўлдирилган бўламан. Шу ерда қолинглар. Ярим кечагача шу ерда бўлинглар — балки эсон-омон қутулиб келарман уёқдан. Қамоқхоналари кўпдаям мустаҳкам эмас. Бундан ташқари, ёнимда олтин бор. Эҳтимол жонимга оро кириб қолар у. Бор гап шу, вассалом. Хайр, содиқ дўстим! Омон бўл!

Карлос дон Хуаннинг қўлини маҳкам сиқиб сакраб отига минди-ю, уни қичаб кетди.

Бироқ, тўғри қалъага қараб от солмади — у чоғда овчини хаш-паш дегунча пайқаб қолишлари тайин эди-да, ахир. Чакалакзордаги сўқмоқ уни ўз навбатида қалъа дарвозасига элтувчи асосий йўлга олиб чиқарди; у ана шу сўқмоқдан кетди. Антонио уни нақ чакалакзор этагигача кузатиб қўйди-да, кейин бошқалар ёнига қайтди.

Катта йўлга чиқиб олгач, Карлос отини йўрттириб, кенг қалъа дарвозасига қараб дадил бораверди. Ити Бизон бир одим ҳам кейинда қолмай, ортидан югуриб борарди.

XXXIII БОБ

— Биби Марям ҳаққи, бу ўша!— таажжуб ҳамда ханотирсираб хитоб қилди Робладо!— Худди ўзи! Чин сўним!

— Шундоқ ҳам билардим, билардим-а!— чинқириб юбораёзди Вискарра.— Қоядаги ўшайди, кўзимга кўрингани йўқ эди!

— Қай гўрдан пайдо бўлиб қолдийкин у? Жамики пвлиёю анбиёлар ҳаққи, бу йигит қаёқдан...

— Робладо, мен кетишим керак! Пастга тушаман мен. У билан рўбарў бўлишни истамайман. Йложим йўқ бунга!

— Полковник, сиз билан гаплашгани маъқул. У сизни аллақачон кўрди, таниб бўлди-ку, ахир. Агарда ўзингизни олиб қочадиган бўлсангиз, бу унда шубҳа уйғотади, холос. У биздан ҳиндуларни таъқиб этишда ёрдам сўрайди-ёв, кафолат бераман, фақат шу ниятда келяпти у!

— Сиз шундай деб ўйлайсизми?— деб сўради Вискарра ушбу тахминдан хиёл ўпкасини босиб олиб.

— Заррача шубҳам йўқ! Яна нимагаям келарди бўлмаса? Бор гап унинг хаёлига келмайди. Негаки у онасига ўхшаган жодугар эмас-ку, ахир! Ҳеч қаёққа кетманг, қани кўрайлик-чи, нима деркин. Ўз-ўзидан равшанки, у билан шу ерда асотейда туриб гаплашасиз, у ўса пастда тураверсин. Агарда у ўзини қупол, сурбетона тутадиган бўлса,— ёдингиздадир, бир марта икковимизни жиғимизга теккан эди-ку, ахир, уни қўлга олиб, сал совигунича бир-икки соат қамаб қўямиз. Йшонаман, бунга важ топиб беради ўзи. Мен ҳам унинг байрамдаги сурбетларча қилиғини унутганимча йўқ.

— Сиз ҳақсиз, Робладо, мен шу ерда қолиб, унинг гапини эшитаман. Шуниси яхшироқ. Шубҳа-гумонларга барҳам беради бу деб ўйлайман. Ундан кейин, гапингиз тўғри: у ҳеч нимадан шубҳа қилиши мумкин эмас.

— Аксинча, у ҳозир биздан ёрдам сўрайди-ю, сиз унга ёрдам берасиз — ана унда издан бутунлай чалғитиб юборасиз. У ҳали сизга дўст ҳам бўлиб қолади!— Шуларни айтиб, Робладо хохолаб кулди.

Бу гап ҳақиқатнамо эшитилди ва Вискаррага маъқул келди. У шу заҳотиёқ капитаннинг маслаҳатига амал қилишга қарор берди.

Мазкур ошиғич суҳбат бор-йўғи бир неча дақиқапи— улар чавандозни кўрган дастлабки сониядан токи овчи қалъа кўланкасида кўринмай қолгунига қадарли фурсатнигина олди.

Охирги икки юз ярдча масофани, ушбу ҳокимият таянчи остонасида чавандозлик маҳоратимни кўз-кўз қилсам тагин бунини бевошлиғу такаббурликка йўйиб юрмасинлар деб чўчигандек, гўё эҳтиром сақлаб оҳиста босиб ўтди у. Қелишган чехрасидан ғам-андух изларини уқса бўлар эди-ю, аммо шу тобда унинг қалбини ҳаммасидан ортиқроқ изтиробга солаётган туйғудан нишона берувчи аломатдан асар ҳам кўринмасди.

Қалъага яқинлашар экан у сомбреросини ечиб, боши ва кифтлари кунгурадор девор узра кўзга ташланиб турган зобитларга эҳтиром-ла таъзим бажо келтирди; қалъа деворига ўн қадамча қолганида эса оти жиловини тортиб, яна сомбреросини бошидан олди-да, ўзидан сўз сўрашларини кута бошлади.

— Хўш, нима хизматлари борийди?— деб сўради Робладо.

— Кабальеро, комендантга гапим бор эди.

Бу жавоб қандайдир илтимос-ўтинчи бор одам сўзлайдирган оҳангда айтилган эди. Ушбу оҳанг Вискаррани ҳам, аслида овчининг тинч-дўстона ниятда келаётганига унчалик ишончи комил эмаслигига қарамай, бошлигини бунинг аксига ишонтиришга уринган хийла безбету беҳаё муттаҳам шеригини ҳам тинчлантирди. Эндиликда унинг ўзининг бирламчи тахмини тўғри эканига шубҳаси қолмади: Карлос улардан мадад сўраб келган.

— Мен шу ерданман!— деб жавоб қилди қўрқувни буткул тарқаб кетган Вискарра.— Комендант менман, Хўш, нима гапингиз бор эди менга, ошна?

— Зоти олийлари, мен бир илтимос билан келгандим.— Шундай деб овчи тавозе ила яна таъзим қилди.

— Айтмабмидим сизга!— деб пичирлади Робладо бошлиғига.— Ҳаммаси жойида, полковник!

— Қани, дўстим, қулоғимиз сизда, эшитамиз,— деди Вискарра такаббуруна-мурувватпеша оҳангда.— Башарти ўтинчингиз бамаънию оқилона бўлса...

— Зоти олийлари, сиздан катта марҳамату илтифот кўрсатишингизни ўтинаман-у, локин бу ўтинчимда ҳеч қанақанги ақлга зид нарса бўлмаса керак деган умид.

даман. Имоним комилки, башарти бу сизнинг бошдан ошиб ётган хизмат вазифангизга халал бермасагина, илтимосимни рад этмассиз. Ушбу жабҳада қанча вақтингизу ғайратингизни сарф этганингизни барча жамоат билади-ку, ахир.

— Айтмабмидим сизга!— дея ғулдураб қўйди тағин Робладо.

— Хўш, хўш, қани айтнинг-чи!— деб далда берди Вискарра арзғўйга.— Мен, ахир, нимани илтимос қилмоқчи эканингизни эшитмай туриб жавоб бера олмайман-ку.

— Гап мана бундоқ, зоти олийлари. Мен битта бечораҳол бизон овчисиман...

— Э-ҳа, сиз Карлос, бизон овчисисиз-а! Биламан, биламан.

— Ҳа, зоти олийлари, учрашганмиз биз... авлиё Ноани байрами кун.

— Бўлмасам-чи, бўлмасам-чи! Эсимда. Сиз ажойиб чавандозсиз.

— Бошим осмонга етди бундан, зоти олийлари. Аммо маҳоратим ҳозир иш беролмайди менга. Бошимга беҳад мусибат тушган...

— Нима гап, нима бўлди? Барини айтаверинг!

Вискарра ҳам, Робладо ҳам овчининг нимани илтимос қилишини билиб-фаҳмлаб туришарди. Улар ушбу илтимосни бекорчиликда дарвоза атрофида ўралашиб юрган аскарлар эшитишини истаб қолдилар, шу бондан арзғўй ҳам овозини баландлатсин учун ўзлари қаттиқ-қаттиқ сўзлаётган эдилар.

Карлос ҳам қаттиқ жавоб қайтараётган эди — суҳбатдошларини қаноатлантириб, уларни мамнуи этини учун эмас, йўқ, бундан унинг ўз мўлжали бор эди, албатта. У ҳам зобитлар билан бўлаётган гапларни аскарлар, жосийси эса, дарвоза олдидаги соқчилар эшитишини истарди.

— Гап мундоқ, зоти олийлари,— сўзини давом эттирди у,— мен қашшоқ бир ранчода, кептнинг энг чеккасида, кекса онам ва синглим билан тураман. Утган кун кечаси уларга ҳиндулар ҳужум қилишибди. Онамни шундоқ уришибдики, шўрлик онам тил тортмай қулабди, уйимизга ўт қўйиб, синглимни олиб кетишибди!

— Эшитгандим буни, дўстим. Иннайкейин, ёввойиларни таъқиб этгани шахсан ўзим отланганман ҳам.

— Хабарим бор, зоти олийлари. Унда мен даштда эдим, бугун кечаси етиб келдим. Сизнинг, зоти олийлари, дарҳол ёввойилар орқасидан йўлга чиққанингизни эшитдим, бунинг учун сиздан чексиз миннатдорман.

— Миннатдорлик билдиришга арзимаydi, мен бурчимнигина адо этдим, холос. Содир бўлган фалокатдан ғоятда афсусланаман ва қайғу-ташвишингизга шерикман. Муттаҳамлар қочиб қолишга муваффақ бўлишибди, қани эди ҳозир қилмишларига яраша жазоларини берсак, илло бундан умид йўқ. Эҳтимол кейинчалик, гарнизонимиз кучайтирилгач, имкони туғилар. Ана унда шахсан ўзим ҳиндулар устига бостириб бора олардим-у, ўшанда синглингизни излаб топган бўлардик балки.

Овчи эҳтиром сақлаш билан Вискаррани тамоман лақиллата олди — комендантнинг совуққонлиги ва ўзига ишончию такабурлиги батамом қайтди; содир бўлиб ўтган воқеа хусусида улар ўртасида бораётган суҳбатдан англашилаётганидан ортиқ нарсани билмайдиган ҳар қандай одамнинг сўзларига қулоқ соларкан, алданиши турган гап эди. У муғомбирликни қотириб уддалаётган эди — на гап-сўзи, на башараси сирини ошкор этаётганди. Бироқ бор ҳақиқатни беш қўлдайд билган Карлоснинг ўткир кўзидан (ҳар қанча сезилмас бўлмасин) лабларининг пириллаб титраётгани қочиб қутулолмади; у Вискарранинг гумонсировчи-жонсарақ нигоҳ ташлаётгани ва сўзлашидаги ҳар бир заррача қадар тутилишни илғаб турарди.

Ҳа, Карлос уни лақиллатганди, у эса Карлосни алдаёлмаган эди.

— Хўш, нимани илтимос қилмоқчи эдингиз?— сўради Вискарра, келажақда шунча нарсани ваъда қилгач.

— Шунини илтижо қиламанки, зоти олийлари, аскарларингизга, ўз раҳнамолигингиздами (унда бошим кўкка етади) ёки жасур зобитларингиздан бирортаси бошчилигидами (буни эшитаркан Роблагога мойдай ёқиб кетди), талончилар изидан яна бир карра бориб кўришга ижозат берсангиз... ўзим йўл кўрсатиб бораман, зоти олийлари. Бу атрофларда икки юз милгача мен мана шу водийни билганимчалик яхши билмайдиган жой йўқ. Гарчи бу гапни ўз оғзим билан айтишим ноқулай бўлса-да, лекин сўзимга ишонинг, зоти олийлари, ҳиндуларнинг изини топиб боришда Улуғ Текисликдаги ҳар қандай изқувар овчидан сира қолишмайман. Фақат аскар

жунатсангиз бас, зоти олийлари, сўз бераман сизга — мен уларни талончилар устига бошлаб бораман ёки қин-қизил шарманда бўламан! Қаергаки олиб бормасин, иларидан адашмайман икки дунёда!

— У, шундоқ денг!— деди Вискарра, Робладо билан маънодор кўз уриштириб олар экан.

Икковлари ҳам алланечук бўлиб кетишди.

— Шундоқ, зоти олийлари, қаерда бўлмасин излардан толиб бораман.

— Йўғ-э, мумкин эмас бу,— деб эътироз билдирди Робладо.— Ахир бунга икки кун бўлди-ку. Иннайкейин, биз ҳам бир марта изларидан бордик. Қароқчилар Пекос дарёсидан кечиб ўтиб, етиб бўлмайдиган даражада олислаб кетганига ишонч ҳосил қилдик. Шунинг учун мутлақо бефойда бу, бекорга овора бўлинади.

— Кабальеролар!— янгитдан иккаларига мурожаат этди Карлос.— Сизларни ишонтириб айтаманки, қароқчиларни топиш қўлимдан келади. Улар ҳали кўпдаям олислаб кетишмаган бу ердан.

Комендант билан капитан нақ сапчиб тушишди-ю, сезиларли даражада ранглари ўчди. Овчи бунга зигирчалик эътибор бермагандек кўринди.

— Бекорчи гап бу, ошна!— тутилиб деди Робладо.— Улар... э улар юз миль олислаб кетган, бундан каммас... Льяно Эстакадонинг қаерларидадир ёки қаердадир тоғда ҳозир...

— Гапингизга қўшилмаганим учун маъзур тутасиз-у, капитан, локин мен аминманки... булар қанақанги ҳиндулар эканини, уларнинг қайси қабиладан эканлигини биламан.

— Қайси қабиладан эканини?— бараварига сўрашди зобитлар; ҳар икковиниям башараси жиддий, овози хиёл титроқ эди.— Қайси қабиладан эканини деганингиз нимаси? Нима, ютлар эмас эканми улар?

— Йўқ,— деб жавоб қайтарди ўз суҳбатдошларининг саросимага тушиб қолганларини аниқ-таниқ кўриб турган овчи.

— Бўлмаса кимлар экан?

— Буларнинг ютлар эмаслигига ишончим комил,— деди Карлос.— Хикариллар бўлса керак. Улар менинг ашадий душманларим.

— Жудаям бўлиши мумкин-да!— бараварига қўшилишди зобитлар очиқ-ошкора енгил тортиб.

— Жудаям бўлиши мумкин-да!— такрорлади Робладо.— Шоҳидларнинг тасвирлашларига қараганда уларни ютлар деб ўйлаш ҳам мумкин. Лекин, одамлар янглишишгандир эҳтимол. Ҳаммалари шунақанги ваҳимага тушиб қолишган эдики, мундоқ тузук-қуруқ тушунтириб ҳам бериша олмади. Ундан кейин, ҳиндулар фақат кечасилари пайдо бўлишган-да.

— Ҳўш, сиз уларни нега хикариллар деб ўйлаяпсиз?— деб сўради комендант, у қайтатдан енгил нафас ола бошлаган эди.

— Бир чеккаси шунинг учунки, улар сон жиҳатидан жудаям кам бўлишган,— деб жавоб қилди Карлос.— Агар ютлар бўлганида...

— Лекин улар жуда унақанги озчилик эмасди. Чўпонлар берган ахборотга қараганда каттагина тўда бўлган. Улар катта подани ҳайдаб кетишган. Агарда йирик бўлук бўлмаса водийда қораларини кўрсатишга журъат эта олмасдилар, бу кундай равшан гап.

— Менинг эса ишончим қатъий, улар озчилик бўлишган, зоти олийлари. Довюрак аскарларингиздан бир эскадрони ҳам босқинчиларни, ҳам улжаларни қўлга туширишга кифоя.

Бу сўзларни эшитганда шу атрофда ўралашиб юрган паст бўйли уланлар қоматдорроқ кўриниш учун қаддиларини тиклаб, кифтларини ростладилар.

— Ишқилиб хикариллар бўлишсин-да,— сўзини давом эттирди Карлос,— унда изларидан боришимниям ҳожати йўғийди. Улар Текисликка томон кетишмаган. Башарти ўша томонга қараб юришган экан, орқаларидан қувиб борганинларда сизларни чалғитиш учунгина шундай қилишган. Улар ҳозир қаерда эканини биламан: тоғда.

— Сизнингча, тоғдами улар? Шунақа денг!

— Ҳа, шундоқ, амишман бунга. Яна тағин бу ердан эллик миль нарида. Фақат аскар юборинг, зоти олийлари, уларни тўғри керакли жойга бошлаб бораман. Бунинг учун қароқчилар водийдан чиқиб кетган йўлдан боришнинг кераги йўқ, имоним комилки, бу чалғитадиган алдамчи излар.

Комендант билан капитан кунгурадор девор ёнидан нарироққа чекиниб, бир печа дақиқа пичирлашиб маслаҳатлашиб олишди.

— Чакки бўлмайди бу киши кўзига,— дерди капи-

тан.— Аслида, сизга нақ шуписи керак-ку, ахир. Омад ўз оёғи билан кириб келяптику эшигингиздан. Сиз мана шу йигитчанинг илтимоси билан аскар жўнатасиз, хўш, унинг ўзи ким бу ерда? Ҳеч вақога арзимайдиган бир одам! Унга гўёки ёрдам бериш билан бирга ўзингизга хизмат қиласиз. Кафолат бераманким, бу ғаройиб воқеа бўлади.

— Лекин у йўл бошлаб бораман деяпти-ку!

— Борса бораверсин! Янаям яхши: ҳамма хурсанду мамнун бўлади. У, тайин гапки, ўша хикарилларини тополмайди... Топиб ҳам бўпти! Лекин бир аҳмоқни кўнглига тасалли берсак нима қипти?

— Аммо, бир тасаввур қилиб кўринг-а, иттифоқо сиз билан бизнинг изимизга рўпара келиб қолса-чи? Поданинг изини кўриб қолса-чи?!

— Уёққа бормайди. Кейин, биз унинг кетидан хоҳлаган томонга эргашиб боришга мажбур эмасмиз-ку, ахир. Иннайкейин, уёққа бормайман, излардан бориш ниятим йўқ, деб айтди ўз оғзи билан. У ўша хикарилларнинг уёқдаги, тоғдаги уяларини биларкан... Нима ҳам дердик, эҳтимол шундоқдир. Уларни тор-мор этиш — ҳатто мақтовга лойиқ иш. Дарвоза тепасига бир жуфтгина калла терисини осиб қўямиз — чакки кўргазма бўлмайди бу. Сиз билан биз бу ерга келганимиздан берига бунақанги безак кўпайганича йўқ. Хўш, нима дейсиз? Пировард-оқибатини олганда, бу шунчаки кичиккина — отда эллик миллик кўнгили ёзар сайр холос.

— Хўп, майли, умуман эътирозим йўқ. Бу сайр чиндан ҳам чакки томоша эмас... Аммо шахсан ўзим боролмайман. На ушбу сайрда, на яна бирон бошқа ерда бу азаматга яқин йўлашга ҳушим йўқ... Вужудимни қандай ҳис-туйғу чулғаб олганини ўзингиз тушуниб тургандирсиз балки?— Шундай деб Робладога маънодор қараб қўйди комендант.

— Ҳа, ҳа... албатта...— дея жавоб қайтарди униси.

— Аскарларни сиз бошлаб борасиз, агарда оёғингиз тортмаётган бўлса, Гарсиани ёки сержантни жўпатинг.

— Ўзим бораман,— деди Робладо.— Шундай қилган тўғри. Мабодо овчи бирор бошқа бизга номақбул издан боришни хаёл қилиб қолса, мен уни бўлак ёққа бошлайман ёки шунчаки кўнмайман... Шундай, мен ўзим борганим маъқул. Жин урсин, ўша қизил танлилар билан жангга киришишдан гоятда хурсанд бўлардим-да!

Сизга каллахомларини келтиришдан умидворман!—
хохолаб кулди Робладо.

— Қачон йўлга чиқмоқчисиз?— деб сўради полковник.

— Ҳозироқ. Қанчалик тезроқ бўлса, шунчалик яхши. Бу барчага хуш келади ва бизнинг ғайрату шижоат ҳамда ватанпарварлик ҳис-туйғуларига тўла эканимизнинг далил-исботи бўлади!— У яна хохолади.— Сиз сержантга буйруқ берарсиз, мен эсам бориб овчи дўстимизни хурсанд қилай.

Робладо асотейдан шошилиб тушиб кетди-ю, бир неча дақиқадан сўнг карнай садолари янгради. У: «Отларга!»— дея чорлади.

XXXIV БОБ

Бутун суҳбат давомида овчи отини биринчи тўхтатган ерида қимир этмай эгарда ўлтирди. Мана, зобитлар кўринмай қолишди йигитга: улар асотей чеккасидан узоқлашишган, кунгуралар кўздан яшириб турибди уларни. Лекин Қарлос уларнинг нима хусусда кенгашаётганларини фаҳмлаб, сабр-тоқат-ла кута бошлади.

Дарвоза олдида аллақачон ўттиз ёхуд қирқ чоғли аскар жам бўлишганди, уларнинг бари қизиқсиниб от билан чавандозга тикилишар эди; бир пайт ўзларига ошно карнай садоси янгради-ю, ҳаммалари отхона томон югуриб қолишди; дарвоза олдида фақат соқчигина қолди. Ҳамма аскарлар қатори у ҳам овчи билан зобитлар ўртасида бўлиб ўтган гап-сўзларни эшитган ва карнайчининг бекорга карнай чалмаётганини англаб етган эди. Гарчи комендант ҳали ўз оғзи билан айтмаган бўлса-да, Қарлос илтимосини бажаришларига ишонарди.

Охирги дақиқагача унинг бирон аниқ ҳаракат режаси йўқ эди. Бари вазият-шароитга боғлиқ бўлиб турган пайтда қандай ҳам ҳар тарафлама ўйлаб кўра оларди дейсиз?

Фақат биргина нарса ойдин эди: Вискаррага ёлғиз рупара бўлиши керак. Ақалли бир нафасгагина — шунинг ўзи кифоя эди унга.

У илтимос қилиш, ялиниб-ёлвориш бефойда — бундай қилиш вақтни шамолга совориш эканини ва оқибати мағлубияту ҳалокат билан тугашини ҳис этиб турарди.

Иштиқом олиш учун бир дақиқа ҳам етарли. Синглим нобуд бўлди деган хаёл эса Карлосни тарк этмас ва у қасос иштиёқида ёнарди. Кейин нима бўлади — буёғини ўйламасди у. Мабодо қочишга тўғри келса — нима ҳам қиларди, бу борада у қулай мавриду ўз-ўзига орқа қилаётган эди: кучию тадбиркорлиги доғ қолдирмайди уни.

Хулласи калом, шу сониягача унинг ҳеч қандай аниқ режаси йўқ эди. Аммо туйқисдан бошига, эҳтимол ёвни таъқиб этадиган бўлукка комендантнинг ўзи бошчилик қилар, деган фикр келди. Борди-ю, шундай бўлса, ҳозирча ҳеч нима қилмай туради. У йўл бошловчилик вазифасини ўтайди, ана шунда нафақат ганимларини нобуд қилиш учунгина, шунингдек, астагина қутулиб кетиш учун ҳам тўлиқ имкон туғилади унга. Қани, улар овлоқ, ўзлари билмайдиган текисликка чиқсинлар-чи, кўради — уёқларда уланлардан асти чўчимайди, ўзидан ўн карра кўпроқ бўлган тақдирларида ҳам. Вафодор тулпорида бўлса икки дунёда қувиб ета олишмайди улар.

Аскарлар сафарга отланишяпти — буни у карнай садосидан англади. Вискарра ҳам бирга борармикин? — Ана шу савол ҳаммадан кўпроқ безовта қиларди тоқатсизлик ила тепага, кунгуралар орасига тикилганча ҳапуз оти устида қимир этмай ўлтирган Карлосни.

Мана, девор қирраси узра манфур башара кўринди. Бу гал комендант нотавон илтимосчига ўз кўнглида хурсанд қиладиган хабарни айтмоқлик учун девор оша ташқарига муралади. У, овчига беқиёс илтифот кўрсатаётганига қатъий ишонган ҳолда, мазкур хабарни вожоҳат билан тум-тароқли оҳангда етказди.

Карлоснинг чеҳраси қувончдан ёришиб кетди, бироқ эшитган хабаридан эмас — Вискарра эса айнан ана шундан деб ўйлади, — йўқ: Карлосни қувонтирган нарса комендантнинг асотеяда ёлғиз қолгани эди. Ёнида Робладо кўринмаётган эди.

— Мендай бир қашшоққа шундай мурувват кўрсатяпсиз, саховатингизнинг чеки йўқ, эй зоти олийлари. Сизга қандай миннатдорчилик изҳор этишимни билмай қолдим.

— Миннатдорчилик билдиришга арзимамайди, ҳа, арзимамайди. Ўз бурчини адо этаркан, католиклар пушти паноҳи ҳазрати олийларининг зобитига миннатдорлик билдириб ўлтиришнинг ҳожати йўқ.

Шу сўзларни айтар экан комендант мағрурона ҳамда

виқор-ла қўл силтаб қўйди ва, чамаси, кетишга чоғланди. Карлос уни саволга тутиб тўхтатди:

— Камина қулингиз зоти олийларига йўл бошловчилик қилиш шарафига мушарраф бўладими?

— Йўқ, шахсан ўзим бормайман мазкур сафарга, уни энг яхши зобитим, капитан Робладо бошқаради. У ҳозир сафар тадоригини кўряпти. Кута туринг уни.

Вискарра шундай деди-ю, чўрт бурилиб, асотеядаги сайрини қайтатдан давом эттираверди. Шубҳасизки, ушбу бетма-бет суҳбатдан алланечук бўлиб кетган ва овчи билан тезроқ хайр-маъзур қилишдан хурсанд эди у. Нега энди у бундай тушунтириб ўтирибди деб сўраб-суриштириб ўлтиришининг ҳожати ҳам йўқ, негаки Карлосга ана шу билиб олган нарсасининг ўзи кифоя эди.

У фурсат етганини, бирон сонияни бой бериш мумкин эмаслигини англади-ю, дарҳол ишга тушишга қарор берди.

Шу дамгача у эгарда қилт этмай ўлтирган эди. Милтигини қўндоғини узангига тираб, оғзини елкасига босганча ўлтирганидан бирон тирик жон зоти пайқамаган эди қуроли борлигини. Қўнжи узун этиги билан кифтига ташлаб олган серапеси милтиқни бутунлай яшириб турган эди. Карлоснинг чап белида осиглиқ турган ўткир ов пичоғини ҳам серапеси бегона кўзлардан пинҳон тутаётган эди. Унинг бор қуроли шугина эди, холос.

Комендант билан Робладо кенгашаётган пайтда Карлос вақтни зое кеткизмади, у сиртдан қарагандагина бекор тургандек кўринарди. У деворни ҳафсала билан, яхшилаб назардан ўтказди. У қалин деворга ёпишган, шундоққина дарвоза олдидан бошланган тош зиналар асотеяга олиб чиқишини кўрди. Бу зинапоя хизмат юзасидан қалъа томига чиқишлари керак бўладиган аскарларга аталган эди. Аммо Карлос яна зобитлар учун бўлак зинапоя ҳам борлигини биларди. Қалъада илгари сираям бўлмаганига қарамай, ана ўша зинапоя бионинг оралиқ — туташган жойида бўлиши керак, деб тўғри хулосага келди у. Шунингдек у дарвоза олдида биттагина соқчи турганини ва дарвозахонадан ичкарироқдаги тош ўриндиқлар — одатда қоровулда турувчилар дам оладиган жой — ҳозир буш эканини ҳам пайқайди.

Демак, соқчилар ё ичкарида, бино ичида, ё казармаларга тарқашган. Шунини айтиб ўтиш керакким, қалъада

нитизом ёмон эди. Вискаarra ўзи олифта-сатаанг, батариб бўлса ҳам, аскарларига нисбатан кўпдаям талабчан эмасди. У ўз ҳузур-ҳаловати билан ҳаддан зиёд банд бўлиб, бўлак бирон ниманинг ташвишини чекишга вақти йўқ эди.

Сезгир ва кузатувчан овчи буларнинг барини Вискаarra унга таъқибга аскар йўллаш ниятида эканини хабар қилиш учун кунгуралар ёнига иккинчи марта яқинлашмасидан бурунроқ пайқаб улгурган эди. Қисқаси, комендант тагин кўздан ғойиб бўлгани ҳаманоқ Карлос ишга киришди.

У тўсатдан отидан тушди, отни дастлаб келиб тўхтаган ерида қолдирди. У қорабайирни на устуну на тўсинга боғлади, жилов тизгинини эгар қошига ташлаб қўйди, холос. У тобига етказиб ўргатилган тулпори ўзини хотиржамгина кутажагини биларди.

Милтигини — оёгига маҳкам босиб олган қўндоғи энди бегона кўзларга ташланиб турган бўлишига қарамай — ҳамон ридоси остида тутарди. Карлос уни авайлаб ушлаганча дарвозага қараб юрди.

Карлосни бир нарса безовталантираётган эди: соқчи ўтказиб юборармикин уни? Борди-ю, ўтказмаса, соқчи гумдон бўлади!

Лаҳзада шундай қарорга келди-ю, дарвозага яқинлашар экан, ридоси остида астагина пичоғи дастасидан тутди овчи.

Карлоснинг бахтига, нимасиниям айтасиз, соқчининг ўзининг ҳам бахтига, нияти муваффақиятли чиқди: овчи ҳеч бир мушкулликсиз дарвозадан ўтиб олди. Соқчи, бесўнақай ва ялқов йигит ҳозиргина бўлиб ўтган гапларни эшитиб турган эди, шу боисдан у ҳеч қандай шубҳага бормади. Тўғри, у ҳар қалай Карлосни тўхтатмоқчи бўлди, аммо овчи шоша-пиша, комендантга айтадиган гапи борлигини, у асотеяга чиқишни буюрганини айтди. Соқчи бу жавобдан тўлиқ қаноатланмади ва истамайгина бўлса ҳамки, ҳарҳолда Карлосни ўтказиб юборди.

Карлос ўша заҳотиёқ зинапояга ташланди-ю, зипиллаганча тепага чиқа бошлади. У бамисоли мушукдай енгил ва шарпасиз кўтариларди тош зиналардан, шу тариқа асотеяга чиқиб борганида зинапоядан атиги бешолти қадамча нарироқда турган Вискаarra эндиликда бу ерда ёлғиз ўзи эмас эканини хаёлига ҳам келтирмади.

Ҳа, бу ўша, Вискаarra, Карлоснинг синглисини нобуд қилган, номусини ўғрилаган зolim ситамкор, босқинчи, зўравон Вискаarra эди. Мана у қасоскор акадан бир неча одимгина, милтиқ оғзидан олти футча нарида турибди-ю, илло жонига нима таҳдид қилаётганидан ҳали-ҳануз беҳабар. У бурилиб, бошқа томонга қараяпти, хавфни кўрмаяпти у.

Овчи бирровгина кўз ташлади унга, сўнг тепада ҳеч ким йўқлигига ишонч ҳосил қилмоқ учун девор ёқалаб кўз югуртди. У ҳар иккала минорада биттадан соқчи турганини биларди-ю, бироқ уларни кўрмаётганди: уларнинг марраси сиртқи девор тарафда бўлиб, ҳозир Карлос турган жойдан кўринмаётган эдилар. Томда шулардан бўлак тирик жон асари йўқ эди. Ёлғиз ғанимигина шу ерда, Карлоснинг нигоҳи яна унга келиб тўхтади.

Карлос Вискаarrани орқасидан отиши мумкин эди, шундай қилишга шайланганди ҳам, аммо ўша ондаёқ фикридан қайтди. У мана шу одамни ўлдиргани келгану, лекин бу йўл билан эмас. Ҳаттоки эҳтиёткорлик ҳам бошқача йўл тутишни айтиб турибди унга. Пичоқнинг тили йўқ, гунг, иш битгач қасоскорга ими-жимида гоёиб бўлиш имконини беради қайтага.

Хаёлидан шу ўй кечар экан, Карлос милтиғи қўндоғини эҳтиёт билан ерга тушириб, оғзини кунгурадор деворга суяб қўйди. Шунда темир тошга тик этиб тегди. Бу тикиллаган товуш қанчалик оҳиста бўлмасин, комендант уни эшитиб, шартта ўгирилди-ю, номатлуб меҳмонни кўриб титраб кетди.

У ўзини аччиқланган қилиб кўрсатишга уринди, аммо орадан ўтган дақиқалар ичида овчининг юзи таниб бўлмас даражада ўзгариб кетганини, ундаги янги ифодани кўрди-ю, ғазаби қўрқувга ўриш бўшатиб берди ўша замоноқ.

— Рухсат сўрамай бу ерга келишга қандай журъат этдингиз, тақсирим?— дея гап бошлади у.— Қандай қилиб...

— Секинроқ, полковник! Секинроқ, овозингизни эшитиб қолишлари мумкин-а!

Бу сўзлар оҳистагина, қуруқ ҳамда қатъият-ла, буйруқ оҳангида айтилди-ю, улар қаратилган муртад қўрқоқнинг юраги қинидан чиқиб кетди. У қаршисида турган одамнинг афтида, бутун қиёфасида барқарор ҳамда бебок қатъияту дадиллик ифодасини кўрди, бу чеҳра

унга очиқ-ошкора: «Қулоқ солмай кўр-чи — унда ўлганинг!» — деб турарди.

Ушбу ифодани дастасини овчининг қўли маҳкам чапгаллаб турган узун пичоқ тиғининг йилтираши тасдиқлаётган эди.

Қўрқувдан Вискарранинг ранги паға бўлиб оқариб кетди. Бу гапларнинг бари замирида нима ётганини билиб олганди эндиликда. Аскар юбориш ҳақдаги илтимос унга, Вискаррага рўпара бўлиш йўлидаги баҳонагина экан. Овчи изини топибди, ҳаммасига у айбдор эканини билиб олибди, мана энди талабини қондириш ҳуд синглизининг ўчини олиш учун келибди. Шунда тундаги тушининг ваҳимаси ўнгидаги даҳшатларга қўшилиб Вискарранинг вужудини эгаллади-олди.

У нима деярини билмай қолди, аслида гапиришга мажоли ҳам йўқ эди шу топда. У бирор томондан ёрдам келиб қолар деган беҳуда умид билан жон ҳалпида атрофга алангларди. Аммо теварак-атрофда ҳеч зот йўқ, қаршисида — фақат кулранг девору унинг олдида даҳшатли ғанимининг ғазабкор афти. Ёрдамга чақирса бўларди, бироқ бу башара, таҳликали ҳолат... Вискарра ягарда қичқирса, бу қичқириқ умридаги энг охиргиси бўлишини тушунди. Ахийри, нафаси бўғзига тиқилиб тилга кирди:

— Нима керак ўзи сизга?

— Синглим!

— Синглингиз?

— Ҳа!

— Карлос, мен билмайман... Бу ерда йўқ у... Мен...

— Ёлғон! У шу ерда, қалъада. Ана қаранг, ит уёқда, ошик тагида ҳуряпти. Нимага шундай қиляпти?

Шундай дея Карлос айна сонияда Бизон олдида чир айланиб ириллаб-ҳуриётган, бутун туриш-турмуши билан ичкарига киришга интилаётган қўйи қават эшигини кўрсатди. Бир аскар эса уни ҳайдашга ҳаракат қилаётган эди.

Вискарра ўша томонга қаради. У итни кўрди, аскарни ҳам кўрди-ю, лекин уни чақирришга ботинолмади. Қаршисида ўткир тиғ ярқираб турарди. Овчи яна қайтарди саволни:

— Ҳуш, нимага шундай қиляпти?

— Мен... мен, билмадим...

— Яна ёлгон сўзлаяписиз! У ҳув ўша эшикдан кирган. Ҳозир қаерда у? Жавоб беринг! Тезроқ!

— Сизга айтяпман-ку, билмайман. Ишонинг...

— Ёлгончи аблаҳ! Шу ерда у! Мен изини топдим, қаерданки ўтган бўлманглар, барини кўриб билдим. Ҳийлаларингиз ёрдам бермади. Агар тағин бир марта ёлгон гапирсанг — мана шу пичоқ қоқ юрагингга санчи ладн бориб! У шу ерда! Қайси жойда у? Қайси? Жавоб бер!

— Йўқ-йўқ, ўлдирманг мени, ҳаммасини айтаман! У шу ерда... У... Онт ичаман, унга ҳеч қандай ёмонлик қилганим йўқ! Онт ичаман, мен...

— Хўп майли, муттаҳам! Буёққа кел... буёққа девор ёнига! Тезроқ қимирла!

Овчи патио — ички ҳовлининг бир қисми кўриниб турган жойни кўрсатди. Комендант дарҳол итоат этди, акс ҳолда ўлиши муқаррар эканини тушуниб турарди.

— Буюр, уни буёққа олиб келишсин. Уни ким қўриқлаётганини биларсан-ку! Ўзингни босиб, оғирроқ бўл, эшитяпсанми? Йигитларингга ишора қилишга урина кўрма! Оғзингдан бирои нима чиққудек ё биронта но-жўя ҳаракат қилгудек бўлсанг — ғарчча пичоқ санча-ман! Қани?!

— О тангрим, тангрим!.. Унда хароб бўламан... Ҳам-мага дoston бўлади... Хароб бўлдим, хароб!.. Ёлбораман сизга, шафқат қилинг, бир оз сабр этинг! У қайтади уйингизга, онт ичаман! Шу бугун тундаёқ!..

— Йўқ, ҳозироқ, муттаҳам! Қани бўл, қимирла! Унинг қаердалигини биладиган одамни чақир. Синглим-ни олиб чиқишсин! Тезроқ, тоқатимни тоқ қилмай, бўла қол! Яна бир дақиқадан кейин...

— Ё одил эгам! Ўлдирманг мени!.. Бир нафасгаги-на... шошилманг!.. А-ҳа!

Унинг охирги нидоси тамоман бўлакча янгради. Бу қувонч, таптана нидоси эди.

Комендант мудом Карлос чиқиб келган зинапоя то-монга қараб, овчи эса уёққа тескари турган эди, шунинг учун ҳам у асотеяга тағин бир киши чиқиб келганини кўрмай қолди... Бир пайт кимнингдир бақувват қўли унинг таҳдид-ла баланд кўтарилган қўлини исканжадай қисди. У қўлини силтаб тортиб олиб, шартта орқасига гирилди — қаршисида шопдек бўлиб зобит турарди. У лейтенант Гарсияни таниди.

— Сизда ҳеч қанақа хусуматим йўқ!— деди овчи.—
Қўйинг, аралашманг!

Лейтенант бунга жавоб бериб ўлтирмай, тўппончаси-
ни чиқарди-ю, нақ башарасидан отмоқчи бўлди. Карлос
ушга ташланди.

Варанглаб ўқ отилди, бир сонияга Гарсиани ҳам, ов-
чини ҳам дуд қуршади. Шунда Вискарра кимнингдир
асотеяга гурсиллаб қулаганини эшитди. Яна бир лаҳза
ўтди — дуд орасидан иккинчиси, омон қолгани кўзга ча-
линди.

Бу бизон овчиси эди, унинг қўлидаги пичоқдан эса
чикиллаб қон томчиларди.

У ҳозиргина комендант турган жойга ташланди,
аммо у ердан ҳеч кимни топмади: Вискарра аллақачон
асотеядан иккинчи зинапояга қараб югуриб борарди.

Карлос бу ерда, асотеяда етиб ололмаслигини дарҳол
диглади — Вискарра зинапояга уриб кетишга улгуради.
Орқасидан пастга қувиб тушиш эса — подонлик: негаки
ўқ овози барчани аллақачон саросимага солиб қўйган,
албатта.

Карлос умидсизликка тушиб қолди, аммо бир лаҳза-
гагина. Уша ондаёқ хаёлида ажойиб бир фикр йилт
ўтди — милтиғи ёдига тушди. Чамаси, комендант ундан
ҳали қочиб қутулолмаган экан!

У шартта милтиғини олди-ю, ҳали тарқаб улгурма-
ган дуд ҳалал бермаслиги учун четроққа сакраб, нишон-
га олди.

Вискарра бу орада зинапояга етиб бориб, пастга ту-
ша бошлаган эди. Нимадир уни тўхтаб, орқасига ўгири-
либ қарашга мажбур этганида фақат бошию кифти чи-
қиб турарди девор раҳидан. Номарднинг қўрқуви деяр-
ли тарқаб бўлганди — ёрдам етиб келаёзган эди-да,
ахир — шу боисдан овчи билан Гарсиа ўртасидаги оли-
шув нима билан тугаганини кўриш учун кизиқсиниб
қараган эди орқасига. У бир онгагина тўхтамоқчи эди,
биноқ у бошини буриб улгурар-улгурмас варанглаб ўқ
урилди — мерганона отилган ўқ мўлжалга келиб тен-
ди-ю, комендант зиналардан пастга думалаб кетди.

Овчи ўқ мўлжалга текканини, бунинг устига у иккин-
чи зобитнинг ҳам тил тортмай ётганини кўрди, пастдаги
дарғазаб бақириқ-чақириқларни эшитди ва тезроқ,
бирон сонияни ҳам ўтказмай қочиб қолмаса, ўзини

ўраб олиб, танасига юзлаб найзалар санчилажагини фаҳмлади.

Дастлаб хаёлига буёққа чиқиб келган зинапоядан тушсаммикин деган фикр келди. Иккинчиси ички ҳовлига олиб тушади, у ер эса аллақачон аскарлар билан тўлган бўлиши керак.

У лейтенантнинг жасади устидан сакраб ўтиб, зинапояга қараб отилди.

Зинапоядан қуролли одамлар чиқиб келаётган эди. Йўл кесиб қўйилибди.

У тагин мурда устидан ўтиб, асотея бўйлаб чошиб боғриб, сиртқи деворнинг кунгурадор тўсиғи устига сакраб чиқди-да, пастга қаради.

Бундай баладдан сакраш қўрқинчли, аммо у яна нимадан умид қилиши мумкин? Бир неча улан аллақачон томга чошиб чиққан, найзаларини шайлаб унга қараб отилишган, бир хиллари қарабинларидан ўқ узишар, атрофидан ўқлар чувиллаб ўта бошлаганди. Ўйлаб ўлтиришга фурсат йўқ эди. Шунда Карлоснинг кўзи қорабайирга тушди; бебаҳо тулпор бўйини мағрурона гажак қилган кўйи, жиловини «чайнаб-ғажиганча» турарди. «Худога шукр, ҳали тирик экан у!»

Вафодор дўстини кўрганда Карлоснинг кучига куч қўшилди. Пастга сакради — мана у ерда, девор таккинасида, соппа-соғ ҳамда бус-бутун.

Қаттиқ ва чузиқ ҳуштак-ла отини чақирди, сакраб ўзини эгарга олди-ю, бирон дақиқа ўтмаёқ, қарабсизки, водийда от елдириб кетяпти-да.

Орқасидан чувиллаб ўқлар учарди, уланлар таъқиб этишга ошиқардилар. Бироқ, улар отларига миниб, дарвозадан чиққунларича Карлос чакалакзор чеккасига етиб келиб, кўздан ғойиб бўлди; буталарнинг қуюқ барглари уни ўз бағрига олгач, яна туташиб, девор ҳосил қилди.

Робладо билан Хомес бошчилигидаги уланлар бўлган Карлоснинг кетидан от солиб келарди. Бироқ, чакалакзорга яқинлаб қолганларида, уларни бағоят ҳайратга солиб, буталар узра йигирма чоғли бош пайдо бўлди-ю, қаршиларида ваҳшиёна жанговар қичқириқлар янгради.

— Ҳиндулар! Ёввойилар! — бўкириб юборишди уланлар, ваҳимада талвасага тушиб орқага бурилган отлари жиловини тортиб.

Тўхтаб, мадад етиб келишини кутишга буйруқ берил-

ди. Бутун гарнизон оёққа турғазилди, чакалакзор қуршаб олинди ва ниҳоят ичкари киришга қарор берилди. Лекин, отларининг изи чакалакзорнинг ҳар томонига таралиб кетгани яққол кўзга ташланиб турганига қарамай, ҳиндуларни топа олмадилар.

XXXV БОБ

Гарсия ўлган эди. Гарчи кўтариб олиб кирганларида худди озроққина умри қолгандек кўринган бўлса-да, Вискаarra ўлмади; туриш-турмиши унинг ўлимдан қанчалик қўрқишини айтиб турарди. Афти қора қонга беланган, чакагида ўқнинг қонли изи қолган эди. Аммо у тирик эди, ҳадеб вой-войлаб, нималардир деб гудранарди. Аниқ, тушунарли қилиб гапиролмасди — чакагини жароҳатлаган ўқ бир нечта тишини қўпориб чиққан эди.

У юзидан яраланган эди, холос. Жонига зиғирчалик хавф таҳдид қилмаётганди. Лекин ёш ва унчалик тажрибаси йўқ шаҳар врачлари ўз беморини дарров тинчлантира олмади; Вискаarra бир неча соатни муттасил ўз қисмати нима бўлишидан мутлақо беҳабар бир ҳолатда ўтказди. Ҳарбий врач воқеадан илгарироқ оламдан ўтган ва унинг ўрнига гарнизонга ҳали бошқа ҳақимни юборишганича йўқ эди.

Ўша куни қалъада, турган гапки шаҳарда ҳам, беқиёс ҳаяжону безовталиқ ҳукм сурди. Бутун Сан-Ильдефонсо ақлли шошириб қўядиган ҳайратангиз миш-мишлардан ларзага келди; бамисоли даштга тушган ёнғиндай бутун водий бўйлаб ёйилди бу миш-мишлар.

Содир бўлган воқеа тўғрисида ҳар хил гаплар тарқади. Бир хиллар, шаҳарни Карлос, бизон овчиси бошлаб келган ёввойилар бутунлай қуршаб олишибди, дейишарди; ёввойиларнинг сон-саногини йўқ кўринади, негаки улар қалъага очикчасига ҳужум қилишибди, лекин кескин олишувдан кейин — ҳар иккала томондан талайгина одам ҳалок бўлибди; бу орада — ҳар қалай жасур аскарлар ҳужумни қайтаришибди; зобитларнинг ҳаммасини ўлдиришибди, бугун кечаси яна ҳужум қилишса керак — энди тўғридан-тўғри шаҳарни босишади-ёв, дейишарди бошқалари.

Аммо бошқача овоза ҳам тарқалганди: гўёки тинч яшаётган ҳиндулар бош кўтарган эмишлар-у, Карлос

ёввойи жангчиларни эмас, ана ўшаларни бошлаб келганмиш. Қалъага муваффақиятсиз ҳамла қилган ўшалар эмиш, жасур аскарлар уларнинг ҳамласини даф этганмиш, бу муҳорабада ҳар иккала томон катта талафот кўрган, шу қаторда комендант билан унинг зобитлари ҳам ҳалок бўлишган эмиш; буларнинг бари Сан-Ильдефонсодаги жамики тагнослар қатнашаётган зўр исённинг дастлабки уч кунигина эмиш ва, ҳеч шак-шубҳасиз, бугун кечаси улар яна ҳужум қилишармиш!

Ушбу овозалар хусусида бош қотириб, мулоҳазага берилганлар ҳеч тушунолмасдилар. Нега энди бу жаңгари ҳиндулар деярли ҳимоясиз шаҳар ёки бой-бадавлат асиендолар қолиб, қалъага ҳужум қилганлар? Кейин, нега энди овчи Карлос ҳеч нарсадан-ҳеч нарса йўқ уларга бошлиқ бўлиб қолибди? Нимага энди айнан у — бошига ёввойилар шунча кулфат солган одам — бошчилик қилади? Сан-Ильдефонсода Карлоснинг синглисини ўшалар ўғирлаб кетганини ким билмайди дейсиз, ахир! Шундоқ бўла туриб ҳиндулар босқинига йўлбошчилик қилармиди — йўқ, бу сира ақлга тўғри келмайдиган гап-ку!

Хўш, фитна, қўзғолон-чи? Ахир тинч ҳиндулар ҳамма ерда далада хотиржам ишляяптилар, бошқа вазифадагилари ҳам ўзларининг одатдаги хизматлари билан банд. Мабодо кондан келаётган хабарларга қараладиган бўлса, уёқда ҳам исён ёхуд фитнадан дарак берадиган ҳеч қандай аломат сезилмайди. Водийга таралган бу икки овозадан бири — овчи раҳнамолигидаги тагнослар галаёли ҳақидаги овоза хийла тўғрироққа ўхшаб кетарди. Тагносларнинг ўз қисматларидан мутлақо мамнуи эмасликлари ҳаммага аён эди. Аммо ҳозир бундай галаёндан дарак берадиган ҳеч қандай белги-аломат йўқ эди-ку. Тагносларнинг барчаси ўзларининг кундалик юмушлари билан машғул. У чоғда исён кўтарганлар кимлар бўлдикин? Шундай қилиб миш-мишу овозалар буткул ақлга тўғри келмайдигандек кўринарди.

Кўп ўтмай шаҳар аҳлининг ярмидан кўпроғи қалъа олдида тупланиб қолди; оғиздан-оғизга кўчган турлитуман тахмину тусмол гаплардан сўнг, ниҳоят ҳақиқатда рўй берган воқеа аён бўлди.

Аммо-лекин содир бўлган ҳақиқий воқеаларнинг ўзи ҳам овозалардан кам жумбоқ эмасди. Овчининг гарнизон зобитларига ҳамла қилишига сабаб бўладиган қаи-

даб важлари бор экан? Ёнидаги ҳамроҳлари қайси ҳиндулар бўлдийкин? Жангариларими ёки тинч ҳиндуларми? Ёввойиларми ёки ғалаёнчиларми?

Баридан қизиқ жойи шундаки, фараз қилинган «жаангда» иштирок этган аскарларнинг ўзлари ҳам мазкур саволларга жавоб бера олмасдилар. Бировлари ундоқ деса, бошқалари бундоқ дейишарди.

Улардан кўпчилиги Карлоснинг зобитлар билан гапишганини эшитган эди, бироқ ўз-ўзидан мутлақо табиийки, шундан кейин рўй берган ҳодисаларни қўшиб олганида ушбу суҳбат шундоқ ҳам жумбоқ бўлиб турган мубҳам ишни узил-кесил чалкаштириб юборди. Аскарлар ҳеч нимани тузук-қуруқ тушунтириб беролмадилар, шаҳарликлар уй-уйларига тарқалишар экан, мазкур сирли ҳангомалар хусусидаги баҳсни давом эттириб, талашиб-тортишиб боришарди. Ниҳоятда турли тусдаги тахминну гумонларни уртага ташлашар эди. Баъзилар овчи бу ерга ҳиндуларга қарши астойдил ёрдам сўраб келган-у, ёнида эса у таъқибда ёрдам беринглар деб илтимос қилган бир неча тагнос ҳам бўлган, деб ўйлашар эди. Комендант олдиниغا унга ёрдам ваъда қилган-у, кейин сўзидан қайтган, ана шу овчининг бундай тушунарсиз, ғалати қилмишига сабаб бўлган, дейишарди.

Тарафдорлари кўпроқ бошқа бир тахмин — овчи капитан Робладони йўқотишни дилига тугиб қўйган, деган тахмин ҳам бор эди. Ҳаммасига рашк сабабчи. Ахир байрам куни охирлаб қолганида Карлос ўзини қандай тутганини ҳамма билади-ку, ўшанда озмунча майна қилиб кулишганимиди. Хўш дегандан, Роблагога рўпара келишга муваффақ бўлолмаганидан кейин комендант билан талашган... ва ҳоказо.

Гарчи унчалик ҳақиқатга ўхшамаса-да, ушбу тахминини кўпчилик илиб кетди, зеро овчининг хатти-ҳаракатиға аслида нима сабаб бўлгани ойдинлашмаган эди-да, ахир. Қалъа ичкарасидагилар фақат тўрт кишию ташқаридагилардан уч кишигина билишарди бунинг асли сабабини. Қолганларнинг бари етти ухлаганда тушига ҳам кирмасди бу.

Ҳаммаларининг фикрлари бир нарсада бир жойдан чиққан — бир оғиздан Карлосни айблашаётган эди. Унга сиртмоқ ҳам камлик қилади, қўлга туширганларида қилмишига яраша жазосини олади. Унинг ўтакетган даражада нонкўрлиги барчанинг ғазабини қўзғаётган эди.

Бир кунгина бурун худди шу зобитлар довиорак аскарларни билан ҳиндуларни таъқиб этиб, унга озмунча яхшилиқ қилишмаган эди-я! Эсини еб қўйганга ўхшайди у. Кампир онаси афсун ўқиб, авраб қўйган бўлса керак-да, уни.

Лейтенант Гарсиядай одамни ўлдирибди-я! Ҳамма-нинг арзандасини денг! Э, минг лаънат-э!

Бу ҳақ гап эди: лейтенантни бутун водий аҳли яхши кўрарди, унинг қилган яхшилигию саховати учун эмас, шунчаки, катта зобитларга сира ўхшамасгани учун, холос. У хушмуомала, ҳеч кимга зиёни тегмайдиган йигит бўлиб, ҳамма ҳурмат қиларди уни.

Уша оқшом бутун Сан-Ильдефонсода овчининг бирорта дўсти қолмаганди. Дарвоқе, ундай эмас. Биргина дўсти бор эди унинг. Биргина юрак — Каталанининг юраги худди илгаригидек муҳаббат туйғуси ила лиммолим эди, аммо у ҳам йигитнинг ўзини нега бундай ғалати тутганини тушуна олмаётганди.

Илло бунинг сабаби қандоқ бўлмасин, у бир нарсани биллади: Карлос ноҳақ иш тутиши мумкин эмас. Карлоснинг бошига ёғилаётган бўҳтону тухмат тошларини, кулгию масхаралашларни бир пақирга олмайди у! Башарти суюқлиси одам ўлдирганида ҳам унинг нима иши бор бу билан! Жиддий асоси бўлмаса ҳам ҳеч қачон бундай қилмасди у. Эҳтимол иззат-нафсига тегадиган қилиб ҳақоратлашгандир уни. Каталина бунга амин эди. Карлоснинг раҳмдилу сахий қалб эканини билган қиз ўзгача ўйлай ҳам олмасди. У — қиз қалбининг соҳиби ва ҳукмдори — ёмон, ножўя иш қилмайди асло.

Содир бўлган воқеалар хабари етиб келганида Каталанининг юраги тилка-пора бўлаёзди. Бу хабар узоқ муддатли, эҳтимолки, абадий фироқ демак эди! Эндиликда Карлос шаҳарда, умуман Сан-Ильдефонсода кўрнишга ботинолмайди. Уни худди бўри ёки қутурган бизон сингари бепоён даштликларга қувадилар, балки қўлга тушириб, ўлдиришар!.. Қанчалик аччиғу аламли эди қиз хаёлидан кечаётган бу ўйлар. Энди қачон дийдор кўришади у билан? Эҳтимол, ҳеч қачон!

XXXVI БОБ

Бу орада Вискаarra кўрпа-тўшакда, оғриқ азобидан кўра кўпроқ ўз ҳаётидан кўрқиш ваҳимасида «войвойлато» қилиб ётарди.

Агарда шу томони бўлмаганида у ғазаб отига қамчи босиши тайин эдику-я, аммо ўлим ваҳимаси қолган жамики ҳис-туйғуларни ситиб чиқарганди вужудидан.

Айтмоқчи, башарти ўзининг соғайиб кетишига ишончи комил бўлган чоғида, ҳам, бари бир орому таскин топмаслиги аниқ эди. Унинг тасаввуру хотиротига даҳшатли туш ва ундан кейин бўлиб ўтган воқеалар путур этказганди. Атрофини аскарлар қуршаб, қуриқлаб турганига қарамай, у бари бир бизон овчисидан қўрқаётган эди: назарида, Қарлос нимаики истаса, бариини удасидан чиқадиганга, кейин эса ҳеч нарса кўрмагандек бежазо қутулиб кета оладиганга ўхшарди. Ҳатто эшигида соқчи қўриқчилик қилиб турган ўз хонасида ҳам Вискарра ўзини бежавотир ҳис этмаётганди — қасоскорнинг дасти шу ергаям ета оладигандек туюларди.

Ҳозирда у қиздан — жамики кўргиликлари айбдоридан қутулишни ҳар қачонгидан кўпроқ истарди, бироқ бу иш бағоят қалтису нозик ва уни амалга ошириш эндиликда ҳар қачонгидан мушкулроқ эканини фаҳмлаб турарди. Карлоснинг нима сабабдан бунчалар телбаёна тарзда унинг жонига қасд қилганини муқаррар билиб олади одамлар, бу ҳақдаги овозалар олий мартабали бошлиқларгача етиб боради, ана унда тергов-текширув олиб боришни буюришади, бу эса, агарда ўзини шубҳагумонлардан муҳофаза қилолмай қолса, албатта нобуд этади.

Тузалиб кетишга умид боғлаган Вискарра ана шу тариқа ўйларди; бунга шубҳалана бошлаганида эса фикр ўйлари ғамгинона тус олиб, дарди-дунёси қоронғи бўлиб кетарди.

У Робладонинг қайтишини тоқатсизлик ила кутаётган эди, зеро капитан ҳаммасини босди-босди қилишнинг қандайдир имкону йўриғи борлигини шама қилганди унга. Жангари капитан ҳали-ҳануз чакалакзорни титпит қилиб излаб юрибди. Лекин, мана Хомес кўринди, у капитаннинг излашни тўхтатишга қарор бериб, қалъага қайтаётганини хабар қилди.

Роблагога эса бу кунги ҳангомалар, аксинча, ёқаётган эди; уни четдан кузатган ҳар қандай кимса бунга ишонч ҳосил қилиши мумкин эди. Уни дарҳақиқат ранжитган нарса комендантнинг жароҳати эди: бу ўлим

келтирадиган оғир жароҳат эмасди-да, ахир! Робладо врачдан тажрибалироқ бўлиб, буни жуда яхши биларди. Вискарра икковлари дўстдан кўра кўпроқ шерик эди — уларни жиноятли ишларда ҳамкорлик бошларини қовуштириб турарди, икковидан истаган бирови ўзи учун фойдали деб топган дамда ушбу дўстлик риштасини сири афсусланмай чўрт узиб юбориши тайин эди. Ушбу дўстлик Робладонинг, ўқ «дўстимга» ё сал юқорироққа, ё сал пастроққа — боши ёки бўйнига — тегмабди-да, деб чин қалбдан афсус чекишига ҳалал бермади. Комендант-да хусумати борлиги ва уни кўролмаганидан эмас, шунчаки, мабодо ҳозир айтганимиздек бўлганида, бундан фойдаланиб қолиши мумкин эканидан афсус-надомат чекаётган эди, холос. Робладо хизмат поғонасидан юқорироққа кўтарилишни кўпдан орзу қилиб юрарди. У камтарину камсуқумлардан эмасди ва бир кун келиб қалъа коменданти бўлишдан умидвор эди, дилидаги бу орзусини ардоқлаб юрарди. Вискарра ўлди дегунича капитан дарҳол унинг лавозимини эгаллайди. Аммо ҳозир Вискарранинг ажали етмаган экан, ана шу ўй Робладонинг қувончига пича сув пуркаб қўйди.

Ҳа, у хурсанд эди. Негаки, у билан Гарсия бир-бирларига душман эдилар. Улар аллазамонлардан бери бир-бирларини кўрарга кўзларию отарга ўқлари йўқ эди, бир-бирларига ҳасад қилардилар, ана шу боисдан ҳам Робладо лейтенантнинг ҳалокатидан заррача ўқинмади. Лекин бугунги ҳангома яна бир жиҳатдан унинг қувончига сабаб бўлганди, сабаб бўлганда ҳам ниҳоятда жиддий, Робладонинг истак-орзуларига ҳаммадан кўпроқ жавоб берадиган омил бўлди.

Гарчи бизон овчисининг Каталанининг кўнглини овлашга уринишлари, жўнгина қилиб айтганда, куракда турмайдиган гапдай туюлса-да, сўнгги пайтларда Робладо кўрган-билган жамики нарса дилида рашк қўзғотган эди. Бу ҳам камлик қилгандек, ғоятда хавотирга тушиб қолганди у. Жуда ғалати қиз-да бу Каталина де Крусес, у неча марталаб беназир қатъият, метин иродасини намоён этган — бунақанги қизни на мнсоли бир той молдай сотиб ололасану на сотиб юбора оласан. Охириги пайтларда уларга — отаси билан Робладога — бошлаб сабоқ берди-да. У жажжигина оёқчаси билан ер депсиб, агарда ўз холига қўймай, зўрлайдиган бўлишса, ё монастирға кетаман, ё гўрға кираман, деб қўрқитди

уларни. У Роблагога тегмайман деб тўғридан-тўғри рад
ётмади-ю, бироқ, токи ўзи бир қарорга келгунича ўйлаб
кўриб, кейин жавоб бергунича муддат беришларини та-
лаб этиб туриб олди ва дон Амбросио кўнишга мажбур
бўлди.

Капитаннинг кўнглига ғулғула тушиб, бесаранжом
бўлиб қолганининг ажабланарли жойи йўқ. Гарчанд қиз-
ни ўзича севса ҳам, уни рашк қилибгина қолмай, шу-
нингдек, бундай рақибни борлигини ўйлашнинг ўзиёқ
капитаннинг нафсониятига тегиб кетарди-ю, аммо Ката-
линанинг бир сўзлигидан хавотирсираб, қайлиғининг
ишжайиб сепини қўлдан чиқариб юборишдан қўрқар эди.
Бунақанги аёлнинг қўлидан ҳар қандай телбалик кела-
ди. У ростдан ҳам монастирға кетиши, йўқса анави но-
тавон бизон овчиси билан Текисликка — даштларға жу-
наб қолиши мумкин. Тўғри, ҳар иккала ҳолда ҳам у
бойлигини олиб кетолмайди, лекин буёғи барибир эмас-
ми? У чоғда давлати унга, Роблагога тегмайди-ку,
ахир.

Хўш деганингиздан, мана энди бизон овчисидан қўр-
қишнинг ҳожати йўқ: содир бўлган воқеадан сўнг у ка-
питанга ортиқ рақиблик қилолмайди. Ҳаёти қил устида
турибди. У Каталина билан учраша олмайдигина эмас,
ҳатто кенту қишлоқларда кўринишга журъат этолмайди.
Уни мутгасил кузатишади. Шунда Роблаго ўз рақибни
қандай таъқиб этиши, уни тутиб, қандай жазосини
беришини ўйлар экан, ич-ичидан қувонарди.

Тошбағир капитаннинг хаёлидан шундай фикр-ўйлар-
кечарди — бугунги воқеалар уни мана нима учун қувон-
тириб, мамнун этаётган эди.

Чакалакзорни тит-пит қилиб, фараз қилинган ҳинду-
лар изидан нақ ясситоғликкача боргач, қочоқни олис-
роқларгача таъқиб этиш тадоригини кўриш учун ўз
уланлари билан қалъага қайтди.

XXXVII Б О Б

Роблаго қайтгач, ожизона кеку адоват ҳамда ваҳи-
ма ич-этини кемираётган Вискаarra пича тинчланди.

Шубҳасиз, суҳбат охирги воқеалар хусусида борди —
Роблаго таъқиб ҳақида сўзлаб берди.

— Ростданам ўша овчининг ёнида ёввойилар бўлуғи бор деб ўйлайсизми?— деб сўради комендант.

— Йўқ,— дея жавоб қилди Робладо.— Олдинги шундай деб ўйладим, тўғрироғи — аскарлар шундай деб ўйлашибди, оқибатда уларнинг ахборотлари чалғитибди. Энди бўлса булар ҳинду жангчилари эмас, балки унинг тагнос ошналари эканига аминман. Хоакин тақсирлари ҳақ бўлиб чиқяптилар — бизон овчисининг таниш-билишлари, ошна-оғайнигарчиликлари шубҳали. Уни аллақачонлароқ қўлга олишимиз мумкин эди, шунинг ўзи баҳона бўларди бунга. Хўш деганингиздан, мана энди бўлса бизга баҳона-сабабни керагиям йўқ. У бизники, фақат қўлга туширсак бўлгани.

— Хўш, қандай ҳаракат қилмоқчисиз?

— Тўғри, у осонликча тутқич бермайди бизга, албатта. Уни қўлга туширгунча тузуккина тер тўкишга тўғри келади. Мен одамларни иложи борича узоқроқ сафарга шайлаш учунгина қайтдим. Ярамаслар водийдан юқориги йўл билан чиқиб кетишибди, тоққа жўнаган бўлишса керак. Хомес ҳам шу фикрда. Биз излардан бориб, уларга етиб олишга ҳаракат қиламиз. Дарҳол яқин-атрофдаги барча кенту қишлоқларга хабар қилиш керак, агар Карлос пайдо бўлса, уни қўлга олсинлар. Лекин унинг бундай қилиши даргумон-ов.

— Нега бундай деб ўйлайсиз?

— Нега? Э, маълум бўлишича, қари жодугар тирик қолган экан-ку, ахир! Бунинг устига у синглисини топшдан умидвор шундоқ бўлгач, Сан-Ильдефонсо атрофларида изғиб-ўралашиши турган гап-да.

— А-ҳа! Сиз ҳақсиз, худди шундай бўлади. У мени ўлақолса тинч қўймайди, токи синглиси...

— Янаям яхши-да. Тезроқ қўлга туширишимизда ёрдам беради бу. Аммо-лекин, қадрдоним полковник, кундаям осон бўлмайди бу, ишонаверинг гапимга. У буридан ҳам эҳтиёткорроқ, анави жин ургур отига эса бутун бошли гарнизонимиз қувиб ета олмайди. Йигитчани алдаб тузоққа илинтириш керак, йўқса уни тутиб бўлмайди.

— Хўш, ўша тузоқни ўйлаб қўйдингизми?

— Унча-мунча нарсани ўйлаб қўйибман.

— Хўш-хўш, нима экан у?

— Биласизми, бир учини чиқардим сизга — Карлоснинг шу яқин-атрофда изғиб-ўралашиб юришига сабаб

борлигини айтдим. Жодугар кампирни кўргани бир-икки марта келади, балки, лекин бундан ортиқмас. Иккинчи тузоқ ишончлироқ.

— Сиз қизни назарда тутяпсизми?— деди Вискаarra Росита қамаб қўйилган хонани кўрсатиб.

— Ҳа. Айтишларича, у синглисини жонидан ортиқ кўрар экан. Хўш деганингиздан, борди-ю, қиз акаси иқинлаша оладиган жойда бўлса, кафолат бераман сизга, у албатта келарди. Биз эса ўша ерга пистирма қўйган бўлардик.

— Қайси ерга? Қаерда?— деб сўради Вискаarra бафуржа.

— Ўзларининг ранчоларига яқин бирор жойда. Уёқди биронта қўналға топишар унга. Башарти ўзлари уни пақтинчаликка жўнатишга розилик берсалар, кейин яна осонгина қайтарадилар — ўша Карлоснинг суробини тўғрилаганимиздан сўнг ҳеч ким ҳалал беролмайди сизга.

— Розилик берсангиз дейсизми? Ёлғиз истагим-ку бу! Токи у шу ерда экан, тинчлик бўлмайди менга. Борди-ю, олди-қочди миш-миш тарқалган бўлса, икковимиз ҳам маломатга қолдик деяверинг. Агарда бу овозалар баъзи ерга етса борми, ҳолимизга вой бўлади. Ёки нотўғрими?

— Ҳа, бу борада сиз қисман ҳақсиз. Гарсиянинг ўлганини хабар қилмасликнинг иложи йўқ, бундан хабардор бўлганларидан кейин эса сабабини суриштириб-иқинлашга тушиб қолишади. Биз ҳам ўзимизча ривоят тўқиб қўйишимиз керак ва у иложи борича ҳақиқатнамо бўлиши керак. Бизга шубҳа-гумоннинг ҳатто сояси ҳам тушмаслиги зарур, ҳар қандай миш-мишу овоза сабабини пай-пайдан қирқиб, қизни ҳозироқ олиб бориб қўйган маъқулмиди.

— Қандай қилиб элтиб қўйилади ахир? Мени ана шу нарса безовта қиляпти. Агарда уни уйига жўнатадиган бўлсак, бу бешбаттар шубҳа туғдиради. Қандай тушунтирилади буни? Ахир ҳиндулар қайтариб ташлаб кетмайдилар-ку, икки дунёда! Ҳозир ўзингиз қандайдир режангиз борлигини айтдингиз чоғи?

— Уйлайманки, режа бор. Лекин олдин менга тушунтириб беринг-чи, қизни телба деганингизда нимани назарда тутган эдингиз?

— У эсини йўқотиб қўйган. У ҳозир ҳам телба, Менга Хосе айтди: қаёқдаги нарсаларни валдираб, сира гап-

га тушунмаётганмиш. Мени қаттиқ ваҳима босяпти, Робладо!

— Сира гапга тушунмаётган эмишми? Имонингиз комилми бунга?

— Имоним комил.

— Унда яна яхши. Демак, ҳозир қаердалигию қаерда бўлганини эслаб қололмайди. Ана энди ундан қандай қутулиш йўлини биламан. Бундан осони йўқ. У уйига қайтиб борганида, агарда гапиришга қурби етса, ҳиндулар асирлигида бўлдим, дейди. Хўш, қалай, қапоатлантирадими бу сизни?

— Бўлмасам-чи! Лекин қандай ташкил қилинади бу?

— Жуда осонгина-да, қадрдоним комендант. Мана қулоқ солинг.

Хомес билан Хосе ўтган сафаргидек ҳиндуларга ўхшаб кийиниб, бежаниб олишади-ю, шу бугун тундаёқ ёки эрта тонгда қизни бу ердан олиб чиқиб кетишади, қаёққа — буни мен ўзим тайинлайман уларга. Тоғининг бирон ерига. Узоққами ёки яқинроққами — аҳамияти йўқ буни. Эрта билан уларни топишади, қиз эса худди асирдай қўл-оёғи боғлоғлиқ бўлади. Мабодо ўша пайтга бориб, эси ўзига келиб қолса, ўшаларнинг асираси эканман-да, деб ўйлайди ўзиям, унда янаям соз бўлади. Хўш, деганингиздан, камина аскарлар билан Карлосни излаб юриб, тасодифан бу ҳиндуларга рўпара бўлиб қоладилар. Бежавотирроқ ердан, ҳеч кимга тегмайдиган қилиб, уларга қарата, бир-иккита ўқ узса ҳам бўлади. Шунда улар асирани ташлаб, жуфтакни росталашади-ю, биз қизни қутқариб, шаҳарга қайтариб олиб келамиз, ана ундан кейин халос бўламиз, қиздан. Ҳа-ҳа-ҳа! Қалай, ўйлаб топган режам ўзларига ёқдими, полковник?

— Қойил!— дея жавоб қилди Вискаarra. Ушбу режа амалга ошажагига олдиндан ишониб, кўнгли жойига тушди.

— Э, бу режа шайтони лаъиннинг ўзиниям бошини ғовлатиб, гангитиб қўяди. Шунда биз ўзимизни нафақат шубҳадан халос этамиз, аксинча, шуҳратимизга шуҳрат қўшамиз. Бўлмасам-чи! Ёввойиларга қарши муваффақиятли ҳаракат-ку бу! Яна асирани озод этган бўламиз-а! Уни яқинларига қайтарамиз! Тағин кимни деи? Сизнинг жонингизга қасд қилган айнан ўша одамнинг синглисини-я! Ишонинг, комендант, ҳатто овчининг ўзиям (агар бу сизни хурсанд қила олса), бошлаб лақилла-

талади. Агарда қиз икки сўзни бир-бирига жуфтлай олса, шу пайтгача ҳиндулар асирлигида эдим, деб оинт ичадди. Ҳатто ўз акасига ҳам ана шу бемаъни сафсатани айтди.

— Қойилмақом режа! Барини шу бугун тундаёқ бажариш керак.

— Албатта-да! Аскарлар казармаларга тарқалишлари биланоқ Хомес қизни олиб йўлга тушаверса бўлади. Мен бугун Карлосни ахтаргани чиқмайман — виждонан айтганда, бундан бирон маъни чиқишига кўзим етмаяпти. Уни қўлга олишимизнинг биргина имконияти бор: тuzоқ қўйиш, қиз эса бунда «хўрак» хизматини ўтайди. Кейинроқ барини жой-жойига қўямиз, сиз эса ортиқ ханотирланмасангиз ҳам бўлади. Эртага чошгоҳда ҳузурингизга: ҳикариллар ёки ютлар билан бўлиб ўтган мардона олишувда фалонча ҳинду ўлдирилди, бир несира озод этилди, аскарлар қаҳрамонона жанг қилдилар, писмадончи капралнинг унвонини оширишни тавсия қиламан, ҳоказо ва ҳоказо қабилидаги ахборот билан кираман. — Шундай деб капитан қаҳқаҳлаб кулди.

Вискарра унга жўр бўлди; башарти Робладо жароҳати хавфсиз экани ва бир-икки ҳафта ичида бутунилай битиб кетажасига ишонтириб улгурмаганида, чамаси у кулмаган бўларди.

Робладо ўз ишонтирувчи сўзларини докторни нодон деб атаб, бошқача сўкишу ҳақоратларни қаторлаштириш билан тасдиқлаган эди. Мана шунинг учун ҳам муқаррар ўлим ваҳимаси ҳамда ич-этини тирнаётган бўлак ўй-фикрлардан халос бўлиб олган Вискарранинг кўнгли жойига тушиб, сўнгги кеча-кундузда маҳрум бўлган руҳий осойишталиги яна қайтган эди. Эндиликда унинг вужудини бўлак майлу истак — Карлосдан ўч олиш истаси қамраган эди.

* * *

Шомга бориб, кечки карнай янграши ва аскарлар казармаларга киришлари биланоқ чоққина тўда қалъаларвозасидан чиқиб, тоққа олиб борадиган йўлдан кетаверди. Отлиқлар бор-йўғи уч киши эди. Улардан бири, бошдан-оёқ ўралиб олган ва хачирда бораётгани аёл киши эканини англаш қийин эмасди. Қолган иккитаси галати кийинган, антиқа қилиб бўёқ суртиб, пару патлар

тақиб бежаниб олган, ҳинду жангчиларга ўхшаб кетарди. Бироқ, булар ҳиндулар эмас, ҳиндуча ясаниб-тусанган испан аскарлари эди. Бу бизон овчисининг синглисини қалъадан олиб чиқиб кетаётган сержант Хомес билан Хосе эди.

XXXVIII БОБ

Карлос чакалакзорга аллақачон яқинлаб қолганди, унинг таъқибчилари эса қалъа девори ёнидан эндигина қўзғалган эдилар. Турган гапки, уни фақат отда қуввишларигина мумкин эди, отга эгар уриб, қуролларини олишларига бўлса вақт керак эди. Шунинг учун Карлос қуввиб етишади деб чўчимай қўйганди, кейин, изни ҳам чалғитиб ўтирмади. У ўзининг тулпорга ишонар, таъқибчиларнинг шундоққина тумшуққинаси остидан тутқич бермай елдириб кетишини ва чакалакзорда биқиниб яшириниб юришнинг ҳожати йўқ эканини биларди.

Карлос кутиб турган дўстлари ёнига ўтиб борар экан, эндиликда ўз хавфсизлигини ўйламай қўйган на фақат дон Хуан билан унинг ҳамроҳлари ташвишнинг чека бошлаган эди. У баногоҳ дўстлари қанчалик мушкул вазиятда қолганларини тушунди. Қандай қутулиб кетишади улар?

Очиқ майдоннинг ярмини босиб ўтишга улгурмасиданок дўстларидан хавотирланиш туйғуси ҳар қандай ўз жонидан қўрқиб ҳиссини дилидан сиқиб чиқарди ю, буёғига нима қилиш лозимлигини кўз олдига келтириб бошлади. У чакалакзордан ичкарилаб кетмайди, балки тўғри Қиз ўлган қояга олиб борадиган сўқмоққа буради отини. Уланлар ҳам ўша йўлдан от солишади, бу орада эса дон Хуан билан тагнослар яшириниб улгурадилар.

Карлос мабодо дон Хуаннинг оқилона иш тутушига ишонганида ушбу мўлжалдан фойдаланган бўларди, аммо у бундай қилишдан хавотирсирар эди. Дон Хуан қизиққон, кейин кўпдаям мулоҳазали, узоқни кўралиган йигит эмас. Карлосни қуввиб келаётганларига кўн тушгани ондаёқ, қандай келишиб олган бўлмасинлар, у одамлар билан бирга чакалакзордан чиқиб келишни ўз бурчи деб билади, шубҳасиз, Карлос эса худди шуни истамасди. Ана шу боисдан ҳам у отини тўғри ўша

бўса, дон Хуан ўз ҳамроҳлари билан, пистирмада кута-
тули ерга қараб учириб бораверди.

— Худога шукр, соғ-саломат қайтибсан!— деди дон Хуан ҳаяжонда.— Лекин улар кетингдан қувиб келишяпти-ку. Хув ана улар, неча киши ўзи улар?

— Шундай,— жавоб қайтарди Карлос, орқага кўз ташлаб.— Аммо анча орқада қолиб кетишди.

— Энди нима қилдик?— деб сўради дон Хуан.— Буталар оралаб тарқалишамизми ёки ҳаммамиз бирга бўламизми? Негаки улар ҳадемай етиб келишади бу ерга.

Карлос ўйга толиб, дарҳол жавоб қила қолмади. Уларнинг қутулиб кетишлари учун учта маълум даражада ишончли имкон бор эди: биринчиси — дон Хуан таклиф этганидек, буталар оралаб тарқалиб кетиш; иккинчиси — бирга бўлиб, ҳаялламай буёққа келган йўлларидан (лекин таъқибчилар кўзига чалинмай) ортга чекиниш; ва ниҳоят — яширинмай, улар қаршисига чиқиб, ана шундан сўнггина ўша йўлдан жўнаб қолиш. Ҳозир юзага келган вазиятда жангга киришиш тентаклик ва бефойда иш бўлурди.

Овчи узоқ ўйлашга ўрганмаган эди, у мазкур режанимкониятларни шашту шитоб-ла тарозуга солиб кўрди. Биринчисидан ўша ондаёқ воз кечди. Чакалакзорга таралиб кетиш — ўзини-ўзи ҳалокат чангалига тутиб бериш демак эди. Ўрмон унчалик катта эмас, энига нари борса икки милча келар, бўйига эса икки баравар узунроқ эди. Уланлар сони жиҳатидан ўрмонни бемалол ўраб олишлари мумкин ва дарҳол шундай қилажаклари тайин, албатта. Чакалакзорни энию бўйига тит-пит қилиб кезиб, одамларнинг ярмини қўлга туширишади-да, қалъада содир бўлган воқеада алоқалари бор деб топишади ва шафқатсизларча жазолашади ёки йўқ, айбларини исботловчи ҳеч қандай далил-исбот йўқлигига ҳам қарамай, жой-жойларида отиб ташлашади.

Карлос иккинчи имкониятдан фойдаланган — таъқибчилар кўзига чалинмай чакалакзорлар оралаб жўнаб қолишга уриниб кўрган бўларди-ю, лекин у қош қорайтунга қадар етиб олишади деган хавотирда эди. Тагнослар миниб келган хачирлар аллақачон силласи қуриб бўлган, аскарлардан кўпчилигининг оти эса яхши, тезкор эди. Башарти шу томони бўлмаганида ҳаммалари бири-жимиди қутулиб кетишарди-ю, дон Хуан билан одамлари булар ҳам қатнашган деган шубҳа-гумон туй-

дирмасдилар. Бу нарса келажакда муҳим аҳамият касб этиши мумкин эди... Шунга қарамай, барибир иккинчи режа-имкониятни хаёлга келтирмаса ҳам буларди. Қис-қаси, Карлос учинчи имкониятни танлади.

Ана шулар устида мулоҳаза юритиш учун овчининг сиз билан биз бу ҳақдаги сатрларни ўқиб чиққунча сарфлаганимиздан икки баробар камроқ вақти кетди. Ордан сир неча сония ўтар-ўтмас Карлос дон Хуанга ҳамма эшитадиган баланд овоз билан жавоб қайтарди. Унинг жавоби буйруқ оҳангида янгради:

— Ҳамма барабарига — чакалакзор оралаб олға! Бу та орасидан муралаб қаранглар, лекин фақат бошларинг, елкаларинг уқ-ёйларингизга кўринсин. Жанговар қичқириқларинг баландроқ янгрисин! Кейин ўша заҳотиёқ орқага бурилишлару ҳар томонга қараб тарқаб кетинглар! Қани, ортимдан!

Карлос апил-тапил кўрсатма берди-ю, чакалакзорга урди ўзини ва зум ўтмай чакалакзор этагида пайдо бўлди. Деярли бир вақтда иланг-биланг чизиқ ҳосил қилиб қатор тизилган тагнослар ҳам кўринди; уларни бир қапотда дон Хуан, иккинчисидан Антонио муҳофаза қилиб турарди. Улар уқ-ёйларини бошлари узра силкиганча жанговар наъра тортиб, гўёки чиндан ҳам юввойи ҳиндулардай ҳайқира кетдилар.

Ҳатто яқин масофадан ҳам ҳиндуларнинг ёввойи жангчилар эмас, балки тагнослар эканини фақат тажрибли кўзгина илғай олиши мумкин эди. Барчаларининг бошлари яланғоч, узун сочлари шамолда ҳилпирарди; ташқи қиёфаларидан улар ўзларининг дашти қабиладошларидан ростдан ҳам оз фарқ қилишар эди. Ҳаммаларининг қўлида уқ-ёй — иш башарти урушга бориб тақалгудек бўлса тинч ҳаёт кечирувчи ҳиндулар ҳанузгача ишлатадиган қурол, кейин, уларнинг жанговар наъра-ҳайқириқлари ҳам одатда «жанггари», «ёввойи» деб аталгувчи баъзи қабилаларнинг қийқириқларидан кам таҳликали эмасди. Карлоснинг ҳамроҳларидан аксарияти жангларда қатнашганига ҳали кўп бўлгани йўқ. Қўнлари кун кечагина тинч меҳнат кишиларига айланганлар.

Уларнинг пайдо бўлиши баайни бизон овчиси кўзлангандай самара берди. Отлиқ аскарлар бетартиб бир тарзда тўда-тўда бўлиб елиб келаётган эдилар, баъзиларининг чакалакзорга етишларига уч юз қадамча қол-

ган эди; кутилмаган ҳайқириқларни эшитиб жон ҳолатда отлари жиловини тортдилар. Мабодо қалъа дарвозасидан янги, йирик бўлук чиқиб келаётганини кўрмаганда олдиндагилар ўша ондаёқ орқага қайтишлари тайин эди-ёв.

Таъқибчилар тараддуда эдилар. Улар чакалакзордагиларнинг ёввойи ҳиндулар эканига, сон жиҳатидан сонсаноксиз эканликларига қаттиқ ишонгандилар. Уларнинг ушбу ишончларини кейинги вақтдаги воқеалар тасдиқлаб турарди — ахир аскарлар иш кунлари давомида худди ана шу ёввойиларнинг изларидан қувиб, таъқиб этаётганларига чиппа-чин ишонган эдилар-да. Мана энди бўлса ўшаларнинг ўзлари ҳужум қилишяпти-да уларга! Уланларнинг текисликда таққа тўхтаб, мадад этиб келишини кутаётганларининг боиси ҳам шунда эди.

Қарлос ўз найрангининг худди шундай таъсир кўрсатишини олдиндан кўра билганди. У ҳамроҳларига шарпа чиқармай, орқага, буталар орасига чекинишни буюрди; ҳаял ўтмай барчалари яқингинада пистирмада турган жойларида жам бўлдилар.

Энди уларни ўрмондан Антонио бошлаб кетди — лекин у Қиз ўлган қоя томонга эмас, балки ясситоғликдаги бошқа тепа ёнига элтадиган сўқмоқдан йўл солди. Улар пистирма қурганларидан бемалол уч миллар узоқлашиб, қоя-тошлар оралаб юқорилаётган пайтда олисдаги чакалакзорлару орқа тарафда ястанган водийга кўзлари тушди. Чакалакзорнинг олд томонидаги яйдоқ майдонда ҳали-ҳанузгача жасур суворилар уёқдан-буёққа от ўйнатиб юришарди; улар ўзлари ёвуз ёввойилар биқиниб ётибди, деб ўйлаётган чакалакзор ичкарисига киришга ботина олмаганди шу топгача.

Қарлос билан ҳамроҳлари ясситоғликка кўтариллиб, кескин шимол ёққа бурилдилар ва бу ердан тахминан ўн милча наридаги дарага қараб йўлга тушдилар; бироқ токи улар даштликни кесиб ўтиб борарканлар, орқада бирор таъқибчининг қораси ҳам кўринмади.

Дара машриққа қараб чўзилиб кетган ва Пекоснинг қуйи оқимига чиқиб борар эди. Бу ёғингарчилик палласидагина сув тўлиб оқадиган ўзан бўлиб, ҳозирда бутунлай, қуриб қолган эди. Туби майда шағал билан қопланган, унда изни деярли билиб бўлмасди: от тубқлари шағални нари-бери суларди холос, изқувар-синчи уқиб-аниқлаб оладиган бирон-бир аломату белги қолмасди.

Бу ерда эски изни янгисидан фарқлаб-ажратиб бўлмасди.

Карлос билан ҳамроҳлари дарага тушиб бордилар; улар қуриган ўзандан қуйига қараб беш-олти миль босдилар-да, дам олгани тўхтадилар. Нафасни ростлаш Карлосга буёғига қандай ҳаракат қилишни шерикларига айтиш учун керак эди; унинг эндиликда кейинги бирикки соат ичида обдан ўйлаб пишитилган, пухта режаси бор эди.

Шу пайтгача шерикларидан ҳеч кимнинг номи (унинг ўзидан ташқари) қорага чиқмаган ва у бундай бўлишни мутлақо истамасди ҳам. Бунинг унга фақат зарари тегиши мумкин эди. Дон Хуан билан Антонио чакалак зордан қораларини ҳам кўрсатмаган эдилар, қолганларнинг буталар орасидан бирров мўралаган қора-қизғини башараларини эса эхоналари чиқиб кетган аскарлар таний олмаганлар, албатта. Шунинг учун ҳам, мабодо дон Хуан ва унинг пеонлари ҳеч кимга сездирмай, имижимида уйга етиб олсалар, улар учун бари яхшилик билан тугаши мумкин. Бемалол қилса бўладиган гап бу: Ўз бўлугини йўлга шайлар экан, Карлос ниҳоятда эҳтиёткорлик билан иш тутган эди. Улар каллан саҳарлаб, одамлар маст уйқуда эканида йўлга чиққан ва уларни ҳеч ким кўрмаган эди. Қалъада содир бўлган воқеа ҳақидаги овозаю миш-мишлар тарқалган пайтда эса, ҳатто бизон овчисининг қайтганини ҳеч бир кимса билмасди. Унинг хачирларидаги юкларини тушираётганларини, хачирларни ҳозир пеонлардан бири унинг ранчосидан олисда ўтлатиб боқиб юрганини ҳеч зор кўрмаган эди. Хуллас калом, башарти аскарлар эртагача водийда кўринмай туришса, дон Хуан билан унинг пеонлари ҳеч кимда шубҳа уйғотмай кечаси уйга етиб олишга улгуришади. Ўз-ўзидан равшанки, Робладо эрталаб ўша ерда бўлади, ундан илгарироқ бўлиши даргумон. Аввало капитан уларнинг изларига тушса керак, бу йўл эса дон Хуаннинг уйдан деярли тескари томонга олиб боради. Робладонинг аскарлари бу йўлни ҳамма иланг-биланг тармоқ-шоҳобчаларини кўздан ўтказиб чиққунларича кам деганда бир кун кетади. Шунда ҳам, албатта, таъқибчилар Карлос билан одамлари дам олгандан кейин қаёққа қараб кетганларини барибир билолмайдилар, зеро унинг янги режаси ҳарқандай одамни ҳам чалғитиши турган гап.

Умуман шундай қарорга келинди: дон Хуан ўз пеонлари билан уйига қайтади; Карлоснинг пеонлари ҳам ринчогога жўнайдилар; улар уйнинг томини бошқатдан билдилар — ёнғиндан кейин шу юмушнинг ўзини бажарилса бас эди, зотан деворлари бут қолганди — ва гўё ҳеч нима бўлмаган, ҳеч нимани кўрмагандай, ўша ерда қоладилар. Хўжайинларининг қилмиши учун уларни жавобгар қилмаслар-ку, ахир!

Карлоснинг ўзи қаерда яшириниб юрганини билса бир-икки содиқ дўстидан бўлак ҳеч ким билмаслиги керак. У ўзига қўналға топа олади, албатта. Очиқ даштми, тоғдаги бирорта форми — унинг учун барибир, ўз уйида бир гап. У бошпанасиз ҳам амаллайди. Қандайдир қасру саройнинг олтин ҳалли шифтидан юлдузли осмон азизроқ унга.

Тагнослар — овзи бўш одамлардан эмаслар, устига-устак улар ўзларининг шахсий хавфсизликлари, эҳтимолки, ҳаётлари тишини-тишга қўйиб сир сақлашларига боғлиқ эканини билардилар.

Ахийри ҳаммаси келишиб олинди, бироқ Карлос ва унинг ҳамроҳлари то кун ботгунга қадарли шу ерда бўлдилар. Сўнг барчалари от ва хачирларига миниб, тагин ўзандан қуйига қараб жўнаб кетдилар.

Тахминан бир милча йўл босганларида тагнослардан бири қия ёнбағирдан кўтарила бориб дарадан чиқиб олди-да, даштдан жануб томонга қараб кетаверди. У Сан-Ильдефонсонинг чеккасига элтувчи сўқмоқдан водийга қайтиши лозим эди. Ўша ёлғизоёқ сўқмоққа қош қорайгандагина етиб бора олади, шубҳасизки, бирон кимсага йўлиқиб қолиши даргумон; ахир, теварак-атрофда «ёввойи» ҳиндулар изғиб юрибди-я!

Орадан пича ўтгач, иккинчи тагнос дарадан юқорига чиқиб, деярли ўша, биринчиси кетган томонга йўл солди. Кейин яна бири, ортидан тагин ва тагин йўл олаверишди... ва ниҳоят дарада фақат дон Хуан, Антонио билан Карлослар қолишди. Тагносларга бошқа-бошқа йўл билан уйга қайтишни буюрдилар, хийла идроклию топағонроқларига эга энг чалкаш сўқмоқлардан юришни тайинладилар. Қисқаси, қалъада уларнинг изига тушадиган аскар топиллиши маҳол эди.

Карлос билан икки ҳамроҳи дарани энг охирида тарк этиб, улар ҳам ўнгга бурилдилар ва Сан-Ильдефонсо водийсига нақ этагидан кириб бордилар. Бу пайтда бу-

тунлай, қоронғи тушиб бўлганди-ю, аммо учовлари ҳам йўлни яхши билишарди, шундай қилиб ярим кечаси чорвадор йигитнинг қўрғонига етиб келдилар.

Улар олдиниға тешкириб кўрмагунча уйға яқинлашишға жазм этмадилар. Аммо-лекин аён бўлишича ҳаммаёқ осойишта, аскарлар бу ерга ҳали келишмаган экан.

Карлос шоша-пиша онасни қучди, кундузи бўлган гапларни сўзлаб берди, дон Хуанга у-бу йўл-йўриқлар бериб, сакраб отиға минди-ю, улар билан хайрлашди.

Егулик заҳира ортилган хачирни ҳайдаганча уйға Антонио эргашди. Улар водийдан чиқиб, Льяно Эстакадо сари йўл олишди.

XXXIX БОБ

Эртаси кун шундоқ ҳам қатор кўз кўриб, қулоқ эшитмаган ғалати ҳодисалардан таҳликаға тушиб бевозталанган Сан-Ильдефонсо аҳлини ҳаяжонға келтирган воқеа рўй берди.

Чошгоҳға яқин, қотилни излашға жўнатилган (Карлосни эндиликда шундай атай бошлагандилар) уланлар шаҳар орқали қалъаға қайтишарди. Улар қотилнинг изини топиша олмабди-ю, лекин тоғ этакларида йирик жангари ҳиндулар бўлугиға тўқнаш келишибди. Орада қаттиқ олишув бўлибди, ҳиндулардан талайи ўлдирилибди, бироқ, одатдагидек, тирик қолганлари ўртоқларининг жасадларини олиб кетишға улгуришибди, мана шу сабабдан аскарлар уларнинг каллахомларисиз қайтишаётган экан. Лекиниға улар бундан кўра чандон бора қимматлироқ ўлжа — ўзлари ҳиндулар бандилигидан халос этган, асли Сан-Ильдефонсодан бўлмиш ёшгина қизни олиб келишаётган эмиш. Таъқибчиларнинг довурам бошлиғи капитан Робладонинг ўйлашича, бу бир неча кун бурун водийнинг энг чеккасидаги ранчодан ўғирлиб кетилган худди ўша қиз эмиш.

Капитан билан халос қилинган қиз ёнида турган бир неча киши майдонда қолишди, бошқалар қалъаға қайтишди.

Робладонинг айнан ана шу энг узун йўлни танлаши ва шаҳарда қолишида ўз режаю важлари бор эди. Даставвал у ўз измидаги қизни маҳаллий маъмурларға

топширмоқчи эди. Сўнгра эса, шаҳарликларнинг бари-
қизини олиб келганини кўриб қўйсин: қиз у кўрсатган беқи-
ё жасоратнинг жонли далил-исботи-ку, ахир. Ва ниҳоят,
бу унинг учун ўзи биладиган болохона-шийпон рўпараси-
дан савлат тўкиб ўтишига қулай фурсат эди.

Капитан ўзи кўзлаган учала ниятни амалга ошир-
ди-ю, аммо ҳаммасиям у истагандек бўлиб чиқмади. Ас-
кирлар етиб келганидан дарак бераётган карнай садо-
си тинмас, озод қилинган асира улар ўртасида кўзга
иққол ташланиб турар, капитан Робладонинг оти — ўт-
кир учли шпорлари ёрдамисиз эмас, албатта — ақлга
сигмас даражада гижинглаб ўйноқларди, аммо бари бе-
ҳуда эди: Каталина болохона шийпонига чиқмади бари
бир. Идора хизматчилари ва хизматкорлар орасида кў-
ринмади у, шу тариқа гердайган ғолиб шийпон олдидан
узоқлашганида чеҳрасидан тантанаворлик ифодаси
маъюсона умидсизлик-ла алмашинган эди.

Бир неча дақиқадан сўнг Капитул уйи қаршисида от-
дан тушиб, қизни алькальд билан шаҳарнинг бошқа оқ-
соқолларига топширди ўз қўли билан. Мазкур маросим
давомида тумтароқли нутқ сўзланиб, унда асирани ха-
лос этиш жараёнида содир бўлган баъзи ҳайратда қол-
дирадиган тафсилотлар келтирилди, унинг туғишганла-
рига ҳамдардлик билдирилди (улар кимки бўлмасин-
лар), пировардида эса нотик, бу бахти қаро жабрдийда
бир неча кун муқаддам ҳиндулар ўғирлаб кетган қиз
бўлса керак, деган тахминни айтди.

Буларнинг бари ўйлаганларидан ҳам зиёда, ҳийла
ҳақиқатнамо ҳамда ишонарли чиқди. Робладо ўз изми-
даги қизни алькальдга топширгач отга минди-ю, ҳай-
рату тасанно садолари остида йўлига равона бўлди; ша-
ҳар оқсоқоллари уни қичқириб айтилган ҳамду санолар,
иқли шаҳар — қарсақлару «viva» нидолари ила кузатиб
қолдилар.

— Илоё яратганнинг ўзи ёрлақасин сизни, капитан! —
деган сўзлар қулоғига чалинди у оломон орасидан чи-
қиб олганида.

Синчков кузатувчи айни шу сонияда Робладонинг
кўзлари бурчидан йилт этиб ўтган антиқа ифода — ис-
техзою шу билан бирга ғоятда кисталангига олган кул-
ги аломатини илғаган бўларди. Чиндан ҳам довюрак ка-
питан ҳайратга тушган оломоннинг бетига қараб туриб
қаҳқаҳлаб юборишига бир баҳя қолганди. У мазкур ҳа-

зилнинг ҳузуру лаззатини комендант билан баҳам кўришни хоҳлаётгани учунгина ўзини тийиб тургани — ҳозир айнан ўша зотнинг қошига ошиқаётган эди.

Аmmo биз асира ёнига қайтамыз.

Атрофни ўраб олган оломон ўз қизиқсиниш истагини қондириш иштиёқида. Шуниси, қизиқки, худди ана шу истак-иштиёқ баридан ҳам устун эди-да, шу тобда. Ачиниш, шафқат деярли сезилмайди, ҳолбуки бундай пайтларда раҳм-шафқат кутилади аслида. Бармоқ билан сарнали кишиларгина: «Бечора-е!» — деб қўйишди, ана шу озроққина ачинганлар ҳам — аксари қизғиш танли маҳаллий аёллар эди:

Башанг кийинган дукондорлар — испаниялик кўчманчи ва креоллар, эркаклару аёллар — қизга бепарво-лоқайд ёки бировнинг бошига тушган кулфатни кўришга ишқибоз бекорчихўжалар янглиғ қизиқсиниб қарашаётган эди.

Бировнинг бошига тушган кулфат, у тортаётган азоб изтиробга лоқайду бепарво қараш Янги Мексика аҳолисига — ашиқроғи бу ўлканинг аёлларига — хос нарс эмасди асло, зотан бу юртнинг эркаклари бағритош бўлсалар ҳамки, аёллари раҳмдил ва куюнчакдирлар.

Шу боисдан ҳам уларнинг ўзларини шундай тутаётганлари галати кўриниши мумкин-у, лекин ушбу ҳолда бунинг асоси бор эди. Улар асираликдан озод этилган қизнинг кимлигини, бизон овчисининг синглиси — ҳа-ҳа, қотил Карлоснинг синглиси эканини билар эдилар-да! Улар вужудидаги энг яхши туйғуларни бўғиб турган нарсаси худди ана шу эди.

Карлос умумжамоатнинг қаҳру ғазабини қўзғатганди. Маҳаллий аҳоли уни ёвуз ситамгар, қароқчи, нонкўр деб атарди. Қандай аблаҳ-а! Бу атрофларда барча яхши кўрадиган ёқимтой лейтенантни ўлдирибди-я! Нима мажбур қилди экан уни бунга? Балки арзимаган нарсадан жанжал чиққандир ёки рашкдандир. Дарҳақиқат, бунга уни нима ундаганийкин? Бу оқ-малласоч шаккок, бу иблиснинг қонга ташналикдан бошқа қанақанги важи бўлиши мумкин? Вой нонкўр муттаҳам-а! Довюрак комендантнинг, яна-тагин бу қотилнинг синглисини ёввойи ҳиндулар қўлидан қутқариш учун бор кучи, меҳнатини аямаган комендантнинг жонига қасд қилибди-я!

Мана ниҳоят комендант муродига етди ҳам. Қаранг-а: мана, қиз шу ерда, уйига қайтди у, комендантнинг ша-

рофати билан тирик ҳамда зиён-заҳмат етмади унга. Уз капитани билан аскарларни қизни — оз бўлмаса уни жонидан жудо қилаёзган одамнинг синглисини излаб топгани жунатган комендант эмасми, ахир. Иблис! Қотил! Қароқчи! Хулласи, жамоат уни дорда кўрса хурсанд бўлгудек эди. Художўй католик ҳеч қачон бундай қилмаган бўларди, бу фақат гуноҳкор, шаккок, қонхўр америкаликнинггина қўлидан келади! Қўлга тушсин, қилмишига яраша жазосини олади!

Асоратдаги ҳиндулар — қашшоқ қуллар билан бир неча креоллардан ташқари, водий аҳлини ана шундай ҳистуйғулар ҳаяжону таҳликага солаётган эди. Айтмоқчи, бу қуллар ва креоллар ҳам, испан ҳукмронлигини бутун вужудлари билан ёмон кўришлари ва исёнкор кайфиятлари зўр бўлишига қарамай, Кароснинг қилмишини маъқулламаётган эдилар.

Умумжамоат бизон овчисига нисбатан мана шундай муносабатда экан, бахти қаро қиз, унинг синглисига кўлдаям ачинмаётганларининг сира ҳайрон бўладиган жойи йўқ эди.

Халос этилган қиз унинг синглиси эканига ҳеч ким шубҳа қилмасди (аслида эса уларни майдондагилардан жуда камчилиги танир эди). Ҳозирда номи тилларга тушиб, машҳури жаҳон бўлган акасини авлиё Иоанн байрамигача шаҳарликлар деярли билишмасди. У шаҳарда аҳён-аҳёнда бир бўлар, синглиси эса ундан ҳам кам, шу боисдан бу ерда илгари шу тобда майдонда ҳозир бўлганлардан камдан-кам кўрганди. Лекин ака-сингил шубҳасиз бир-бировига ўхшарди. Бунақанги ажойиб олтин сочини, сутга чайилгандек оппоқ тана, қирмизи ёноқларни Шимолий Мексикада (дунёнинг бирон бўлак қисмида ҳеч кимни заррача ҳайрон қолдирмаса-да) аҳён-аҳёнда учратасан. Девортошларга ёпиштириб ташланган эълонларда эса «қотил»нинг баайни ана шу белгилари тасвирланган эди. Шубҳасизки, бу ўшанинг синглиси. Устига-устак, Роситани байрам куни—унинг ҳусни-жамоли нафақат ҳайратга солган, шунингдек ҳасад уйғотган куни кўрганлар ҳам бор эди бу ерда.

Росита ҳамшагидек чиройли эди, фақат ёноқларининг қирмизи туси пича сўнган, кўзлари, нигоҳида аллақандай ёввойинамо ифода пайдо бўлган эди. Ўзига қаратилган саволларга у ё мутлақо жавоб қайтармас, ё тушуниб бўлмайдиган қилиб гудраниб қўя қоларди. У

жимгина ўлтирарди; аҳён-аҳёнда оғзидан узуқ-юлуқ, қовушмаган ғалати сўзлар чиқиб кетарди; у бир неча марта «хиндулар» ва «ёввойилар» деган сўзларни так-рорлади.

— Ақлдан озибди у,— дейишарди одамлар бир-бирларига.— Назарида, ҳалиям ёввойилар қўлидаман, деб ўйлаяпти-ёв.

Эҳтимол, чиндан ҳам шундайдир. Ахир атрофида қуршаб турганлар дўстлари эмасди-да.

Алькальд жамоатдан ораларида қизни ишониб топширса бўладиган туғишганлари ёки танишлари бор-йўқлигини суриштирди.

Оломон орасидан бу ерда ҳозиргина пайдо бўлган оддийгина қиз олдинга чиқди: у шўрлик қизни танир экан; уни авайлаб уйига элтиб қўйишни ўз зиммасига олди.

Бу қизнинг ёнида ҳинду — аниқроғи метис аёл ҳам бўлиб, афтидан, унинг онаси эди. Бандиликдан озод қилинган асирани ана шулар олиб кетишди. Ҳадемай ҳамма уй-уйига тарқади ва ўзининг кундалик иши билан андармон бўлди.

Росита ва унинг ҳамроҳлари камбағаллар истиқомат қиладиган даҳадан ўтадиган торкўчага бурилдилар, торкўчани ортда қолдириб, шаҳар чеккасига чиқиб қолдилар. Кейин бутазор оралаб кетган овлоқ сўқмоқдан бир неча юз ярд юриб, чоққина хароб ранчо ёнига етиб бордилар ва ўша ерга кириб ғойиб бўлдилар. Бир неча дақиқадан сўнг эса ранчо эшиги олдига қўшқўкиз қўшилган арава келиб тўхтади, уни пеон ҳайдаб келган эди.

Бояги қиз Роситани қўлидан етаклаб чиқди-да, икковлари аравага ўлтиришди.

Улар арава тўбига тўшалган пичан устига жойлашиши билан пеон ҳўкизларга қамчи босди. Бутазордан чиққач, арава водий этагидаги охириги фермаларга элтувчи катта йўлдан кета бошлади.

Қиз Роситага ачиниб, тикиларди; силкинишда иложи борица камроқ қийналсин учун унинг қулайроқ жойлашиб олишига ёрдамлашди; мулойим, эркалатувчи сўзлар билан унга таскину тасалли берарди-ю, бироқ дугона ёки эски танишдек тутмасди ўзини. Бу қизнинг илгари Роситани сира кўрмагани кундай равшан эди.

Улар йўлнинг шаҳардан тахминан бир милча олисдаги энг хилват еридан ўтиб боришаётганда, орқа томонда

отини елдириб келаётган сувори кўринди. Бир неча дақиқа ичида уларга етиб ҳам олди. Суворининг остидаги ижойиб мустанг гижинглаб ўйноқларди: отни авайлаб-асрашлари ва парвариши зўрлиги яққол кўзга ташланиб турарди — у шўх ва ўйноқи, биқинию сағриси ялтиллари.

Сувори арава ёнига етиб келиб, пеонга тўхташни буюрди; мулойиму ёқимли овози ўша ондаёқ суворининг аёл эканини фош этди-қўйди, латифу нафис ёноқлари, ипакдек майин сочларию хушбичим чеҳраси унинг ҳақиқий сеньорита эканининг шаҳодати эди. Узоқдан уни эркакка ўхшатишни ажабланарли жойи йўқ эди: кифтига оддий серапе ташлаб олган, сомбреросининг кенгбар соябони қоп-қора, ялтироқ сочларини деярли буткул яшириб турар, кейин эгарда ҳам, худди моҳир мексика чавандози янглиғ, эркакчасига ўлтирар эди.

— Сизмисиз бу, сеньорита?— ажабланиб, аини дамда эҳтиромла деди аравадаги қиз.

— Нима, танимадингми мени, Хосефа?

— Йўқ, сеньорита. Шўргинам қурсин-а мени! Манавинақанги ясаниб олганингиздан кейин қандай қилиб таниб бўларди сизни?

— Қандай ясаниб олибман? Оддий кийим-да бир!

— Албаттаку-я, сеньорита, лекин сиздай баобру хонимнинг кийими эмас-да!

— Ҳа, чамаси, мени бу кийимда таниб бўлмас экан. Йўлда бир нечта танишларни учратдим, улар менга салом бериб, кўришишмади.— Сувори кулиб юборди.— Бечорагина-я!..— сўзлашда давом этди у қўққисдан сўз оҳангини ўзгартиб ва Хосефанинг ҳамроҳига ачиниб қараганча.— Қанча уқубат тортибди-я! Шўрликкина қизча-я! Менга тўғрисиини айтишган бўлмасайди деб қўрқаман. Ё Биби Марям! Қанчалик ўхшайди-я!..

Сеньоританинг сўзи оғзида қолди. Хосефа билан пеон борлигини унутиб, хаёлидаги гапларни овоз чиқариб айтиб юборганди у. Охирги сўзлари оғзидан беихтиёр чиқиб кетган эди.

Бирдан хатосини пайқаб қолиб, икковига синовчан назар ташлади у. Пеон ҳўкизлари билан овоза эди-ю, қизнинг юзида қизиқсиниш ифодаси балқиб турарди.

— Кимга ўхшаркан, сеньорита?— деб сўради у соддадиллик билан.

— Бир танишимга. Бунинг аҳамияти йўқ, Хосефа.—

Сеньорита бармоғини лабига босиб, пеон томонга маънодор қараб қўйди.

Унинг сирини билган ва ўша таниш ким эканини фаҳмлаган Хосефа индамай қўя қолди.

Сеньорита аравага Хосефа ўлтирган томондан яқинлашди-да, унга энгашиб, пичирлади:

— Эрталабгача ўша ерда қолавер, барибир қош қораймай, ёруғда етиб келолмайсан. Қолақол — эҳтимол бирои нимани эшитарсан. Эртароқ қайт, лекин уйга эмас, ибодатхонага, тонгги ибодатга етиб кел. Яна кечикмагин-а. Мен ибодатхонада бўламан. Антониони кўришга ҳаракат қил. Унга манавини бериб қўй.— Сеньоританинг бармоқларида тилла узукнинг олмос кўзи ярақлаб кетди-ю, ўша ондаёқ уни Хосефа маҳкам қисимлаб олди.— Унга кимга беришини айтгин-у, ким бериб юборганини билиши эса шарт эмас. Манави пул харажат қилишингга, озроққинасини бунга берарман. Йўқ, агар олишга кўнса, онасига берганинг маъқул.

Хосефанинг тиззасига дўп этиб ҳамён тушди.

— Бирон нимани билиб кел. Албатта билиб кел, жон Хосефа!.. Кўришгунча хайр! Хайр!

Сўнгги сўзларни сеньорита шоша-пиша айтди; ялтиллаб турган мустангини буриб, яна шаҳарга қараб йўртириб кетди у.

У Хосефанинг ўзи тайинлаганидек эрталабгача ўша ёқда қолишига шубҳа қилмаса ҳам бўлади — қиз ушбу сафардан сеньоритадан кам манфаатдор эмас.

Кўҳликкина Хосефа метис Антонионинг қаллиғи эди, шу боисдан йигитни кўришга муваффақ бўладими ё йўқми, уйга шошилмоқчи эмасди. Агар уни кўрса ранчога қолиши қиз учун янаям кўнгиллироқ бўлади; борди-ю кўролмаса, висол умид-иштиёқида тутилиб қолади барибир.

Оддий арава дабдурустан рессорли ва бахмал тўшама-ёстиқли қулинг ўргилсин извошга айланиб қолгандек туюлди.— Хосефа умрида кўрмаган бўлса ҳам, шунақанги аравалар борлигини эшитганди: қўлида жамики харажатига олтидан бир улуши ҳам етиб ортадиган тангага лиқ тўла ҳамён турибди, олдинда эса уни Антонио билан висол онлари кутяпти-да, ахир!

Қўнгли бўш қиз хас-хашакни тушириб ташлаб, Роситанинг бошини тиззасига қўйди, кечки салқинда совқотмасин учун ўзининг шолрўмолини ёпиб, ўради-да,

неонга қўзғалишни буюрди. Пеон ҳўкизларни бақириб чўҳ-чўҳлаб, таёғи билан ниқтади-ю, улар аравани тупроқ йўлдан яна торта кетди.

XL БОБ

Эрталабки ибодатга қатнаш мексикалик сеньорлар, йиқиқсанги каттаю кичик шаҳарларда истиқомат қилувчи сеньорлар орасида кенг тарқалган таомил эди. Тонг оқариши биланоқ улар ўз уйларининг кенгбар эшигу дарвозаларидан чиқиб, шаҳар кўчалари бўйлаб қўнғироқлари қулоқни қоматга келтираётган черковга ошиқадилар. Сеньорлар шунақанги ўраниб-чирманиб олишадими (бадавлатлари — шойи шарфлари елкапўшларга, камбағалроқлари эса қоп-қора шолрўмолларга), уларни асти таниб бўлмайди. Ҳар қайсилари ёпинчиғи остида муқовали китобча — дуономасини ушлаб олган.

Қани, уларга эргашиб ибодатхонага кириб кўрайлик-чи, у ерда нималар бўлаётган экан.

Борди-ю, сиз ибодат бошланишига кеч қолиб, ичкари киргач, эшик олдида туриб қолсангиз, юзлаб тиз чўккан кишиларни, аниқроғи, уларнинг куракларини кўрасиз.

Айнан бир хил чеҳра-юз бўлмаганидек, бу кифтлар ҳам мутлақо бир қолипда эмас. Уларнинг шакли-тарҳи, ҳажмию туси ҳамда жамоат орасида тутган мавқеи ниҳоятда турличадир. Сиз бу ерда сеньорларнинг елкапўшли кифтларини кўрасиз; баъзилар бошларигача бурканиб олган бир пайтда бир хил бундай ораста либосни елкаларидан сирғалиб тушишига йўл қўйиб берганлар — мана сизга икки турли услуб. Бунда яна шолрўмоли учларини назокат-ла кифтлари оша орқага ташлаб қўйган кўҳлик-кўҳлик оддий қиз-жувонларнинг кифтларию уларнинг шолрўмолга назокату латофатга заррача даъво этмовчи, эҳтимол, ҳаттоки унчалик озода ҳам бўлмаган шолрўмолга ўралиб олган оналарининг куракларига кўзингиз тушади. Сиз калта каноп мато камзули аранг ёпиб турган дўкончи кифтини, унинг кун камзулли сув ташувчи — мешкобчининг курагини, сиқимласа бир сиқим бўладиган майин мовут ридосига ўралиб олган олифтанин кифтини, шаҳарлик камбағал йигитнинг йиртиқ-ямоқ серапесини кўрасиз. Қаршингизда кенгу тор, тiku букчайганроқ кифту елкалар намоян

бўлади; бир-иккита букрини (айниқса катта шаҳар ибодатхонасида) кўришингиз ҳам эҳтимолдан холи эмас. Илло ибодат пайтида қайси бир Мексика ибодатхонасига кирманг, мен сизга ваъда қиламанким, анвойи турелкаю куракларни кўрасиз. Аммо-лекин уларни бироқ бир тартибда жойлашади деб умид қила кўрманг асло. Елкапушли сеньораларнинг кифтчасини икки дағал унниқиб тузи чиқиб кетган шолрўмол исканжасида, йўл-йўл ёхуд хол-хол гулли серапе кийган қашшоқнинг курагини эса бирор олифтанинг антиқа мовут ридоси қава-тида кўришингиз ҳеч гап эмас. Бу кифту елкаларнинг барини жойлаштириш масъулиятини ўз зиммамга олмайман-у, лекин уларнинг талайини ҳамда турли-туманини кўрсатишга сўз бераман, холос.

Сизга боқиб турадиган яккаю ягона юз — бу жуббага ўранган тикмачоқдек руҳонийнинг қиртишланган башараси бўлади. Қачонлардир бу башара, шубҳасиз оппоқ ва озода бўлган, бироқ ҳозир унинг туси гўё ифлос ич кийим солинадиган саватга ташланган ва қандайдир англашилмовчилик билан ювмай қайтариб берилган кир буюмга ўхшаб кетган. Қавмлари орасидаги энг ашаддий гуноҳкор банда қанчалик художўйга ўхшаса, тақсирлари ҳам шунчалик тақводорга ўхшайдилар. Мана у қўлида гоҳ асо, гоҳ исириқ тутаб турган бухурдон тутганча пастак супачада нари бориб-бери келяпти, энди бўлса, ана, қўғирчоқни — авлиё ҳайкалчасини олди қўлга. Шунда қулоғингизга томоша давомида у гўлдираётган тушуниб бўлмас, ёқимсиз лотинча сўзлар чалинади. Бундай онларда сиз — башарти томоша қилиш бахтига мушарраф бўлган эсангиз — мистер Робиннинг ижроси ёки «Улуғ афсунгар» пьесаси ёдингизга келиши бешак.

Ҳеч қанча вақт ўтмай мазкур кифту елкаларнинг ҳолатини ҳайратомуз тарзда ўзгартириб юборувчи қўнғироқча овозини эшитасиз. Бир муддат уларни ғаройибу ғалати ҳолатда — елкаларга хос типпа-тик эмас, балки эгикроқ ҳамда сал ёнга оғганроқ ҳолатда кўрасиз. Токи улар нафас ростлар эканлар, юзлари ҳам кўриниб қолиши эҳтимоли йўқ эмас, аммо ён томондангина кўринади, холос: борди-ю, у чиройли бўлса, у чоғда сизни елкаю куракларни унутишга мажбур этиши тайин. Дарвоқе, у чоғда қаршингизда кифту елкалар эмас, биқини, ёнбош намоён бўлади. Балки ён томондан кўришини сизни асти художўйлигу тақводорона ифодаси билан

эмас, гўзаллиги ила мафтун этар. Сиз шунда карашмалию муғомбирона тикилаётган хумор кўзларни кўрасиз, борди-ю, синчковроқ бўлсангиз, унда бўлак ёнбош, мазкур карашмали, қувлик-ла тикилувчи кўзлар қараб-қараб қўяётган нишонни — бичими хийла дағалроқ гавдани илғайсиз. Ушбу ҳол кифту елкалар пича ҳордиқ олаётиб бўшашиброқ тушган дақиқаларда содир бўлади. Уларнинг қандай қилиб бундай ҳолатга кира олишлари сиз учун жумбоқ, анатомик муаммодек туюлади, ислида эса жуда осон бу. Бунинг ҳадисини олган одам учун қийин жойи йўқ: тана оғирлиги таянч нуқтасини тиззадан тос-корсонга кўчирилса бас. Ажабланаётганингизни фаҳмлаш мушкул эмас, зеро ридою елкапўшлар, шарфу шолрўмоллар ва юбкалар ила ниқобланган мазкур ҳийлагарлик бағоят усталик билан адо этилади.

Мана, қўнғироқча ҳам жиринглаб қолди — курагу елкалар яна ростланди. Ҳозир бўлган ибодатчилар учун қўнғироқча овози аскарларга берилгувчи «ғоз турилсин» буйруғидек гап. Қўнғироқча жиринглагани ҳаманоқ курагу кифтлар ростланиб, ўша ондаёқ бир неча дюмга ўсади. Руҳоний тақсирлари ғўнғирлаб яна бир карра Биби Марям шаънига муножот қилиб, «Отче наш»ни ўқиркан, тағин бир унсиз саҳнавий томошани ижро этади, бу аснода эса елкаю кураклар қимир этмай, тек қотганча туради. Ана шу пайт улар бирдан яна боягидек энсизлашади-ю, ёнламасига бурилади, эгалари бош силкишар, шўхчану нозли нигоҳлар учрашади, то қўнғироқча жингиллагунча давом этади бу ҳол. Қўнғироқча жиринглагач эса руҳоний тақсирлари томошанинг учинчи даврасини бошлайди, кейин тўртинчиси ва ҳоказо — токи ибодат интиҳосига етгунига қадар давом этаверади бу.

Мексика ибодатхонасида ҳар куни саҳарда, нонушталикдан хийла олдинроқ, ана шундай тиз чўкиш ва ғўлдираб дуо ўқиш такрорланади. Эркаклар ҳам, аёллар ҳам (аслида заифалар орасида художўй намояндалар анча-мунча бисёрроқ) шу билан машғуллар ва ашаддий тақводор аёллар орасида маҳаллий олий табақадан таллай сеньорлар ҳам бор.

Бу одамларнинг барини каллан саҳарлаб тўшакларини тарк этиб, кўчада совуқдан қалтираб, черковда совқотишга нима мажбур қиларди? Нима ўзи бу — эътиқодми ёки ҳурфот? Диёнату тақводорликми ё риёкор-

лик? Шубҳасизки, ушбу ақли ноқислардан аксарияти чиндан ҳам, буларнинг бари яратганга манзиру матлуб тушади, унинг иродаси шу, деб ишонади: улар беихтиёр тиз чўкиб, дуоларни такрорлайдилар, бунинг эвазига эса ҳаллоқи оламнинг марҳаматига мушарраф бўладилар. Аммо эрталабки ибодатни канда қилмайдиган художўйлар орасида, турган гапки, мутлақо бўлак нияту ташвишда келадиганлар ҳам кўп. Эркаклари рашкчи, аёллари айниқсанги уддабуруну ҳийлагар мамлакатда ушбу саҳар палласи — олтиндан қимматроқ палла эди. Сабабки, ашаддий рашкчию қўриқчилардан ҳам камданкам бундай совуқ паллада иссиқ ўрнидан туришга жазм этади-да, ахир.

Мазкур маросимнинг тугашини ибодатхона эшиги олдида кутиб туринг. У ерда каттакон жомда муқаддас сув қўйилган. Ибодатхонадан чиқаётган ҳар бир кимса қўлини ана шу жомга ботириб, ўзига сув сепади. Мана узуклар қадалган нозик қўлча, бармоқлари учини сувга тиқаркан, ўша ондаёқ эпчиллик билан ридо ёпинган хушторига ишқий мактуб тутқазди. Яна сиз бадавлат бир хонимнинг ибодатхонага келган йўлининг тамоман тескарисига қараб кетаётганини кўришингиз ҳам ҳеч гап эмас. Хўш дегандан, мабодо сиз расму таомилни писанд қилмай, унинг кетидан боришга қизиққундек бўлсангиз, у чоғда бирор хилват торкўча ёки бирорта теракзордаги мамну¹ учрашувнинг шоҳиди бўлишингиз мумкин.

Ҳа, Мексика шаҳарларида субҳидам нақ тун каби саргузаштларга бойдир.

* * *

Сан-Ильдефонсо ибодатхонаси қўнғироғи эрталабки ибодатга чорлаб бонг ура бошлаши биланоқ шаҳардаги энг ҳашаматлию энг бадавлат хонадонлардан бирининг дарвозасидан аёл киши лип этиб чиқиб кетди. Тонг хиёлгина оқаринқираганди; аёл бошидан-товонига қадар ўралиб-чирманиб олганди, лекин унинг баланд, келишган қомати, қадди-бастини тик тутиши ҳамда латофатли, мағрурона, беданадек енгил одим-ла хиром этиши унинг кибор хонимлардан эканини фош этиб турар эди. Ибодатхонага яқинлашгач, у тўхтаб, атрофга алаанглади.

¹ М а м н у — тақиқланган (ред.).

Хийла пастга тушириб қўйилган мантильяси — тўр рўмол — қатлари юзини тўсиб турарди-ю, бироқ қандай тургани, бошини гоҳ уннга, гоҳ сўлга қандай бураётганидан унинг ғира-шира саҳар палласида бамисоли шарпадек яқинлаб келаётган художўйларга синчиклаб тикилаётгани яққол сезилиб турарди. У шубҳасиз, кимнидир кутаётгани, майдонда пайдо бўлаётган ҳар бир одамга бетоқатлик ила тикилиб қараётганидан кутаётган кишиси ўзи учун жуда-жуда зарур эди чоғи.

Ниҳоят ибодатхонага охирги художўй эркак яқинлаб келаверди. Ортиқ кўчада тураверишдан маъно йўқ эди. Сеньорита ошкорасига ноумидлик-ла пештоқ остидан ўтиб, эшик ортида ғойиб бўлди. Орадан бирон сония ўтар-ўтмас у меҳроб қаршисида тиз чўккан кўйи илтижо қилиб, тасбеҳ ўғирай эди.

Илло ибодатхонага кириб борган художўй у эмасди; орадан кўп ўтмай яна бир қавмдош аёл кўзга чалинди. Сеньорита ибодатхонага кириб кетиб бўлган пайтда майдоннинг нариги четидан бир арава чиқиб келди-ю, ўша ерда тўхтади. Аравадан ёшгина қиз сакраб тушди; у майдонни чопқиллаганча босиб ўтди-да, пиллапояга кўтарилди. Янги келган қизнинг эғнида эса тўқ-қизил юбка, гул чекилган кофта билан шолрўмол — бу ўлкаларда камбағаллар, оддий халқ шундай кийнади. У оддий деҳқон қизи эди.

У ибодатхонага кириб борди, лекин тиз чўкишдан бурун саф-саф елка-куракларни диққат-ла кўздан кечириб чиқди. Улардан бири, тўр рўмол ёнинганида тўхтади нигоҳи. Қиз биз ҳозиргина тилга олган сеньоритани таниди. Шунда қизнинг кўнгли хотиржам торти чама-си; елкаю куракларни оралаб ўтди, сеньоритага шунчалик яқин тиз чўкдики, икковларининг тирсаклари деярли тегиб турарди бир-бирига.

Қиз бу ишларни мутлақо шарпа чиқармай бажарганидан сеньорита ёнидаги янги ҳамсоясини пайқамай ҳам қолди, фақат тирсагига астагина теккан туртки уни бошини кўтариб, ўгирилиб қарашга мажбур этди. Унинг чехраси қувончдан ёришиб кетди, аммо лаблари гўё ҳеч нима бўлмагандек пичирлаб дуо ўқишда давом этаверди.

Мана, бир оз нафасни ростлаб олишга изн берилганидан далолат этгувчи қўнғироқча жиринглади, шунда тиз чўккан икки қомат — сеньорита билан авом қизи —

бир-бировлари сари оғди; ана, қўллари яқинлашди. Бирон лаҳза ўтмаёқ шолрўмол остидан жажжигина долчинранг қўлча кўринди, тўр рўмол остидан эса узуклар тақилғиқ нозик, оппоқ бармоқлар чиқиб келди.

Бамисли илгаритдан тил бириктиргандек, қўлчалар ўзаро тақалди, гарчи бу ҳолат ярим лаҳзага бориб-бормаган бўлса-да, ўта сезгир кузатувчигина бир қўлдан-иккинчисига — долчинранг бармоқлардан оппоғига — пайча қилиб ўралган қоғоз парчаси «лип» этиб ўтганини пайқашни мумкин эди, холос. Аммо-лекин, ҳақиқатан ҳам мазкур эпчилона ҳаракатни ниҳоятда кўзи ўткир кузатувчигина пайқай оларди — бу шундай чаққонлик билан адо этилган эдиким, олдинда ёхуд орқада тиз чўкканлардан бирортаси ҳеч қанақанги ноҳўя ҳаракатни пайқагани йўқ.

Ҳар иккала қўл ўша заҳотиёқ елкапўш остида ғойиб бўлди: қўнғироқча жиринглади, сеньорита билан деҳқон қизи тагини қадларини ростлашди-ю, бағоят тақводорона қиёфада дуо сўзларини такрорлашга тушишди.

Мана, ибодат тугади. Қизлар ўзларига муқаддас сувдан сепиб, шоша-пиша пичирлашиб олишди; бироқ ибодатхонадан бошқа-бошқа чиқиб, икки ёққа қараб кетишди. Деҳқон қизи майдонни тезгина кесиб ўтди-ю, торкўчага кириб кетди. Сеньорита мағрурона хиром-ла ўз уйи томон юрди; унинг юзи қувончдан чарақлаб ёришиб кетган эди.

У ҳовлисига кира солиб ўз хонасига ошиқди. Чоққина қоғоз парчасини ёзиб, ўқий бошлади:

«Азизам Каталина! Сиз мени бахтиёр этдингиз. Атиги бир соатгина муқаддам мен оламдаги энг бахти қаро одам эдим. Синглимдан жудо бўлган ва Сизнинг ҳурмат-эътиборингиздан маҳрум бўлдим деган ўйда эдим. Мана энди унисига ҳам, бунисига ҳам эгаман қайтатдан. Синглим ёнимда, бармоғимда кўзни қамаштиргудек ярқираб турган қимматбаҳо тош ҳаттоки ғийбату бўҳтонлар ҳам мени Сизнинг дўстлигингиз, Сизнинг муҳаббатингиздан жудо эта олмаганини айтиб турибди. Сиз мени қотил деб ҳисобламайсиз. Ҳа, мен қотил эмасман, мен — қасоскорман. Сиз буларни барини билиб оласиз. Мен ва менинг қон-қардошларим қурбони бўлганимиз, даҳшатли фитнадан хабар топасиз. Ушбу фитналар шунчалар шафқатсиз, ваҳшиёна-ки, бундай бўлишини сира ақл бовар қилмайди. Ҳа, мен қурбони бўлдим бу гараз-

ли фитнанинг. Мен ортиқ Сан-Ильдефонсода кўзга кўри-
на олмайман. Эндиликда мени худди бўридай таъқиб
этадилар, борди-ю, қўлга туширгудай бўлсалар, нақ бў-
ридай жаззамни берадилар. Локин эндиликда, Сизнинг
менинг рақибларим томонида эмаслигингизни билганим-
дан кейин, жаҳонда ҳеч нимадан қўрқмайман.

Агарда Сиз бўлмаганингизда бу ерлардан олисларга
жўнардим. Бироқ, Сиздан ажралишга мажолим етмайди.
Сиз яшаб турган жойни ташлаб кетгандан кўра ҳаётим-
ни соат сайин хавф остида қолдиришни маъқул кўра-
ман — ёруғ жаҳонда Сиз ҳаммадан кўра қимматлию
азизроқсиз, ахир!

Бериб юборган узугингизни неча-неча бор бўсалар-
га кўмиб юбормадим асти! Бу муҳаббат кафолотини
мендан жонимни қўшиб тортиб олишларигина мумкин.

Ғанимларим ортимдан исковучдек қувиб юришибди,
аммо қўрқмайман улардан. Вафодор тулпорим ҳаминша
бирга мен билан, у бор экач, мен қуёнюрак таъқибчи-
ларимни мазах қилиб, устларидан кулавераман. Бироқ,
мен қандай бўлмасин яна бир марта шаҳарга тушишим
шарт. Сизни кўришим керак, азизам. Сизга қоғоз орқа-
ли етказиб бўлмайдиган гапни айтишим даркор. Утин-
чимни рад этманг! Мен Сиз билан кўришгани эртага
ярим тунда эски жойимизга бораман. Йўқ демассиз-а,
азизам, севгилим! Сизга жуда муҳим, талай гапларни
айтишим керак, бу гапларни ўз оғзим билан танҳо ўзин-
гизга айта оламан, холос. Менинг қотил эмаслигимни,
илгаригидек севгингизга муносиб қолганимни кўрасиз.

Раҳмат! Бечора жажжи синглимга кўрсатган сахова-
тингиз, меҳрибончилигингиз учун ташаккур Сизга! Худо
хоҳласа, яқин орада тузалиб қолади у. Кўришгунча
хайр, севгилим! К.»

Сулув Каталина хатни ўқиб бўлгач, уни лабига бо-
сиб, бостириб-бостириб ўпди.

— Муҳаббатимга муносиб у! — пичирлади қиз. — Ҳа,
у маликалар муҳаббатига муносиб! Мард, ҳимматли
Карлос!

Қиз қоғозни яна ўпди-да, сийнасига яшириб, зипил-
лаганча хонадан чиқиб кетди.

Х Л И Б О Б

Вискарранинг Карлосдан ўч олиш истаги соат сайин
ўсиб борарди. Ўлим даҳшатидан халос бўлганда вужу-

дини чулғаган қувонч кўпга бормади. Асира ташвишидан қутулгандаги хурсандчилигининг умри ҳам шунингдек қисқа бўлди. Уни мутлақо булак туйғу ич-этини кемираётган эди. У ўз ҳуснини ҳамма нарсадан кўра кўпроқ қадрларди — мана энди ўша ҳуснидан жудо бўлди. Бир умрга хунук-бедаво бўлиб қолди-я!

Ўз юзини кўзгуга солиб кўрганида юрагига ўт туташиб, бамисоли лаҳча чўғдек ланғиллаб кетди. Аслида қўрқоқ бўлса-да, ўша жойнинг ўзидаёқ ўзини бир ёқлик қилиб қўя қолмаганларига лак-лак бора афсуслар чекди.

У бир нечта тишидан айрилганди-ю, лекин ясама тиш қўйдириши мумкин эди, аммо чакагининг абжағи чиққанди. Уқ бир парча этини юлиб кетганди. Ўша жойи энди хунукдан-хунук чандиқ бўлиб қолади абадий.

Вискарранинг афти бедаво бўлиб қолганди. Миясида ғужғон ўйнаётган фикр-ўйлари хунугу даҳшатли эди. Бизон овчиси юзини қай аҳволга солиб қўйганига тикиларкан, баралла инграб юборди у. Қасос олишга аҳд қилди. Карлосни қўлга туширишсин-чи — қандай қийнашу қандоқ ўлдиришни ўзи билади! Ўлим унга, синг-лисию онасига ўлим!

Гоҳо-гоҳо Вискарра овчининг синглисини жунатиб юборганига ҳатто пушаймон еб қўярди. Оқибатидан нимага чўчиб ўтирибди-я? Нега энди уни ўлдириб ўчини олақолмади? У эндиликда қизни севмай қўйган, кўнгли совиган эди. Қизнинг заҳарханда кулгиси ҳанузгача унинг юрагини кемириб, мужимоқда эди. Унинг буткул азобу изтироблари — ҳаёти билангина бирга тугайдиган изтиробларининг боиси, кун битгунига қадар у қутула олмайдиган ғам-аламлар, таҳқирланишу хўрликларнинг сабабчиси ўша қиз! Нега энди ўлдириб юбормади уни? Бу акасидан олинган лаззатли қасос, чеккан уқубатлари эвазига олган энг аъло мукофоти бўларди-ку, ахир!

Ана шундай фикр-ўйлар ич-этини кемираётган Вискарра тўшагида тўлғанар, юраги зардобга тўлиб инграп ва маифурона, бўралаб сўкинар эди.

Карлосни албатта қўлга тушириш керак. У, Вискарра, бор кучи билан шунга эришишга ҳаракат қилади. Ушлаганда ҳам тирик қўлга олиш зарур. Жазосини беришга ошиқишнинг ҳожати йўқ. Карлос ўлимга маҳкум албатта, аммо дарров ўлдириб қўя қолиш керакмас. Йўқ, Вискарра дашти ёввойилардан ибрат олади. Қин-

дуларнинг қўлида бандилар қандай ўлим топса, бизон овчиси ҳам худди ўшандай ўлади: уни жазо устунига боғлаб, ёқиб юборишади. Вискарра бунга олт ичди.

Ана ундан кейин — онаси. Уни жодугар ҳисоблашди. Уни худди жодугардай жазолаш керак. Ана шунда у ёлғиз ўзи иш кўрмайди. Уни иезуит отахонлар қўллаб-қувватлашлари шаксиз. Улар бундайин мутассибона шафқатсизликни жон худо деб адо этадилар.

Карлоснинг синглиси ёруғ жаҳонда бир ўзи қолгач, ҳеч зоғ унинг тарафини олмайди. Қиз бутунлай унинг изми-ихтиёрига ўтади. У қизни истаган кўйига солади — унга ҳеч ким халал бермайди.. Унинг жисми-вужудида садо бераётган нарса муҳаббат эмас, интиқом истаги эди.

Мазкур жирканч аблаҳнинг миясида ана шундай иблисона ўй-хаёллар гужгон ўйнаётган эди.

Робладо ҳам бизон овчисининг ўлимига ундан кам ташна эмасди. Унинг иззат-нафсига ҳам худди ўшандай зарба етганди: у Каталинанинг ўша одамга жиддийи кўнгил берганига — эҳтимолки, уларнинг дилларини муштарак севги ришталари боғлаб аллақачоноқ тил бириктириб олишганига — заррача шубҳаси қолмаганди. Робладо қалъада фожиавий воқеа содир бўлганидан кейин бир марта қизни бориб кўрди. Шунда у қиз ўзини илгаригидан буткул бошқача тутаётганини пайқади. Эндиликда, «қотил» шунчалар шармандаи шармисор қилинган, капитан унинг устидан қозонилган зафар тантанаси нашидасини суриш умидида эди. Бироқ, Каталина бирон калима сўз ила Карлосни ҳимоя этмаган бўлсада — турган гапки, журъат этмади бунга — айни чоғда қарши томонни қувватлаб, бирон белги-аломат билан «қотил»нинг қилмишидан жаҳли чиққанини ҳам намоён этмади. Отасининг Карлос шаънига сахийлик-ла ёғдираётган ҳақоратларига қўшимча бўлган Робладонинг таҳқирли сифатлашу тавсифлари қиз дилига озор етказаетгандек туюлди. Шубҳасизки, журъат эта олганида қиз унинг ёнини олган бўларди.

Робладо эрта биланги зиёратида мана шуларнинг барини пайқаган эди.

Аmmo у қизнинг хатти-ҳаракати хусусида ўзининг хуфияси орқали хийла кўпроқ нарсани билиб олди. Каталинанинг оқсочларидан бири — Висенса негадир бекасини хушламай қолган, унга хиёнат йўлига ўтиб, бир-

мунча вақтдан буён ўз хуштори-ҳарбийлардан бирининг ҳамкору шеригига айланиб қолганди. Озроққина олтин, ёлгон-яшиқ ваъда, бунинг устига ошиқ аскар — бу Хосе эди — ана шулар эвазига Висенса Робладонинг итоаткор қуролига айланган-қўйган эди. У Хосе орқали Каталаниа ҳақидаги маълумотларни олиб турарди, қиз эса ҳеч қандай шубҳага бормасди ҳам. Гарчи ушбу айғоқчилик ишлари яқингинада йўлга қўйилган бўлса-да, аллақачоноқ самара келтира бошлаган эди. Робладо Каталанианинг уни кўрарга кўзи йўқлигини, бошқа бировни севишипи билиб олди. Уша биров ким — Висенса билмасди буни, аммо Робладо осонгина фаҳмлаб турарди ким эканлигини.

Шу боисдан ҳам унинг Карлос, бизон овчисининг ўлимини истаётганининг ҳеч бир ажабланидиган жойи йўқ эди. Ҳа, у йигитнинг ўлимига Вискаррадан кам ташна эмасди.

Ўз ниятларига етиш истагида ҳар иккалалари ҳам жонларини жабборга бериб ҳаракат қилишарди. Тўрт томонга излагани бўлук-бўлук аскар жўнатилди. Шаҳарнинг девор-тошларига — комендант билан капитан ижодининг маҳсули — Карлоснинг бошига мўмайгина мукофот ваъда қилинган эълонлар ёпиштириб ташланди; уни тиклай тутиб келтирилган одамга бундай ҳам кўнроқ пул ваъда қилган эдилар.

Маҳаллий жамоатчилик ҳам четда қўл қовуштириб турмади; ўзларининг холисона содиқликлари ҳамда ғайрат-шижоатлари исботи сифатида улар ҳам эълон битиб, унда Карлосни тутиш бахтига мушарраф бўлган кимсага катта маблағ, бутун бир бойлик беражакларини хабар қилгандилар. Мазкур эълонга шаҳарнинг жамики казо-казолари имзо чекишган, дон Амбросионинг исми шарифи биринчилар сафида савлат тўкиб турар эди. Жамоатчилик ҳатто аллақачоноқ шаккок қотилни ахтаришга киришган аскарларга мадад бериш ҳаракатига тушиб қолган — аниқроғи, уни қўлга олган кимсага ваъда қилинган катта пулга эга бўлиш дардидаги — талабгорлардан кўнгиллилар бўлугини тузиш тўғрисида ҳам гапира бошлаган эди.

Дарҳақиқат танг қоларли жумбоқ, боши шунчалик юқори баҳоланган экан, Карлоснинг умри кўпга бора олармикан-а?!

Робладо уйда ўлтирган жойида қочқинни қандай

қўлга тушириш устида бош қотирадди. У аллақачоноқ водий бўйлаб энг ишончли айғоқчию хуфияларини жўпатган, уларга туну кун аҳоли орасида ғивирсиб-ўралашиб юришни буюрган эди. Улар Карлоснинг қаерларда бўлиши ёхуд овчи илгарилари учрашиб юрган одамлар хусусида нимаики эшитса, барини зудлик билан хабар қилишлари лозим эди, бу хизматлари эвазига яхшигина ҳақ тўлаш ваъда қилинганди. Ёш чорвадор дон Хуаннинг уйини кузата бошладилар. Вискарра билан Робладо уни ўзгача бир усулда танобини тортиб қўйиш ниятида бўлсалар ҳам, йигитга ҳозирча тегмай туришга қарор бердилар — шунда режаларини амалга ошириш осонроқ бўлади. Ёлланган айғоқчилар аскарлардан эмас, балки шаҳар аҳлидан ҳамда қашшоқ чорвадорлардан эди; шаҳарнинг одатда ўзлари йўламайдиган қисмида ҳарбийларнинг пайдо бўлиши Вискарра билан Робладонинг ўйлаган режаларини барбод этиши мумкин эди. Бироқ, аскарлар ҳам шай туришарди-ю, илло қушчани чўчитиб юбормаслик ва ўз уясига қайтишига халал бермаслик учун бирмунча нарироқда пусиб ётишарди. Нимаям дердик, ушбу тадорикларнинг бари оқилона ҳамда мантиқан тўғри эди.

Хулласи, Робладо уйда Карлосни қандай илинтириш устида бош қотириб ўлтирарди. Шу пайт эшик тикиллаб, қандайдир қоғозларга тикилиб мулоҳаза юритаётган Робладонинг хаёлини бўлиб юборди. Бу қоғозлар айғоқчилари қалъага ҳозиргина етказган ахборотлар бўлиб, у билан комендантга аталган эди.

— Ким у?— деб сўради у киришга ижозат беришдан олдин.

— Бу менман, капитан,— деган ўткир, чийилдоқ овоз эшитилди сўровига жавобан.

Робладо, шубҳасиз, овозини таниди чоғи, негаки у:

— Э, сенмисан?! Қиравер!— деди.

Эшик очилди-ю, хонага паст бўйли, қорачадан келган, сувсарча муғамбир башарали одам кириб келди. У қийшанглаб, беданачасига йўрғалаб қадам ташлар, эгнидаги мундири, қиличию шпорларига қарамай, сиёқи мўмин-итоаткор кўринарди. У қулларча лаганбардорлик оҳангида сўзларди, зобитга честь беришни ҳам ғуломона ҳушомад-ла адо этди. Вискарра билан Робладога ўхшаган одамлар айнан мана шундай тоифадаги шубҳали нусхаларни ёллайдилар-да: бу нусха уларга худди шун-

даї мақсадда неча марталаб хизмат кўрсатган. Бу Хосе деган аскар эди.

— Хўш, нима дейсан? Висенсани кўрдингми?

— Ҳа, капитан. У билан кеча оқшом учрашдим.

— Янгилик борақанми?

— Яна билмадим-у, бу капитан учун янгиликми ё йўқми, кеча сеньорита уни уйига жўнатибди, у менга шунигина айтди, холос.

— Уни-я?

— Ҳа, капитан, оқпар-малла сочлини.

— А-ҳа! Уёғи-чи!

— Сиз кетганингиздан кейин алькальд, олиб кетишни хоҳлайдиган одам бўлса олиб кетсин уни, деб таклиф қилганидан ўзингиз хабардорсиз, ахир. Гап мана мундоқ, шунда бир қиз олдинга чиқди-да, бу мени танишим, деди. Кейин, ўша ерда яна битта хотин ҳам борийди — ўша қизнинг онаси. Уни ўшаларга беришди даррон; кейин улар қизни шаҳар сиртига, чакалакзордаги уйига олиб кетишди.

— Лекин у ерда қолган эмас у. Ҳали-ҳозирча тафсилотини эшитмаган бўлсам ҳам, унинг уйдан жўнаб қолганини биламан. Буёғи қандоқ бўлди?

— Мана мундоқ, капитан: улар уйга кирар-кирмас аравакаши тагнос бир арава етиб келди, шунда қиз, анави хотиннинг қизи Хосефа, оқпар-малла сочли билан аравага чиқиб, бирга жўнаб кетишди. Лекинига оқпар-малла сочлини на қизи, на онаси кўришган илгари. Хўш, сизнингча қандоқ, капитан: уларни, аравани ким юборган?

— Висенса нима деди?

— Уларни сеньорита юборган, деди, капитан.

— А-ҳа!— хитоб этди Робладо.— Висенсанинг ишончи қатъий эканми бунга?

— Ҳали бу ҳаммасиямас, капитан. Арава қўзғалгач, балким сал кейинроқдир, сеньорита отига миниб чиқиб кетибди уйдан. У, гўёки бирор чорвадорнинг қизиги ўхшаб, оддий серапега ўраниб, бошига сомбреро кийиб олибди. Бунақанги либос, менимча, олинасаб сеньоритага муносиб эмас. У айланма йўлдан от чоптириб кетибди. Лекигин Висенса уни, уйлар ёнидан ўтиб бораётиб катта йўлга бурилган ва эҳтимол, ўша аравага етиб олган, деб ўйлаяпти. Бунга вақти бемалол етарли экан.

Бу маълумотлар, афтидан, Роблагога қаттиқ таъсир

етди. Афти тундлашиб, қошлари чимирилди, кўзлари
чақнаб кетди — турқидан хаёлига қандайдир янги режа
келган кўринарди. У ўз хаёлларига гарқ бўлиб пича
ким қолди, сўнгра сўради:

— Ҳаммаси шуми, Хосе?

— Ҳаммаси, капитан.

— Эҳтимол Висенса тағин бирон нимани билиб ол-
гандир. Бугун кечаси яна учраш у билан. Тайинлаб айт,
сеньоритадан кўз узмасин. Агарда уларнинг хат ёзи-
мишларини билиб берса, яхши ҳақ тўлайман унга, сени
ҳам қуруқ қўймайман. Анави хотин билан қизи тўғриси-
да муфассалроқ билиб ол. Уларни аравада элтиб таш-
лаган тагносни қидириб топ. Вақтни ўтказма, Хосе.
Бор, йўлга туш!

Хушомадгўй аскар лаганбардорона ташаккур билди-
риб, яна бир бор тавозе-ла кафтини чаккасига қилди-ю,
ёшиқ ортида ғойиб бўлди.

Робладо у чиқиб кетгани ҳамоноқ ўрнидан сакраб
туриб, ҳаяжонда хонада уёқдан-буёққа юрган кўйи ўзи
билан ўзи сўзлаша кетди:

— Жин урсин!!! Нега энди бу тўғрида илгарироқ
ўйламабман? Улар ёзишиб туришади... Бўлмасам-чи!
Вой иблислар-эй! Қанақанги аёл ўзи бу! Мабодо синг-
лисини ҳиндулардан гўеки биз халос этганимизга ўзиям
ишониб қолмаган бўлса, бу овчи ҳозирда ҳаммасини
билиб олгани тайин. Дон Амбросионинг уйини кузатиш
керак. Балки уни илинтирадиган тузоғимиз айнан шу
бўлар? Севги — акалик меҳрига нисбатан чандон бора
ишончлироқ хўрак. Шошмай туринг, сеньорита! Мабодо
бу тўғри чиқса, ана унда кўрасиз, сизнинг тушингизга
ҳам кирмаган дастак қўлимда бўлади. Шунда ўша қо-
воққалла дадажонингиздан мадад сўраб ўлтирмай ҳам,
ўзларини ҳамма шартларимга кўнишга мажбур қилган-
ним бўлсин!

Робладо интиқом ва зафар орзуси сурури ила ўз
ният режаларини тағин бир неча дақиқа мобайнида пи-
шитди, кейин хонадан чиқиб, ҳозиргина Хосе келтирган
маълумотларни етказмоқ ниятида комендант ҳузурига
пўл олди.

XLII БОБ

Дон Амбросио де Крусеснинг уйи шаҳардаги қўра-
ховлилардан эмасди. У шаҳар ёнгинасида — аниқроғи
шундоққина шаҳар чеккасида, кенг майдонидан тахми-
нан саккиз юз ярд масофада жойлашган эди. У танҳо,
бошқа уйлардан хийла олисроқда қад кўтарганди. Уни
вилла¹ ёхуд коттедж деб атаб бўлмасди — Мексикада
на унисю на буниси, на ҳаттоки шуларга ўхшаган нарса
бор. Ушбу ўлкада минг миллаб масофада, унинг шимо-
лий чегарасидан то жанубийсигача, меъморлик услуги
бир хил — бир тусу бир зайлда. Чоғроқ-чоғроқ уйлар,
камбағалларнинг ранчолари, денгиз сатҳидан қандай
баландликда эканлигига боғлиқ бўлган уч хил иқлим —
иссиқ, мўътадил ҳамда совуқ минтақада жойлашганига
қараб бир-бировдан фарқ қилади. Иссиқ ўлкаларда
асосан (ўзгача қилиб айтганда соҳилбўйи ва мамлакат
ўртасидаги баъзи водийларда) қамиш ва синчдан қурил-
ган, томи пальма барглари билан ёпилган енгилгина
иморат — ранчолар. Хиёл юқорироқда, ясситоғликда
ястанган Текисликда — шуни айтиб ўтиш лозимки, мам-
лакат аҳолисининг аксар қисми айнан ана шу ерларда
истиқомат қилади — раночаларнинг жамикиси гувалалой
деворли. Урмонли тоғ ёнбағирлари, денгиз сатҳидан
хийла баландда ранчолар хода-ёғочлардан қурилган;
уларнинг томи тахта пилакчалари билан қопланган,
буғотлари энли, анчагина олдинга чиқиб туради; улар
америкаликларнинг овлоқ ўрмонлардаги ёғоч кулбала-
рига заррача ўхшамайди ва улардан чандон бора са-
ранжом-саришта ҳамда кўркавроқ.

Бу ранчо хусусида. Ўзингиз кўриб турибсизки, бу
ерда бирмунча хилма-хиллик бор. Бойларнинг уйлари
ҳақида бундай деяёлмайсиз. Жуғрофий кенгликнинг ўт-
тиз градуслик минтақасини энию бўйигача олганда,
Мексиканинг у чегарасидан бунисигача ва эҳтимолки,
бутун Испан Америкасида, бойларнинг иморатлари бир
хил услубу бир хил андозада солинади. Башарти сиз
аҳёнда бир бўлакчароқ меъморлик услубида солинган
иморат учратиб қолсангиз, унда сураб-суриштириб,
уйнинг эгаси муҳожир: кон эгаси бўлмиш инглиз, фаб-

¹ Вилла — боғли кошона.

рика хўжайини шотланд ёки савдогар немис эканини билиб оласиз.

Буларнинг бари фақат қишлоқ жойларга тааллуқли. Кичик шаҳарчаю кентларда иморатлар худди шаҳар ташқариларидагининг ўзгинаси, сал-пал ўзгаришу, унча-мунча янгиликлари бор, холос. Йирик шаҳарларда ыса, гарчи у ерларда ҳам баъзи бир соф мексикача жиҳатлар сақланиб қолган бўлса-да, биноларнинг меъморчилик услуги Европа шаҳарлари, шубҳасизки, асосан испан меъморчилигига ёндашиб келади.

Дон Амбросионинг уйи шаҳар атрофидаги бўлак бадавлат хонадонларнинг қўраларидан кам фарқ қиларди. У турма, қалъа-қўрғон, монастир ёхуд ҳарбийлар қароргоҳига ўхшарди — ўзингизга ёққанига ўхшатаверинг, марҳамат; шунга қарамай, ҳар қалай унинг ташқи кўринишини деворлари бўялган ранглар — бир-бирова билан алмашган қизил, оқ ва сариқ тикка йўл-йўл бўёқлар — сезиларли даражада жонлантириб турарди. Ана шундай ғирт шарқона ёрқин бўёқлар шарофати ила мексикача услубдаги иморат унчалик совуқ кўринмасди. Бундай усул-услуг Мексиканинг баъзи қисмларида кенг тарқалган.

Уй жуда оддий, соддагина қурилган. Унга олд томон, катта йўлдан боқсангиз, ўртасида каттакон дарвозаси, номутаносиб жойлашган уч ё тўртта деразаси бор узун деворни кўрасиз. Деразалари тикка-тиккасига қадалган темир чивиклар билан иҳоталанган. Бу дераза панжараси. Деразаларга на ойна солинган, на қопқоқлари бор. Дарвозаси оғир, ёғочдан, сиртига ту누ка қопланган, темир ғалақалар билан маҳкамланади. Олд томондаги девор — бир қават баландлигида, лекин томдан тепада кўкрак бўйи баробарида панжара-тўспқ ҳам борлигидан баланд кўринади. Том ясси бўлганлиги туфайли пастдан панжара-тўсиқни пайқаб бўлмайди.

Уйнинг сўл бурчагидан ўнгга бурилиг. Яна-тагин болохона-кўшкни кўраман деб умидвор бўлманг, бунақанги уйларда таги-тугида бўлмайди у. Яхлит, силлиқ девор узундан-узун чўзилиб кетган, баландлиги олд томондаги деворни тепасидаги панжара-тўсиғи билан қўшиб олганда баб-баравар келади; борди-ю, шу девор ёқалаб охиригача борсангиз-у, яна муюлишдан мўралаб қарасангиз, худди ўшанақанги деворни кўрасиз — тўрт бурчакнинг сўнгги девори.

Дон Амбросионинг уйи олд томонини кўриш насиб этмайди бунақада (бинонинг хийла ҳашамдорлик қисмини назарда тутган тақдирда, албатта). Мексикалик ўз уйининг ташқи кўринишига аҳамият бермайди. Ички ҳовлидангина — патио — қаршингизда бинонинг жамоли; олд томони намоён бўлади ва сизни ўзининг нозик безакларию салобати билан лол қолдириши ҳеч гап эмас. Ана шунда сиз уй соҳибининг дидига баҳо бера оласиз.

Келинг, патио¹га ўтайлик. Дарвозабон қопқанинг тақиллаши ёхуд кўнғироқ овозини эшитиб, чоққина, бир тавақали эшикни очади бизга — юқорида таърифланган дарвозанинг дарчаси бор. Шунда биз бинониникига ажратиб турган шифти гумбазсимон йўлакдан ўтиб бориб, ҳовлига чиқамиз. Энди қаршимизда уйнинг ҳақиқий олд кўриниши намоён бўлади.

Ҳовли саҳнига рангли гиштлар шахмат тахтаси тарзида ётқизилган. Уртада тизиллаб фаввора отиляпти, унинг ҳовузчаси нақшин гуллар билан безалган. Илдизлари гишт ётқизилган саҳнга зиён етказмаслиги учун катта-катта ёғоч пақирларда ўстирилган дарахтлар, уларнинг шох-бутоқлари батартиб кузалган. Ҳовли теграсидаги эшикларга кўзингиз тушади; улардан баъзилари ойнаванд ва дид билан парда тутилган. Катта меҳмонхона, емакхона ва хобхоналарнинг эшиклари уч томонда жойлашган, тўртинчи томонда ўчоқбоши, омборхона, қазноқ, шунингдек отхона ҳамда араваю извошхоналар жойлашган.

Уйнинг яна бир муҳим бурчини тилга олиб ўтмоқ даркор: бу том-асотейар. Уёққа тош зиналардан чиқилади. Том ясси ва ниҳоятда мустаҳкам, зеро у цемент билан сувалган, ёғин-сочин писанд эмас, бутуи гирди атроф-теваракни томдан кузатишга халал бермайдиган, бироқ йўловчи-ўткинчиларнинг сур ҳамда шилқим нигоҳларидан муҳофаза этадиган баландликдаги тўсиқ — пастак девор ила қуршалган. Қуёш ботгач ёки у булутлар панасидалигида асотейар — сайр қиладиган энг кўнгилли жой. Дон Амбросионинг уйи томида сайр қилиш айниқса кўнгилли, зотан у нақ боғнинг ўзгинасига ўхшаб кетади. Бутуи гирдига қора лок билан бўялган тувакларда нодир ўсимликлар қўйилган, уларнинг ям-яшил шох-шаббалари ҳамда ёрқин-ярқироқ гуллари уйни ташқи

¹ П а т и о — ичкари ҳовли.

томондан ҳам муъжизавор бир тусда безаб туради.

Аммо бу бадавлат кон эгасининг хонадонидаги як-ию-ягона боғ эмас. Уй ортида шаклан узунчоқ, икки томонидан баланд девор олинган яна битта боғ бор. Бу деворлар токи анҳор қирғоғигача чўзилиб кетган. Анҳор соҳилида девор йўқ, анҳор бу ерда етарли дарахтда кенг ва чуқур бўлиб, бемалол девор хизматини ўтайди. Боғ катта, этагида эса яна мевали дарахтлар ўтказилган. Дид билан ўтказилган йўлка, турли шаклу дарахтдаги гулпушталар ҳамда яшил суҳбатгоҳлар унинг чиройига чирой қўшади. Мазкур боғда сайр қиларкансиз, дон Амбросио (гарчи, у бор-йўғи бадавлат мартабни обрўталаблардан бўлса-да), нозик дидга эга экан деб ўйлашингиз мумкин — бунақанги сўлим бурчакларни Мексикада кўпдаям учратавермайсиз-да, ахир. Ило мазкур соя-салқин дарахтзорлару оромбахш суҳбатгоҳларни у ўйлаб топган эмас. Буларнинг барини унинг соҳибжамол қизи ўйлаб топган, у талайгина соатларини ана шу салқин боғда ўтказади.

Дон Амбросиога коннинг кўриниши — қоядаги атрофида чақмоқтош уюмлари қалашиб ётган улкан камгак ва унинг ичкарасидаги манзара оламдаги жамики гуллардан азизроқ эди. Қуйма кумушнинг бир уюми унинг илгоҳини қора лола ёхуд мовий картошкагуллар чаманчаман очилган чечакзордан кўпроқ маҳлиё этиб, ақлини кўпроқ ўғирлаши тайин эди.

Каталина отасига мутлақо ўхшамасди. Унинг дидтабиати ниҳоятда нозигу юксак эди. Унга бойлик ҳирси ва бойлар кибру ҳавоси мутлақо ёт эди. У талай мишмишу фикр-мулоҳазалар туғилишига сабабчи бўлаётган меросни жон-жон деб рад этиб, ўзи севган кишиси билан қашшоғона ранчода яшашга рози эди.

XIII БОБ

Қуёш уфқ сари оғиб борарди. Унинг оловли гардини мағриб ёқда юксалган Сьерра-Бланкининг қорли чўққисидан бўса олгани ошиқарди. Тоғ кифтларидан қуйига томон тушиб келган оппоқ ридо барлари очқирмизи рангда ял-ял чўғланар, дараларнинг кемтигу камгак жойларида алвон тус олар ва Сьерра ёнбағирларини қоплаган қорамтир ўрмонлар қаватида янада гузалроқ,

фараҳлироқ кўринар эди.

Уша кунги оқшом айниқса ёрқин бўлди. Мағриб ёқда анвойи тусли булутлар қалашиб-мингашган; заррин, қирмизи ва ложувард мовий ранглар антиқа тарзла уйғунлашиб, беназир нақшинкор кошона касб этган булутлар бағоят ғаройиб шаклу шамойилга кирган ва бу ярқираб жилоланаётган, мафтункор хилқатлар қайсидир ўзга оламдан келган махлуқотга ўхшаб кетарди. Ушбу манзара кўзларни қувнатиб, қайғуга ботган аламли дилларни яйратиб, завқ-шавқ бахш этмоғи, бахтиёрларни янада бахтиёрроқ қилмоғи лозим.

Шубҳасизки, бу манзара пайқовсиз қолмади. Унга бир жуфт кўз, беқиёс гўзал кўзлар тикилганди, илло уларда ҳар қалай ўзлари қадалган манзарага асло мос тушмайдиган андуҳ зуҳур этиб турарди.

Бу кўзларга ғам-андуҳ соясини ташлаётган нарси шафақ ёлқини эмасди, йўқ. Гарчанд улар шафаққа тикилаётган бўлса-да, нигоҳида акс этаётган қайғу кўнгилга ташлаган ғашликдан эмасди. Қалбини ўртаётган — мутлақо бўлак армон эди.

Бу кўзларнинг соҳибаси — ёш қизалоқ эмас, балки авжи яшнаб, хусни-малоҳати қиёмга етган соҳибжамол қиз эди. У дангиллама уйнинг асотейсида турар ва сержило шафақни суқланиб томоша қилаётганга ўхшардию, бироқ хаёли кунботар шафағида эмас, кўнгилга унчалик ўтиришмайдиган нохуш ўйлар билан банд эди.

Ҳатто ўт туташган осмон бағридан ёғилаётган қирмизи ёлқин ҳам унинг чеҳрасидаги ғам соясини тарқата олмаётганди. Қалбини забт этган қоронғулик ташқи олам ёлқинидан кучлироқ чиққан эди. Ғира-шира кўлка гўзал чеҳрасини тунду хиралаштирар, зотан қалбини соя-кўлагалар буткул чирмаб олганди.

Шунга қарамай унинг чеҳраси гўзал, баланд, адду сарв қадди-басти беқиёс. Бу соҳибжамол Каталина де Крусес эди.

У асотейда ёлғиз, анвойи тур ўсимликлару гуллар қуршовида танҳо. Пастак тўсиқ девор узра энгашиб, ғарб ёққа тикилган кўйи ботаётган олам чароғини кўриб турибди.

Гоҳо-гоҳо осмону қуёшга қараб қўйяпти, аммо кўзлари кўпроқ боғ ичкарисига, ёввойи хитойи дарахтлар соя ташлаб турадиган, хушқад дарахт таналари орасидан анҳор кумуш тасмадай ярқираб кўринаётган жойда

дан Қизнинг нигоҳи вақти-вақти билан аллақандай ғалати бир қизиқиш-ла ана ўша дарахтзорда тутилиб қолпти. Бу жой унинг нигоҳини тортаётганининг ажабланидиган ери йўқ. Илк бора муҳаббат аҳд-паймонини мифтуну маҳлиё бўлиб худди ана шу ерда эшитган; бу аҳду паймон бўса ила мунаввар этилган ва қиз уни ўз орзулари қанотида аянчли заминдан самовий юксакликларга учирма қилган. Унинг учун ўша ердан ажойибу азизроқ жой йўқлиги таажжубланарли эмас асти. Жаҳондаги энг донғи кетган истироҳат боғларида, ҳатто жаннатда ҳам унинг ўзи мазкур ёввойи хитойи дарахтлар шох-шаббасию япроқлари қўйнида барпо этган муъжазгина яшил суҳбатгоҳга тенг келадиган соясалқину сўлим гўша топилмаса керак.

Унинг боқишлари нечун бундайин ғамнок? Ахир ўша панагоҳда шу бугун келасиёқ ушбу гўшани унинг учун мунаввар ошиёнга айлантирган кимсаси билан дийдор кўришади-ку. Хўш, нечун бунчалик ғамбода у? Бўлажак висол онлари суруридан шоду хурсанд бўлмоғи даркор эмасми, ахир?!

Ора-сира, бўлажак учрашувни ўйлаган дақиқаларда шундай бўлиб ҳам турди. Лекин хаёлига бўлак ўй ҳам дориб турар ва бу ҳол хавотирли ҳис-туйғуларни уйғотарди, чеҳрасига соя ташлаётган нарса эса ана шу эди. Қандай фикр-ўй бўлди экан бу?

Каталина қўлида бандолани тутиб турибди. Мапа у ўриндиққа чўкиб, ғалати бир испанча қўшиқ оҳангини тинчиллата бошлади. Аммо у шу тобда ўзини бошқара оладиган ҳолатда эмасди. Хаёллари аллақаерларда изғир, бармоқлари измига итоат этмасди.

У бандолани қўйиб, тагин ўрнидан турди-да, асотей бўйлаб, уёқдан-буёққа юра бошлади. Сайр эса тасалли бериб кўнглини тинчлантира олмади. Баъзан сеньорита тўхтаб, кўзларини ерга қадаганча, нима хусусдадир ўйга толгандай кўринарди. Кейин тагин юра бошлар ва яна жойида тек туриб қолар эди. Яна ва яна сўзсиз-содосиз, жимгина шу ҳол такрорланарди.

Бир гал у, худди ниманидир ахтараётгандек, ўсимлигу гул туваклари орасидан мўралаб қараган кўйи бутун асотей теграсини айланиб чиқди; аммо излашлари бесамара бўлди, бирон нарса эътиборини тортмади.

У тагин ўриндиққа ўтириб, бандолани қўлига олди. Илло бармоқлари учи торларга тегар-тегмас созни қў-

йиб, қўққисдан қандайдир муҳим нарса эсига тушиб қолгандек, дик этиб туриб кетди.

— Нимага хаёлимдан қочирибман-а буни? Уни боғда тушириб қўйган бўлишим мумкин-ку, ахир!— дея пичирлади у ва чопқиллаганича зинапоядан пастга, пастига тушиб кетди.

Энсизгина йўлак патиодан боққа олиб чиқар эди. Лаҳза ўтмаёқ Каталина дам-бадам энгашиб, ҳар бир дарахт, ҳар бир бутанинг остига — ўзи ахтараётган нарсаси тушиб қолиши ва кўзга кўринмай ётган бўлиши мумкин жой борки жамига кўз ташлай-ташлай, қум сепилган йўлқадан кетиб борарди.

У буткул бурчакларни тит-пит қилиб излаб чиқди, кейин хитойи дарахтлар оғушидаги яшил суҳбатгоҳда пича тутилиб қолди—бу унинг учун ўзгача азиз жой эди-да, ахир. Ниҳоят, мана у боғни тарк этди; чеҳраси бояги-боягидек ташвишли: сеньорита тушириб қўйган нарсасини топа олмаган кўринади.

У асотеяга қайтди, яна бандолани қўлига олди-да, худди боягидек торларини тинғирлатиб жойига қўйди-ю, тағин ўрнидан туриб, ўзи билан ўзи сўзлашишга тушди:

— Жуда ғалати бўлди-ку! Хонамдаям йўқ... Меҳмонхонада, емакхонада, асотея, боғда ҳам — ҳеч қаерда йўқ... Қаёқда қолиши мумкин? Вой худойим-а! Дадамнинг қўлига тушиб қолган бўлса нима бўлади? Унда ҳаммаси очиқ-ойдин ёзилган, беш қўлдай тушунарли қилиб... Йўқ, йўқ, йўқ!.. Бордию бошқа бировнинг қўлига тушган бўлса-чи! Унинг душманлари қўлига! Унда бугун кечаси... деб ёзилган... Тўғри, қаердалиги айтилмаган-у, лекин вақти кўрсатилган, қаердалигини ақл югуртиб пайқаб олиш қийин эмас... Кошкийди уни қандай огоҳлантиришни билсам-а! Буни билмайман-да, у ҳеч нарсадан беҳабар келаверади. Шўргинам қурсин, энди ҳечам огоҳлантириб бўлмайди. Ишқилиб душманларнинг қўлига тушмаган бўлсин-да. Қаерда тушиб қолдйкин-а? Ё биби Марям, қаёқда қолдйкин-а, у?..

Ушбунинг барини шундайин тўлқинланиб айтаётган эдики, сеньоританинг ўзи учун ниҳоятда муҳим ва қимматли нарсасини тушириб қўйгани кундай равшан кўриниб турарди. Бу Хосефа келтирган, Карлос унда шу бугун тунда келишини ёзган хатдан бўлак нарса эмасди. Шу бондан ҳам бу йўқотиш уни хавотирга солиб

қўйганини сира ажабланадиган жойи йўқ эди. Хатнинг мазмунини нафақат унинг покиза номига доғ туширибгина эмас, шунингдек, севгилисизнинг ҳаётини таҳлика остида қолдирарди. Ана шунинг учун ҳам унинг чеҳрасига қора кўлагалар соя ташлаган, хавотир исканжасида бутун боғу асотейни айланиб ўшани ахтариб чиққанди.

— Висенсадан сўраб кўришга тўғри келади,— ўз ўзи билан сўзлашишни давом эттирди у.— Лекин сўрашга сираям кўнглим бормаяпти-да. Шунақанги ўзгариб қолганки, асти қўяверасиз! Жудаям самимий, ҳалол қиз эди, алдоқчи ва иккиюзламачи бўлиб қолган ҳозир. Икки марта ёлғон гапирганида тилидан илинтирдим. Нимага бунақа бўлиб қолдийкин-а?

Каталина худди ўйга толгандай, бир оз жим қолди.

— Шундаям бари бир сўрашга тўғри келади. Эҳтимол қоғозни топиб олгандир у, бирорта керакмас қоғоздир-да, деб ўйлаб, ўтга ташлаб ёқиб юборгандир. Яхшиямки ўқишни билмайди. Лекин у ўқишни биладиганлар билан учрашиб туради-ку, ахир... Буни қаранг-а, унинг дўсти, анави аскарни бутунлай унутиб юборибман-ку. Тагин у хатни топиб олган ва ўшанга кўрсатган бўлса-чи?.. Ё одил эгам!

Шундай бўлиши мумкин эканлиги ҳақида ўйлаш изтиробли эди, сеньоританинг юраги қаттиқроқ уриб, тез-тез, энтикиб нафас ола бошлади.

— Қандай даҳшатли бўлади унда!— сўзлашда давом этди у.— Бундан касофат иш бўлмайди оламда!.. Сираям ёқмайди ўша аскар менга, қандайдир айёр ва пасткаш кўринади... Комендант унга мурувват кўрсатса ҳамки, ярамас одам дейишади уни. Агарда хат ўшанинг қўлига тушган бўлса, худонинг ўзи асрасин-да! Вақтни кеткизмаслик керак, дам ғанимат Висенсани чақириб, сўраб кўраман.

У тўсиқ девор олдига бориб, пастга қараб овоз берди:

— Висенса! Ҳой Висенса!

— Нима дейсиз, сеньорита?— қаердандир уй ичкари-сидан жавоб эшитилди.

— Буёққа кел!

— Ҳозир, сеньорита.

— Тезроқ! Бўлақол!

Қалта гулдор юбка билан енгсиз оқ кофта кийган қиз патиога чиқиб, зинадан томга кўтарилаверди.

Оч-қаҳваранг туси унинг метис — ҳинду билан испан

аслидан туғилган қурама эканидан далолат бериб турарди. У кўҳликкина эди-ю, аммо афтига бир қараган одам уни сахий-меҳрибон, ҳалол-покиза, хушмуомала деб ўйламасди: бу башарада ёвузона заҳар-заққумлик, муғамбирлик ифодаси мужассам топганди. Важоҳатиям жинойт устида қўлга тушган ва ҳар қандай чора-жазога тайёр турган одам сингари тўрсайган ҳамда жигга тегадиган қиёфада эди. Бунақанги турқ яқингинада пайдо бўлганди унда, шунда бекаси унда рўй берган бошқа ўзгаришлар қатори ушбу янгиликни ҳам пайқанган эди.

— Нимани истайдилар, сеньорита?

— Мен бир парчагина қоғозни тушириб қўйибман, Висенса. У найча қилиб ўралганди... хатга ўхшатиб эмас, манавинақа қилиб.— Шундай деб у қизга худди ўшандай ўралган қоғозни кўрсатди. — Мабодо ўшанақа қоғозга кўзинг тушмадимми?

— Йўқ, сеньорита,— ўша заҳотиёқ жавоб қилди қиз.

— Балки уни супуриб ёки оловга ташлаб юборгандирсан? Кўринишидан арзимагангина қоғоз эди, аслидаям шунақайди-ю, унда битта расм борийди, ўшани кўчириб олсам дегандим. Ишқилиб бир нима қилишмаганимкин уни, сен нима деб ўйлайсан?

— Қайдам, сеньорита. Лекигин мен уни нобуд қилганим йўқ. Мен уни супуриб юборганим ҳам, оловга ташлаганим ҳам йўқ. Ўзим ўқиёлмаганимдан кейин унақа қоғозни қандоқ ташлаб юборардим? Унақада керакли қоғозларниям ташлаб юбориш мумкин-ку, ахир.

Мулоҳазасининг иккинчи қисми тўғрими ё ёлғонми, билмадиг-у, аммо Висенса, гапнинг бошида ҳақиқа кўчганди. У қоғозни нобуд қилмаган — супуриб ҳам ташламаган, ёқиб ҳам юбормаган эди.

У тўппа-тўғри ва содагина қилиб, худди ўзидан бундайин эҳтиётсизлигу бепарволикда шубҳаланаётганларидан ранжигандек, ҳаттоки пича жаҳли чиқиброқ жавоб қайтараётган эди.

Унинг жавоби, афтидан, бекани қаноатлантирганга ўхшади, бироқ у Висенсанинг сўз оҳангини фаҳмладимкин — бу борада бирон нима дейиш қийин, зеро у:

— Майли. Буни унчалик аҳамияти йўқ. Кетишинг мумкин, Висенса,— деб қўя қолди у.

Қиз қош-қовоғини уйганча нари кетди ва зинадан пастга туша бошлади. Охирги сонияда у ўзига орқа ўги-

риб турган бекасига қараб қўйди, шунда заҳаролуд ҳамда масхараомуз иршайишдан лаблари бурилди. Турглин гапки, у йўқолган қоғоз парчаси хусусида бекасига йитганидан кўра кўроқ нарсани билар эди.

Каталина яна ботиб бораётган қуёшга боқди. Бир неча дақиқадан сўнг тоғнинг қорли чўққяси ортига шўнгиб, кўздан ғойиб бўлади. Бир неча соат ўтгач эса— қувончли висол онлари!

* * *

Робладо илгариги сафардагидек уйида ўтирибди. Бир пайт худди ўтган галгидек эшик астагина тиқиллади. У яна ўшандагидай: «Ким у?»— деб сўради-ю, тагин: «Менман!»— деган жавоб эшитилди. Шунда у ўша галгидек овозни таниб, тиқиллатаётган одамга ичкарига киришга рухсат этди. Зобит ҳузурига яна қўлини лаганбардорона ҳолда чаккасига қилганча оддий аскар Хосе кириб келди.

— Хўш, Хосе, қандай янгиликлар бор?

— Фақат мана шу,— жавоб қайтарди аскар, найча қилиб ўралган қоғоз парчасини узатиб.

— Нима бу? Кимдан?— шоша-пиша сўради Робладо.

— Капитаннинг ўзлари мендан кўра яхшироқ тушуниб, билиб оладилар — мени ўқишга тишим ўтмайди-ку, ахир. Бу қоғозни сеньоритадан яшириқча олишган, унда хат ёзилганга ўхшайди. Кеча эрталаб ибодатхонада сеньоритага аллаким берганмиш — Висенсанинг фикри шундоқ. У сеньорита эрталабки ибодатдан қайтибоқ шуни ўқиётганини кўрибди. Висенсанинг гапича, уни водийга деҳқон қизи Хосефа келтирганмиш. Капитан, балким, ўзлариям кўрарлар...

Робладо, аллақачон хатни ўқишга берилиб кетган, Хосе айтаётган гапларнинг ярмиям қулоғига кирмаган эди. У мактубни охиригача ўқиб, бўлгач, бамисоли биров бигиз суқиб олгандек ўтирган курсисидан сапчиб турди-ю, ҳаяжонда хона бўйлаб уёқдан-буёққа бориб келишга тушди.

— Тезроқ! Тезроқ бўл, Хосе!— қичқирди у.— Хомесни айтиб юбор, буёққа. Бировга чурқ этиб оғиз очакўрма! Тайёр бўп тур, сен ҳам керак бўлиб қоларсан балки менга. Хомесни ҳаялламай айтиб юбор буёққа! Бор!

Асқар бу сафар сал мундайроқ хушомад-ла честь

берди — ғоятда шошиб қолганди-да, ахир! — ва хонадан отилганча чиқиб кетди.

— Омадни қаранг-а, худо ҳаққи! — ғудранди Робладо — Телба ошиқ бундай хуракни деб тузоққа илинмай қолган ҳол бўлганмас! Яна тагин шу бугун ярим кечасиёқ! Ҳозирлик кўришга бемалол вақтим бор. Қани энди, учрашув жойини билганимда эди-я, нур устига аъло нур бўларди-да! Илло бу тўғрида ҳеч нима дейилмаган хатда.

У хатни қайтадан ўқиди.

— Айтилмабди, жин ургур! Минг афсус-а! Нима қилсам экан? Кўр-кўрона иш тутиб бўлмайди-ку, ахир.. Воҳ, топдим! Уни кузатиш керак! То учрашадиган жойларига боргунича пойлаш керак. Висенса уддалайди буни, биз бўлсак бу вақтда яқин-орада пистирмада ётамиз. Қаерда учрашишганини Висенса бизга етказадди. Шундан кейин уларни қуршаб олишга улгураамиз — дарров ажралиша қолишмаса керак ахир. Биз уларни ширин висол дамлари лаззатини сураётганларида қўлга тушираамиз. Минг лаънат-э! Менинг йўлимга ким тўғаноқ бўлганини ўйлаб кўринг-а — жирканч кўппак, бизонлар кушандаси-я! Сабрли бўл, Робладо, ҳовлиқма! Шу бугуноқ... шу бугун тундаёқ!

Эшик тикиллади. Сержант Хомес кирди.

— Йигирма нафар аскар танла, Хомес! Энг сараларидан, эшитяпсанми! Ун бирга шай бўлиб тур. Вақт етарли, аммо мен чақиртиргунимча тахт бўлсин ҳаммаси. Бегоналарга оғзингдан гуллай кўрма! Отларни эгарлашни буюргин-у, одамларга тайинлаб қўй, тишларини тишларига босишсин. Карабинларни ўқлаб қўйинглар. Бажарадиган ишинг бор, Нима ишлигини кейин биласан. Бор, тайёргарлик кўр!

Сержант бирон оғиз сўз айтмай, буйруқни бажаргани жунади.

— Лаънатлар бўлсин-э! Уша жойни тахминан бўлсам билганимда эди-я! Уйга яқинмикин? Ё боғдами? Эҳтимол бирон узоқроқ жойда, шаҳардан четдадир? Бўлиши мумкин! У нақ шаҳар сарҳадигача келишга жазм этолмас-ов — унда ўзини ёки отини таниб қолишлари мумкин. Ҳе, ўша оти ҳаром қотсин!.. Йўқ, йўқ! Уша отни қўлга киритмасам Робладо отимни бошқа қўйганим бўлсин! Мабодо қаерда учрашишларини олдиндан биллиб ололганимизда қойилмақом иш бўларди-да. Лекин

ундоқ бўлмади, хатда учрашадиган жой тўғрисида ҳеч нарса дейилмаган. Йўғ-э, қанақасига, «эски жойда» дейилган-ку! Э минг лаънат-э! Илгариям учрашишган экан-да ҳали, яна-тагин, тез-тез учрашиб туришган бўлишса-я. Оҳ-ҳ!

Робладонинг кўксидан изтиробли ингроқ отилиб чиқди-ю, гўё ақли-ҳушидан айрилаётгандек, хонада наридан-бери зир югуриб қолди.

— Вискаррага ҳозироқ айтсаммикин ёки ҳаммаси охирига етказилганидан кейин маъқулмикин?— сўзлашда лапом этди у.— Сабр қилганим маъқул. Кечликка антиқа янгилик бўлади-да, ўзиям! Балким дастурхонга билон овчисининг қулоқларидан тайёрланган таом тортарман!

Шундай дея ярамас муттаҳам иблисона қаҳқаҳа уриб юборди. Сўнг қиличини осиб, зилдай тўппончадан бир жуфтини олди-да, шпорлари мустаҳкамлигини текшириб кўриб, шитоб-ла хонадан чиқди.

XLIV БОБ

Ярим кечага бирор соат қолганди. Кўкда ой нур сочар, аммо у уфққа оға бошлаган, водийни жануб ёқдан девор янглиғ тўсиб турган қоялар бир неча ярдлик узундан-узун кўланка ташлаётган эди.

Ясситоғликнинг тош қирғоғи ёқалаб, шундоққина ясситоғ этагида бир сувори шаҳарга қараб кетяпти. У отини эҳтиёткор одимлатиб бораркан, вақти-вақти билан йўлга безовталиқ ила қараб-қараб қўярди — чамаси нимадандир хавфсираётган ва ўзини сездирмаслигини истаётган эди. Шубҳасизки, айнан шу сабабдан ҳам у қоялар кўлагасидан бораётганди, бинобарин у ёнбағирлик қиялашиб, кўланка ташламай қўйган ерга яқинлашаркан, йўлдан тўхтаб, диққат-ла атрофни кўздан кечирарди, шундан кейин ўша жойдан тез ўтиб оларди. Башарти у бирор кимсанинг кўзига чалинмасликка уринмаган чоғида, турган гапки, қоя этагига қисиниб юрмай, хиёлгина наридан ўтган хийла мақбул йўлни танлаган бўларди.

Шу зайлда бир неча миль йўл босгач, сувори ниҳоят шаҳар рўпарасидан, уч миль беридан чиқди. Бу ердан шаҳарга олиб борадиган, қоялар оралаб кетган —

ясситоғликнинг сўл қисмига эътадиган сўқмоқлар билан туташган йўл ўтган эди.

Сувори оти жиловини тортиб, ўй сурганича бир неча дақиқа йўлга тикилиб қолди. Кейин ундан боришдан воз кечиб, яна бир милча масофани қоялар кўланкасида босиб ўтди, сўнгра яна тўхтаб, ўнг томонини диққат-ла кўздан кечирди. Шаҳарга ёки қаёққадир янаям юқорироққа борадиган ёлғизоёқ йўл бор экан. Сувори ўзига худди ана шу сўқмоқ кераклигига тезгина ишонч ҳосил қилди чоғи, отини буриб, қоялардан узилди-да, очик жойга қараб ҳайдади уни.

Ойдинда унинг навқирон ва хушқад йигит экани кўзга ташланади; чорвадорчасига кийинганди у; остидаги ажойиб қорабайир ойдинда нақ ялтиларди. Суворини таниш мушкул эмасди. Одамларнинг туси қорачадан келган бу ўлкада унинг сутга чайилгандек оппоқ юзи ва сомбреросининг энли соябони остидан чиқиб турган оч тусли-малла жингалак сочи унинг кимлиги хусусида заррача шубҳа қолдирмасди бирон кимсада. Бу Қарлос, бизон овчиси эди. Кетида бузоқдай, нақ бўрига ўхшаган ит югургилаб келарди; олдинроқ, кўланкада келаётганда у кўринмаётганди. Бу ит Бизон эди. Сувори шаҳарга яқинлашгани сайин тобора эҳтиёткорроқ бўла борди.

Қаршисида ястанган ер, гарчи текис бўлса-да, бутунлайига яйдоқ эмасди: унинг бахтига у ер-бу ерда чоққина-чоққина оролчалардай дарахтлар тўп-тўп бўлиб кўкка бўй чўзиб турарди; сўқмоқ бутазорларни оралаб борарди, бутазорлар текислик сийнасининг гоҳ у, гоҳ бу жойида (нақ парча-пурча ямоқдек) кўзга ташланиб қоларди. Бутазорга биринчи бўлиб шарпасиз, писибгина ит кириб борди: сувори унга эргашди. Бутазор четига чиққач эса тагин тўхтади, кейинги бутазоргача бўлган яйдоқ майдонни синчиклаб кузатди, ана шундан сўнгина йўлини давом эттирди.

Сафарини шу тарпқа давом эттира бориб, ниҳоят у шаҳар чегарасига етиб борди, орада бир неча юз ярд масофа қолганди, холос. Биноларнинг деворлари билан дарахтлар узра ялтираётган черков гумбази яллақачон кўзга ташланиб турарди. Сувори бошқаларидан яқинроқдаги деворга тикилди. У деворнинг шакли-таҳини таниди. Бу дон Амбросио уйи томидаги девор эди; сувори унга орқа томонидан яқинлашиб келаётган эди.



Карлос чоққина, водийдаги охирги бутазорда тўхтади. Унинг чеккасидан то юқорида айтиб ўтганимиздан Амбросио боғининг этаги келиб туташган анҳор қирғоғига очик, теп-текис майдон эди. Бу жой дон Амбросиога қарашли яйлов бўлиб, одатда шу ерда отлари ўтлаб юрарди. Уларни боғ тўсиги ортиданоқ бошланган, қўполдан-қўпол, ёғоч-ходалардан солинган кўприк орқали ҳайдаб ўтказишарди; бироқ у ерда яна битта, хийла енгил ҳамда пухта ишланган бошқа кўприк ҳам бор — яйлов билан боғни туташтирган бу кўприк фақат пиёдалар учун аталган эди. Дон Амбросионинг қизини кўнгли тусаб қолган пайтларда ана шу хилват кўприк орқали боғдан анҳорнинг нариги бетидаги ажойиб яйловга сайр қилгани ўтиб турарди. Боққа бегоналар доримаслиги учун энсизгина кўприкнинг қоқ белида қулфлоглиқ турадиган эшик ҳам бор эди.

Карлос тўхтаган бутазор билан ўша кўприк оралиғи уч юз ярддан сал мўлроқ келарди, шу боис уни ёлғиз қоронғиликкина кўздан яшириши мумкин эди. Аммо ҳали ой нур сочиб, Карлос унинг узундан-уzun қозик оёқлари ва оч бўёқ билан бўялган эшикчани яққол кўриб турарди. Анҳорни кўра олмасди у, қирғоқлар бу ерда баланд, боғни эса нақ сув ёқагинасида ўсган терагу хитойи дарахтлар тўсиб олган эди.

Дарахтзорга киргач Карлос отдан тушди, отни буталар энг қалин соя ташлаб турган ерга етаклаб борди-да, ўша ерда қолдирди. У отни боғламади, ерда сурғалиб юрмасин учун жилов тизгинини эгар қошига илиб қўя қолди. У кўпдан буён ажойиб йўрғасини бойлоқсини бир жойда туришга ўргатган эди.

Сўнг у бутазорнинг четига бориб, кўприкча ва унинг ортидаги дов-дарахтларни кузатмоқлик учун тўхтади. Карлос бўёққа биринчи марта келаётгани йўқ эди-ю, лекин ҳеч қачон ҳозиргичалик юраги ҳовриққан эмасди.

У олдиндаги висол дамларига ҳозирланаркан, ўз-ўзинга очикчасига гапиришга сўз берди, зеро илгари сира журъат этмаганди бундай қилишга. У розилигини сўрайди... Розини бўлармикин ёки рад этармикин? Унинг тақдири шунга боғлиқ эди. Юраги шунақанги қаттиқ ура кетдики, унинг гурсиллаб тепиши қулоқларини шанғиллатиб юбораётган эди.

Шаҳар сув қуйгандек жимжит. Шаҳар аҳли аллақачон ётиб қолган, эшик ёхуд деразалардан биронтасида чироқ шуъласи кўринмас — барчаси зичлаб беркитилиб, тақа-тақ қулфлаб қўйилган. Кўчаларда жон асорати кўринмайди, атиги бир неча нафаргина тунги соқчи қўриқлаётибди шаҳарни. Қора ридога ўралиб олган посбонлар уйлар олдидаги харрактларда ойболталарини маҳкам чангаллаганча мудраб ўлтиришар, оёқлари ёнида, йўл устида эса фонуслари турарди.

Дон Амбросионинг хонадонида ҳам чуқур сукунат ҳукмрон. Каттакон дарвоза мусту-мустаҳкам беркитилган, дарвозабон ўз қоровулхонасига гумдон бўлган, бу ҳол истиқоматчиларнинг бари уйда эканидан далолат беради. Башарти осудалик ҳукм сурмоқда экан — бу уйқу дегани, демак, ҳамма ухляпти бу ерда. Аммо ойнаванд эшикнинг зичлаб тортиб қўйилмаган шойи пардаси ўртасидаги тирқишчадан қилтириққина нур толаси сиртга сизиб, ғишт ётқизилган ҳовлига тушяпти — демак, истиқоматчилардан ақалли бири бедор ҳали. Шуъла Каталинанинг хонасидан тушиб турибди.

Баногоҳ тун сокинлигини қўнғироқнинг янгроқ даранг-дурунги бузиб юборди. Бу ярим кеча бўлганини маълум қилаётган ибодатхона минорасидаги соатнинг бонги эди. Охириги жаранг садоси янграб бўлар-бўлмас, хонадаги чироқ қўққисдан ўчди — эндиликда дераза парда орасидан шуъла кўринмай қолганди.

Ҳадемай ойнаванд эшик астагина очилди-да, ўраниб-чирманиб олган аёл қомати пайдо бўлди. У шарпа чиқармайгина, оёқ учида ҳовлининг қоронғироқ томонидан зипиллаганча йўргалаб кетди. Кенг-ковул елкапўш келишган қад-қомати, малоҳатини яшира олмаётганди, қисиниб-қимтиниб ҳамда сергаклик-ла ҳаракат қилаётганига қарамай, товусона хироми мафтункор эди. Бу — сеньорита эди. Патиодан ўтгач, боққа чиқиладиган йўлакка бурилди. Уйдан ташқарига ўтиладиган йўлни тўсиб турган залворли эшик олдида тўхтади. Бир сониягина, холос. Елкапўш остида калит кўринди-ю, каттакон ғалақа истамайгина ён берди аёл қўлчаси измига. Бироқ индамай бўйин эгмаганди: занглаган темир ғижирлаб кетди-ю, Каталина қўрққанидан сесканиб тушди. У тагин ғижирлаганини биров эшитиб қолмади-

микин деб текшириб қарагани ҳатто орқасига, йўлакки қайтди; қоронғи йўлакда туриб патиога аланглади. Орқасига қайтаётганида тарақлаб ёпилган эшик бўлмасин яна? Ақалли унинг наздида шундай туюлди, шу сабабдан у ҳовлига чиқиладиган эшикларга хавотирланиб тикилганича туриб қолди. Бироқ эшикларнинг бари, шунингдек ўз хонасининг эшиги ҳам тақа-тақ берк эди: Каталина йўлга тушишдан олдин ёпганди уни. Шунга қарамай, ҳар қалай шубҳа-гумон тарк этмади сеньоритани, оқибатда у боққа чиқадиган эшик ёнига кўнгли ғаш бўлиб қайтди.

Эшикни ҳадиксирабгина очиб, йўлакдан боққа чиқиб борди у. Дарахт ҳамда буталар панасидан юриб бориб, бир зумда боғ этагидаги чоққина дарахтзорга етиб олди. Шу ерда тўхтади; дарахт таналари орасидан ҳозир Карлос тўрган жой билан дарахтзор оралиғидаги очиқ майдонни кўздан кечирди. У дарахтларнинг шакли-тарҳинигина аранг ажрата олаётган эди, холос; уларнинг кўлагасидаги қора кийимли одамни бунчалик масофадан кўриб бўлмасди.

Каталина ғизиллаганча дарахтзордан чиқди; лаҳза ўтмаёқ у кўприкча белидаги эшик олдида, энг баланд ерда турарди. Бу ерда тағин тўхтади у, елкапўши остидан оплоқ батист рўмолча чиқарди-да, қаддини баралла ростлаб, рўмолчани иккала қўли билан боши узра баланд тутганча ёйиб силкиди.

Ҳавода ялтироқ қўнғизчалар виз-виз учар, улар дарахтзор қоронғусида учқундек йилтиллерди, бироқ бу ҳол Каталинанинг ана шу учқунлар аро янаям ёрқинроқ, гўёки биров гугурт чертгандек, ярқ этиб кетган ёрқинни пайқашига халал бермади. У ўз ишорасига жавоб олганди.

Каталина рўмолчани туширди-да, чоғроққина калитни чиқариб, уни қулфга солди. Эшикни очиб, орқасига, дарахтлар кўлагасига қайтди-да, тўхтаб, кута бошлади.

Унинг кўзлари ҳатто қоронғиликда ҳам севги учқуни-ла чақнаб турарди: у бировнинг дарахтлар орасидан чиқиб, кўприкча томонга кела бошлаганини кўрди. Бу одам оламдаги жамики нарсадан қимматлироқ эди унинг учун; қиз уни кутаркан, икки бети ловуллаб, қалби қувончга тўлиб борар эди.

XLV БОБ

Каталина йўлакдан орқага қайтаётганида назарида эшик ёпилганини эшитгандек туюлгани бежиз эмасди. Уша сонияда чиндан ҳам биров эшикни — оқсочлар хонаси эшигини ёпган эди. Агар Каталина тезроқ ҳаракат қилганида эди, у бировнинг ҳовлидан югуриб ўгиб, ўзини ўша эшикка урганини кўрган бўларди. Аммо Каталина кечикканди. Эшик аллақачон ёпилиб бўлган, атроф яна жимжит бўлиб қолган эди. «Хаёлимда шунақа бўлгандай туюлди шекилли», — деб ўйлаганди у.

Аммо ундай эмас, хаёлида шундай туюлмаган эди. Оила аъзолари ўз ётоқхоналарига тарқашлари биланоқ Каталинанинг эшигини кузатишга тушган эдилар. Висенса ойнабанд эшик пардаси оралигидан ташқарига тушаётган ёруғликдан кўзини узмай, кузатаётган эди.

Кеча оқшомдаёқ оқсоч қиз озроққина вақтга жавоб сўраган эди. Унга рухсат беришди. У деярли бир соат бўлмади уйда. Жангчи Хосе уни Робладонинг ҳузурига бошлаб борди, ўша ерда ҳаммасини келишиб олишди.

Висенсага сеньоританинг уйдан қачон чиқишини пойлаш, ана шундан кейин изма-из кузатиб бориб, учрашув жойини билиб олиш буюрилди. Қандай жой ва қаерлигини билиб олгач, у ўша заҳотиёқ Робладо билан аскарлар кутиб турган ерга қараб югуриши, уларни ошиқ-маъшуқлар устига бошлаб бориши лозим эди. Робладо бу энг аниғу тўғри ҳаракат режаси деган қарорга келиб, ушбу режанинг амалга оширилиши ғамини еб қўйган эди.

Оқсочлар ётоғининг эшиги шундоқ Каталинанинг хонасига қарама-қарши эди. Висенса калит солинадиган тешикчадан чироқ ўчганини, сеньоританинг астагина патиога чиққанини кўриб турган эди. Шунда у токи бекаси йўлакка киргунича кутиб туриб, кейин эшикни секингина очиб, писибгина унинг изига тушган эди.

Сеньорита худди боғ эшигини очган пайтда Висенса йўлакнинг нақ оғизгинасида деворга қапишиб турганди. Каталинанинг орқага қайтаётганини пайқаб — бекани одим шарпаси фош қилиб қўйган эди — айёр айғоқчи зинғиллаганча оқсочлар хонасига қочиб бориб, эшикни беркитиб олганди.

Шундан сўнг, қайтадан ташқарига чиқишга дарҳол

журъат этолмади-ю, лекин бари бир мажбур бўлди — негаки, эндиликда калит ўрнидан ҳеч нимани кўриш мумкин эмасди-да, ахир. Висенса шунда ҳам тешиқдан мўраллади ҳар қалай, аммо бекаси қайтмади орқага — демак, боққа чиқиб кетибди. Висенса яна эҳтиёткорлик билан эшикни очиб, ётоқдан сирғалиб чиқди. Оёқ учидан йўлак бошига бориб, писибгина мўраллади уёққа. У ер энди зимистон қоронғи эмасди: эшик очиқ қолиб бутун йўлакни ой ёғдуси ёритиб турибди. Сеньоританинг ташқарига чиққанига, ҳозир боғда эканига шубҳаланмасам ҳам бўларди.

Боғдамикин? Висенса кўприкчани эслади. У бекасида ўшоқдаги эшикнинг калити борлигидан, сеньорита кундузлари бот-бот, ҳаттоки кечалариям сайр қилгани анҳорнинг у бетига ўтиб юришидан хабардор эди. Борди-ю, сеньорита бу гал ҳам кўприкдан ўтиб кетган бўлса-чи? Ҳозир у нариги қирғоқдан узоқлаб кетгандир-ов... Агар у бекаси қайси тарафга қараб кетганини биллолмай, ҳамма ишни барбод қилса нима бўлади?..

Хаёлига шу ўй келди-ю, Висенса йўлакдан боққа қараб отилди, энгашиб олганича кучи борица йўлқадан югура кетди.

Мевали дарахтлару гулпушталар оралиғида ҳеч кимни кўрмай энди тарвузи қўлтиғидан тушай деб турганида боғ этагидаги қалин дарахтзор умид бахш этди унга: учрашув учун энг қулай жой мана шу ер, бунақанги ишларда устихони йўқ Висенса тўғри хулосага келди.

Бироқ, дарахтзорга яқинлашиш осон эмас экан. Гулпушталар билан мазкур дарахтзор оралиғи очиқ ер — яшил майсазор эди. Мабодо уёқда, дарахтзорда биров бор бўлса у яқинлаб келаётган одамни муқаррар кўради — сутдек ойдин-да, ахир. Висенса дарҳол фаҳмлади буни, таққа тўхтаб, буёғига ҳар қалай қандоқ ҳаракат қилиши лозим экани устида бош қотира бошлади.

Биттагина йўли қолган кўринади. Баланд девор майсазорга бир неча фут кенгликда узун кўланка ташлаб турибди. Хўш деганингиздан, ана ўша кўланка панасида дарахтзоргача бориб олса нима қилади? Қиз шундай қилишга қарор берди.

Қурамаларга хос ҳийлакорлик ила ерга ётиб, ўрмалай кетди у: шу тариқа ўрмалаганча дарахтзор четига,

ибнан яшил суҳбатгоҳнинг орқагинасига етиб борди. Шу ерда тўхтаб, бошини кўтарди ва барглар орасидан мўраллади. У истаган нарсасини кўрди.

Каталина қурама қиз ётган жойдан юқорида, кўприкча устида турар ва унинг шакли-тарҳи мовий осмон сийнасида кўзга яққол ташланар эди. Висенса баланд кўтарилган оқ рўмолчани кўрди-ю, бу ишора эканини англади. Ушбу ишорага жавобан йилт этган нарсани ҳам, бекасининг қулфни бураб, эшикни очганини ҳам кўрди.

Айёр айғоқчида учрашув дарахтзорда содир бўлишига заррача шубҳа қолмади, эндиликда ушбу хабарни Робладога етказсаям бўларди. Аммо Робладо унга токи ошиқ-маъшуқларнинг келишилган жойда учрашганларини ўз кўзи билан кўрмагунича уларни ташлаб кетмасликни очиқ-эйдин буюрган эди, шу боисдан ҳам у буёғига нима қилишларини кута бошлади.

Карлос ўзига таниш оқ рўмолчани кўргач, бунга жавобан бир чимдим милтиқдорини ёндирди. У вақтни бой бериб ўлтирмади. Зум ўтмай оти ёнида ҳозир бўлди, унинг қулоғига алланиманидир шипшиди, от ҳам яхши тушунди чоғи. Кейин бутазордан чиқди. Бизон бир қарич ҳам ортда қолмай, изма-из эргашиб келаверди.

Карлос кўприкча етгач энкайди-да, итига икки оғизгина пичирлаб, яна йўлини давом эттирди. Ит жойида қолди — у анҳор бўйида ётиб олди.

Яна бир сония ўтди — ошиқ-маъшуқлар учрашишди.

Висенса ер бағирлаганча ётиб, олисдан уларни кўзатарди. Ой уларнинг бетларига ёғду сочиб турар, мазкур ёғдуда Карлоснинг оппоқ чеҳрасию жингалак сочи яққол кўзга ташланар эди. Қиз бизон овчисини танирди — ҳа, бу ўша.

У Робладо билиши лозим бўлганларнинг барини ўз кўзи билан кўрди.

Учрашув жойи — шу ерда, боғ этагида. Энди зобит ёнига боришу буни хабар қилиш қолганди, холос.

У энди ўрмалаб орқага қайтишга чоғланган, қаддини хиёл кўтарган ҳам эдики, қўққисдан ошиқ-маъшуқларнинг дарахтзор оралаб худди ўзи орқасида писиб ётган суҳбатгоҳга қараб келаётганларини кўриб эси тескари бўлиб кетаёзди.

Улар нақ Висенсаининг устига бостириб келаётганга ўхшардилар. Мабодо ўрнидан турса ёки секингина жуф-

такни ростлаб қолишга урингудек бўлса борми, анавилар уни пайқаб қолишлари муқаррар эди.

Танлашга йўл ҳам, чора ҳам йўқ — лоқал бу ердан жўнаб қолиш учун қулай фурсат келгунга қадар жойидан жилмаслиги керак. Шундай қилиб Висенса баргу шаббалар кўлагасида яна гужанак бўлиб, биқиниб олди.

Бирор дақиқадан сўнг ошиқ-маъшуклар суҳбатгоҳга кириб келиб, ушбу хилват гўшадаги харракка чўкнишди.

XLVI БОБ

Каталина билан Карлос шунчалар ҳаяжонда эдиларким, бир неча дақиқагача бирон сўз айта олмадилар. Биринчи бўлиб Каталина тилга кирди.

— Синглингизни аҳволи қалай?— деб сўради у.

— Пича тузук. Ранчомизни тузатишни буюргандим, ҳозир ўша ерда у. Қадрдон бошпанамиз муъжизавор таъсир кўрсатди. Роситанинг эс-ҳуши дарров жойига келди-қўйди, гоҳо-гоҳо сал хаёли оғиб турибди. Лекин тез орада бутунлай соғайиб кетади деган умиддаман.

— Жудаям хурсандман! Шўрлик қизгина, анави қўпол ёввойилар асирлигида қанча азоб чекканикин-а?!

— Қўпол ёввойилар! Ҳа, Каталина, кимлар тўғрисида гапираётганингизни ўзингиз билмай туриб ҳам уларни ҳақиқий номлари билан атадингиз.

— Вой, кимлар тўғрисида дейсизми?— дея такрорлади қиз ҳайрон бўлиб. У ҳамма қатори Карлоснинг синглисини ҳиндулар асирлигида бўлганига ишонарди.

— Бир томони сиз билан айнан ана шу хусусда учрашишни истагандим, бугун. Ўз қилмишимни сизга тушунтирмай туриб яшай олмасдим, сиз мени тушунмаслигингиз мумкин эди. Лекигин энди ҳаммасидан хабардор бўласиз. Қулоқ солинг, Каталина!..

Карлос бирорта ҳам тафсилотини қолдирмай ушбу даҳшатли фитнани батафсил сўзлаб берди. Каталинанинг оғзи очилиб, лол бўлиб қолди.

— Вой ёвузлар-эй!— нидо солди у.— Етти ухлаб тушга кирмайдиган бағритошлиг-а бу! Оламда шунақанги иблислар ҳам бор экан-да, а?! Азизим Карлос, агарда шу гапларни сизнинг оғзингиздан эшитмаганим-

ди, бунақанги разиллик ҳам бўлишига сираям ишон-
масдим! Икковлариям ярамас одамлигини билардим,
уларнинг пасткашона ишлари ҳақида эшитган эдим-у,
аммо бунақанги ёвузликларини хаёлимга ҳам келтир-
магандим. Ё биби Марям! Қанақанги одамлар-а! Йирт-
қич махлуқлар! Сира ақл бовар қилмайди-я!

— Мана энди мени ҳақли равишда қотил деб атаяп-
тиларми, йўқми, буни ўзингиз кўриб турибсиз.

— Азизим Карлос, бу тўғрида ўйламанг! Мен ҳеч
қачон ишонмаганман бунга. Сизнинг поҳақ, қабиҳ иш-
га қўл урмаслигингизни билардим. Сиз сира қўрқманг!
Буни бутун олам билиб олади...

— Бутун олам!— истехзоли оҳангда унинг сўзини
бўлди Карлос.— Мен учун олам йўқ. Менинг уйим йўқ.
Ҳатто ўзим билан бирга ўсганлар учун ҳам мен ҳамиша
бегона — назардан қолган шаккок бўлиб қолганман.
Энди бўлса бундан ҳам бешбаттар; мен қочоқман, ме-
ни таъқиб этишяпти, бошим учун мукофот белгиланган,
мукофот бўлгандаям озгина эмас. Очигини айтганда,
пархим шунчалик қиммат эканини хаёлимга ҳам кел-
тирмаган эдим асти!

Карлос кулиб юборди, аммо унинг қувноқлиги кўлга
бормади. У сўзини давом эттирди:

— Мен учун бутун олам — сизсиз, Каталина! Бун-
дан-буён эса менинг фақат юрагимдагина қоласиз. Мен
сиз билан хайрлашиб, кетишим, ҳа, олисларга кетишим
керак. Бу ерда мени ўлим кутяпти... йўқ, ўлимдан ҳам
баттарроқ нарса. Мен кетишим даркор. Ота-оналарим-
нинг юрагига, аллазамонлардаёқ унутилиб кетган қон-
қариндошларимиз ҳузурига жўнашимга тўғри келади.
Эҳтимол уёқларда паноҳ топиб, дўст-ёрлар орттирар-
ман-у, аммо сизсиз бахт йўқ менга ва ҳеч қачон бах-
тиёр бўлолмайман ҳам!

Каталина кўзларига ғилқ-ғилқ ёш тўлиб, жим ўти-
рарди. Иттифоқо миясида йилт этган фикрдан сесканиб
кетди-ю, уни айтишдан қўрқди. Илло ҳозир ясама кам-
тарлигу ортиқча қўрқоқликнинг вақти эмасди, устига-
устак унинг феъли-табиатига тўғри ҳам келмасди бу.
Унинг бир умрлик бахти ва яна севиклисининг бахти
ёлғиз биргина сўзга боғлиқ эди шу тобда. Нарироқ тур,
эй, қизларга хос тортинчоқлик! У хаёлига келганини
ийтади ҳозир.

У Карлос сари энгашиб, унинг қўлини ушлади-да,

кўзларига тикилиб туриб, назокат-ла, аммо қатъий оҳангда деди:

— Карлос, сиз ахир... мени ўзингиз билан бирга кетишимни истаяпсиз-ку, ахир, шундай эмасми?

Йигит шу ондаёқ қизни қучиб, бўса олди.

— Ё тагрим! Имкони бормикан буни?!— хитоб этди у.— Тўғри тушундимми ўзи? Каталина, жонгинам, сизга худди шуни таклиф қилмоқчи эдим-у, локин ботинолмаётгандим. Қўрқиб тургандим. Назаримда бу ақлсизликдек туюлаётганди. Сиз мени деб жамики нарсани қурбон берасиз-ку унда?! Азизам, жонгинам, наҳотки шу рост бўлса? Наҳотки мен билан кетишга рози бўлсангиз?

— Ҳа, розиман!— йигитнинг сўроғига қисқагина, бироқ қатъий жавоб бўлди.

— Ё раб! Мен ғоятда бахтлиман! Бир ҳафтадан бери изтироб чекаман, мана энди яна бахтиёрман. Бир ҳафта бурун ҳам бахтиёр эдим, Каталина. Ажойиб савдолар кечди бошимдан, менга катта давлат ато этай деб турганди. Вужудимни умид чулғаган, сизни кўнглингизни забт этиш умидида эдим, Каталина... Йўқ-йўқ, азизам, сизни эмас — отангизни. Мен олтин ёрдамида унинг розилигини оламан деган ниятда эдим. Мана қаранг!— Карлос ялтираб турган маъдан ушлаган қўлини олга чўзди.— Бу олтин. Мен олтин топдим. Мен бойликда отангизга тенглашиб, кейин эса розилигига эришаман деган умидда эдим. Минг афсус, энди олтин ҳам ёрдам беролмайди... Аммо сизнинг сўзларингиз менга бахтимни қайта ато этди. Бойлигимдан айриладиган бўлдим деб ўйламанг асло... Йўқ-йўқ, сиз уни хаёлингизга ҳам келтирмайсиз, биламан буни, жонгинам. Мен сизга ҳади эта оламан ўшанча бойликни — балки ундан ҳам ортиқроқни. Бундай қимматбаҳо ахлатни қаердан топса бўлишини биламан, вақтимиз бўлганида барини гапириб бераман сизга. Бугун кечаси...

Каталина унинг сўзини бўлди. Унинг зийрак қулоғи ўзига ғалати туюлган товушни илғаганди. Суҳбатгоҳнинг орқа томонида, худди шамол барғни оҳиста ҳилпиратгандек, нимадир астагина шитирлагандай бўлди. Бироқ шамол йўқ, ҳаттоки «хилп» этган эпкени ҳам йўқ эди-ку, ахир. Демак, бу бошқа нарсанинг шарпаси. Хуш, ниманики бўлди унда?

Бир-икки лаҳза сабр қилиб, суҳбатгоҳдан чиқишиб,

шитирлаш эшитилгандай туюлган буталар орасини пай-
ислаб излаб кўришди, лекин ҳеч нима топа олишмади.
Бутун теварак-атрофни кўздан кечиришди-ю, лекин
ҳеч ерда бундай шитирлатадиган ҳеч вақо йўқ эди. Ҳо-
мир атроф улар суҳбатгоҳга кириб келганларидагига
нисбатан хийла қоронғулашиб қолганди. Ой пастлаб
кетган, унинг кумуштоб ёғдуси хиралашган, бироқ, ҳар-
ҳолда бир неча ярд наридаги ҳар қандай йирик нарса-
ни илғаса бўладиган даражада ёруғ эди. Каталина ян-
глишиши мумкин эмасди. У, шубҳасиз, аллақандай ши-
тирлашни эшитган эди. Балки бу итдир? Карлос кўприк-
чага ўтиб борди. Йўқ, Бизон эгаси қолдириб келган
жойда ётибди. У суҳбатгоҳга яқин йўламаган. Нима
бўлдийкин бу? Қалтакесакмикин ё? Эҳтимол бирорта
ваҳарли илондир?

Илло у нимаики бўлмасин, суҳбатгоҳга қайтиш мум-
кин эмас — улар сиртда қолишади. Каталинанинг кўн-
гидаги нохуш ҳис — ғашлик ғимирлаб қолганди: у йў-
қотиб қўйган хат, устига-устак буёққа чиқаётганида
қайсидир эшикнинг тарақ этгани ёдига тушган эди. Бу-
ларнинг барини ўз дўстига гапириб берди у.

Шу дамгача Карлос содир бўлган ҳолатда табиий
бир ҳодисадир деб кўп аҳамият бермаётган — биз чў-
читиб юборган бирорта парранда қанотини питирлат-
гандир, илон ёки калтакесак ўрмалаб ўтган бўлса ке-
рак, деган ўйда эди. Лекин Каталинанинг сўзлари уни
сергак тортишга мажбур этди. У бунинг замирида би-
рон ғаразли нарса яширинганини дарҳол фаҳмлади. У
неча-неча бор ҳиндулар ҳийла макрига тўқнаш келиб,
тез мулоҳаза юритишга ўрганиб кетган эди. У шу заҳо-
тиёқ ерни диққат-ла синчиклаб кўздан кечириб чиқиш-
га аҳд қилди.

У яна суҳбатгоҳ ортига ўтди-да, чўк тушиб, диққат
билан бута ҳамда майсаларни текшира бошлади. Бирор
сониядан кейиноқ ўрнидан туриб, ҳайрат-ла деди:

— Онт ичиб айтаманки, сиз ҳақсиз, Каталина! Бу
ерда биров бўлганига шубҳа йўқ. Кимдир худди мана
шу ерда ётган. Лекин қаёққа ғойиб бўлдийкин у?..
Э-ҳа, бу аёл киши экан-ку, ахир! Мана кўйлагининг изи.

— Висенса!— нидо солди сеньорита.— Оқсочим Ви-
сенсадан бошқа одам эмас! Ўзингни раҳминг келсин, ху-
дойим! У гапларимизни оқизмай-томизмай эшитибди!

— Албатта-да! Уйдан чиқаётганингизда изингизга тушган у. Локин уни бу ишга ундаган нима бўлдийкин?

— Шурим қурсин-а! Ёлғиз худо билади буни. Кейинги пайтларда жуда ғалати бўлиб қолганди-я ўзи... Сира тоқат қилиб бўлмайдиган даражада! Карлос, жоним,— дея сўзини давом эттирди сеньорита, унинг овозида энди ранжиш эмас, хавотирланиш оҳанги акс этиб турарди,— бу ерда ортиқ қолишингиз мумкин эмас. Ким билади дейсиз, нима машмашаларни бошларкин у? Шартта отамни чақириб чиқсачи! Борди-ю, бундан ҳам бадтарроқ иш қилар... Эй, биби Марям! Наҳотки!..

Шунда Каталина шоша-пиша Карлосга Висенсанинг оддий аскар Хосе билан танишиб қолгани ва бу қизга даҳлдор бари гапларни сўзлаб берди. У ҳозироқ кетиши керак, бирор дақиқа ҳам ҳаяллаб бўлмайди!

— Яхши, мен кетаман,— деди Карлос.— Локин улардан қурққанимдан эмас. Ҳозир карабиндан отишга қоронгилик қилади, қиличлари эса менга етишига йўл бўлсин: ахир вафодор тулпорим ёнгинамда-ку, чақирсам кўз юмиб очгунча етиб келади. Локин, чиндан ҳам кетганим маъқул. Бунинг тагида бир гап бор. Шунчаки қизиқсинганидангина шунчалик тиришмасди-ку бу қизча. Ҳозироқ жўнайман.

Шундай қилиб, Карлос бир қарорга келди. Аммо ҳали дилида айтилмаган қанча-қанча гаплари, яна бир бор ишқий қасамёдлар айтиш, келаси учрашув, эҳтимолки барини ташлаб, Муаззам Текислик орқали жўнаб қолиш олдидан охириги учрашув муддатини белгилаш каби гаплар бор эди.

Карлос кўприкча устига қадам қўйганида неча марта Каталинанинг ёнига қайтди: яна бир оғиз ширин гап айтай, видолашув олдидан яна бир бор бўса олай деб...

Ахийри, сўнги бора «кўришгунча хайр» дейишганча айрилишди ошиқ-маъшуқлар. Каталина уй томонга юрди, Карлос эса кўприкдан ўтишга чоғланди, аммо Бизоннинг ириллаши уни ҳушёр тартиб тўхташга мажбур этди.

Ит яна, бу гал дағдағалироқ ириллади, кейин эгасини хатар яқинлигидан огоҳ этиб ҳуришга ўтди.

Аввалига Карлос кўприкчадан югуриб ўтиб, оти турган жойга отилмоқчи бўлди — ана унда вақтида ғойиб бўлишга улгурарди. Бунинг ўрнига у Каталинани эҳти-

от қилиш ва уни шошилтириш учун дарахтзорга бурилди. Бу пайтда Каталина майсазорга чиқиб олган, лекин итнинг вовуллаганини эшитиб йўлдан тўхтаган эди. Оралдан бир он фурсат ўтмаёқ ёнига Карлос чопиб келди. Бироқ, у қизга бир сўз айтиб улгурмасидан боғ деворлари орқасида отлар дупури эшитилди — ҳар иккала томонда ҳам суворилар от йўрттириб келаётган эдилар. Туёқларнинг тартибсиз дупурлашига қараганда улардан баъзилари от тизгинини тортган, бошқалари девор ёқалаб нарига ўтиб бораётгандилар. Мана тақаларнинг катта кўприкка ташланган ходаларга тарақлаб тегаётгани эшитилди, ўша лаҳзадаёқ ит қутуриб вовуллай кетди-ю, нариги қирғоқдаги дарахт таналари оралиғида сувориларнинг қора шарпалари кўзга ташланди. Боғ қуршаб олинди!

XLVII БОБ

Ошиқ-маъшуқлар суҳбатгоҳга кирганларидан кейин ҳам Висенса узоқ чўккалаб ўлтирганича уларнинг гапларига қулоқ солди; бирорта сўзни ўтказиб юбормади у. Уни суҳбатга қизиқиш эмас, агар кетишга урингудек бўлсам пайқаб қолишади деган ҳадик тутиб турарди бу ерда. У мулоҳаза билан иш тутган эди, зеро ойдинда у кесиб ўтиши лозим бўлган майсазор суҳбатгоҳдан яхши кўриниб турарди. Ой ботгандан сўнггина Висенсада сездирмай жўнаб қолиш умиди туғилди. Шунда у қулай фурсат, ошиқ-маъшуқлар ўзи томонга қарамаётган сониядан фойдаланиб бир неча ярдга ўрмалаб бордида, ўрнидан туриб, жонҳолатда қоронғига қараб югурди.

Қизиқ томони шундаки сеньорита шитирлаган товушни қиз суҳбатгоҳ ёнидан ўрмалаб кета бошлаганда эшитмаган эди. Яхшироқ яшириниш учун Висенса йўлакай бир навдани эгиб, кейин қўйиб юборган, шабба тўғриланиб, барглари шитирлаб кетганида эшитганди. Ана шу боисдан ошиқ-маъшуқлар суҳбатгоҳдан дарҳол чиққанларига қарамай ҳеч нимани топиша олмаган эди. Ўша дамда улар айғоқчини на кўришлари, на шовқини шарпасини эшитишлари мумкин эди. У шабба шитирлаб улгурмасидан буруноқ йўлакка уриб кетганди.

Висенса бирон лаҳза ҳаялламади. У ўз хонасига қайтмади, балки ҳовлидан чопиб ўтиб, дарвозага қараб

ошиқди. Дарвозабонни уйғотиб юборишдан чўчигандек, ташқи ҳовлидан писибгина утиб борди.

Мана Висенса дарвоза олдида; у чўнтагидан калит—дарвозанинг эмас, тавақасидаги дарчанинг калитини чиқарди.

Калитни у керак бўлишини билиб кеча оқшомдаёқ тайёрлаб қўйган эди. Ҳозир уни қулфга солиб, тагини шиқиллаб ёғижирлаб кетмасин учун ғоятда эҳтиёткорлик ила буради. Ғалақани худди ўшандай эҳтиётлик билан кўтарди-да, дарчани очиб, астагина кўчага чиқди. Дарчани секин ва шовқин чиқармай ёпди-да, жони борича яқиндаги ўрмончага элтадиган йўлдан югура кетди.

У ерда, дон Амбросонинг уйи яқингинасида, Робладо билан аскарлари пистирмада турган эдилар. Робладо ўзларини ҳеч ким пайқамаслиги ҳамда режаларига ҳеч нима ҳалал бермасин учун аскарларни буёққа хуфтонда айланма йўл билан бошлаб келганди. Ҳозир эса у ўз айғоқчисини кутиб турган эди ўша ерда.

Қиз кўзлаган ерига етиб бора солиб, зобитга кўрганларининг барини шошганча сўзлаб берди. Эшитганларини такрорлаши учун эса вақт йўқ эди. Робладо унинг кечиккани сабабини билганидан кейин бирон дақиқани ўтказиш мумкин эмас эканини англади. У бостириб боргунича учрашув тугаб бўлиши мумкин, ана унда ўлжаси қўлдан чиқиб кетади.

Башарти Робладонинг ихтиёрида вақт мўлроқ бўлганида, у мутлақо бошқача ҳаракат қилиши аниқ эди. У пайтда капитан одамларидан бир қисмини қуйи йўлдан жўнатган ва улар боққа тўғридан-тўғри яйлов томондан яқинлашган бўлардилар. Шаксиз, у бутун ҳаракат режасини хийла хотиржам ҳамда эҳтиёткорлик ила пухта амалга оширарди.

Бироқ у тўғри, аниғ-у, илло секин ҳаракат қиламан деса кечикиши мумкинлигини тушунарди. Йўқ, ҳозир шошилиш керак, бу кундай равшан! Шундай қилиб, Робладо ўша заҳотиёқ ҳамроҳларига буйруқ берди. Одамларни икки нотенг гуруҳга бўлишди. Бир киши боғнинг ўнг девори, бошқаси сўл девори ёқалаб марра эгаллаши лозим эди; асосий бўлукка девор ёнида бир неча кишинигина қолдириб, бошқалар иложи борича тезроқ от йўрттириб бориб катта кўприкдан нариги қирғоққа ўтиш ва боғдан чиқиладиган йўлни тўсиш

бюрилди. Афтидан, асосий ишни адо этнш айнан ана шу бўлукнинг зиммасига юкланганди — унга Робладонинг ўзи раҳнамолик қилаётган эди. У деворга нарвонини чиқиб бўлмаслигини жуда яхши биларди — демак, мибодо Карлос боғда бўлса, кичик кўприкдан ўтиб қолиб қолишга уринади. Борди-ю, йўлак орқали дарвозани қараб югуриб, кўчага чиқиб олишни хаёл қиладиган бўлса, унда Хомес бошчилигидаги пиёда аскарлар қўлга туширишади — Висенса уларни ички ҳовли тарафдан йўлак оғзигача бошлаб боришни керак.

Режаси чакки эмасди. Робладо бу ерларни яхши биларди. У бу ерда бот-бот сайр қилиб турар ва деворларнинг баландлиги, боғ теварагидаги барча йўлу йўлакчилар беш қўлдай маълум эди унга. Тўғри, агарда боғни аскарлар яқинлаб келишаётганини Карлос пайқаб қолмасидан бурунроқ қуршаб олинганида, муваффақият қозонишларига шубҳа қилмасликлари мумкин эди. У гумдон қилинар ёки қўлга туширилган бўларди.

Айғоқчи етиб келганидан кейин бир неча дақиқа ўтмаёқ Робладо одамларига буйруқ бериб улгурган эди. Яна бир неча дақиқадан сўнг улар ўрмончадан чиқиб, ўзларини дон Амбросионинг уйидан ажратиб турган чоғроққина майдонни кесиб ўтдилар, боғни қуршай бошладилар. Бизоннинг дастлабки огоҳлантирувчи ириллашини худди ана шу пайтда эшитилган эди.

— Қочинг! Қоча қолинг! — қичқирди Каталина Карлос қайтиб келаётганини кўриб. — Мени ўйламанг! Менга тажовуз қилишга ботинишолмайди! Мен ҳеч қандай жиноят қилмаганман. Мени қўяверинг, Карлос қочинг! Ё биби Марям, ана улар!

Йўлакдан чиқиб, боққа қараб отилган одамлар қораси кўринди. Улар қиличларини шарақлатганча, буталарни оралаб тўғри ошиқ-маъшуқларга қараб югуришяпти. Булар пиёда аскарлар эди. Йўлак оғзида бир неча киши қолди, бошқалари чопганча тобора яқинлашиб келишяпти.

Карлос олдинига худди ўша ёққа югурмоқчи эди. Унинг наздида, уйгача чопиб бориб, асотеяга кўтарилиб, настига сакрашга улгурадигандек туюлган эди. Қоронғиликдан фойдаланиб майсазорнинг нариги этагига етиб оларди-да шунда. Бироқ у йўлак кесиб қўйилганини кўрди-ю, бу фикридан қайтди. У боғ деворларига нигоҳ ташлади — бўлмайди, жуда баланд, ошиб ўтолмай-

ди. Ҳаракат қилиб кўрса бўларди, аммо бу орада душманлар ташланиб қолишади унга. Кўприк орқали ёриб ўтиш керак — бирдан-бир нажот йўли шу. Орқага қайтмаслиги керак эканини энди тушунди. Каталинага, ақалли унинг ҳаётига ҳеч қандай хавф таҳдид қилмаётган эди. Аксинча, ёнида қолгани қиз учун хатарлироқ. Уша заҳотиёқ кўприк орқали қочиши лозим эди. Мана энди оти ёнига борадиган йўли кесиб қўйилди. У отини чақириши мумкин, ажойиб тулпори шу ондаёқ чақиришга елиб келади-ю, лекин у чоғда ғанимлари йўрғата ташланадилар, балки тутиб ҳам олишар. Бу эса ҳаётдан жудо бўлди деган гап. Йўқ, асло, отини чақириши мумкин эмас! Карлос чорлов ишорасини бермади. Хўш, нима қилсин ахир у? Каталинанинг ёнида қолаверсинми? Унда зумда ўраб олиб, қўлга туширишар, балки бир ит мисоли ўлдириб юборишар! Бунақада Каталинанинг ҳаётини хавф остида қолдиради-ку, ахир. Йўқ-йўқ! У таваккал қилиб, боғдан чиқиб олишга уришиб кўриши даркор: агар иложи бўлса яйловга ўтиб олиши, уёғига эса...

Карлос уёғи нима бўлиши хусусида ўйлаб ўлтирмади.

— Хайр жонгинам!— деди у ҳаяжонда.— Мен кетишим керак. Хафа бўлиб, куйиниб юрманг! Агар қисматимга ҳалок бўлиш битилган бўлса, сизнинг муҳаббатингизни ўзим билан бирга арши аълога олиб учаман! Хайр! Алвидо!

У шоша-пиша шу қабилда видолашди-ю, шундай тез югуриб кетдики, ўзига қайтарилган жавобни эшитмади ҳам.

Сеньорита тиз чўкди: қўлларини кўксига қовуштирган кўйи, кўзларини кўкка тикиб унга нажот тилаб илтижо қила бошлади.

Карлос бир неча сакрашдаёқ тагин қоп-қоронғи дарахтзорда кўрди ўзини. Нариги соҳилда ғанимлари қорасига кўзи тушди, овозларига қараб улар кўпчилик эканини билса бўларди. Улар шанғиллашиб гаплашишар, бир-бировларини чақиришар эди. Карлос Роблдонинг овозини таниди: у уланларнинг ярмига отдан тушиб, орқасидан кўприкка қараб юришни буюрди. Унинг ўзи аллақачон отдан тушиб бўлган эди.

Карлос яккаю ягона қутулиб кетиш йўли — оёғини қўлига олиб югурганича кўприкдан ошиб, суворилар

Ўдасини ёриб ўтиш эканини кўриб турарди. Фақат шундагина у яйловга етиб олиб, оти томон ўзига йўл очса бўлади чамаси. Эгарга ўрнашиб олганидан кейин уни тутишга уриниб кўраверсинлар! Бу таваккалона — сиф орасидан ёриб ўтиш аҳди деярли ҳалокат билан баробар. Мабодо шу ерда қоладиган бўлса — бу ундан кўра ҳам аниқ ўлим деган гап.

Тараддуланишнинг вақти эмасди. Бир неча киши аллақачон отдан тушиб, кўприкчага қараб юра бошлаганди. Улар етиб келмасидан буруноқ кўприкдан ўтиб олиш лозим. Мана, бирови у ерга етиб келди ҳам. Уни орқага суриб ташлаш керак.

Карлос тўппончаси тепкисини кўтариб, дарча томон отилди. Нариги томондаги одам ҳам яқинлашиб қолди. Мана улар бетма-бет бўлдилар. Уларни эшиккина ажратиб турибди. Ана шунда Карлос қаршисидаги ғаними Робладонинг ўзи эканини кўрди.

Бирорталари чурқ этиб оғиз очмади. Робладо ҳам тўппончасини шай тутиб турган эди, биринчи бўлиб ўқ узди, бироқ ўқи хато кетди. Бу ҳолни англаб, рақибни ўқидан қўрққанидан орқасига тисариларкан, аскарларга карабинлардан отинглар деб қичқирди.

Аммо улар буйруқни адо этишга улгурмаслариданоқ ўқ овози янгради: овчи ўз тўппончасини бўшатганди. Робладо томоғи йиртилгудек лаънат ўқиганича қирғоққа қараб думалаб кетди. Карлос эшикки ланг очиб, олга ташланмоқчи бўлди-ю, лекин дуд ҳамда қоронғилик орасидан ўзини мўлжалга олиб турган карабинлар оғзини илғади. Шунда хаёлига урилди: йўқ, кўприкдан қочиб бўлмайди! Уша ондаёқ аскарлар бу орада карабинлари тепкисини босишга аранг улгурган бўлсалар-да, у янги фикрни амалга оширди.

Йилт этган учқун кўринди, тепки чириқ этиб, вараңлаган товуш янгради, дуд тарқаб бўлганда эса кўприкда Карлос ғойиб бўлган эди. Наҳотки боққа қайтган бўлса у? Э йўқ, бир неча нафар аскар уёққа қайтадиган йўлни кесиб қўйган эди аллақачон!

— Ўлди у!— деган ҳайқирриқлар янгради.— Жин ургур! Сувга қулади у. Ана қараңлар!

Ҳамманинг кўзи сувга қадалди. Тўғри, уёққа биров қулаганди — вижирлаётган кўприклару сув бетида донра бўлиб таралаётган тўлқин халқалари бунинг шаҳодати эди-ю, бироқ бўлак ҳеч вақо кўринмаётганди.

— Чўкиб кетди у! Сувга фарқ бўлди у!— деб қичқирди аскарлар.

— Кўз-қулоқ бўлинглар, тагин сузиб қочиб қолма син-а!— деди аллаким.

Қирғоқлар бўйлаб сувдан кўз узмай югуриб кетишди одамлар.

— Мумкинамас-э! Сувда ҳеч нима кўриниб, ҳеч нима эшитилмаяпти-ку!

— Бу ердан сездирмай қочиб қололмасди у,— деди кўприкдан пича қуйроқда турган аскар.— Мен сувдан кўзимни узмай қараб тургандим.

— Мен ҳам!— деб қичқирди юқорида турган бошиқаси.— Менинг ёнимдан сузиб ўтгани йўқ.

— Демак, ўлган у, сув тагида ётибди ҳозир.

— Келинлар, чангак билан чиқариб оламиз уни!

Аммо бу пайт ўрнидан туриб улгурган Робладо — у қўлидангина яраланганини кўрганди — уларга мазкур ниятларини амалга оширишларига ҳалал берди.

— Қирғоқ бўйлаб тарқалинлар!— бўкирди у.— Ҳариккала томонга! Тезроқ, йўқса қўлдан чиқиб кетади! Тез қимирланлар!

Барчалари буйруқни бажаргани ташландилар, шу пайт қўққисдан оқим ёқалаб қуйига қараб бораётган аскарлар ҳангу манг бўлиб тўхтаб қолишди. Улардан юз ярдча нарида тик қирғоқдан бир одам энкайганча тепага чиқиб бораётган эди. Яна бир сония ўтди — у қаддини ростлади-ю, чақин тезлигида югурганича яйловдан дарахтзор томон отилди.

— Ушла!— деган ҳайриқлар янгради.— Ана у! Авлиёю анбиёлар ҳақи, худди ўшанинг ўзи-ку!

Қуролларнинг қарс-қурс шовқини орасидан чўзиқ ҳуштак овози эшитилди. Отлиқлар то жойларидан кўзгалгунларича чопиб бораётган одам истиқболига дарахтзордан бир от учиб чиқди. Ҳалиги одам бир сакраб, зумда ўзини эгарга олди-ю, баралла, нафратомуз қаҳ-қаҳ урганича, қоронғулик сари от елдирди кетди.

Бу пайт отларига миниб улгурган деярли бари уланлар отларини жон-жаҳдлари ила қичаганча унинг кетидан қувиб қолдилар; бироқ водийда уни пича қувганларидан сўнг таъқибдан воз кечиб, ўзларининг жароҳатланган бошлиқлари ёнига қайтдилар.

Робладо қутуриб кетди дейиш — ҳеч нима демаган билан баробар: унинг шу тобдаги аҳволи-руҳиясини сўз

билан таърифлаш мушкул эди. Илло буёқда иккинчи қурбони бор-ку, ахир, шундоқ экан, бутун аламини ўшандан олиб, заҳрини ўшага сочиши мумкин-ку.

Каталинани боғда, у севгилисига нажот тилаб илтижо қилаётган пайтда қўлга туширгандилар. Уни Хосенинг ихтиёрида қолдириб, бошқалар Карлос таъқибчиларига кўмакка отилгандилар. Хосе овчини яхши биларди, шу боис ўзи кўпда довиюрак бўлмаганидан таъқибда қатнашишга мутлақо ҳаракат ҳам қилмади.

Каталина отишувлар ва ҳайқириқларни эшитиб, жончиқарга олишув бораётганини фаҳмлаганди. Шунингдек у бошқа жами шовқинни босиб кетган қаттиқ ҳуштак ва нафратомуз қаҳқаҳани ҳам эшитганди. Сўнг-ра таъқибчиларнинг ҳайқириқлари олисларда қандай тинганиниям илғаган эди.

Унинг юраги қувонч-ла тепа кетди шунда. У Карлоснинг эсон-омон қутулиб кетганини билган эди.

Энди, ана шундан кейингина ўзи тўғрисида ўйлади. У ҳам қочиб қолиш ниятида эди. Қиз бу ярамасларнинг қабих бошлиғининг ҳақоратомуз истеҳзоли кулгисини эшитишига тўғри келишини биларди. Нима қилсин, ўша мурдор билан тўқнашувдан қандай қутулсин экан? Хосени кўндиришдан бўлак чора йўқ. Бу одамнинг пасткаш марази эканини биларди қиз. Олтинга ўч эмасмикин у? Синаб кўриш керак. Синов муваффақиятли чиқди. Катта пул олдида ўзини тиёлмай қолди. Истаган вақтда яна қўлга олса бўладиган асирани мабодо қочириб юборса ўзини унчалик қаттиқ жазола-масликларига ақли етди унинг. Бунча пул эвазига у капитаннинг норозилигига учрайди, албатта. Лекин капитаннинг унга мурувват кўрсатишига маълум сабаблар ҳам йўқ эмас. Алқисса, пул тутқазилди-ю, сеньоританинг жўнаб қолишига ижозат берилди.

Бу ҳолга қочиб кетди деган тус бермоқлик учун Хосе унга ўз хонасини ичкаридан қулфлаб олишни ўтинди; бека буни рисоладагидек адо этди.

Робладо кўприкдан ўтиши биланоқ уни Хосе қарши олди-ю, дудуқланганча, энтика-эптика, сулув асиранинг уйга қочиб кириб кетганини хабар қилди. У сирғалиб чиқиб, қочиб кетибди. Оддий асира бўлганида у албатта отиб ташлаган бўларкан. Орқасидан қувиб, ўз хонасига кираётгандагина етиб борибди у, бе-

ка ичкарига кира солиб: эшикни нақ башарасига тарақлатиб ёпиб олибди-да!

Жазаваси қўзиган Робладо дастлабига уйга бостириб кирмоқчи ҳам бўлди. Бироқ у ўйдан қайтди, кулгили кўриниши мумкин, иннайкейин, қанчалик фойдаси бор дегн буни. Жанг майдонидан мағлуб сифатида чекиниш уни ўзига келтириб, яраланган қўлидаги оғриқни ёдига солди.

У тагин кўприкдан қайтди, аскарлари кўмагида отига минди-да, шавкатли лашкарларини йиғиб, ушбу тўстўполоннинг сабаби хусусида фол боқишни уйғотиб юборилган шаҳар аҳлига ҳавола қилганча, қалъа сари йўлга тушди.

XLVIII БОБ

Эртасига эрта билан шаҳар аҳлининг оғзидан тунги воқеалар тушмай қолди. Аввалига ҳиндулар бостириб келибди, аскарлар ҳар доимгидек уларнинг ҳамласини қайтаришибди деб тахмин қилдилар. Халқнинг қандайин ҳимоячилари-я улар!

Кейин, қотил Карлосни ушлашибди, отишма пайтида эса капитан Робладони ўлдиришибди, деган овоз тарқалди. Кўп ўтмай эса Карлоснинг қўлга тушмагани — уни пойлашгани, сал бўлмаса қўлга туширишаёзгани аён бўлди. Робладо у билан яккама-якка олишиб, уни яралабди, аммо жиноятчи қоронғида ўзини анҳорга отиб қочиб қолибди. У капитанни қўлидан ярадор қилибди, ана шунинг учун ҳам капитан уни асирга тушира олмаган эмиш.

Бу овоза қалъанинг ўзидан тарқалган ва ҳақиқатга яқинроқ эди. Карлоснинг жароҳатлангани хусусидаги гапни эса Робладонинг хатти-ҳаракатига жило бериш ниятида тўқиб чиқаришганди; лекин кейинроқ маълум бўлишича бизон овчиси бирон ери ҳам тирналмай-нетмай ғойиб бўлибди.

Одамлар ҳайратдан ёқаларини ушлардилар: жиноятчи ўзининг боши эвазига мукофот ваъда қилинганини била туриб шаҳарга доринга қандай журъат этибдидийкин-а? Бундай қилишга муҳим сабаби бордир-да. Ҳадемай сабаби ҳам маълум бўлди — бутун воқеа сирга қалқиб чиқди. Гийбатчию фисқи-фасодчиларга ро-

са байрам бўлди денг-а! Каталина аллақачонлароқ Сан-Ильдефонсонинг олди гўзали деб тан олинган эди, мава энди бўлса ҳасадчи аёллар ва рашкчи эркаклар унга осмондан келиб, нописандлик ила қарашлари мумкин. Унинг шаънига доғ тушган эди. Унинг қилмиши нотенг, зўраки никоҳдан ҳам беш-бадтар ёмонроқ. Маҳаллий киборлар Каталинанинг қашшоқ, гадодай бир кимса билан яқинлашиб обрусини ер билан битта қилганидан ғазабланса, мутаасибларча художўй шаҳар камбағаллари уни «қотил» билан, ундан ҳам ёмони — «шаккок» билан яқинлигини қоралар эди.

Ушбу ҳодиса ақл бовар қилмайдиган даражада алгов-далговга, салкам саросимага сабабчи бўлди. Овчи бошининг нархи биржадаги қимматли қоғозлар баҳоси сингари кўтарилиб кетди. Капитул Уйда шаҳар бошқармаси кенгашининг аъзолари билан маҳаллий дўкайлар тўпландилар. Янги эълонлар осилди. Эндиликда Карлосни қўлга туширган кимсага янада каттароқ пул ваъда қилинган эди эълонда; бундан ташқари уни озиқ-овқат билан таъминлаган ёки унга ҳайрхоҳ бўлган ҳар қандай одамга қаттиқ жазо берилажаги айтилганди. Бизон овчисига ўз бошпанасидан паноҳ берган гражддан эса тегишли жазони олибгина қолмай, шунингдек, унинг бор бисоти мусодара қилиниши ҳам эслатилган эди.

Черков ҳам четда қолгани йўқ. Дин пешволари худонинг қаҳри билан қўрқитишар ва шаккок қотилнинг оқил судловга тортилишига халал бергувчи ҳар қандай кимсани муртад, кофир деб эълон қиламиз, дея дағдағага ўтган эдилар.

Қочоқ ана шундай ночор аҳволда қолган эди. Яхшиямки Карлос бошпанасиз ҳам кун кечира оларди. У ғанимлари очдан ўладиган хувиллаган дашт кенгликларида ҳам, тоғдаги қоя-тошлар қуршаган дараларда ҳам ўз уйдагидек ҳис қиларди ўзини; кейин, ғанимлари уни ахтариб буёқларга юрак ютиб келолмасдилар ҳам. Башарти Сан-Ильдефонсо аҳлидан егулигу паноҳ излашга тўғри келган тақдирда ҳам бари бир дарҳол хабар бериб, унга хиёнат қилишлари тайин эди. Аммо прериянинг ёввойи истиқоматчиларининг бу нарсаларга эҳтиёжи қапчалик кам бўлса, овчи ҳам ўшанчалик муҳтож эди буларга. Яшил ўтлоқ билан яланғоч қоя унга тўшак хизматини ўташи мумкин эди,

Ўзига егулик топишни эса у ҳатто ҳеч вақо унмайди-ган беҳосил Льяно Эстакадодаям удласидан чиқарди, уёқларда таъқибчиларнинг бутун бошли лашкари писанд эмасди овчига. Дон Амбросио кенгашда қатнашмади. Бошига тушган мусибат алами ва ғзаб уни уйга михлаб қўйганди. У билан қизи орасида қаттиқ можаро бўлиб ўтди. Қизни бундан буён муттасил қўриқлайдиган, отасининг уйда асирадай сақлайдиган бўлдилар — ушбу жазо уни итоаткорликка ўргатади-да, ахир!

Робладо билан комендантнинг аҳволи руҳиясини тавсифлашнинг иложу имкони йўқ. Улар ғзабдан нақ бўғилаёзмоқда эдилар. Улар аламлари, умидсизлик, зўрлик, жисмоний ҳамда руҳий изтироблардан ақлдан озишларига бир баҳя қолганди. Кунбўйи уйдан чиқмадилар, ўзларининг ашаддий рақибларини қандай қилиб қўлга тушириш устида бош қотириб, чамалаб, режа тузишдан бўшамадилар.

Вискаarra муваффақиятга эришишга қанчалик ташна бўлса, Робладо ҳам ўшанчалик ғалаба иштиёқида ўртанарди. Ҳар иккалаларининг ҳам Карлосни ёмон қўришларига етарлича асослари бўлиб, икковлариниям уни қўрарга кўзлари йўқ эди.

Робладо ҳаммасидан кўра, эҳтимолки, бир неча ҳафта давомида таъқибда шахсан ўзи иштирок эта олмаслигидан ич-этини ерди. Гарчи жароҳати хавфли бўлмаса-да, қўлини боғлаб, бўйнига осиб юришига тўғри келар, шу сабабдан у отини бошқаролмасди. Эндликда у билан комендантнинг ҳаракат режаларини жиноятчини қўлга туширишдан уларчалик манфаатдор бўлмаган бошқа биров бажаради. Яхшиямки Санта-Федан, штаб қароргоҳидан икки лейтенантни юборишибди, йўқса гарнизон вақтинчаликка умуман зобитларсиз қоларди. Лекин янгилардан ҳеч қайсиси — на Яньес, на Ортига — бизон овчисини қўлга туширишга қодир эмасди. Уларни жасорати етишмайди деб бўлмасди, ақалли Ортига хусусида; бироқ икковиям Испанияда яқиндагина келган ва буёқларда, чегарада қандай жанг қилаётганларидан беҳабар эдилар.

Аскарлар жиноятчини бажонидил таъқиб этаётган ва ибрат олса арзигундек даражада ғайрат кўрсатаётган эдилар. Улар ваъда қилинган катта мукофот дардида овчинини тутишга интилишар ва ҳар гал разведка-

ги жон-жон деб жунашар эди. Аммо-лекин Карлосга ҳамла қилишга фақат кўп сонли бўлуккина ботина олиши мумкин эди. Ёлғиз ўзи ёки икковлашиб — ҳатто мақталган ўша Хомес ҳам бундан мустасно эмасди — унга милтиқ ўқи етадиган масофада яқинлаб боришга ҳеч ким ботина олмасди, овчи билан бетма-бет келиб, уни ушлашга уриниб кўринишни-ю, асти қўя туринг.

Улардан аксарияти Карлоснинг беқиёс довьораклигига шахсан ишонч ҳосил қилган, бошқалари эса бу тўғридаги кўпиртириб, бўяб-бежаб таърифланган ҳикояларни эшитганди, оқибатда гарнизонда ундан шундай кўрқар эдиларки, Карлоснинг пайдо бўлишининг ўзиёқ бутун бошли бўлукни тирқиратиб юбориши ҳеч гап эмасди.

Бизон овчиси аслида ҳам эпчил, бақувват ва кўрқув иммалигини билмайдиган довьорак йигит эди, маҳаллий иқолининг бой тасаввуроти эса ана шу сифату хислатларни бўрттиргандан-бўрттира борарди. Бу ҳам камлик қилгандек, аскарлар ҳам, оддий фуқаро ҳам Карлоснинг сеҳрлангани, шу боисдан ўлмас одамлигига имонлари комил эди; ахир унга жодугар онаси ҳомийлик қилади-да — ўзгача сўз билан айтганда, унинг ҳомийси иблиснинг ўзгинаси! Кўпчилик, унга на ўқ ўтади, уни на найза олади, на қилич чопади, деб таъкидларди, кўприкдаги олишув пайтида унга карабиндан ўқ узганлар эса бунга буткул ишонардилар. Улардан ҳар бири ўқи Карлосга текканига, иблис ҳимоясида бўлмаганида уни муқаррар асфаласофинга жўнатган бўлишига қасам ичишга ҳам тайёр эди.

Аскарлар ва водий аҳли орасида ғаройибу антиқа ўйдирма гаплар тарқалиб турарди. Карлос гоҳ у, гоҳ бу ерда, яна ўзининг кўмирдек қора отида (от ҳам сеҳрланганга чиққан эди) пайдо бўлиб қоларди. Овчини исситоғликнинг нақ қиррасида кўришибди — у шундоққина даранинг ёқасида отини учуриб бораётган экан, ҳатто сигарасининг кулини пастга, водийга силкиб тўкса бўларкан шу кетишида. Бир хиллар уни кечаси бутазорлардаги овлоқ сўқмоқларда учратишган эмиш, уларнинг гапларига қараганда овчининг юзию қўллари қип-қизил, лағча чўғдек шуъла таратаётганмиш. Чупонлар уни тепада, Қиз ўлган қояда, иннайкейин, ҳағтоки пастда, водийда ҳам кўришганмиш-у, лекин ҳеч бирлари юрак ютиб унга яқинлашиб, у билан гаплаша

олмабди. Ҳамма ундан ўзини четга олибди, ҳар
у билан учрашишдан қочибди. Аллақим ҳатто
лоснинг кўприкчадан дон Амбросионинг баша
кетаётганини ўзим кўрдим, деб тасдиқлабди, ан
дан сўнг вафодор Каталинанинг шаънига иши
бату бўҳтонлар бамисоли дўлдай ёғилл кетди
воқе, бадҳоҳларнинг ҳафсалалари пир бўлиб,
пучга чиқди, зотан уларнинг эшитишларича,
рикча таги-тугида йўқ — дон Амбросио қизини
муносиб қилмишини билган кунининг эртасига
бузиб ташлашни буюрган экан.

Ирим-сирим, бидъат Янги Мексиканинг охи
устидан шундайин ҳукмронким, жаҳоннинг
сундай эмас. Бидъатни бу ерда диннинг негизи
кил этади дейиш мумкин. Қуёшпарастлар орада
эътиқодини тарғиб этгувчи миссия пешволари
хурофий бидъатларни рағбатлантириб, уларани
фратлари йўлида фойдаланар эдилар. Шу бондан
ларнинг мазкур ирим-сиримларнинг баридан
қанчалик бемаънию тутуриқсиз бўлмасин —
маганини мутлақ тушунардилар. Ана шунинг
янги мексикаликлар афсунгарлик ва афеунгар
гарларга худога ишонгандан заррача кам иш
лар.

Модомики шундоқ экан, бизон овчиси Кар
ишларига иблис аралашганидан ажабланиш
кан. Унинг чавандозлик маҳорати, таъқибчи
шундоққина бурнилари остидан қочиб қолган
ҳатто муъжиза ҳисобламаган чоғда ҳам — тайр
ҳамда романтик бир ҳол эди, албатта. Аммо
дефонсо аҳли бунга эндиликда бошқача қарар
лосга иблис ёрдам беради: байрам кунини бу
дайин чаптастлик ила қулатгани, қарқарини
қиб олиб, тубсиз жар ёқасида от ўйнагани
лиги ҳам, кейин карабинлару найзалардан тир
лат емай, соғ-саломат қутулиб кетгани ҳам —
иблиснинг иши!

Бироқ ғалати томони: сўнгги кунларда
ноятчини учратишга уринмаган кимсидар ун
тўқнаш келадиган бўлиб қолди, унга албатта
келишни истовчилар эса сира эришолмасди
тенаитлар Яньес ва Ортига ўз аскарлари билан
кун, эрта тонгдан қаро кечгача тегирик

Карлос келиши мумкин бўлган жамики
муъайян бўлган талайдан-талай айвоқчилар ҳам
қўлига олимаётган эдилар. Бугун уни бир
дефода дейишса, эртасига бошқа жойни айтишар-
дилар. Ушунга айтилган жойга от солиб қолишар-
дилар. Ҳар гал қора от минган бирор чорвадорни овчи
қилганлари маълум бўлиб қоларди. Аскарлар то-
лиқига нега тушгандан-тушиб борадилар, ахий-
роқ бесамара таъқиблар одамларни ҳам, отлар-
ни бутунлай ҳолдан тойдирди. Шунга қарамай, маз-
курлар гарнизоннинг бирдан-бир вазифаси бўлиб
қолган токи ихтиёрида ақалли битта аскар
қолганига қадар таъқибдан воз келишини хаёлининг
дан ҳам келтирмасди.

Бундан жойни айниқса ҳушёрлик ишла кузатардилар.
Ушунга қўлига олган аскарлар билан махсус ёл-
ма хуфиялар кечасию кундузи кўзи узишмасди уша
қилди. Бу бизон овчисининг ранчоси эди. Кийимини ўз-
гартирган аскарлар билан хуфияларни шундай жойлаш-
тирдиларки, улар ўзлари панада қолиб, уй ташқариси-
да қолган ивоқеаларни кўриб турардилар. Улар кун-
дан-кун маррани, кечаси бошқасини эгалладилар, бир
кундан иккинчиси билан алмашинарди, шу
қилди. Буларнинг бирор дақиқага бўлсин узилмасди. Илло,
бу илло бўлса, Карлосга ҳужум қилиш хуфиялар
қилганига кирмасди. Улар яқин орада шай турган бў-
лганлар беришлари лозим эди, холос, ана ундан ке-
либ қолган жонотчини қўлга олишга етарли куч бор эди.
Ушунинг онаси билан синглиси яна ўз ранчалари-
да бошлагандилар. Пеонлар ушунга тузатиб, бошқат-
тирган эдилар; бунинг унчалик қийини жойи йўқ эди,
улар жонотлари ёнғиндан зарар кўрмаганди. Қисқаси,
улар қилганлари илгаригидек шинам бўлиб қолган эди.
Бу ким Карлоснинг онаси билан синглисининг тин-
члиги — негаки улар ўзлари тинч узлуксиз куза-
ришларини билмасликлари керак эди-да, ахир. Улар-
нинг тоқит-да муносабатда бўлаётганлари беғараз
қилди. Ҳар бир ҳаракатларини сертаклик билан ку-
затарди. Ранчодан чиқди дегунча изларига тушиш-
тирган уйдан чиққани ҳақдаги хабарни дарҳол пис-
мо билан турган бўлук бошлиғига етказиш лозим эди.
Ушунга қадар буйруқни бажармаган ҳар қандай ким-
ни қўлига жазо таҳдид қиларди.

олмабди. Ҳамма ундан ўзини четга олибди, ҳаммалари у билан учрашишдан қочибди. Аллаким ҳатто, Карлоснинг кўприкчадан дон Амбросионинг боғига ўтиб кетаётганини ўзим кўрдим, деб тасдиқлабди, ана шундан сўнг вафодор Каталинанинг шаънига янги-янги гийбат у бату бўҳтонлар бамисоли дўлдай ёғила кетди-да. Дарвоқе, бадҳоҳларнинг ҳафсалалари пир бўлиб, умидлари пучга чиқди, зотан уларнинг эшитишларича, ҳозир кўприкча таги-туғида йўқ — дон Амбросио қизининг номуносиб қилмишини билган кунининг эртасигаёқ уни бузиб ташлашни буюрган экан.

Ирим-сирим, бидъат Янги Мексиканинг оми халқи устидан шундайин ҳукмронким, жаҳоннинг ҳеч ерида шундай эмас. Бидъатни бу ерда диннинг негизини ташкил этади дейиш мумкин. Қуёшпараастлар орасида Рим эътиқодини тарғиб этгучи миссия пешволари талай хурофий бидъатларни рағбатлантириб, улардан ўз манфаатлари йўлида фойдаланар эдилар. Шу боисдан қавмларнинг мазкур ирим-сиримларнинг баридан — улар қанчалик бемаънию тутуриқсиз бўлмасин — воз кечмаганини мутлақ тушунардилар. Ана шунинг учун ҳам янги мексикаликлар афсунгарлик ва афсунгару жодугарларга худога ишонгандан заррача кам ишонмайдилар.

Модомки шундоқ экан, бизон овчиси Карлоснинг ишларига иблис аралашганидан ажабланиш жоизмикан. Унинг чавандозлик маҳорати, таъқибчиларнинг шундоққина бурнилари остидан қочиб қолгани — буни ҳатто муъжиза ҳисобламаган чоғда ҳам — ғайриодатий ҳамда романтик бир ҳол эди, албатта. Аммо Сан-Ильдефонсо аҳли бунга эндиликда бошқача қарарди. Карлосга иблис ёрдам беради: байрам кунини буқани қандайини чаптастлик ила қулатгани, қарқарани ердан юлқиб олиб, тубсиз жар ёқасида от ўйнатгандаги эпчиллиги ҳам, кейин карабинлару найзалардан тирноқчаликлат емай, соғ-саломат қутулиб кетгани ҳам — ҳаммаси иблиснинг иши!

Бироқ ғалати томони: сўнги кунларда умуман жиноятчини учратишга уринмаган кимсалар унга тез-тез тўқнаш келадиган бўлиб қолди, унга албатта рўпара келишни истовчилар эса сира эришолмасди бунга. Лейтенантлар Яньес ва Ортига ўз аскарлари билан кунбакун, эрта тонгдан қаро кечгача теварак-атрофда беҳуда

енишарди. Карлос келиши мумкин бўлган жамики ерларга жўнатилган талайдан-талай айғоқчилар ҳам оинини йўлиқтира олмаётган эдилар. Бугун уни бир ерда кўрдик дейишса, эртасига бошқа жойни айтишарди. Таъқибчилар ўша айтилган жойга от солиб қолишардию, ҳар гал қора от минган бирор чорвадорни овчи деб ўйлаганлари маълум бўлиб қоларди. Аскарлар тобора сохта изга тушгандан-тушиб борардилар, ахийри бундай бесамара таъқиблар одамларни ҳам, отларни ҳам бутунлай ҳолдан тойдирди. Шунга қарамай, мазкур излашлар гарнизоннинг бирдан-бир вазифаси бўлиб қолди: комендант токи ихтиёрида ақалли битта аскар қолмагунига қадар таъқибдан воз кечишни хаёлининг кўчасига ҳам келтирмасди.

Бир жойни айниқса ҳушёрлик ила кузатардилар. Кийимини ўзгартириб олган аскарлар билан махсус ёлланган хуфиялар кечасию кундузи кўз узишмасди ўша ердан. Бу бизон овчисининг ранчоси эди. Кийимини ўзгартирган аскарлар билан хуфияларни шундай жойлаштирдиларки, улар ўзлари панада қолиб, уй ташқарисидан бўлаётган воқеаларни кўриб турардилар. Улар кундузи бир маррани, кечаси бошқасини эгалладилар, бир кинирин пойлоқчи иккинчиси билан алмашинарди, шу тариқа кузатув бирор дақиқага бўлсин узилмасди. Илло, агарда пайдо бўлса, Карлосга ҳужум қилиш хуфиялар вазифасига кирмасди. Улар яқин орада шай турган бўлукка хабар беришлари лозим эди, холос, ана ундан кейин эса жинойтчини қўлга олишга етарли куч бор эди.

Овчининг онаси билан синглиси яна ўз ранчоларида яшай бошлагандилар. Пеонлар уни тузатиб, бошқатдан ёпган эдилар; бунинг унчалик қийин жойи йўқ эди, чунки деворлари ёнғиндан зарар кўрмаганди. Қисқаси, бошпаналари илгаригидек шинам бўлиб қолган эди.

Ҳеч ким Карлоснинг онаси билан синглисининг тинчинини бузмасди — негаки улар ўзларини узлуксиз кузатиётганларинин билмасликлари керак эди-да, ахир. Уларга сабр-тоқат-ла муносабатда бўлаётганлари беғараз эмасди: ҳар бир ҳаракатларини сергаклик билан кузатишяпти. Ранчодан чиқди дегунча изларига тушишзди; улар уйдап чиққани ҳақдаги хабарни дарҳол пистирмада турган бўлук бошлиғига етказиш лозим эди. Ушбу қатъий буйруқни бажармаган ҳар қандай кимсага қаттиқ жазо таҳдид қиларди.

Бунинг бари тушунарли эди. Вискаarra билан Робладо Карлос бу ерларни бутунлай ташлаб, онаси на сингилисини олиб кетади деган шубҳада эди. Нега энди шундоқ қилмасин? Нега энди бу ерлардан жўнаб кетмасин? Сан-Ильдефонсо водийси эндиликда ушга ватанлик қилмайди, айни пайтда Муаззам Текисликнинг нариги тсмонида осонгина бошпана топа олади. Бу ерда у бир умрга муртад деб эълон қилинган. Ёлғиз ажалгина уни муттасил ҳаётдан хавфсираш таҳликасидан халос эта олади, холос. Ана шу сабабдан ҳам ҳар иккала зобит Карлосни ўзга ўлкаларга жўнайди деб ҳисобларди. Лекин у, албатта, онаси билан сингилисини — токи уларни гаров тариқасида тутиб турган эканлар — ташлаб кетмайди. У бу ердан олисга бормайди. Эртами ё кечми бу тулки қопқонга илинади, ана унда жазосини беришади.

Комендант билан унинг капитани ана шундай мулоҳаза юритишарди, айнан шу боисдан ҳам ранчони ниҳоятда қаттиқ қўриқлаш буюрилган эди. Унинг истиқоматчилари, ўзлари буни хаёлларига ҳам келтирмаган ҳолда, чинакамига асира эдилар — ҳарҳолда Вискаarra билан Робладо шундай деб ўйлашарди.

Уларнинг жамики ҳийлагарона режаларига қарамай, хуфиялар, айгоқчилару аскарлар иш кўраётгани, ваъда қилинган мукофотлару беражак қаттиқ жазоларига қарамай кун ортидан кун ўтиб борар, жиноятчи эса илгаригидек озодликда қолаётган эди.

XLIX Б О Б

Карлос кўпдан сувга чўкиб кетгандек дом-дараксиз ғойиб бўлган, унинг хусусида келаётган маълумотлар текширувдан сўнг ёлғон бўлиб чиқаётган эди. Комендант билан ҳамкасабаси безовталана бошладилар. Борди-ю, у ростдан ҳам бу ердан бошқа ўлкаларга бутунлай кетиб қолган бўлса-чи? Эндиликда улар ҳаммасидан кўра ана шундан кўпроқ қўрқардилар. Ҳар икковларида унинг бу ердан олисроққа кетишини ишташга асослари борийди, иннайкейин, яқингинада улар ишнинг бундай оқибатидан жуда-жуда қувонган бўлардилар ҳам. Аммо Карлосни қўлга тушириш борасидаги муваффақиятсиз уринишдан кейин икковлариям — маишат иш-

қибози ҳам, сеп овчиси ҳам — буни истамай қолишган эди. Бетизгин интиқом истаги бировининг манфурона муҳаббатю иккинчисининг ҳарисона тамагирлигидан устун келганди. Бошларига тушган мусибатга умумжамоатнинг ҳамдardлиги уларнинг ғазабини янада авж олдириб юборган эди. Ушбу ғазаб қури тугаб қолади деб хавотир олмаса ҳам бўларди. Вискарра учун кўзгуга боқишнинг ўзи кифоя эди — ана шунда ғазаб ўти кўксиди қайтадан аланга олиб, ловуллаб кетарди.

Мана, Вискарра билан Робладо қалъа асотейсида тахминлари ҳақу ноҳақлиги устида мулоҳаза юритиб ўлтиришибди.

— У синглисини жонидан ортиқ кўради,— деди комендант,— кейин, жодугар бўлишига қарамай, опасиниям. Шундаям, ҳар қалай, ҳар қайсисини жони ўзига ширин, қадрдоним Робладо. Кўйлагим ўзим учун қимматли-ю, лекин ўз терим ундан азизроқ. Мабодо бу ерда қоладиган бўлса, эртами-кечми қўлимизга тушишига жуда яхши ақли етади, кейин ана унда ҳоли не кечишиниям билади. Тўғри, қойиллатиб қочиб қолди у, лекин ҳамишаям шунақанги омади келавермайди-ку. Кўза ҳар куни эмас, куни битганда сиғади. Аблах жуда айёр — бу мақолни билади, албатта. Ана шу сабабдан ҳам уни, ҳарҳолда, бу ердан жўнаб қолмадимикин деб қўрқаман. Эҳтимол бутунлай эмасдир-у, лекин яқин-орада қорасини кўрсатмас-ов, ҳар қалай. Дейлик, бу қайтади ҳам, илло биз қандай қилиб узлуксиз кузатамиз уни? Бунақанги кузатиш нақ иблисининг ўзиниям адойи тамом қилади-ку. Гранада қамали олиҳиммат қирол Фердинанднинг, ифлос кўйлак ва унинг жангари рафиқасининг қанчалик жонига теккан бўлса¹, бу ҳам ўшанчалик жонимиздан тўйдиради. Худо ҳаққи, шундоқ ҳам меъдамга тегиб бўлди ўзи!

— Агарда биздан қочиб қутилиб кетса ёмон бўлади,— эътироз билдирди Робладо.— Ундан кўра мен бир умр изидан қувиб юрганим маъқул.

— Ҳа, ҳа, мен ҳам, капитан. Тағин мени, кузатув-

¹ Испан қироли Фердинанд I (1452—1516) ва унинг рафиқаси Изабелла Гренадани — маврларнинг Испаниядаги сўнгги таянчларини узоқ муддат қамал қилиб турганлар. 1492 йили Гренада таслим бўлган. Афсоналарга қараганда Изабелла токи Гренада қўлга киритилмагунича кўйлагини алмаштирмасликка оинт ичган экан.

дан воз кечиш ниятида экан, деб ўйламанг асти Асло, жин урсин! Менга бир қаранг-а!

Афтини хунугини чиқарган чандиқ эсига тушиб қолди-ю, Вискарранинг юзи алаמידан янада таъвия кўриниб кетди.

— Бўлиб ўтган шунча савдолардан кейин,— сўзини давом эттирди у,— ҳар қалай, ҳатто қисқа муддатга бўлсаям, уларни ташлаб кетиши даргумон. Синглисини ахтариб келганида жонини қанчалик хатарга қўйганини эслаб кўринг-а.

— Албатта,— ўйчан жавоб қилди Робладо,— албатта. Мени ҳаммасидан унинг тундаёқ, Росита қайтиб борган ўша тундаёқ нима учун жўнаб қолмагани кўпроқ ажаблантиради... Ахир, хатига қараганда у ўша ерда, ўз ранчосида бўлган-ку. Тўғри, белоён даштликни босиб ўтиш учун сафарга тайёргарлик кўришга вақт керак. Бизга қарашли бирорта кент ё қишлоққа кўчиб ўтмайди, олисга кетиш учун эса ҳозирлик кўриш керак — ҳеч бўлмаганда аёллар. Унинг ўзига-ку, балки, дашт ўз уйидай бир гапдир, у ерларда оҳу ёки дашт бўрисида ёмон сезмас ўзини. Шундоқ бўлгач, агар ис-таганида ўшандаёқ уларни олиб жўнаб қолиши мумкин эди ҳарҳолда.

— Биз ўша куни кечаси ранчосига одам юбормай хато қилибмиз,— деб қўйди Вискарра.

— Агарда қўлдан чиқиб кетади деб чўчиганимда, албатта юборган бўлардим.

— «Агарда» деганингиз қандоқ бўлди? Нима, чўчмаганмидингиз? Ахир ундан шуни кутиш мумкин эмасмиди?

— Тариқчалик ҳам,— деди Робладо.

— Сизни тушунолмай қолдим-ку, қадрдоним капитан. Буёғи қандоқ бўлди?

— Мана бундоқ, водийда уни онаси билан синглисига қараганда кучлироқ тортиб турадиган оҳанрабо бор, мен эсам буни билардим.

— Гап буёқда денг! Энди тушуна бошладим сизни.

— Ҳа, шундоқ!— ғижиниб, тишларини ғижирлатиб сўзини давом эттирди Робладо.— Худди ана шу жонон, тенги йуқ гузал ҳар қандоғига ҳам менга хотин бўлади бари бир. Ҳа-ҳа-ҳа! У жонони билан дийдор кўришмай кетолмасди. Шундай, дийдор кўришишди ҳам, лекин бу сўнгги учрашувлари эканини, ортиқ учрашол-

масликларини гаплашиб олишдими йўқми, ёлғиз ярат-
лига аён. Аммо ҳечқиси йўқ, улар учун мен ҳал қи-
либ қўйдим, бунда дон Амбросио кўмаклашди менга.
Жини урсин, энди қиз кечалари бошқа сайр қилмайди
деган умиддаман! Йўқ, у қочиб кетгани йўқ. Мен йўл
қўймайман — бунинг иккита сабаби бор. Аввало хо-
шимни деб... Ҳеч қачон севиб қолганмисиз ўзи? Демок-
риманки, чинакамига севганмисиз ҳеч?— Шундай деб
у тағин кулиб юборди.

— Чамаси, бир марта шунақанги гуноҳ қилгандиг-
ов,— жавоб қилди Вискарра ҳам кулиб.

— Хўш деганингиздан, менинг ҳаётимда ҳам шу-
нақанги аҳмоқона воқеа содир бўлган. Нимаям дердим,
унда ўзингиз билишингиз керак: мабодо одам жиддиян
севиб қолган бўлса, уни кўнглини ром этган маъшуқа-
си яшайдиган жойдан ҳеч қанақанги арқон билан тор-
тиб силжитолмайсиз. Худди шундоқ; ўйлайманки, гар-
чи мутлақо тенги бўлмаса-да, овчимиз каминанинг бў-
лжак рафиқасини севади ва унга сажда қилади. Ҳа-
ҳа ҳа! Шунинг чун ишонавериинг, токи дилида яна бир
марта яширинча учрашув умиди бор экан, ҳеч қандай
хавфу хатар, ҳатто дорга осилиш ваҳимаси ҳам уни
Сан-Ильдефонсонни ташлаб кетишга мажбур этолмай-
ди. Хўш деганингиздан, сеньоританинг ўзига талпиниб
турганини билгани туфайлидан эса ўша умидини уз-
ганича йўқ у. Иккинчи асос — уни ҳали ҳозирча яқин-
итрофда яшириниб юрибди деб ўйлашга асос — бу худ-
ди сиз айтган нарса. Шунча воқеалардан кейин онаси
билан синглисини ташлаб кетиши даргумон. Худога ёки
иблисга шукрки, ундан ташқари ҳаммани чалғитган
бўлишимизга қарамай, уни лақиллата олмадик. У ба-
ридан хабардор, Висенса буни тасдиқлаб берди биз-
га. Ана шунинг учун уларни узоқ муддатга ташлаб кет-
маслигига имоним комил. Бу овчи дашт бўрисидай
айёр, у қаерга пистирма қўйганимизни сезган шубҳа-
сиз, кейин, қўйган хўрагимизниям билади, шу сабаб-
дан кўзимизга чалиниб қолмасликка ҳаракат қилиши
турган гап. У ҳечам узоққа кетмаган, анани лаънати
пеонлари орқали онаси ва синглиси билан алоқа боғ-
лаб туради.

— Хўш, унда нима қилишимиз керак?

— Мен буни аллақачон ўйлаб қўйганман.

— Агарда пеонларнинг истаган жойларига бориш-

ларига тўсқинлик қиладиган бўлсак, улар ранчо агрофига пистирма қўйганимизни дарров билиб қолишади.

— Шубҳасиз, комендант. Бу сираям ярамайди!

— Сиз бирорта бошқача режа ўйлаб қўйганмисиз?

— Қисман.

— Қани, айта қолинг унда!

— Гап бундоқ, эшитинг. Пеонлардан баъзилари мутасил Карлоснинг уясига қатнаб туради. Бунга ишончим комил. Ана ўшаларни изидан кузатишяпти, албатта, лекин улар фақат кундузи йўлга чиқишар экан, кейин, десангиз, ҳар сафар ўзларининг одатдаги юмушлари билан юрганлари маълум бўляпти. Аммо улар орасида биттаси бор экан, ранчодан кечаси чиқиб кетаркан, ана ўшанисининг изига тушиб бўлмаяпти сира. Орқасидан қанчалик пойлашмасин, ҳамиша бутазорларда ғойиб бўлиб қоларкан. Шул боисдан ҳам овчи билан учрашадигани худди ўша деб ўйлайман.

— Худди шунақага ўхшайди.

— Гап мундоқ, мабодо уни қаердалигини билиб олган ёки ақалли изига тушган бирорта одам топилганида эди... Ҳамма ишқал худди ана шунда-да. Хозир бизга ҳаммасидан бурун яхши изқувар керак, бутун гарнизонда эса намунагаям топилмайди унақаси.

— Лекин водийда бошқа овчилар ҳам бор-ку, боз устига нафақат бизон овлайдиган. Наҳотки ўшалар орасидан биз бопи топилмаса?

— Овчилар борку-я, албатта, кейин, улардан ҳеч қайсиси ўша жиноятчига ҳайрихоҳ эмас, дейишади. Лекин уларнинг ҳаммасиям бизга иш бермайди деб қўрқаман. Бизга шунақаси керакки, у ҳам эпчил, ҳам довюррак бўлсин, бу иккисидан бири бўлмаса ҳеч нима қиллолмайди. Уларни овчини кўрарга кўзлари йўғ-у, лекин айнаи чоғда жинояткордан қўрқишадиям. Биттаси бор, тўғри,— у тўғрисида унча-мунча эшитганман,— айнаи бизга керак одам ўзи. У Карлос бир ёқда турсин, нақ шайтони лаъиннинг ўзига рўпара бўлишдан ҳам тап тортмайди. Хўш деганингиздан, эпчиллик ва ҳар хил ҳиндуча макр-хйллалар масаласига келганда овчилар орасида Карлосдан кўра обрўси ортиқроқ.

— Қим экан ўша?

— Улар ҳатто икковлон, ажралмас. Бири — мулат, у илгари америкаликлар қўлида қул бўлган. Қочоқ у,

шу туфайли эски хўжайинларини эслатадиган жамики ирсани улардай ёмон кўради. Сизнинг овчингизни бўлса кўрарга кўзи, отарга ўқи йўқ дейишади. Қисман ўтминни хотираларига, қисман эса Карлоснинг овчилик шон-шухратига ҳасади келганидан. Шундоқми ё бошқилчани, бизга қўл келади бу. Ошнаси ҳам мулатдай бир гап:— самбо — негр билан Матаморас ёки Тампико соҳилилик ҳинду аёлдан туғилган фарзанд. Бизнинг ўлкаларга келганига талай бўлган, қандоқ қилиб келиб қолганини эса ҳеч ким билмайди. Аммо-лекин ўша самбо билан мулат аллазамонлардан бери бир-бировидан ажрашмайди: бирга туриб, бирга ов қилишади ва бир-бировини жон чиқарга ҳимоя қилишади. Икковиям девдэй-девдай азамат, айёрликлариям етиб-ортгулик. Лекигин мулат бош-қошчи — икковларидан биринчиси ўша муттаҳам. Икковиям кўпда виждони қийнайдиғанлардан эмас. Қисқаси, худди шулар керак-да бизга.

— Унда нега дарҳол ишга солмаймиз уларни?

— Ҳамма бало шундаки, улар ҳозир бу ерда эмас. Овда улар. Улар миссияга унча-мунча хизмат қилиб туришади: тақсирларни буғу эти ва бўлак илвасинлар билан таъминлашади. Ҳозир, афтидан, бизнинг мўминройиш, сабр-қаноатли роҳибларимизни бизон тилидан тотингилари келиб қолиб — уларнинг қандайдир махсус назандалик услублари бор — ўз овчиларини янги илвасин овлаб келгани жўнатишган кўринади.

— Кетганларига кўп бўптими, билмадингизми?

— Бир неча ҳафта бурунроқ, Карлос қайтмасидан анча илгарироқ.

— Унда тез орада қайтиб қолишар балки?

— Бўлиши мумкин. Бўлмаса мен ҳозироқ миссияга бориб, аниқроқ билиб кела қолай.

— Бора қолинг. Уларни топа олсак заб иш бўларди-да. Таърифлашингизга қараганда ўша икки азамат бутун бошли гарнизонимизга арзир экан-да. Бўла қолинг, фурсатни ўтказманг.

— Бирор дақиқани ҳам ўтказмайман,— жавоб берди Робладо. Кейин том девори узра эгилиб қичқирди:— Ҳой, Хосе! От!

Ҳеч қанча ўтмай хабарчи келиб, от эгарлаб қўйилди, леб ахборот берди. Робладо энди зинапоя томон одим ташлаган эдики, қаршисида, асотейнинг тош саҳни баробарида сочи калта қилиб олдирилган боши чуққисида

дум-думалоқ калга ўхшатиб тақир қирилган жойи ярақираб турган бош кўринди. Лаҳза ўтар-ўтмас асотейга назокат-ла жилмайганича Хоакин тақсирларининг ўзлари чиқиб келдилар.

Л Б О Б

Бу авлиё Иоанн байрами кўпи қалъадаги зиёфатда ҳозир бўлган ўша черков хизматчиси. Икки иезуитнинг ёши каттароғи бўлиб, миссиянинг мутлақ ҳоқими эди. Ёш биродари, Хорхе тақсирлари Сан-Ильдефонсога яқинда келган, Хоакин тақсирлари эса миссия деярли асос солинганидан буёқ бошчилик қилади. У бу ернинг кўҳна истиқоматчиси ва шу боисдан ҳам водий аҳлининг ҳар бирининг сир-асрорини ипидан игнасигача билди. Бизон овчиси Карлоснинг хонадонини негадир ҳаммиша сира хушламай келар ва гарчи сабабини тушунтирмаган бўлса-да, ёқтирмаслигини Вискарраникидаги зиёфат дастурхони устида намоён этганди. У «оқпармалла сочлиларни» мутлақо шаккок ҳисоблагани учунгина ёмон кўрмас эди, зотан — Хоакин тақсирлари, гарчи, қалбан бунақанги нарсаларга ҳеч қандай аҳамият бермасди. Унинг дин-эътиқод йўлидаги саъи-ҳаракати — бу ғирт риёкорлик ҳамда оддийгина ҳийлагарлик эди. Сан-Ильдефонсода Хоакин тақсирлари барчадан кўра кўпроқ берилмаган бузуқчилигу иллатнинг ўзи йўқ. У монте борасида устаси фаранг ўйинчи, кези келиб қолганида фириб беришдан ҳам тоймайди, у хўроз кўпкарисида нуфузли ҳакам ва ҳаммиша бир неча тилло тикишга тайёр. Бироқ бу тақводор отахон мақтанадиган нарсаларнинг ҳаммаси эмас ҳали. Отиб олган пайтларида — бундай ҳол эса тез-тез бўлиб туради — ўзининг ёшликдаги ҳамда яқин-яқинлардаги ишқий саргузаштлари ҳақида ҳикоя қилишни ёқтиради. Динни янги қабул қилганлар тагнослар бўлиши лозимлигига қарамай, миссияда мудом бир нечталаб ёш-ёш метис — қиз болаю ўғил болалар ўралашиб юришади, уларни бу ерда Хоакин тақсирларининг жиянлари деб аташади.

Эҳтимол сиз бу гапларнинг бари ниҳоятда бўрттириб юборилган деб ўйларсиз.

Ана шу тариқа ҳаёт кечирадиган бирон-бир муҳтарам руҳонийни ўз қавмлари ҳурматига сазовор деб та-

таъбир этиш мумкинми? Башарти Мексика дин пешво-
ларининг хулқ-атворларини кузатмаганимда, камина
ҳам шундай деб ўйлаган бўлардим. Хоакин тақсирлари-
нинг фосиқлиги — унинг биродарлари даврасида мутлақ
этишно эмас. Аксинча, бу ниҳоятда кенг тарқалган ҳо-
лат, ҳаттоки умумий қоида деса ҳам бўлади.

Алқисса, роҳибни бечора овчининг хонадонига қар-
ши тиш қайратган нарса художўйлик, эътиқод шашту
шижоати эмасди асло. У оиланинг марҳум бошлиғига
нисбатан ғазабини яшириб, яниб юрарди: иезуит собиқ
комендант даврида ундан таъзирини еганди.

Хоакин тақсирлари асотейга ташвишли қиёфада,
қовлиққанча чиқиб келди, унинг аллақандай янгилик-
ни хабар қилишга сабри чидамаётгани кўриниб турар-
ди; музаффарона илжайишига қараганда у ушбу янги-
лик эшитганларга қаандай таъсир этишини билиб, ол-
дидан шунинг завқини сураётган эди.

— Хуш келибдилар, отахон!.. Саломатмилар, ҳаз-
ратим!..— дея омонлашишди комендант билан Робладо
бираварига.

— Саломатмисизлар, бўталарим!— жавоб қилди
иезуит.

— Жуда вақтида қадам ранжида қилдилар-да, ўзи-
им, ҳазрат,— деди Робладо.— Мени миссияга боришдан
халос этдингизда шу тобда — камина ҳузурингизга от-
ланиб тургандим-да, ўзи.

— Агар борганингизда, мен сизни ажойиб таом би-
лян меҳмон қилган бўлардим. Ниҳоят бизон тилини
келтириб беришди бизга.

— Шунақа денг!— бараварига хитоб этишди Виска-
ра билан Робладо, улар шунчалик ҳовлиқиб қолишган
ёдики, Хоакин тақсирлари ҳатто таажжубга тушди бу-
дан.

— Вой нафси карнай қароқчилар-эй! Фаҳмладим
нимага шама қилаётганларингни. Мендан бир неча до-
насини ундириш дардидага ўхшайсизларов. Илло би-
либ қўйинглар, токи томоғимга ўтириб қолган чапни
ювиб ташлагани бирон нима бермагунингларча ақалли
жаздагини ҳам ололмайсизлар. Ўзиям томоғим шундай
қакраб кетдики, асти қўяверасизлар!

Зобитлар хандон ташлаб кулиб юборишди:

— Хуш, қанақасидан истардилар ҳазратим?

— Шошилтирманглар, пича ўйлаб олай... А-ҳа! Ўз-

ларига яқингинада юборишган анави бордодан бир қўдаҳгина.

Шароб келтирилди; Хоакин тақсирлари лиқ тўлган стаканни бир зарб билан бўшатди-ю, ичимликнинг сифату қийматини тўлиқ баҳолай оладиган билимдонде лабларини чўлпиллатиб қўйди.

— Ажойиб! Антика!— хитоб этди у ва гўёки жамики яхши нарса ўша ердан тарқаб, ўша ерга қайтадигандек, кўзларини кўкка қадади.

— Шундай қилиб, бизон тили келтиришди деиғ?— сабрсизлик билан сўради Робладо.— Демак, овчиларингиз қайтишибди-да.

— Ҳа, қайтишди. Ана шу боисдан ҳам келгандим-да, ҳузурингизга.

— Жуда соз! Мен бўлса айнан шуни билгани миссияга отланиб тургандим.

— Бир тиллони ўртага қўйиб айтаманки, ҳаммамизнинг ҳам фикримиз бир жойдан чиқибди-да!— деди Хоакин тақсирлари.

— Сиз билан баҳслашим бефойда, отахоним, сизнинг қўлингиз ҳамиша баланд келади.

— Қўйинг-э! Мен келтирган янгилик учун жон-жон деб берасиз бир тиллони.

— Қандай янгилик!.. Қандай янгилик келтирдингиз?— ҳар иккала зобит ҳам унга қараб интилди.

— Яна бир қадаҳ бордодан қуймасанглар, нақ бўғилиб ўламан ҳозир. Бу чанг-тўзонли йўл аъроф-аросатдан ҳам баттарин-да. Ҳа, балли, ана бу кўмак беради каминага.

Шундай деб тақсирлари яна бир стакан шаробни сипқордилар-у, тагин лабларини чўлпиллатиб қўйдилар.

— Ана энди, ҳазратим, келтирган янгиликларини айтсинлар!

— Гап бундоқ, қулоқ беринглар: овчиларимиз қайтишди.

— Хўш нима бўпти?

— Нима бўпти? Улар янгилик топиб келишди.

— Қанақанги?

— Дўстимиз, бизон овчиси хусусинда.

— Карлос ҳақидами?

— Йўқса ким ҳақида бўларди?

— Қандай янгилик экан? Уни кўришибдими ўзлари?

— Ўзини кўришмабди-ю, илло изини топишибди.

Улар Қарлосниг уясини топишибди ва ўзи ҳозир қаерда эканини билишар эмиш.

— Жуда соз — деб юборишди Вискарра билан Робладо.

— Хоҳлаган пайтда топиб оламиз уни дейишяпти.

— Қойил!

— Мана кўрдингларми, дўстларим, қандай янгиликлар келтирдим. Ундан истаганларингдек фойдаланишинглар мумкин.

— Қадрдон отахонимиз,— деди Вискарра,— сиз ақли одамсиз, бизга маслаҳат берсангиз. Аҳвол қандоқлигидан ўзингиз бохабарсиз. Бизниг уланларимиз у ярамасни қўлга туширишга ожизлик қиляптилар. Сизнингча, нима қилишимиз керак?

Бундай ишонч иезуитга мойдай ёқиб тушди.

— Биродарлар,— деди у икковини яқинроқ чорлаб,— мен аллақачон шу ҳақда ўйлаб қўйгандим. Менинг наздимда, уланларсиз ҳам бемалол эплаштирсанглар бўлади. Бизнинг овчиларни лозим бўлганича ўз ишларинг билан таништириб, керак-яроқ ила таъминланглару, унинг изига тушаверишсин. Башарти улар ўша ярамас шаккокни тутиб бера олишмаса, демакки, ҳазрат Хоакин одамларни фарқига зиғирчалик бормас экан.

— Биз ҳам худди шунга ўйлаб турган эдик-да!— деди Робладо тўлқинланиб.— Мен, ахир, айнан шу хусусда ҳузурингизга отланиб тургандим-да, ўзиям!

— Бағоят тўғри ўйлабсизлар, буталарим. Фикри ожизимча, ушбу энг тўғри йўл.

— Ўша овчиларингиз кўнишармикин? Озод-эркин одамлар,бунақанги қалтис ишга кўнмасликлариям мумкин.

— Қалтис!— такрорлади иезуит.— Хавф-хатардан қўрқмайди улар, менга ишонаверинглар. Шердай довюрагу йўлбарсдай эпчил улар. Хотиржам бўлинглар, ҳеч қанақанги хавф-хатардан тап тортмайди улар.

— Уларни рози бўлади деб ўйлайсизми?

— Рози бўлди деб ҳисоблайверинг, зеро буни аллақачон аниқлаганман. Улар Қарлосни унчалик хушламайди — бунга ўзларига яраша важлари бор, шу боисдан уларни кўндиришга кўпда овора бўлмайсизлар. Сирасини айтганда, йўлга тушишга тайёр бўлишса ҳам керак — эълонни ўқишган-ку, ахир, кейин, Қарлосни қўлга тушириш қанча бойлик келтиришини чўтлаб кў-

ришгандир-ов. Мўмайгина мукофот олишларини тасдиқ-ласанглар бас, қарабсизларки, уч кун ўтмаёқ ўша бизон овчисининг қулоғи ёки каллахомини, ўнгидан келиб қолса (агарда сизларга шу кўпроқ ёқса) бутун бошли жасадини келтириб туришибди-да. Уни излаб топмай қўймайди булар, хотиржам бўлаверинглар!

— Ёнларига аскар қўшиб жўнатсак-чи? Карлос ёлғиз ўзи эмасдир балки. Анави метис — унинг ўнг қўли, хўжаси билан бирга деб ўйлашга асосимиз бор, бундай ёрдамчи билан биргаликда ўша овчиларингиз учун ҳазилакам рақиб бўлмайди-я.

— Буниси даргумон-ов. Ахир улар нақ иблиснинг ўзгинаси-ку. Илло ўзларининг олдиларидан ўтиб кўринглар. Ёрдамга муҳтожми ё йўқми, ўзлари яхши билишади. Бу уларнинг иши, шундоқ экан, ўзлари ҳал қила қолишсин.

— Ҳозироқ уларга одам юборайликми ёки ўзингиз жўнатасизми уларни буёққа?— деб сўради Робладо.

— Бирорталарингиз олдиларига борганингиз маъқул эмасмикин? Бунақанги ишни ошкор қилиб бўлмайди. Агарда улар бу ерга келишадиган бўлса, унда одамлар улар билан нима хусусда гаплашганингларни фаҳмлаб олишади-ёв. Мабодо бу азаматлар ўзини ахтариб юргани Карлоснинг қулоғига бориб етса, у чоғда овчини қўлга туширишлари даргумон бўлиб қолади.

— Сиз ҳақсиз, отахоним,— деди Робладо.— Улар билан ҳеч зогга сездирмай қандай учрашсак бўлади унда?

— Бундан осони борақанми, капитан. Уйларига, тўғрироғи, кулбаларига бораверинг. Улар қоялар орасидаги қапада истиқомат қиладилар. Ғоятда овлоқ жойлар, йўлда бирор кимсани учратишингиз амримаҳол. Бутазорлар оралаб ўтадиган сўқмоқдан юришингиз даркор, илло мен сизга йўлбошловчи бераман, у ўша жойларни билади ва сизни бошлаб боради. Азаматлар сизни кутишаётган бўлсалар керак: мен уларга, мабодо зарур бўлиб қоласизларми, уйдан жилмай туринглар, деб шамма қилиб қўйганман. Кўнглингиз тўқ бўлсин, албатта уйдан топасиз уларни.

— Йўлбошловчиничи, қачон юборасиз?

— Аллақачон шу ерда у — менинг маҳрамим бошлаб боради сизни. У пастда, ҳовлида турибди, фурсатни кеткизмасангиз ҳам бўлади.

— Албатта, Робладо,— тасдиқлади комендант.—

Опингиз эгарлоғлиқ, вақтни ўтказмай, йўлга тушинг.

— Ҳозироқ жўнайман!.. Қани йўлбошловчингиз, ота-доним?

— Эстебан! Ҳой Эстебан!—деб қичқирди иезуит том девори оша энкайиб.

— Бу ердаман, сеньор!— жавоб қилди биров пастдан.

— Буёққа чиқ! Тез!

Асотеяга ўша заҳотиёқ ҳинду бола чиқиб келди; у шляпасини ечиб, эҳтиром-ла Хоакин тақсирларига иқинлашди.

— Капитанни бутазорлар оралаб ўтган сўқмоқдан овчиларнинг кулбасига бошлаб борасан.

— Хўп бўлади, сеньор.

— Тағин бирор кимсага оғзингдан чиқара кўрмагин-а, бу тўғрида!

— Хўп бўлади, сеньор.

— Агарда оғиз оча кўрсанг, қамчи билан савалайман. Қани, йўлга туш!

Робладо бола ҳамроҳлигида зинапоядан пастга тушди, у ерда отга минишига ёрдамлашиб юборишди-ю, қалъа дарвозасидан ташқарига чиқди.

Хоакин тақсирлари Вискарра таклиф этган яна бир стакан бордони сипқордилар, сўнг миссияда ўзларига лаззатли нонушта маҳтал экани ёдларига тушиб, соҳиб хонадон ила хайр-хўшлашдилару изларига қайтидилар.

Вискарра асотеяда ёлғиз қолди. Башарти у ерда бирор кимса бўлса-ю, уни кузатса, ўша одам Қиз ўлган қояга кўзи тушгандаёқ Вискарранинг юзига ғалати, таҳликали ифода қалқишини пайқаган бўларди.

Л I Б О Б

Робладо буталар орасига кирди; оти илгарисида бир неча қадам олдинроқда Эстебан лўкиллаганча чопиб борарди. Робладо ярим милча масофани шаҳардан қоялар оралигидаги сўқмоқлардан бири сари элтадиган кенг йўли бўйлаб босиб ўтди, кейин деярли ўз қўйларини ахтарадиган қўйчивону овчилардан бўлак одам юрмайдиган ёлғизоёқ йўлга бурилди. Яна икки-уч миль йўл босгач, кўзланган манзил — қоя этагида жойлашган овчилар капасига етиб келди.

Бу ҳақиқатан ҳам фақирона қапа эди. Атрофни босиб ётган дарахтсимон юкка¹лардан бир нечасининг танаси устуну синч ўрнида нишаби бир томонлама томи — аниқроғи юқори томони қояга туташган бостирма-соябонни кўтариб турарди. Томга худди ўша ўсимликнинг қаттиқ япроғи қават-қават қилиб босилган эди. Қапанинг хийла йўғон юкка танасидан шилиб-ёриб олинган тахта-пилакчалардан ясалиб, қўтос терисидан тилинган тасмачаларга илинган эшикнамо нарсаси ҳам бор экан. Айнан ўша хом ашёдан ясалиб, худди ўшандай усулда илиб қўйилган дарча-қопқоқли туйнук дераза хизматини утар эди. Ингичка-ингичка таёқлар билан бўйию энига қинғир-қийшиқ тарзда мустаҳкамланган, токрудадан тўқилган деворларига наридан-бери лой чапланганди. Эгалари бошпана қуришда камроқ тер тўкишга ҳаракат қилгандилар, шунинг учун ҳам тиккасига тушган қоянинг сип-силлиқ ёнбағри унинг тўртинчи — орқа томондаги девори хизматини адо этар, ундаги қора қуримли из мўрикон ўрнига томда қолдирилган оддийгина туйнукдан чиқадиган тутуннинг йўлини кўрсатиб турарди. Эшик биқин тарафда, қояга тақалган; дераза эса капанинг олд деворидан очилган бўлиб, эгалари сўқмоқ орқали бу ерга келишни хаёл қилган ҳар қандай одамни кўриб туришлари тайин эди. Лекин бундай ҳол камдан-кам бўларди; ёвузу бешафқат овчилар айтарли ҳеч ким билан ош-қатиқ бўлишмас, бошпаналариям қояни айланиб ўтадиган йўлга тескари эди. Қапа қоялар орасига анча-мунча, йўлдан бир неча юз ярдлаб ичкарига кириб борган дарада жойлашган эди. Уни бир томондан қоялар тўсиб турган бўлса, иккинчи тарафдан қалин бутазорлар ўз танасига олганди.

Қапа орқасида амал-тақал билан тош териб барпо этилган чоғроққина қўтон кўзга ташланарди. У ерда қирчанғи, туллаган учта хачир билан худди ўшанақанги аянчли иккита от турибди. Қояга экин майдони, тўғ-рироғи — аллазамонларда экин экилган дала туташганди; ҳозирда қаровсиз, ташландиқ жой бўлиб қолгани туфайли ўт-ўлан босиб кетган эди. Дарвоқе, у ер-бу ерда инсон меҳнати изларига кўз тушиши мумкин эди: баъзи-баъзи жойда, ҳаккам-дуккам қаровсиз жўхори

¹ Юкка — лолагуллилар оиласига мансуб ҳамиша яшил ўсимлик.

ноялари дикрайиб турар, улар оралиғида эса қовун ҳам-
да қовоқ палакларининг бурама мўйловчалари кўзга
чалинади. Мазкур жойга келиб ўрнашганлар ернинг
чиннакам эгаси бўлолмагани яққол кўриниб турарди.

Капа остонасида беш ёки олти чоғли ит ётибди, ит-
дан кўра бўрига ўхшайди улар кўпроқ; тепада қоя нақ
муаллақ турган ерда бир печта абжағи чиққан юк эгар-
лари сочилиб ётибди. Иккита сийқаси чиққан, йиртиқ,
ёски чавандозлик эгари дорда осиглиқ турибди; ўша
дорга юганлар, шода-шоода қизил қалампиру боғлам-
боғлам сур гўшт осилган.

Ушбу қапага кириб келган одамнинг икки эпсиз,
ивирсиқ ҳинду аёлга кўзи тушарди — улардан бири зо-
гора нонга хамир қораётган, иккинчиси гўшт қовураёт-
ган эди. Қоя бағрига тақаб қўйилган икки тош ўртаси-
да олов ёнар, шундоқ ёнгинасида эса сопол кўзаю то-
воқлар, қовоқ идишлар айқаш-уйқаш бўлиб ётар эди.

Капа деворларини ўқ-ёй, садоқ ҳамда жониворлар-
нинг мўйна-терилари безаб турарди; икки бурчакдаги
(кулбанинг ўзи битта хона эди) тош супалар устига
ташлаб қўйилган тери-пўстаклар тушаклари эди. Уччи-
чи бурчакда иккита ов милтиғи — биттаси мили узун,
иккинчиси мили калта испан милтиғи билан бир жуфт
дастаси узун найза деворга тираб қўйилган, буларнинг
тепасида овчиларнинг пичоқлари, ўқдонлар, тўрва-хал-
талар ва Қояли тоғларда ов қиладиган сайёд учун зар-
ур бўлган бўлак жамийки керак-яроқлар илиғлиқ эди.
Ўша ерда балиқ ҳамда майда ҳайвонлар овига керакли
тўр дейсизми, бўлак асбобу буюмлар дейсизми, бари
бор эди. Қападаги жамики жиҳозу қақир-қуқур мана
шулар эди, вассалом. Ичкарига кирганида Робладо
ана шуларни кўрган бўларди; аммо у кирмади, зеро
унга зарур одамлар тўрт девор ичида қамалиб ўлтира
олмасдилар. Мулат ерда узала тушганча чалқайиб,
самбо эса ўз ватанининг — иссиқ мамлакатларнинг со-
ҳилбўйи ўлкаси — одатича икки дарахтга тортилган тўр
беланчакда ётишган эди.

Бу одамларнинг турқи ҳар қандай кимсани жиркан-
тириб, ихлосини қайтариб юбориши аниқ эди, бироқ
Робладони хотиржам торттирди. Унга худди мана шун-
дай ҳамтовоқлар керак-да! У икковини илгариям кўр-
ган эди-ю, лекин ҳеч қачон эътибор бермаганди. Ҳозир
эса уларнинг суру беор, тунд башаралари ва мушакдор

қора таналарига тикилиб тураркан: «Ҳа, Карлосни э-лаштирадиган мана шулар. Ваҳимали иккови. Важоҳатига қараганда икковидан хоҳлагани бемалол суробини тўғрилайди уни — гавдалари уникидан хийла йирик, миқтию бақувватроқ», дея хаёлидан ўтказди.

Мулатнинг бўйи шеригиникидан баландроқ эди. Шериги куч-қувватда ҳам, довюракликда ҳам, фаросату зийракликда ҳам хиёл ён берарди. Башарти самбони ҳисобга олинмаса, бутун мамлакатни ахтариб чиққанда турқи мулатнинг башарасидай жирканарли бирорта тавияни топиш амримаҳол эди-ёв. Самбога келганда эса — нақ узукка қўйган кўздай, жуда мос эди-да, ош-насиға.

Мулат терисининг туси хира-сарғимтил бўлиб, сийрак соқол-мўйлови бор эди. Худди занжиларникидек қалин бинафшаранг лаблари ортида бўри тишидек йирик-йирик икки саф тиши садафдек ярқирарди. Чуқур ўрнашган кўзлари оқини ярмигача сидирғасига сарғиш доғ-парда қоплаганди. Кўзлари тепасида ораси кенг қуюқ қора қошлари дикрайган, муштдек келадиган япасқи бурнининг катаклари бамисоли ўпқондай қорайиб турарди. Қалин, жингалак ҳурпайма сочи — жун деса тўғрироқ бўлади — тутамлари шапалоқдек қулоқларини ёпиб олган. Бошига кўп замонлардан бери совун билан ошначиликни узган эски мадраси катак рўмолни саллага ўхшатиб ўраб олган. Бу салласи остидан пешонасиға тушиб турган жингалак сочлари мулатга янада ваҳшиёна шафқатсизлик тусини берарди. Бу башаранинг туриш-турмуши қаҳри қаттиқлик, сурбетона дағаллик, маккорликдан ҳамда унга бирорта инсоний ҳис-туйғу ошно эмаслигидан далолат бериб турарди.

Мулатнинг энгил-боши жамики бепоён дашт овчилари киядиган кийимдан кам фарқ қиларди. У тери ва адёлдан иборат эди. Ёлғиз бош кийимигина — Жанубий штатларда қул бўлган даврларидан мулатга ёдгорлик бўлиб қолган — ғайриодатий эди, холос.

Самбонинг ёвузона башараси ошнасининг турқидан заррача қолишмасди. Фақат тусида фарқи борийди. Терисининг туси қўнғир-қора — ота-онаси мансуб бўлган икки ирқ териси тусининг омухтаси эди. Занжи сингари лаблари қалин, манглайи қиялама, ҳинду қони эса бўйни, елкаларига тушиб турган деярли силлиқ,

тўлқинли соч тутамларида аксини топганди. Шунга қармай, унинг ташқи қиёфаси мулат дўстиникига нисбатан камроқ тортарди эътиборни. У ўз қабиласининг одатдаги либосида — дағал ип газламадан кенг-қовул чолвор билан ўша матодан нимча, қўпол серапе, белига тисма ўрнига шарф боғланган. Кураги, бўйни, кифтлари ва жезранг тусли мушакдор қўллари очиқ.

Робладо айни самбонинг феъл-атвори яққол намоён бўлиб турган манзаранинг устидан чиққан, томошанинг охириги кўринишига етиб келган эди.

У беланчакда ёнбошлаб олиб, ўткир сигарани ҳузур қилиб чекаркан, аҳён-аҳёнда хом терига ёпишаётган нашшаларни қамчи билан қўриб қўяр эди. Кейин у ёллардан бири, ўзининг ҳозирги хотинини чақирди:

— Ҳой қиз! Қорин очиб кетди-ку! Эт пишдимиз ўзи?

— Пишгани йўқ ҳали,— ичкаридан жавоб қилди хотини.

— Бўлмаса зогора билан қалампир мусалласдан олиб чиқ буёққа!

— Уйда мусаллас йўқлигини ўзинг биласан-ку, жоним.

— Буёққа кел! Ишим бор сенда!

Хотин ичкаридан чиқиб, ошкора норози қиёфада беланчакка яқинлашди.

Самбо токи у ёнгинасига келмагунича қимир этмай ўтирди, кейин шу пайтгача орқасига беркитиб турган қамчини тўсатдан силкитди-ю, кучи борича юпқагина кўйлақдаги хотинининг кифтига туширди. То шўрлик хотин ўзини нарироқ олишга ботинмагунича устма-уст зарба тушаверди.

— Ана шунақа, қизалоқ! Кейинги гал нон билан мусаллас келтиришни буюрганымда топарсан дейман, тўғримасми, қизалоқ?

Шундан кейин ёввойи яна беланчакка узаниб, хохлаб кулиб юборди, мулат унга жўр бўлди. У ҳам ўзининг титраб-қалтираб турган хотинини худди шундай савалашга шайланган эдики, айни шу нозик сонияда қапа қошига Робладо келиб тўхтади.

Икковлариям сакраб туришиб, уни эҳтиром-ла қарши олишди. Жўралар унинг кимлигини яхши билишарди. Асосан мулат гаплаша бошлади, негаки ўша бошлиқ ўрнида эди-да, ахир, самбо эса сояда қолаверди.

Суҳбат аёллар билан Эстебан эшитиб қолмасин учун

ним овозда бораётган эди, Хоакин тақсирлари маслаҳат берганларидек, ошналар бизон овчисини ахтариб топиб, улигиними ё тиригиними қалъага олиб боришга ёлланилди. Биринчи ҳолда уларни мўмайгина, кейингисиди эса икки барабар катта мукофот кутарди.

Улар аскарларнинг ёрдам беришини ишташмади. Бу ёқмади уларга. Мўмай мукофотни озайтиргилари, аллакимлар биландир бўлашгилари келмади. Бу маблар икковлари учун катта бойлик эди, уни қўлга киритиш орзу-иштиёқи муваффақиятга эришиш истак-интилишлари гулханига ўт қалаб қўйганди.

Капитан бу ишни ниҳоясига етказгач, қалъа томон от солди, мулат билан самбо эса дарҳол одам овига ҳозирланишга тушиб кетишди.

ЛИ БОБ

Ярим соатдан кейин мулат билан самбо — биринчисини Мануэль, иккинчисини Пепе деб аташарди — йўлга тушишга тайёр эдилар. Ҳозирлик кўриш ана шу вақтнинг ярмини ҳам олгани йўқ, лекин иссиқ овқат билан қоринни тўқлаб, биттадан ўткир сигарани мириқиб чекишларига чорак соатдан кўпроқ вақт кетди; отлар бўлса бу орада олдиларига ташланган жўхори сўталарини кемтирди.

Мана, сигаралар чекиб бўлинди; ошналар отларига сакраб миниб, йўрттириб кетдилар.

Мануэль одатда америкалик овчилар фойдаланадиган узун милли милтиқ, пичоқ (буниси ҳам америкаликларники) ва яккама-якка олишувда даҳшатли қурол бўлмиш уч томонидан бир неча дюймгача ниҳоятда ўткир, зилдай дудама билан қуролланганди. Унисиям, бунисиям Миссисипи водийсидан олиб келган бу қуролни қандай ишлатишни ўшаёқдан ўрганиб қайтган эди.

Пепенинг эгари қошига тасмасидан илиб қўйилган испан милтиғи саланглаб борарди; Пепенинг ўзининг ёнбошида каттакон, залварли пичоқ — мачете, елкасида эса камон билан найзалар жойланган садоқ осиглиқ. Баъзи ҳолларда — масалан, бирорта илвасинга шарпа чиқармай зарба бериш лозим бўлганида — мачете билан камон истаган ўт очар қуролга қараганда қулай келади. Қамондан ўточар қуролга қараганда ил-

Дамроқ ўқ узилади; борди-ю, биринчи узилган камон ўқи хато кетганда ҳам ҳечқиси йўқ — зеро бу ўқ мўлжалга олинган қурбонга ғанимини билдириб қўйиши муҳтимоли хийла камроқ.

Ушбу қуроллардан ташқари, ҳар қайси овчининг белида тўппонча қистириғлиқ, эгари қошида кулча қилиб ўралган лассо илиғлиқ эди.

Орқага, от сағрисига егуликларини — сур гўшт шодаси билан буғу терисига ўралган зогора нонларни ортиб олишган эди. Ашқол-дашқоллардан яна сув солинадиган икки бўғизли қовоқ идиш, мугузлар, милтиқдори солгичу тўрва-халталар ҳам бор эди. Отлар кетидан изма-из турқидан худди эгаларига ўхшаган бадқаҳр ва йиртқич қиёфали иккита ҳайбатли ориқ ит чопиб борарди. Итлардан бири маҳаллий бўрибосар, иккинчиси испан исковучи зотидан эди.

— Қанақасига кетамиз, Мануэль?— деб сўради самбо уйдан узоқлашишаркан.— Тўғри Пекосга қараб бораверамизми?

— Йўқ, йўқ, тепага кўтариламиз, айланиб ўтиб. Водийда кўриб қолишади — кимни ахтариб кетаётганимизни фаҳмлаб олишади. Мабодо унга бирортаси оғзидан гуллаб қўйса борми — унда анави пулларни тушимизда ҳам кўролмаймиз, деявер. Йўқ, эски йўлдан, қуриган ўзандан Пекосга қараб юрамиз. Сал узоқроғ-у, лекин бежавотир.

— Жин урсин! Уёқ тип-тикка — тепага чиққунча ўпканг бўғзингга тиқилиб ўласан-ку, ахир! Бечора отимни кучи етмас-ов бунга. Ўзи шундоқ ҳам силласи қуриган. Бизонлар кетидан озмунча қуваладикми ахир!— деди ҳовлиқиб.

Улар бутазорларни кесиб, қояни айланиб ўтадиган йўлдан сойлик тик ёнбағирликка ёриб кирадиган жойгача етиб боришди. Ана шу сойлик-дара тубидан бориб юқори ясситоғликка кўтарилиши мумкин эди. Бу тиккалаб кетган ниҳоятда оғир йўл эди. Тоғда ўсган мустангдан ташқари — мустанглар ҳамма жойдан бамисоли мушукдай ўрмалаб чиқиб кетади — ҳар қандай от чиқмайман деб оёқларини тираб туриб олади бу ерда. Ҳатто итлар ҳам деярли тик кўтариладиган қоядан машаққат билан юқориларди. Лекин овчилар ерга тушишдида, отларини етаклаганча тепага кўтарила бошлашди; кўп ўтмай ясситоғликка чиқиб боришди.

Шу ерда пича нафасни ростлаб, отларига дам бергач, яна отга миниб, прерия — дашт буйлаб шимолга қараб елдириб кетишди.

— Хўш, Пепе, ўғлон...— ғўлдиради мулат.— Йўлда биров йўлиқиб қолар балки. Бирорта чўпон оҳуни қува-
лаб юрган бўлиши мумкин. Эшитяпсанми?

— Ҳа-ҳа, Мануэль, тушундим.

Ун милча масофа давомида улар орасида бўлиб ўтган гап-сўз шугина эди. Улар турнақатор тизилишиб: олдинда Мануэль, орқасидан Пепе, ундан кейин итлар келишаётган эди. Итлар ҳам кетма-кет — олдинда този, кетидан бўрибосар келяпти.

Ун милча йўл босгач, йўлни қияламасига кесиб ўтган қуриб қолган ўзанга етиб келдилар. Карлос билан дўстлари қалъада содир бўлган воқеалардан кейин қочган кунлари айнан мана шу ўзандан юрган эдилар. Ҳозир эса овчилар тушиб келдилар унга. Улар ҳам Карлос ўшанда қилганидек қуйига, ирмоқнинг мансаби томоёга — Пекос қирғоғига қараб бурилдилар. Бу ерда дарахтзорга киришди-да, отдан тушиб, уларни дарахтга боғладилар. Отлар яқиндагина олис сафардан қайтгач, ҳозир ҳам ўттиз милдан кам юрмаганларига қарамай, жудаям унақанги тўлиққан кўринмасди. Ориқликларига қарамай, улар зотларига муносиб тарзда кучли ҳамда чидамли бўлиб, ҳеч зиён-заҳматсиз яна юз миль йўл босишлари мумкин эди. Эгалари бунга жуда яхши билишар, акс ҳолда одам овида муваффақият қозонишларига ишонмаган бўлардилар.

— Ҳар қанақасига олганда ҳам, қорабайири ажойиб от,— деб қўйди мулат, мустангларга тикилиб.— Ҳечқиси йўқ, етиб оламиз-а, унга, Пепе?

— Етиб олганда қандоқ.

— Иккала қирчанғи йўрғанинг тинкасини қуритар дейман, шундоқмасми, Пепе?

— Шундоқ, Мануэль, албатта тинкасини қуритади!

— Мен ўзимни жуда унақанги койитмоқчи эмасман, гуни-чун ўйинни сал жўнлаштириш керак. Бир эпини қилиб, бирон йўлини топармиз-а, Пепе?

— Умидворман бундан, Мануэль!

— У шубҳасиз юрга жойлашиб олган. Бундан яхшироқ жойни тополмайди. Ухлаб ётганидаям ушлаб олишолмайди уни, аскарлар умрида чиқиб келишолмайди буёқларга. Иннайкейин, унинг орқасига, водийга ту-

шишиям осонгина. Уёқдан-буёққа бемалол қатнайверади, ҳеч қанақанги айғоқчи кўз-қулоқ бўлолмайдиганга. Бошқа қаёққа ҳам борарди. Албатта оти билан бирга ғорга жойлашиб олган у. Фақат битта лекини бор: уни қай пайтда қўлга тушириш керак? Сен нима дейсан, Пепе?

— Ҳамма гап шунда-да! Қай пайт ўша ерда бўлади қай пайт бўлмайди, билсак қанийди-я!

— Э, бу қийинамас. Пистирмада турамыз — вассалом.

— Кундузлари ўша ерда бўлади деб ўйлайсанми?

— Шундай деб ўйлайман, Пепе. Водийга кечаси тушади, бу кундай равшан гап — фақат кечаси. Эҳтимол ўзининг уйига эмасдир-у, бирорта қўшни-пўшнисиникига тушар. Антонио билан-ку учрашиши аниқ. Антонионинг ғорга келиши мумкин эмас: малласоч жуда қув, уни йўлда қарши олади. Бунга шак-шубҳа йўқ!

— Унда Антониони кузатармыз балки?

— Бўлади-ю, лекин бу ярамайди. У чоғда бир йўлакчи билан олишишга тўғри келади. Иннайкейин, Антониони ўлдирмаслик керак. Одамларни Антониога ғаразлари йўқ. Антониони у билан бирга кўришса — ёмон бўлади. Йўқ, ўғлон, бизга малласочнинг ўзиям кифоя — уни қўлга туширгунча озмунча тер тўкиш керакми ҳали. Қўлга тушириш — ўлдириш деган гап эмас. Ўзлари ўлдиришаверишсин. Антониони кетидан пойлаб нима қиламыз? Унинг ўзи қаердалигини билламыз-ку. Агар билмаганимызда бошқа гап эди.

— Мануэль, ғорга балким кундузи борармыз? Нимагадир қаердалигини яхши эслолмай турибман.

— Бир миля келади, каммас. Агарда ухлаётганини билсак бораверардик... Қай пайт ухларкин у? Балким сен биларсан?

— Борди-ю, ухламаётган бўлса-чи?

— Бизни дарада бир миль наридан кўради-ю, отига мина солиб тепага, ясситоғликка чиқиб кетади — ана унда қидириб топиб бўлсан уни! Балким уч кун кетар бунга, эҳтимол мутлақо тополмасмыз.

— Мануэль, биласанми, топдим! Дара оғзига борамиз-да, яқинроқ бирон жойда қоронғи тушгунча пойлаб ётамыз. Қоронғи тушиши билан дара торайган ергача эмаклаб борамиз. У ёнимиздан ўтади — водийга чиқа-

диган бошқа йўли йўқ, тушуняпсанми?—ана шунда уни паққа қулатамиз.

— Вой сени қара-ю! Унақада мукофотнинг ярмидан айриламиз-ку! Мабодо қоронғида ўқимиз хато кетса-чи? Унда ҳамма пул қулоғини ушлаб кетди деявер. Э-йўқ! Ё ҳаммаси — ё ҳеч вақо! Ўз жонимизни тикиб бўлсаям, тириклай қўлга туширишимиз керак уни, фақат тириклай!

— Бўпти, унда дарадан чиқсин,— деди Пепе.—Сал узоқлашиши билан биз ғорга кириб яшириниб оламиз. Қайтишини кутамиз. Бунга нима дейсан, Мануэль?

— Чакки эмас режанг, ўғлон. Бўпти, худди шундоқ қилганимиз бўлсин. Лекигин беҳудадан-беҳудага бош суқмаймиз. Олдин у дарадан чиқиб кетсин, ана ундан кейин ишга тушамиз. Унинг кетганини ўз кўзимиз билан кўргандан сўнггина ғорга кириб оламиз. Ана шунда уни албатта қўлга туширамиз... Қара, кун ботяпти. Вақт етди! Қани кетдик!

— Кетдик!

Улар отга миниб, дарё соҳилига чиқдилар. Бу ерда кечув йўқ эди, лекин бунинг нима фарқи бор? Улар бирон дақиқа ҳам ҳаялламай отларини сувга солиб, сузишга мажбур этдилар; итлари орқаларидан эргашди; ҳадемай ҳаммалари нариги қирғоққа чиқдилар. Устиларидан шариллаб сув оқиб тушарди ерга. Совуққина оқшом палласи эди, аммо бунақанги одамларга иссиқ ёки совуқ писандми денг! Улар энгиллари шалаббо бўлганига парво ҳам қилмаётган эдилар. Дарёдан чиқа солиб тўғри водийга бориб тақалган тик қояларга қараб от чоптириб кетдилар. Уша ерда, Льяно Эстакадо этагида қояларни айланиб ўтиб, ўнга бурилдилар.

Овчилар тош девор ёқалаб икки ёки уч милча от чоптириб бориб, водийга ёриб кирган қояли тармоқ ёнига етдилар. Бу тоғ тармоғи ясситоғдан узоқлашгани сайин энига торайиб, тобора қиялаб борарди. Энг этагида қулаган қоя бўлақлари ва уйда-уйдай ҳарсанглар айқаш-уйқаш бўлиб қалашиб ётарди. Бу ерда дов-дарахт йўқ эди-ю, лекин қоп-қора, қаққайиб турган тошу харсанглар мазкур жойга қандайдир ҳурпайган қиёфа бахш ётарди. Тошлар ораси ва қояларнинг камгагу ўнгирларида бутун бошли суворилар бўлуги отпотлари билан бемалол яшириниши мумкин эди.

Мулат серқоя буруннинг худди ана шу жойига йўл

толганди. Ғор жойлашган дара шу буруннинг панасида
ли; бошқа тизма қоялар дарани жануб томондан тў
иб турарди. Дара қоялар бағрига мисоли ханжардай
қукур санчилиб кирган, уёқдан юқорига, ясситоғликка
ик кетган энсизгина сўқмоқ олиб чиқарди. Бу ёш чор
адор дон Хуаннинг моллари қиргин қилинган худди
ша дара эди. Ҳозир мол ўлаксалари кўринмасди бу ер
да. Сору қузғунлар, бўрию айиқлар оз тер тўкмаганди
лар мазкур «тўкин» дастурхон устида, шу боисдан дара
тубида фақат оппоқ суяк-саёқларгина сочилиб ётарди.

Овчилар ниҳоят кўзлаган манзилларига етиб келди
лар. Улар отларини харсанглар орасига олиб кириб,
миҳкамлаб боғлаб қўйдилар; сўнг ўнгиру ёриқлардан,
қоя-тошларга тирмашиб юқорига интилганча, ахийри
чўққига чиқиб бордилар. Бу ердан дарага киравериш
иққол кўриниб турарди. Қиравериш энига уч юз ярдча
келар, шу сабабдан ҳам на одам, на от Мануэль билан
Пепенинг ёнидан билдирмай ўтиб кета оларди, башар
ти тун ҳаддан зиёд қоронғи бўлмаса, албатта. Лекин
овчилар ойга умид боғлаган эдилар: ойдинда эса улар
дарага кирмоқчи бўлган мушукниям кўришлари тайин
олди.

Улар қулай жой танлаб, ётиб олишди. Қуйидан, тиз
ма қояларнинг икки биқинида ястанган сойликдан улар
ни ҳеч ким кўра олмасди. Отлари бўлса қоялар орали
гига яшириб қўйилибди.

Одам овчилари ҳаракат режасини яққол тасаввур
етишарди. Уларда қонундан ташқари деб эълон қилин
ган Карлос шу ерда, Мануэлга жуда яхши таниш мана
шу дарадаги ғорга жойлашган деб гумон қилишларига
исослари бор эди. Кечалари у, шубҳасиз, бу ердан чи
қиб, водийга йўл олади-да (шу ердан унинг ранчосига
ча бор-йўғи ўн милча келади), ярим йўлда Антонио
билан учрашади, унис эса йнгитга Сан-Ильдефонсода
бўлаётган гапларни оқизмай-томизмай гапириб беради,
лийни пайтда егуликларни ҳам тутқизади қўлига.

Улар Карлос дарадан чиқиб кетгунича шу ерда
ётиш, кейин ғорга кириб олиб, қайтганида таппа унга
ташланиш ниятида эдилар. Албатта, у ёнларидан ўтиб
бораётганида пойлаб туриб ташланишлари мумкин
оли-ю, аммо уни ушлаб олишларига кўзлари етмаётган
ди. Агар отлиқ бўлса, икки дунёда ушлашолмайди уни.
Билдирмай яқингинасига бориб, отишса ҳам бўларди,

албатта, бироқ унда, мулат айтганидай, йингит қочиб қу тулиб кетади деган хавф ҳам йўқ эмасди.

Бунинг устига улар мутлақо бош териси — каллахом овига отланган эмасдилар. Икковлари ҳам, айниқса Мануэль, қандоқ бўлмасин Карлосни тириклай қўлга тушириб, икки ҳисса кўпроқ пул ишлаш дардида эдилар. Бу ҳам қийин, ҳам хавфли бўлсаям майли, мабодо уни қўлга тушира олишса мукофот икки баравар кўпайтирилади, бу пул учун эса каллакесарлар ҳар қандай ишга тайёр эдилар. Дарвоқе, улар минбаъд очиқчасига олишишга интиладиган даражада довюррак эмасдилар. Малласочнинг бениҳоя жасоратга эгалигини билар ва ҳийла билан ундан устун чиқиш умидида эдилар.

Аввалига унинг изига тушиш, ана шундан кейин сездирмайгина бориб, уйқусида босишга қарор берган-у, йўл-йўлакай ҳаракат режасини пишитиб келган эдилар. Бу режа Пепега таклиф этмасидан анча-мунча илгариники пишиб етилган эди Мануэлнинг калласида.

Изига кимлар тушганини қурбонлари хаёлига ҳам келтирмаётгани уларнинг умид чироқларига мой қуяётган эди. Карлос уларнинг овдан қайтганларини ҳеч кимдан эшитмайди, шунинг учун ҳам у жудаям унақанги эҳтиёткору сергак бўлмайди. Улар изига тушганларини билса, Карлос ўзини ҳозиргига, аскарлардан яшириниб юрибман деб ўйлаётган дамдагига қараганда бошқачароқ тутган бўларди, албатта. Аскарлардан хоҳлаган пайтда Льяно Эстакадонинг бирон ерига яширина олади. Овчилар эса — бошқа гап. Башарти биринчи уринишда уни эплаштиролмасалар, қаёққа қочиб борганидаям излаб топадилар бари бир.

Икковлариям — Мануэль ҳам, Пепе ҳам, бир нарсадан шубҳаланмасди: малласоч токи уни қўлга туширмагунларича ошналарнинг шу ерда эканликларини хаёлига келтирмайди. Ана шу боисдан ҳам улар муваффақиятга эришажакларига ишонардилар.

Ўз-ўзидан аёнким, башарти: Карлос ҳозир ғорда, кечаси дарадан чиқиб кетади, деган тахминлари тўғри бўлган чоғда, зафар қозонишларини таъминлайдиган чораларни кўриб қўйган эдилар.

Буни ҳадемай билиб олишади. Қуёш ботиб бўлди. Озроқ кутсалар кифоя.

Карлос бу пайтда ҳақиқатан ҳам ғорда эди. Қалъада содир бўлган воқеадан сўнг у шу ерга жойлашиб,

горни айнан Мануэль ҳамтовоғига айтган важҳу сабаб-
дирга кўра ўз «маконига» айлантириб олганди. Фор
синг учун ишончли бошпана хизматини ўтар, боз ус-
тига у дўстларига, водийга яқин ерда эди. У кечалари
дарадан хотиржам чиқиб, тонготарда бемалол қайтар-
ди. Кундузлари ухларди. Бу ерда у аскарлар изидан
келиб топиб олишларидан чўчимаса ҳам бўларди. Бор-
ди-ю, ҳаттоки изига тушиб қолган пайтларида ҳам фор
изидан дара деярли бир миль наригача, нақ бошлани-
шигача шундоққина кўзга ташланиб турар, ўша томон-
да бирор кимса пайдо бўлса, Карлос уни олисданоқ
пайқар эди. Гарчи даранинг икки биқинида чиқиб бўл-
мас қоялар юксалиб турган бўлса-да, мабодо аскарлар
дарага қуйидан, водий томондан кириб келиб қолса, ов-
чининг қочиш имконияти бор эди. Илгарироқ айтиб ўт-
ганимиздек, энсизгина, тик кўтариладиган хавфли суқ-
моқ ясситоғликка олиб чиқарди. Тикка кўтарилганига
қарамай ажойиб от бўлмиш қорабайир ундан сира чў-
чимай, дадил чиқиб борар, тепада, бепоён Льяно Эста-
кадода эса Карлос ўз таъқибчилари — уланларни мазах
қилиб жуфтакни ростлаб қолиши тайин эди.

Фанимлари фақат уйқусида ёки қоронғи тушганидан
кейингина билдирмай яқинлаб келишлари мумкин эди.
Аммо Карлос бундан ҳам чўчимасди. У худди ишончли
қўриқчилар қўриқлаб тургандай, бемалол-хотиржам ух-
ларди. Ҳа, ҳа, унинг қўриқчиси — вафодор муҳофиз
Бизон бор эди. Охирги, кўприкдаги оғиру машаққатли
олишувдан Бизон ҳар қалай қутулиб чиққан, танасига
бир неча найза санчилган бўлса ҳам, жароҳатлари
хавфли эмасди. Бизон бояги-боягидек эгаси ёнида эди
ва у ухлаётган пайтда ақлли ит камгакда пастга, да-
рага қараб ётарди.

Аскарларнинг мундирларига кўзи тушгандаёқ жуп-
лари тикка бўлиб, хатардан огоҳ этиб ириллашга ўти-
ши аниқ эди. Ит ҳатто қоронғида ҳам яқинлашиб ке-
лаётган бегона одам шарпасини бир неча юз ярд олис-
даноқ пайқайди, ана шу нарса эгасига ўз вақтида энг
илдам таъқибчилардан ҳам яшириниш имконини беради.

Фор кенг-ковулгина, одамлар от-потлари билан бе-
малол сиғадиган даражада кенг эди. Унинг тубидаги
бамисоли инсон қўли билан ясалгандек туюлгувчи дум-
думалоқ жомга ўхшаган чуқурчага қоялардан шишадек
тиниқ, зилол сув оқиб тушарди. Илло кўринишдангина

шундоқ эди. Мазкур жомни ясаган ҳам, уни обирахма билан тўлдирган ҳам табиатнинг ўзгинаси эди. Бу а рофларда бунақанги сув ҳавзалари камёб нарса эма Янада жануброқда юксалган Вако ва Гваделупа то ларида ана шунақанги чашмали ғорлар бот-бот учра туради.

Қочоқ одам учун — у қароқчими, қонун таъқиб эт ган қувғиндими, ким бўлмасин — бундан яхшию бун дан қулайроқ бошпанани тасаввур этиш мушкул, шу боисдан ҳам ғор ҳозир Карлос учун энг қулай, энг му вофиқ панагоҳ эди. У ушбу ғор борлигини кўпдан бери биларди, ундан ташқари эса ғордан унинг ўзига ўхша ган бизон овчиларию ёввойи ҳиндуларгина хабардор эдилар, холос. Ана шу нимқоронғи, нохуш дарага водий аҳли ҳеч қачон яқин йўламасди.

Бу ерда, ғорда, Карлос истаганича ўй суриши мум кин эди, ўйлари эса кўпинча аччиқ-аламли бўларди. Водийда бўлаётган жамики ишларни унга Антонио ет казиб турарди. Ҳар куни кечаси у келишилган жойда Пекос соҳилида Антонио билан кўришар ва ўртоғидан янгиликларни билиб оларди. Айёр мулат Мануэль тў ри топган эди. Мабодо Антонио ғорга келадиган бўлса, уни изидан пойлаб келиб, шу йўл билан Карлоснинг панагоҳини билиб олишлари мумкин эди. Ана шу са бабдан овчи ҳар куни тунда бу ерни тарк этиб, Антонио билан олисроқда учрашарди.

Шаҳарда Антонионинг ниҳоятда эпчил ёрдамчиси бор — унга янгиликларни Хосефа етказиб туради. У Каталина де Крусесни уйдан остона ҳатлатмаётганлари ни; Робладонинг бор-йўғи яралангани ва ҳозирда туза ла бошлаганини; Карлосни ахтаргани янги келган зо битлар бошчилигида бўлуклар йўлга чиққанини, кейин, унинг боши учун ваъда қилинган мукофот оширилгани ни ўшандан эшитди. Ранчосини кузатаётганларини Карлос аллақачоноқ билиб олган эди. Бу режа унча лик ҳийлагарона эмасди-ю, лекин ҳарҳолда уни ғоятда ўкинтирарди: у онаси билан синглисини зиёрат қилол масди. Шундай бўлса-да, улар билан Антонио орқали мудом алоқа боғлаб турарди ҳар қалай. Чамаси, рўй берган воқеалардан сўнг у синглисидан хавотир олиши лозимдек туюларди; аммо аблаҳ Вискарранинг жаро ҳати битиб, ҳали буткул тузалиб кетмаган, бундан таш қари эса, Карлос Роситани нимага озод қилиб юбор-

инилари хусусида тўғри мулоҳаза юритаётган эди. У синглисидан унчалик хавотирда эмасди — ақалли, яқин дунларгача; яқин-орада эса у синглисини олисларга, Бехатар жойларга олиб кетади.

Шу ўйда қулай фурсатни кутаётган эди у. Овчи, фанимлари қанчалик сергагу ҳушёр бўлмасинлар, хоҳлаган пайтида онаси билан синглисини уларнинг тумшуқлари остида билдирмай олиб кетишига сира шубҳа қилмасди. Лекин, улар билан бирга овчи учун улардан қиммати кам бўлмаган бир зот ҳам қочиши керак. Уни эса хийла қаттиқроқ қуриқлашяпти, ундан кўз узишмаяпти!

Ёлғиз ўшанигина деб жонини хавф остида қолдиряпти, ўшани деб ўз ёрида неча-неча соатлаб умрини ташхоликда ўтказяпти, сира ақл бовар қилмайдиган янгидан-янги режалар устида бош қотиряпти.

Каталинани қулфбанд қилганлар, туну кун бедору муттасил қуриқлашяпти.

Каталина у билан бирга кетишга онт ичган. У, нега энди улар дарров, ўшандаёқ қоча қолишмади? Нимага тайсаллашди? Қимматли дақиқани нега бой бериб қўйиш-я у?! Тайсаллашнинг оқибати машъуму таҳликали бўлиб чиқди. Наҳотки ўйлаган режалари бир неча ойлаб, йиллаб амалга ошмаса, эҳтимол ҳеч қачон бундоқ бўлмас?..

Фанимларининг адоватию ғазоби, водийдагиларнинг нафрат билан қараши Карлосни кўпда ташвишлантирмасди. У ёлғиз Каталинадан хавотирда эди. ёлғиз уни ўйлашгина мудом ташвишга соларди уни. Бедор пайтларида у фақат бир нарсани — ўзини эмас, севгилисини қандай халос этишинигина ўйлар эди.

Унинг тун киришини шунчалар исташидан ажабланиб бўладими? Унинг Пекос бўйига, Антонио билан яширини учрашадиган жойга сабрсизликла от елдиришидан таажжубланиш жоизми?

Мана, яна тун чўкди. Карлос отини ғор оғзидаги қияликка етаклаб чиқди-да, бир сакрашда ўзини эгарга олиб, дарадан қуйига қараб йўрттира кетди. Бизон олдинда чопиб борарди.

Л I V Б О Б

Одам овчиларига, худди ўзлари тахмин қилганларидек; кўп кутишга тўғри келмади. Ой нур сочиб ту-

рибди — улар ана шуни ҳам ҳисобга олгандилар. Ол ёрқин ёғду сочяпти, гоҳ-гоҳидагина осмон бўйлаб сузиб юрган булут парчалари бир нафасгагина тўсиб оларди унинг бетини.

Илло ҳили этган шамол йўқ, ҳаво шу кўйи тошқотгандай. Бу ерда, баландда, ҳаво шундайин мусаффо ҳамда беғуборки, тик этган товуш олисданоқ эшитилди, ҳар бир шитир этган шовқин шарпаси узоқлардан акс садо беради.

Гарчи овчиларнинг ўргатилган итларини отлари жим турган, овчиларнинг ўзлари ҳам садо чиқармай ётган бўлсалар-да, барибир шовқини шитир-шитирлар эшитилаётганди. Овчилар жимгина ётишар, мабодо гаплашган чоғларида ҳам фақат шивирлашардилар.

Эшитилаётган шовқини шитир-шитирлар табиатнинг мазкур овлоқ ўлкасининг одатдаги товушлари эди: дам қўнғир айиқ ўзининг қоялар орасидаги уясида хуррак отиб, дам дашт бўриси — койот ув тортиб ё акиллаб қолар, гоҳ бойўғли «уҳ-уҳлаб» сайраб юборар, гоҳ кўршапалак чузиқ чийиллаб ёки тентакқуш чинқириб юборарди.

Орадан ярим соатча ўтди, Мануэль билан Пепе кўзларини қулоқларига бирон дақиқа ҳам дам беришмади. Улар дам дарага, дам водий томонга тикилишарди. Қурбонлари ёрда йўқ бўлиши мумкин, кундузиям бўлмагандир эҳтимол, уларга ўхшаган одамлар эса ҳар қандайин эҳтимолу имкониятни олдиндан пайқаб, торозуга солиб кўра оладилар. Мабодо аслида шундоғу ва мабодо Карлос ҳозир ёрда қайтадиган бўлса, у чоғда уларнинг режасини амалга оширишининг иложи йўқ. Лекин Мануэль шундай ҳолни ҳам ҳисобга олиб қўйганди: Карлосни ўтказиб юбориш керак, ана ундан кейин, кечаси писибгина ёрда яқинлашиб — ўқ етгулик масофагача бўлса янаям яхши — эрталабгача, малласоч яна кўрингунича пойлаб ётиб, у кўриниши билан милтиқдан ўқ узиб қўлидан ярадор қилиш керак — бу қуролни саргимтир тусли овчи моҳирона ишлатар эди. Отини отса ҳам бўлади — бу ҳам чакки режа эмас. Агарда отини ўлдирадиган ёки яралайдиган бўлишса, Карлосни муқаррар қўлга туширишарди-ёв. Хўлласи калом, ошналар кези келиб қолди дегунича ажойиб тулпорни гумдон қилишни дилга тугиб қўйишди.

Улар яна Карлосни ўлдириш ёхуд қўлга тушириш-

нинг жудаям аниқ-пухта йўлини билишарди, бунда муваффақиятсизликка ўриш ҳам, имкон ҳам йўқ эдику-я, лекин қурбонлари ғорда эканини аниқ билишгани тақдирдагина, амалга ошарди бу, албатта. Аммо уларнинг мазкур усулдан фойдаланмасликка ўз асослари бор эди.

Уланлар бўлганини ясситоғлик бўйлаб бошлаб келиб, уни тепада, дарадан чиқадиган сўқмоқ ёнига қўйишдан осони йўқ эди. Бошқа бўлук бу пайтда дарага водий томондан кириб келарди; даранинг икки биқиндаги қоя деворлари ниҳоятда тик бўлгани сабабдан эса ҳар иккала томондан Карлоснинг қочадиган йўли тўсиб қўйилган бўларди. Тўғри, бизга аён бўлганидек, башарти аскарлар дарага қадам қўйди дегуналарича бари режа чиппакка чиқади; уларни дарани айланиб ясситоғликка бошлаб чиқиш учун эса бутун бошли бир кул кетарди. Аммо-лекин Вискарра билан Робладо муқаррар галабага эришиш учун на вақтнию на одамларни аяшган бўлурди-я, албатта.

Мулат билан қизғиш-қора тусли ошнаси буларнинг барини жуда яхши билишарди-ю, бироқ иложи борича бундай усулдан фойдаланмасликка ҳаракат қилишарди. Буни ўзларини деярли хаф-хатарга қўймай амалга оширса бўлади, лекин у чоғда хизматларига озроққина ҳақ тегади: ахир ҳар бир аскар тайин этилган мукофотдан саб-баравар улуш талаб қилади-да. Мануэль билан Пене эса, агарда ўз тажрибаларни топқирликлари нарофати ила Карлос қўлга олинадиган бўлса, мукофотни ҳеч бир кимса билан бўлашишни исташмасди. Йўқ, улар бу усулни қўллашни хаёлларига ҳам келтиришмасди. Икковлариям бировнинг ёрдамисиз ниятларига етишларига зарра шубҳаланишмасди.

Улар қоядаги пистирмаларида кўп кутмадилар. Ярим соатнинг нари-берисида унисиниям, бунисиниям сезгир кулоғи дарадан келаётган товушни илғади: кимдир водийга қараб яқинлаб келаётган эди. От туёқлари тошга тақ-туқ тегаётган, майда шағал шувиллаб кўчаётганди.

Даранинг туби жала пайтида пастга қулаган тошларнинг парча-пурчалари билан қопланган эди. Ана шу тош билан қопланган йўлдан дара бўйлаб сувори ўтиб бораётган эди.

— Малласоч,— деб шивирлади Мануэль.— Албатта ўша.

— Тўғри айтасан, оға, топдинг. Унинг ҳамма изини дарров топиб, билиб олдинг. У худди шу ғорда бекиниб ётган экан. Қайтиб келганида албатта қўлга туширамиз-ов уни... Ҳа, жин ургур! Ана у!

Пепе сўзини охирига етказиб улгурмасиданоқ қияликда баланд қора шарпа кўзга ташланди. Овчилар ойдинда сувори билан отни аниқ кўрдилар. Бу кўз остига олган қурбонлари эканига шубҳаланмаса ҳам бўларди.

— Менга қара, оға,— дея пичирлади Пепе,— борди-ю, шундоқ яқингинамиздан ўтиб қолсачи у? Балки отини қулатармиз? Бунақанги ойдинда ўқинг хато кетмайди, отини пойлаймиз. Уни гуппа қулатсак — малласочини осонгина қўлга туширамиз-қўямиз.

— Ярамайди бу, ўғлон. Уни яёв бўлсаям ушлаш унғаймас. Қоялар орасига чиқиб кетади, уззукунлаб бекиниб юради — ўзиниям, бизниям қийнаб юборади. Эски режамиз маъқул. Қўявер, бораверсин — қайтганидан кейин қўлга туширганимиз яхши. Ана унда шубҳасиз ушлаб оламиз.

— Лекин, Мануэль...

— Э жин урсин! Яна қанақанги «лекин»и бор экан? Ҳамиша шошилганинг-шошилган. Сабр-тоқатли бўл, тайсаллама, чўчима асти! Ана, қара!

Ушбу нидо Пепенинг таклифи оқилона бўлишига қарамай амалга ошмайдиган гап эканини англатарди, зотан сувори улар милтиқдан отганлари тақдирда ҳам ўқлари етмайдиган ердан ўтиб бораётган эди.

У ҳар иккала тик ёнбағирликдан баб-баравар масофада, даранинг қоқ ўртасидан келаётган, очиқ ерга овчилар пистирмада ётган жойдан икки юз ярдлар чамаси наридан чиқиб бориши яққол кўриниб турар эди.

Шундай бўлди ҳам. Бир неча дақиқадан сўнг у овчиларнинг панагоҳи рўпарасига етиб келди ва ораларидаги масофа дарҳақиқат икки юз ярддан кам эмасди. Мануэлнинг овчи милтиғидан узилган ўқ унғача етиб боролмасди барибир; Пепенинг узган ўқи ҳам худди шундай бефойда кетиши аниқ эди. Овчилар нафасларини ичга ютганча, отишни хаёлларига ҳам келтирмай ётишарди; улар итларини қоя ёриғида зўрға, тинчлантириш учун силаб-сийпаб тутиб туришар эди.

Сувори ғоятда эҳтиёткорлик билан, секин келарди. Сутдек ойдинда эгар-жабдуғи ва қуролининг ялтироқ жойлари йилтилларди. Суворининг оппоқ терисию келишган қоматини, унинг антиқа тулпорини аниқ-тиниқ илгаш мумкин эди.

— Малласоч!— ғудранди Мануэль.— Омадимиз боркан, ўғлон.

— Ҳув анави, олдиндаги нимади?— деб сўради Пепе.

— Э-ҳа! Пайқамабман-ку. Э падарига лаънат! Ит у. Ҳа-да, ит!

— Туппа-тўғри, ит-ку, жаҳаннамга даф бўлгур!

— Ҳа, жаҳаннамга даф бўладиган ўзиям! Эшитгандим у тўғрисида. Жуда топилмайдиган ит. Вой дардигар-а! Роса иш орттирадиган бўлди-да бошимизга! Яхшиямки шамол ўшоққа қараб эсмаяпти. Шунчун ҳозир унчалик хавфлимас... Э, жин ургур! Қара!

Сувори қўққисдан тўхтаб, овчилар биқиниб ётган қоя тепасига шубҳали тикилиб қолди. Итнинг ўзини тутишида нимадир уни безовталантирган кўринади.

— Э лаънати!— деб тўнғиллади яна Мануэль.— Бу ит тоза даҳмаза орттирадиган бўлди-ку! Бахтимизга шамол ўшоққа қараб эсмаяпти де.

Кучсизгина шабада эсаётганди, ҳақиқатан ҳам у сувори томондан туппа-тўғри овчиларнинг бетига келиб урилаётганди, бу уларнинг омадлари келгани эди, йўқса бизон исларини олган бўларди, албатта.

Шунда ҳам пистирмаларини оз бўлмаса пайқаб қолаёшишди. Қандайдир салгина товуш — балки отлардан бирортаси ўт устида оёғини кўтариб-босгандир — гарчи сувори ҳеч нимани эшитмаган бўлса-да, итда шубҳа уйғотгандир. Кейин, ит ҳам дарров тинчланди чамаси — у тумшугини пастга солинтирганча олға чопиб кетди. Сувори унга эргашди. Бир неча дақиқадан сўнг улар кўздан ғойиб бўлдилар.

— Ана, энди, ўғлон, ғорга!

— Кетдик!

Овчилар пастга тушиб, отларига минишди-да, қояларни оралаб ўтиб, дарага кириб боришди. Тик ёнбағир кўлагасидан даранинг нариги торгина этагига, ҳозиргина сувори тушиб келган сўқмоққа қараб бораверишди. Сўқмоқдан кўтарилар экан, улар ўнг томондаги қоя-чўққини кузатиб боришарди, бинобарин ғор ўша тарафда бўлиши керак эканини билишарди.

Улар из қолдирамиз-у, ҳатто кундузи қайтган чоғида ҳам Карлос уни таниб қолади деб хавотир олишмасди: сўқмоқ тош-шағаллар устидан тушган, бу тошларда эса унинг ўзининг оти туёқлари қолдирган белги-аломатлар бор эди. Шунга қарамай Мануэль буткул хотиржам эмасди; вақти-вақти билан ўз-ўзичами, ё ошнасига қарата айтяптими, ҳайтовур:

— Падарига лаънат уни! Бу ит ташвиш орттирадиган бўлди-да, албатта дардисар бўлади! Лаънати махлуқ!— деб тўнғиллаб қўяр эди.

Ниҳоят даранинг тош деворида, худди қоп-қора доғдай горнинг оғзи кўринди. Мануэль секингина отдан тушиб, уни Пепеннинг ёнида қолдирди-да, камгакка чиқиб борди ва горга кираверишни синчиклаб кўздан кечира бошлади. Айёр овчи ҳар эҳтимолга қарши, тагин тусатдан ичкарида бирор кимса бўлмасин деб, ғоятда эҳтиёткор эди; шундай бўлиб қолиш эҳтимолини ҳам назар-эътибордан қочирмаган эди у.

Бирмунча муддат кираверишда қулоқ солиб турди у, кейин итларни горга киритиб юборди; итлар эса во-вилламади ҳам, ирилламади ҳам, шундан сўнг Мануэлни ахийри кўнгли жойига тушди. Ўзи ичкарига эмак-лаб кирди (ҳар қалай қоялар кўлага ташлаб турган ердан), кейин тагин шуъласи ташқарига тушмасин деб пана қилиб туриб ўт ёқди, атрофга тез кўз югуртиб, бу ерда ҳеч ким йўқлигига узи-кесил ишонч ҳосил қилгач, ташқарига чиқиб, ошнасига отларни олиб келишни буюрди.

Энди горга иккала овчи отлари билан киришди. Улар бутун теварак-атрофни тит-пит қилиб, Карлоснинг қоқ-қуруқ камгак жойдаги озроққина қақир-қуқурларини топишди. Серапе, ўт қалагани пайраха ёрадиган чоққина болгача, овқат пиширадиган декча, икки-учта товоқ, бир неча бўлак сур гўшт билан озроққина нон — горда бор бисот ана шугина эди, холос.

Номатлуб меҳмонлар дидларига ёққан ҳамма нарса-ни ўзлариники қилиб олишди ва отларини ичкарироққа боғлаб қўйиб, ушбу тош уйи буткул ўзлаштириш учун ҳар бир бурчакни диққат-ла назардан ўтказиб чиқишди; кейин ўтни ўчириб, ётиб олишди-да, бамисоли йиртқич ҳайвонлардек, ҳеч нарсадан хабари йўқ ўлжаларини пойлашга тушишди.

LV БОБ

Гордан жўнаган Карлос ўз ҳолатидаги одам учун тамоман табний тарзда эҳтиёткорлик ила кетиб борарди. Лекин бу кеча у айниқса эҳтиёт бўлаётган эди. У йўлидаги орқасида ғаним яшириниб олиши мумкин бўлган ҳар бир тош, ҳар битта бутага сиичиклаб тикиларди. Нима сабабдан у бугун одатдагидан эҳтиёткорроқ бўляпти? Шул сабабданким, унинг кўнглида шубҳа уйғонган, ҳозир шундоқ яқингинасида писиб ётган одамларни нанимга тушган бўлишлари мумкин деган гумонда эди.

Кейинги кунларда у ана шу одамларни тез-тез ўйлайдиган бўлиб қолди. У бу нусхаларни яхши билар, шунингдек овчиларнинг — Мануэль эса айниқсанги — ўзини кўрарга кўзлари йўқлигидан ҳам хабардор эди. Ушаларни мени излагани жўнатишлари мумкин, деб ўйларди у, унда булар албатта изини топишади. Ана шу сабабдан Карлос ҳозир илгаригига, уланлар бўлуги тажрибасиз бошлиқлари қўли остида ўзини таъқиб этиб юргандагига қараганда чандон бора кўпроқ ташвишда эди. Борди-ю, айёр мулат билан зийракликда ундан қолишмайдиган ошнаси изига тушадиган бўлсалар, у чоғда, турган гапки, ғор унга узоқ бошпана хизматини ўтаёлмайди ва у Сан-Ильдефонсодан маълумоту янгиликларни аввалгидек осонгина ололмайди.

Мазкур ўй-фикрлардан Карлос алланечук бўлиб кетди ва башарти ошналарнинг ҳозирда ясситоғнинг олис ерларида ов қилиб юрганларига ишончи комил бўлмаганида ҳавотири янаям газак олиб кетиши тайин эди. У то Мануэль билан Пепе қайтгунича ҳамма ишларини тинчитиб, бу ўлкадан жўнаб кетишдан умидвор эди. Аммо бугун эрта билан унинг умидлари пучга чиққанди.

У панагоҳига қайтаётганида аллақачон тонг ёришиб бўлганди. Бу гал ҳар бир қадамини айғоқчилар кузатиб юрган Антонио келишилган жойга вақтида етиб келолмади, ана шу боисдан Карлос тутилиб қолди. Дарага қайтаётиб ясситоғликнинг шимолий чеккасида буёққа қараб келган янги изларга кўзи тушди. Бу ердан отлар, хачир ҳамда итлар ўтганди, шунда Карлос изларидан қанча эканликларини бирпасда санаб билиб олди. Маълум бўлишича — сарғимтил тусли овчи билан ошнасининг от, хачир ва итлари қанча бўлса, унинг саноғи ҳам худди ўшанча чиқди. Карлос дарҳол тушунди: бу

ўшаларнинг изи! Улар прерия — даштдаги овдан қайтишибди.

У ишларни диққат-ла назардан ўтказиб, ўзининг хавотири тўғри чиққанига ишонч ҳосил қилди. Итлардан бирининг изи бошқаларникидан фарқ қиларди. Йирик-йирик бўлишига қарамай, бу маҳаллий бўрибосарнинг изи эмасди. Карлос мулат Мануэлнинг яқинда бузоқдай исковуч сотиб олганини эшитганди. Ҳеч шубҳасиз, бу ўшанинг изи.

Карлос овчиларнинг изидан улар токи ўзининг дарага элтадиган эски сўқмоғи билан кесишган жойгача борди. Суворилардан бири итлар билан бирга йўлдан бурилиб, унинг оти изи олиб борадиган томонга қараб юрганини кўрганида йигитнинг қанчалар ажабланганини асти қўяверасиз. Шубҳа бўлиши мумкин эмас: бу одам айнан унинг, Карлоснинг изларини кузатган. Кўп ўтмай ўша одам яна орқасига қайтиб, олдинги йўналишини давом эттирган.

Карлос эндиликда кеча кечқурун бу ердан овчилар ўтишганини билиб олди. У буёғига ҳам излардан бориши мумкин эди-ю, лекин тонг отиб қолди, иннайкейин, овчилар очиқ-ошкора шаҳар томонга кетишгани туфайли ўша тарафга боришга журъат этмай, ўз панагоҳига қайтди.

Кун бўйи уни ана шу кашфиёт кўнглига солиб қўйган хавотирли ўйлар тарқ этмади; ҳозир ҳам, гордан чиқиб келар экан, шуни ўйларди; ана шу сабабдан бундай эҳтиёткорлик қилаётган эди.

Шундай қилиб, Бизон чопганча дара четига чиқиб, дабдурустдан қояларга ўгирилди ва оҳиста ириллади. Карлос худди ана шунда йўлдан тўхтаб, ўша ёққа синчиклаб тикилди. Бироқ у ҳеч қандай шубҳали нарсани илғамади; бунинг устига Бизон ҳам тинчланганди чоғи, тағин олдинга югуриб кетаверди.

«Бирорта ёввойи ҳайвондир-да», — деб ўйлаб, йўлига кетаверди Карлос.

У очиқ ерга чиқиб келди, олти-етти миль от йўрттириб бориб, Пекоснинг бўйига етиб келди. Бу ерда у оти бошини оқим ёқалаб қўйига бурди-ю, яна эҳтиёткорликка риоя қилиб, қирғоқдаги дарахтзорга қараб ҳайдади. Худди ана шу дарахтзор учрашув жойи эди.

Манзилга етишига юз ярдча қолганида Карлос отини тўхтатди. Ит олға ташланди; дарахтлару буталар ора-

лаб изгин чиққач, эгаси ёнига қайтди. Ана шундан кейин у дарахтзорга дадил кириб бориб, одан тушди ва дарахт остига ўтиб, хабарчини кута бошлади.

Унчалик кўп кутмади у. Бир неча дақиқадан сўнг водийда бировнинг қораси кўринди; у энгашиб олганича жадал дарахтзорга яқинлаб келаверди. Уч юз ярдча қолганида тўхтаб, астагина ҳуштак чалди. Карлос ушбу ишорага жавоб қайтарганди, бояги одам ҳануз ўшандай энгашиганича унинг ёнига, дарахт остига етиб келди. Бу одам Антонио эди.

— Орқангдан пойлашдим, дўстим?— деб сўради Карлос.

— Ҳар доимгидек, хўжайин, лекин бирпасда чалғитиб кетдим уларни.

— Ҳа-а, энди осон бўлмайди бу.

— Нимага энди, хўжайин?

— Қандай янгилик топиб келганингни биламан: сарғимтил тусли овчи қайтган, тўғримасми?

— Во ажаб! Худди шундоқ! Буни ким айтди сизга, хўжайин?

— Эрталаб, сен кетганингдан кейин, изларга дуч келиб қолдим — худди ўшаларнинг изи.

— Худди ўшаларники-да, хўжайин. Улар кеча кечкурун қайтишди. Лекин менда бундан ҳам бешбаттар янгилик бор.

— Бешбаттар? Нимайкан ўзи?

— Улар сизни қидиришяпти!

— У-хў, аллақачон-а! Мен буни кутгандим-у, лекин шундай тез бошланади деб ўйламагандим. Буни қаёқдан била қолдинг, Антонио?

— Хосефа айтди. Унинг укаси Хоакин тақсирларига дастёр. Тақсир эрталаб уни қалъага олиб борибди, тундан кейин бўлса капитан Робладони сарғимтил овчининг капасига бошлаб боргани жўнатибди. Тақсир болакайга нўписа қилиб, ҳеч кимга оғзингдан чиқара кўрма, деб тайинлабди. Ибодатгоҳга қайтиши биланоқ у онасининг ёнига чопибди. Хосефа бўлса аллақачоноқ, уни биронта попок ишга жўнатишди-ёв, деган шубҳага борган экан, нимага десангиз, укаси унга кумуш таигани кўрсатибди мақтаниб. Шунда у укасини гапга солиб ҳаммасини билиб олибди. Болакай Робладо билан овчилар нима тўғрисида гаплашишганини билмасмиш-у, лекин назарида улар қаёққадир боришмоқчи экан. Шундоқ қилиб бу-

ларнинг барини жамлаб, чоғиштириб, уларни сизнинг изингизга тушишган бўлишса керак деб ўйладим, хўжайин.

— Албатта шундоқ, дўстим! Бунга тариқча ҳам шубҳам йўқ. Демак, мени ғордан ситиб чиқарадиган бўлишибди-да, энди. Қаерда яшириниб юрганимга ақллари етган, албатта. Нимаям қилардим, бошқа бошпана излашга тўғри келади. Яхшики бу муттаҳамларни вақтида пайқаб қолдим-да, энди ухлаб ётган пайтимда қўлга туширишиб бўпти. Улар, чамамда, худди шунга умид боғлашган-ов... Хўш, яна қандай янгилик бор?

— Жудаям унақанги аҳамиятли эмас. Кеча кечқурун Хосефа Висенсани Хосе билан бирга кўрибди. Сеньорита билан бир оғизгина гаплашишнинг иложини қилолмабди: уни жудаям қаттиқ қуриқлашаётган эмиш. Лекин Хосефани дарвозабоннинг хотинида иши бор экан. Эртага уни кўради — эҳтимол ўшандан бирон нимани билиб олар.

— Меҳрибон ошнам Антонио,— деди Карлос унинг қўлига танга тутқазиб,— буни Хосефага бергинда, унга тайинла, ҳаракат қилсин, бутун умидимиз ўшандан-а!

— Чўчиманг, хўжайин!— деб жавоб қайтарди Антонио кулимсираб.— Хосефа кучи борича ҳаракат қилади. Ўйлашимча, унинг бутун умиди менда-ку!

Карлос ўзининг содиқ хизматкори ва дўстининг содда сўзларига кулиб қўйди-ю, бироқ ўша заҳотиёқ мутлақо бўлак нарса — онаси билан синглиси ҳақида, аскарлар, хуфия-айғоқчилару дон Хуан тўғрисида сўраб-сурштиришга тушиб кетди.

Антонио дон Хуан хусусида ҳеч қандай янгиликни билмасди. Қалъада содир бўлган воқеадан кейин, эртаси кунни уни ҳибсга олишган, ўшандан бери авахтада эди у. Уни Карлос билан шерикликда айблашган ва бизон овчисини ушлашлари биланоқ суд қилишлари лозим эди.

Ярим соат ичида улар ҳамма нарса хусусида гаплашиб олдилар. Карлос Антонионинг қўлидан егулик тугилган тугунчани олиб, ўз панагоҳига қайтишга ҳозирлана бошлади.

— Эртага яна келарсан, Антонио,— деди у хайрлашаётиб.— Борди-ю, буёққа келишимга бирон нима халақят бериб қолса, индинга ва яна кейинги кунни кечаси кут мени. Хайрли тун, дўстим!

— Хайрли тун, хўжайин!

Шу сўзлар билан дўстлар — зеро улар ҳақиқатан ҳам қиёматли дўст эдилар — ажралишди.

Антонио энгашиб, деярли букчайиб олганича водий томонга қараб йўлга тушди, Карлос эса сакраб ўзини эгарга олди-ю, бадқовоқ Льяно Эстакадо қоялари сари от елдира кетди.

LVI БОБ

Антонио хабар қилган янгилик Карлосда ғоятда жиддий хавотир — мабодо Карлосга шундай туйғу ошно бўлса, қўрқув дейиш ҳам мумкин эди — уйғотмай қололмасди. У янада эҳтиёткорроқ бўлиб, зўр бериб ўзини таъқибчилардан қандай муҳофаза этиш устида бош қотира бошлади.

Башарти ўзини қўлга туширишни истаган икки паҳлавон одам билан бетма-бет жанг қилиши керак бўлса бунчалик безовталанмасди у. Аммо бу икки ярамаснинг бақувват эканини, лекин шунга қарамай, унга нисбатан хиёл устунликка эришган чоғларидагина ҳамла қилишларини билар эди. Муттаҳамлар у ухлаб ётганида бос-тириб келишлари муқаррар, ёки уни қандайга бўлмасин гафлатда қолдиришга уриниб кўришади. Ушаларнинг макру найрангидаи эҳтиёт бўлмоғи даркор у!

Карлос бутун вужуди ила сарғимтил овчи ва унинг ошнаси ҳақдаги ўй-фикрларга берилган кўйи аста дарага қараб борарди.

«Улар бу ғорни билишади, албатта,— ўйларди у.— Ростки кеча изимга тушишган экан, демак, мени даранинг қаеридадир яшириниб ётибди деган шубҳага боришган. Қалъада содир бўлган ҳангомани ҳам аллақачон эшитган улар. Уёқда, ясситоғлиқда бирорта чўпон гапириб берган бўлса керак уларга. Хўш... Буёғи қандоқ бўлди экан? Улар миссияга ошиқишган. А-ҳа! Хоакин тақсирлари болакайни қалъага эргаштириб борибди. Тушундим, тушундим... Ҳазрат анави ярамасларнинг пири-ку, ахир. Ушалар тақсиримга нимадир дейишган, йўқса бунчалик эрта қалъада нима бор унга? Шундай қилиб, улар янгилик топиб боришган-у, Робладо ўша заҳотиёқ муттаҳамларнинг ёнига жўнаган. Ҳаммаси ойдин: улар менинг панагоҳимни билиб олишган. Эҳтимол улар мен йўғимда дарага кириб олгандирлар?— ўйларди у.—

Кўрамиз-да! Нимаям дердим, агарда Робладо билан гап-лашганларидан кейиноқ йўлга чиққан бўлишса, вақтлари бемалол етарли бунга. Болакай худди шундай деб ўйлаган. Ҳа, кўз-қулоқ бўлиш керак! Вақт етди!»

Хаёлига шу фикр келгани заҳотиёқ Карлос қорабайирнинг жиловини тортиб, нақ отнинг бўйнига қадар энгашди-ю, зим-зиё истиқболига тикила бошлади. У болакетган йўли билан дара оғзига етиб келган эди. Бироқ, ҳозир ой залворли булутлар ортига яширинган, унинг ёрдуси қоронғу дарани ёритмай қўйганди.

«Улар ичкарироққа, даранинг тор жойига кириб бориб,— дея мулоҳаза қиларди у,— менинг ёрдан чиқишимни пойлаб ётишлари мумкин. Уларнинг қўлидан келадиган иш бу. Мени ўша ерда пойлаб ётишдан осони йўқ. Балки улар шу топда дарададирлар».

У бир нафас ўйга толиб турди. Ҳа, шундоқ бўлиши мумкин.

«Нимаям қилардим, майли, шундоқ бўла қолсин ҳатто,— деди у ўз-ўзига.— Барибир боравераман. Бизон ўқ етадиган масофа баробарида олдиндан бориб, қояларни айланиб тушади. Агарда улар ўша ёқда писиб ётишган бўлса, ит уларни фош этади,— демак, бу нолислар мен ўйлагандан кўра айёрроқ бўлиб чиқади, мен эса уларнинг анойи эмасликларини биламан-ку, ахир! Борди-ю, Бизон уларни чўчитиб юборгундай бўлса, отимни йўрттириб қутулиб кетишга улгураман!»

— Ҳей, Бизон!

Бир неча одим олдинда тўхтаган ит югуриб келиб, эгасининг афтига қаради. Эгаси унга ишора қилиб, биргина сўз айтди:

— Изла!

Ит дарага отилди. Энди у хийла олдинда, ерни искаганча чопиб борарди. Сувори унинг кетидан йўлга тушди.

Тик деворлар ниҳоятда бир-бирига яқинлашган, оралиги бор-йўғи юз ярдча масофагина бўлган жойга шу тахлитда етиб келди. Ҳар икки биқинидаги қоялар этагиде орқасига одамлар бемалол беркинса бўладиган уйда-уйдай тошлар ётарди; уларнинг орқасига ҳатто отларни яшириш мумкин эди.

«Мана, қўрқоқларча пусиб туриб ҳужум қилишга энг қулай жой,—деб ўйлади Карлос. Бу ерда хоҳлаган томондан хоинона зарба берса бўлади, ҳатто унчалик мул-

жаллаб утирмай ҳам. Лекин Бизондан ишора бўлмаяпти-ку».

— А-ҳа!

Бу калтагина хитоб итнинг пастгина ҳуришига жаноб бўлди. Бизон мулат билан ҳамтовоғи дара ўртасига қараб бурилган жойдаги излар устидан чиқиб қолган эди. Шу пайт ой булутлар орасидан мўралаб қолди-ю, Карлос итнинг дара бўйлаб гор оғзига томон учиб бораётганини кўрди.

Эгаси уни чақириб олган бўларди-ю, лекин ит булутлар ортидаги қояларда бирор кимса бор-йўқлигини ахтариб кўргани йўқ эди ҳали, бусиз эса Карлос йўлини давом эттиришга жазм этмаётган эди. Аммо Бизон олға томон ўқдай учиб борарди — унинг янги изни топгани икқол кўриниб турибди; шунда Карлоснинг миясига, ганимларим ҳозир горда экан, деган ўй келди.

У ана шу хаёлга келган заҳоти Бизон яна ҳуриб қолди. Ит энди кўринмай қўйган, бироқ эгаси унинг гор оғзига яқинлаб қолганини ва янги излардан елиб-югуриб бораётганини билиб турарди.

Карлос жиловни тортиб, қулоқ сола бошлади. Уёғига боришга ботинмади. Итни чақириб олишга ҳам журъат этмади. Мабодо яқин-атрофда биров бўлса, овозини эшитади. Ҳозирда итнинг қайтишини кутиш ёки Бизон ким ё ниманинг изидан қувиб кетганини тушуниб олгунига қадар кутишгина қолганди, холос. Пировард-оқибатда бу айиқ ёки бирорта ваҳший ҳайвон бўлиб чиқиши ҳам мумкин-ку.

Карлос отда қилт этмай ўлтирар, аммо поғаҳоний ҳамла уни ғафлатда қолдира олмасди. Унинг аниқ мўлжалга урадиган қуроли эгарга кўндаланг қўйиғлиқ, пилтаси билан ўқини олдиндан текшириб кўрган эди. У шитир этган товушга қулоқ солар, олдиндаги қояларнинг қоронғироқ кўринган ҳар битта камгагу ботиқ ерларига ва теварак-атрофига синчиклаб тикилар эди.

Ҳеч нарсадан беҳабар туриши кўпга бормади: горнинг ичкарасидан суворини эгарда ўлтирган жойида сакраб туриб кетишга мажбур этган шовқин эшитилди. Афтидан итлар олиша кетганди, шунда Карлоснинг назарида Бизон худди айиққа ташлангандай туюлди. Бироқ, ушбу алданиш ўша ондаёқ йўқолди: овчининг сезгир қулоғи бир нечта итнинг товушини илғади, жазавали

олишувнинг оламини бошга кутаргудек шовқини орасидан у исковучнинг ҳирқироқ хуришини ажрата олди.

Шу заҳотиёқ ҳаммаси ойдин бўлди-қўйди унга. Шовқин уша ёқдан келаётганига ишончи қатъий эди.

Калласига келган дастлабки ўй-отини бура солиб дарадан жўнаб қолиш ўйи бўлди. Аммо у жойида қолиб, қулоқ солаверди.

Олишув шовқини тинмаётганди, лекин эндиликда итларнинг вовиллашиб-ириллашлари орасидан Карлос бир-бировни ҳамда итларга шоша-пиша ва босинқи товуш билан алланималар деяётган одамларнинг овозини ҳам илғаб олди.

Шунда тўсатдан олам тинчигандай, итлар жим қолгандай бўлди, аҳён-аҳёнда исковуч бўғиқ ҳуриб қўярди, холос. Бироқ, мана у ҳам тинчиди.

Жимжитлик Карлосга Бизоннинг ё ўлдирилгани, ўзига ташланган одамлардан бирон ёққа қочиб қолганини айтиб турарди. Уни ортиқ кутишдан маъни йўқ эди. Карлос биледи: Бизон агарда тирик бўлса, эгасига етиб олади. Энди сира иккиланмай оти бошини бурди-ю, дарадан қўйи томонга йўрттириб кетди у.

LVII БОБ

Карлос дара оғзига етиб келиб, тўхтади, бироқ очик жойда эмас, қоялар кўлагасида, яқингинада таъқибчилари пистирмада ўлтирган уша қоялар кўлагасида тўхтади. Эгарда ўлтирган кўйи орқасига, дара ичкарасига ўгирилиб қараганича, кетимдан биров қувиб келмапти-микин, деб қулоқ солди.

Кўп ўтмай ўзига аллақандай қора яқинлашиб келаётганини пайқайди. Бизонни таниб қувониб кетди. Мана ит унинг узангиси билан бараварлашди. Карлос энгашиб қараркан, итнинг дабдаласи чиқиб, жароҳатларидан қон оқиб ётганини кўрди. Биқинларидаги бир нечта чуқур жароҳатнинг оғзи очилиб турибди, кифтида бир парча териси ағдарилиб осилиб қолибди, ундаи қип-қизил қон сизиб оқяпти. Бизон каловланиб кетяпти; қон йўқотганидан силласи қуригани кўриниб турибди.

— Дўстим!— деди Карлос.— Сен бугун менинг ҳаётимни сақлаб қолдинг, энди менинг навбатим — сенинг ҳаётингни сақлаб қолишга уриниб кўраман.

Шундай деганича у отдан тушиб, итни кўтариб олди-
ди, яна отга минди.

У буёғига нима қилиш устида ўй сурган кўйи ўти-
раркан, таъқибчилар келадиган тарафдан кўзини уз-
масди.

Горни ким эгаллаб олганни энди аниқ билади. Ис-
ковучнинг ҳуриши унга ҳаммасидан кўра яққолроқ ай-
тиб берганди буни: уёқда сарғимтил овчи, ёнида, турган,
қашки, самбо ҳам бор. Бутун водийда бошқа исковуч
ёқ — демак, ўша вовуллаган Мануэлнинг ити.

Дақиқа ортидан дақиқа ўтиб борар, Карлос эса қоя-
лар кўлагасида қилт этмай, ҳамон қаёққа қараб юрсам-
никин деб бош қотирар эди.

«Дарахтзорга бориб, ўша ерда Антониони кутаман.
Улар бугун изимга тушишолмайди — тун зимистон қо-
ронги бўлади. Осмонни булут қоплаб олди сидирғасига,
инди ой кўринмайди. Агарда улар топишолмаса, эртага
ҳам кун бўйи бекиниб ётсам ҳам бўлади. Хўш, борди-ю
изимни топиб олишса, — нима ҳам қилардим, уларни
олисданоқ кўриб, жуфтакни ростлашга улгураман...
Шўрлик Бизоним, қонингга беланиб кетибсан. Воҳ, жа-
роҳатини қаранг-а! Чидай турасан-да, оғайничалиш!
Дам олгани тўхтаганимизда дори-дармон қиламиз...
Бўлди, дарахтзорга бораман. Улар мени ўшаёққа кетган
деб ўйлашмайди, негаки шаҳар ўша томонда-да, ахир.
Кейин, қоронгида изимниям топишолмайди... У-ҳў! Ни-
малар деяпман ўзи? Қоронгида изимни тополмайди, бе-
корчи гап! Нима, исковучни унутдингми? Яратганинг
ўзи паноҳида асрасин мени! Агарда тун қорақурумдан
қоронғироқ бўлганидаям топиб олишади мени бу иб-
лислар. Илоё ўз паноҳингга асрагайсан мени!».

Юзига хавфу ташвиш соя ташлади. Қўлидаги юки
ҳам оғирлик қилаётгани, оғир ўй-фикрлар жисми-жонини
эзаётгани ҳам кўриниб турарди: Карлос бучкайиб олган
на чамаси, тубсиз умидсизлик домига тушиб қолгандек
эди. Одамлар ҳамда қонун таъқибига учраган қочоқ но-
умидлик аломатларини биринчи бора намоён этаётган
эди.

У от бўйнига энгашган кўйи, бошини кўтармай, узоқ
ўлтириб қолди. Шундай бўлса-да, ҳар қалай буткул
умидсизликка тушмаганди у.

У иттифоқо қаддини ростлади, гўё кутилмаган фикр

вужудида умид уйғотганди. Афтидан, яна бир қарорға келганди у.

— Ҳа,— деди у ўзига,— ўшаёққа дарахтзорга бораман. Биз ҳали сенинг ўша мақталган эпчиллигу чапдастлигингни текшириб кўрамиз, қонхўр Мануэль! Кўрамиз, кўрамиз ҳали!.. Эҳтимол хизматингга яраша насибангни оларсан, лекин бу сенинг кўнглинг тусаётган мукофот эмас-да, фақат! Менинг каллахомим осонликча тушмайди кўлингга!

Карлос ушбу сўзлар билан оти бошини бурди-да, Бизонни яхшироқ жойлаштириб, водий сари от солди.

У шитоб-ла, илгарилаб бораркан, бирон марта орқасига қайрилиб қарамади. Чамаси у, гарчи етиб олишадидеб сира хавотирланишининг ҳожати бўлмаса-да, шошилаётган эди. Бор кучи ила елиб бораётганида унинг отига ҳеч ким қувиб ета олмасди.

Карлос жим; гоҳо-гоҳогина итини эркалатиб қўйяпти у; итнинг қони Карлоснинг оёқлари, қорабайирнинг биқинларидан оқиб тушяпти. Бечора Бизон бутунлай мадордан кетиб, бирон одим юролмайдиган ҳолга келди.

— Бир оз чида, дўстим, пича сабр қил яна! Ҳадемай бундай лўкиллашдан дам оласан.

Бир соатлардан сўнг Карлос Пекос бўйидаги овлоқ, яқиндагина Антонио билан учрашишган ўша ўрмончага етиб келди. Шу ерда отини тўхтатди. У туннинг қолган қисми ва агарда халал беришмаса, эртаси кунни бутунлай ўрмончада ўтказишга аҳд қилган эди.

Бу ерда Пекос унчалик баланд бўлмаган, бироқ тик қирғоқлар орасидан оқади, айтмоқчи, қирғоқлар юқори ҳамда қуйиға қараб бир неча миль масофагача худди шу хилда чўзилиб кетган. Ҳар иккала томонда ҳам кафтдек текислик талай милларга чўзилиб кетган. Бу ернинг ўсимликлари жуда оз. Бир-бировидан олис-олисда тўп-тўп дарахтзор оролчалар сочилиб ётади, қирғоқлар ёқалаб эса энсизгина мажнутол ҳошия янглиғ чўзилиб кетган. Мажнутол ҳошия гоҳ у, гоҳ бу ерда узилиб, дарахтлар оралиғидан сув сатҳи кўзга ташланиб туради. Шапалоқдек-шапалоқдек дарахтзорчаларда терак ва якасзорлар аралаш виргиния эманлари ўсади, баъзида ёнгинада кактуслар ҳам кўзга чалиниб қолади.

Бу ўрмончалар шунчалик кичик ва бир-бировидан шунчалик олиски, водийни кузатишга асти халал бермайди, улардан хоҳлаганига яшириниб олган одам суво-

ёхуд бўлак бирор йирикроқ нарсани узоқданоқ кўриб туради. Ганим кундузи ёруғда унга сездирмасдан қинлаша олмайди — шубҳасизки, у ухламаётган ва ҳушёр бўлса, албатта. Кечаси — бошқа гап; у чоғда хавфлик тун қанчалик қоронғи бўлишига боғлиқ.

Карлос кириб келган яшил ўрмонча бошқа дарахзор-бирдан анча-мунча йироқда эди. Бу ердан дарёнинг ҳар қайси томонидаги текис сойликнинг бир милдан нари-ёригача кўриниб турарди. Ўрмонча бор-йўғи бир неча ярликнигина эгаллаган эди-ю, лекин дарёни ҳошниялаган мажнунтоллар шарофати ила кўзга каттароққа ўхшаб кўринарди. У шундоққина соҳилга тақалган ва мажнунтолларнинг шаббалари унга туташиб кетган эди. Мажнунтоллар сув қирғоғидан атиги бир неча фут берироқда, эди, холос, ўрмонча эса текисликка бир неча юз ярд ёриб кирган эди.

Мазкур ўрмончанинг битта ўзига хос жойи бор эди. Қоқ ўртада гўёки дарахтлар орқага тисарилиб, очилиб қолган ерни бир текисда барра ўт қоплаганди. Бу очиқ майдонча деярли думалоқ бўлиб, кўндалангига юз ярд-и келарди. Майдончанинг бир тарафига дарё соҳили тегиб ўтарди. Ана шу ерда дарахтлар оралиғида очиқ йўлак бўлиб, майдончадан нариги соҳилдан ястанган ўтлоқ кўзга ташланиб турарди. Қарама-қарши ёқда эса ўрмончага туташиб кетган сойликка қараб, бамисоли жажжи хийбонча янглиғ, яна битта йўлак дарахтлар оралаб борарди; шундай қилиб, узун очиқ йўлак ўрмончани деярли теппа-тенг икки қисмга кесиб ўтганди десак бўлади. Лекин дарёнинг икки томонида ястанган сойликдан бу йўлакни мабодо унга тўғри рўпара келиб қолган тақдир-дагина кўриш мумкин эди.

Тахминан ўн-ўн икки ярдча жойни эгаллаган майдонча, дарахтлар оралиғидаги очиқ ер, кейин, сойликнинг ўзи ҳам мутлақо текис ҳамда силлиқ эди; у ерларда дастак ўт-ўлангина ўсар, ҳар қандай қимирлаган жондор отини олисданоқ илғаса бўларди.

Ўрмончада майда бутаю навниҳоллар, аксарияти дастак акаслар, қалин эди. Печак ҳамда чирмовуқларнинг қалин тўрлари бошқа дарахтлардан хийла юксалиб турган азим эманларнинг шох-бутоқларига чирмашиб кетганди. Гарчи илвасинни таъқиб этиб келган овчи ча-

¹ Акр — Англия ва Шимолий Америкада 0,4047 гектарга тенг.

калакзорни оралаб ўта олгани тақдирда ҳам, ушбу буталар остию орасини кўролмасди. Кечаси бўлса-ю, ҳаётто ойдинда ҳам, бу жойлар қоронғи ҳамда ўтиб бўлмади кўринарди.

Майдончанинг бир томонидаги қуп-қуруқ қумли тупроқда кактуслар ўсганди. Улар ўн тупдан ортми эмасди-ю, юмшоқ ва этдор бутоқлари юқорига қараб тарвақайлаб кетган икки-учта энг йириги нақ виргиния эманидай балад кўринарди. Атрофини қуршаб турган дов-дарахтларга мутлақо ўхшамаган кактуслардан тизилган залварлию йўғон устунлар сираси мазкур осуда масканга ғаройиб кўрк бахш этарди. Кўникмаган оддам кўзига оддий бута ва дарахтларга мутлақо ўхшамайдиган ушбу ҳайбатли шамдону чилчироқлар жумбоқ бўлиб кўриниши мумкин эди, боз устига десангиз, буларни табиатнинг қайси салтанатига оидлигини билолмай боши қотиши тайин эди. Қонун таъқибидаги қочоқ ана шу ерда, ана шу ошёндан ўзига тунагулик маскан топмоқ умидида эди.

LVIII БОБ

Ит ҳаётимни асраб қолди деганида янглишмаганди Карлос — ақалли у эгасининг озодлигини сақлаб қолган эди, бу эса, охир-оқибатда ушанинг ўзгинаси. Агарда ақлли ит олдинга югургилаб кетмаганида Карлос ғорга кирган ва уни, турган гапки, шаппа ушлаб олган бўлишарди-да, ахир.

Муғамбир ғанимлари уни қўлга туширишнинг жамики чораларини кўриб қўйгандирлар. Отларни ғорнинг ичкарасига яширишганди. Ўзлари бўлса ғор оғзидаги қоянинг туртиб чиққан ери орқасига жойлашиб олган ва нақ икки йўлбарсдай, кўринди дегунича Карлосга ташланишга тайёр турган эдилар.

Уларга итлари ёрдам берган бўларди, ерга қапишиб ётиб олган итлар эгалари билан бирга ҳеч нимадан хабари йўқ қурбонларига ташланишга шай бўлиб ётарди.

Пистирма пухта ўйлаб, обдан пишитилган, ҳозирча ҳаммаси чакки кетмаётган эди. Овчилар Сан-Ильдефонсодан яширинча йўлга чиқдилар, шу боисдан уларни биров кўриши мумкин эмасди; дарага айланма йўлда етиб келдилар, Карлоснинг жўнаб кетишини ибрат олар

ва даражада сабр-тоқат-ла кутиб, ана шундан кейинги-
га ғорга кирдилар. Бу ишларнинг бари маҳорат-ла адо
етилди.

Уларнинг ғорда биқиниб ётганларини Қарлос билиши
ёки гумон қилиши мумкинмиди? Ўзларининг овдан қайт-
ганларидан унинг хабар топганини хоб-хотирларига ҳам
келтиришмаганди ошналар. Улар водий орқали миссия-
га зимистон кечада ўтиб бордилар, келтирилган ўлжа-
тасвасинларини уловдан туширдилар, буни ҳеч зог кўр-
мади, шундан кейин шаҳарда қайтиб қоралариниям
кўрсатмадилар. Хоакин тақсирлари токи ўзлари хабар
қилмагунларича кутишни буюрдилар уларга. Уларнинг
қайтганини миссиядаги бир нечта хизматкоригина би-
лди, биров бу ҳақда Қарлосга етказадиган ҳеч бир
кимсага ҳеч нима маълум эмасди. Башарти шундоқ
ёкан, мулоҳаза юритишар эди улар, қаёқдан ҳам бизни
ғорга кириб олишган деган шубҳага борсин у? Дарадан
юқорилаб келаётиб ўзлари қолдирган изларни эса у қай-
таётганида кўрмайди. У йўлда майда шағал билан қоп-
ланган жойидагина изни пайқашни мумкин, холос, лекин
аслида бу йўлда кундузи ҳам биров нарсени кўриб, пай-
қаш мушкул.

Бундан кўра яхшироқ тузоқ қўйиб бўладими? Кар-
лос ҳеч нимадан хавфсирамай, ғорга киради, эҳтимол
отини етаклаб кириб келар. Шунда икковлари, улар
билан бирга эса итлариям бараварига унга ташлана-
дилар-у, то у тўппончаси ёки пичоғини олиб улгургуни-
ча оёқ-қўлини боғлаб ташлайдилар. Шундай, унинг тақ-
дири ҳал бўлган.

Аммо унинг тақдири ҳал бўлмаганди ҳали. Мануэль
жуда яхши биларди буни, ана шу боисдан такрор-такрор
гўлдирарди:

— Ланъати ит! Дардисар бўладиган бўлди-да бизга,
Пепе...

Пепе бўлса жаҳл билан сўкинарди: ит ҳақидаги ўй
уни ҳам ташвишга солиб қўйган эди. Бизоннинг таъри-
фи аллақачонлар етиб келган эди уларга, бироқ улар
бу ақлли итнинг қандайин ажойиб таълим олиб, қандай
синовлардан ўтганидан беҳабар эдилар.

Ошналар борди-ю ғорга ит биринчи бўлиб кирса, у
ўзларини фош этиб, эгасини огоҳлантириши аниқ эка-
нини тушунардилар. Агарда Қарлос ўша дақиқада
яқинлашиб улгурмаган бўлса, пистирма муваффақият-

сиз чиқиши турган гап. Мабодо ит орқада қолса, унда ҳаммаси хамирдан қил суғургандек силлиқина битади. Ҳаттоки у эгаси билан барабар чопиб кириб келганида ҳам, хўжайинини олдиндан огоҳлантиролмайдиган гап бу; унда ошналар отилиб чиқиб, оти ёки суворини отиб яралашга улгурадилар.

Иккала бадкирдор разил Карлосни кутиб ана шундай мулоҳаза юритарди.

Улар ҳали ғорга кираверишга астойдил жойлашиб олишмаган эди. Хавфни сезганлари заҳоти мўлжалланган жойларини эгаллашга улгурадилар. Ҳозирча эса қон панасида пастга, дарага тикилиб туришибди. Эҳтимол узоқ кутишларига тўғри келар, шунинг учун ҳам тамадди қилиб олишди — Карлоснинг ғордаги озроққина озуқа заҳирасини пок-покиза қилиб еб битиришди. Мулат соқотмаслик учун ҳозиргина ўзлаштирилган адёлни елкасига ташлаб олди. Ўзлари олиб келган мусаллас солинган қовоқ идиш кутиб зерикиб қолмасликларига ёрдам берди. Сарғимтил овчи билан қора танли ошнасининг хурсандчилигини гоҳо-гоҳо эсларига тушиб турган Бизон ҳақдаги ўйгина хиралаштириб қўярди, холос.

Улар қурбонларини ўзлари ўйлаганчалик кўп кутишмади.

Назарларида Карлос негадир олисга, нақ Сан-Ильдефонсога қадар кетгандек, уёқда эса қандайдир ишлар билан тутилиб қолиб, тонготарда қайтадигандек туюлаётган эди.

Аммо вақт ярим кечага етишидан анчагина бурунроқ, улар ҳозир айтганимиздек тахминлари чўтлаб ўлтириларида дарадан кўз узмаётган Мануэль тўсатдан ирғиб туриб, ошнасининг енгидан тортқилаб қолди:

— Қара, Пепе, ҳув ана! Ана, у, малласоч!

Шундай деб мулат текислик томондан даранинг торгина оғзи сари яқинлаб келаётган қорани кўрсатди. Нимқоронғиликда кўзга аранг чалинарди-ю, лекин отда келаётган одамнинг шакли-тарҳини илғаса бўларди ҳар қалай.

— Э жин урсин уни! Худди ўзи... Ж-жин ургур! — дея жавоб қилди Пепе қоронғиликка тикилиб:

— Беркин, ўғлон! Итларни ушла... Орқага! Яширин! Мен ташқарида пойлаб тураман... Секин!

Улар ким қаерда туришини олдиндан келишиб қўйган эдилар, шу боисдан Пепе дарҳол ўз маррасини эгал-

лади. Мануэль исковучни гарданидан маҳкам ушлаганча гор кираверишида, сиртда қолди, бироқ бир дақиқа утмаёқ қаддини хиёл кутарди, безовталанаётгани очик-ойдин кўриниб турарди.

— Во иблис!— гўлдиради у.— Хаҳ иблис-а!.. Айтмаб-мидим — ҳаммаси чиппакка чиқди... Бардам, бўл, Пепел! Ит изимизни пайқади!

— Жин урсин-э! Энди нима қилдик?

— Форга!.. Тезроқ!.. Уша ерда гумдон қиламиз уни.

Икковлари гор ичкарисига отилдилар-у, қимир этмай кута бошладилар. Наридан-бери янги режа туздилар: Карлоснинг итини олдиларига югуриб келиши билан шаппа ушлаб оладилар-да, бўғиб ўлдиришга ҳаракат қилдилар.

Аммо-лекин бунга эришолмади улар. Бизон гор оғзи-га яқинлаб келди, тўхтаб, баралла вовиллашга тушди.

Жазаваси тутган Мануэль алам устида пўписа қилиб исковучни қўйиб юбора солиб, қўлида пичоқ билан Бизонга ташланди. Уша ондаёқ исковуч ҳам олға сакради-ю, итлар жон ҳалписида олиша кетди. Олишув исковуч учун хунук тугаши мумкин эди, лекин кейинги лаҳзада тўрттовлашиб—Мануэль, Пепе, исковуч ва бўрибосар — пичоғу-тишларини ишга солганча Бизон устига ёпирилган эдилар. Унга бир нечта оғир жароҳат етказишди, шўрлик ит бир йўла тўрт рақибга бас кела олмаслигини пайқаб, оқилона иш тутиб қоялар орасига қочиб қолди.

Уни қувлаб ўлтиришмади: муттаҳамлар ҳануз, Карлос ҳеч нимани пайқамай, форга яқинлаб келади, деган умидда эдилар. Бироқ, уларнинг умидлари тезда тумандек тарқаб кетди. Ғира-шира қоронғида суворининг оти бошини буриб, дарадан ташқарига қараб йўрттириб қолганини кўришди.

Бир неча дақиқа давомида горнинг гумбазсимон шифти остида аламзадалиқ, шаккогона ҳайқириқ-нидолар, ношоён ҳақоратлар жаранглаб турди.

Ярамас муттаҳамлар ахийри пича совушди; тимирскиланиб отлари ёнига етиб бориб, уларни гордан олиб чиқишди. Шу ерда тўхтаб, тагин бўғилиб сўкишга тушишди; кейин буёғига қандай ҳаракат қилиш устида бош қотира бошлашди.

Ҳаялламай Карлос ортидан қувишдан маъни чиқмас-

ди; улар то текисликка чиққунларича овчи, тайин гапки, анча миль нарига бориб қолади.

Овчилар яна талай пайтгача Бизонни сўкиб, ҳақорату ланъатларга кўмиб ташлашди. Ниҳоят, бундан чарчаб, энди буёғига нима қилиш хусусида ўйлай бошлашди.

Пепе кечаси йўл босишни фойдаси йўқ деб ҳисобларди: то тонг отгунича барибир Қарлосга етиб олишолмайди; кун ёришгандан кейин эса унинг изини топиш осон бўлади.

— Аҳмоқсан-да, Пепе!— дея жавоб қайтарди Мануэль бу мулоҳазага.— Кун ёришганда — у бизни кўриб туради... Унақада ҳамма ишни расвосини чиқарамиз. Эҳ сени қара-ю, хомкалла!

— Унда нима қиламиз?

— Оббо! Исковуч-чи, уни нима кераги бор бизга унда? У кечасиям изини топаверади. Узоққа кетиб бўпти ўша малласоч.

— Қачон тўхтайтиди у, ахир? Уни милдан берида тўхтамас! Демак, тунда қувиб етолмаймиз унга.

— Янаям тентаксан, Пепе, Уни миль дейсанми? Йўқ, берироқда! Исковуч борлигини билмайди-ку, у, изимни топиб олишади деб ўйламайди ҳам бизни. Яқинроқда тўхташи аниқ. Лекинига ити ғирт иблиснинг ўзгинаси экан-да! Ити бўлмаганда-ку...

— Бе, энди халал беролмайди бизга.

— Нимага энди?

— Нимага? Шунинг учунки, мен уни пичоқ билан чавақладим. Гапимга ишонавер, умрини яшаб бўлди у.

— Хаҳ иблис-а! Қани энди шундоқ бўлса... Кошкийди-я... Бунинг учун икки тиллониям аямасдим-а. Уша ит бўлмаганида малласоч аллақачон қўлимизга тушарди-я. Ҳозир ҳам ити бўлмаганида уни тонготгунча ушлаб олардик. Ҳадемай тўхтайтиди у. Биздан беҳабар, у, исковучни ҳам билмайди... Тўхтайтиди, мана кўрарсан. Худо ҳақи, аниқ гап бу!

— Қанақасига, Мануэль? Уни узоққа бормайди деб ўйлайсанми?

— Улақолсаям кетмайди! Ҳеч қаёққа кетмайди у!.. Ҳадемай изига тушамиз. Ухлагунича кутиб турамиз-да, кейин писибгина ёнига борамиз... Лекин анави ит... Ҳеч қиси йўқ, билдирмай туриб босамиз.

— Итни ўйламай қўя қол, бизга тўсқинлик қилолмайди энди. Пичоқ билан шундоқ чавақладимки — худо

умр берса йигирма дақиқага боради, нарига ўтиб бўпти! Малласочни топганимизда у бир ўзи, бейт бўлади, гапимга ишонавер.

— Қанийди энди... Хўш дегандан, бир уриниб кўрамиз тагин, ўғлон. Қани кетдик!

Мануэль жилов тизгинини силкиб қўйиб, қоядан дара тубига туша бошлади. Пепе билан итлар унга эргашинди.

Л I X Б О Б

Суворини охирги марта кўрган жойларига етиб келгач Мануэль отдан тушиб, исковучни чақириб олди. У итга бир неча сўз айтиб, ишора билан изни искашни буюрди. Исковуч ўзидан нимани талаб қилаётганларини тушунди, тумшугини ерга эгганича шарпа чиқармай олдинга чопиб кетди. Мануэль яна ўзини эгарга олди-ю, иккала овчи отларини ниқтаб, итдан орқада қолиб кетмаслик учун йўрттира кетишди.

Ой яширинганига қарамай итни кўриб боришарди улар. Исковучнинг оч-малла жуни қоронғилик қўйнидаги яшил ўт-ўланлар узра ажралиб турар, устига-устак бу ерда ит кўринмай қоладиган на бута, на баланд гиёҳлар бор эди. Боз устига, излар янги ва хийла тезроқ югурса ҳам бўлишига қарамай, ит эгаси буюрганидек издан ошиқмай борарди. Исковуч тунда издан секин боришга ва шарпа чиқармасликка ўргатилганди, шунинг учун ҳам мазкур зотга хос бўлган босинқи, калта-калта ҳуриш эшитилмаётган эди.

Олдинда Карлос беркинган ўрмонча кўзга ташлангунича икки соатдан кам вақт ўтмади. Дарахтзорга кўзи тушар-тушмас Мануэль ғўлдираб қўйди:

— Ана қара, ўғлон! Ит ўрмонга бошлаб боряпти, қара! Бир тилло тикиб айтаманки, малласоч ўша ерда, ланъати! Муқаррар ўша ерда!

Ўрмончага беш-олти юз ярд яқинлаб боргач — у знимистон тунда ҳали-ҳануз ширавагина кўринаётган эди, сарғимтил овчи исковучни чақириб олиб, орқада юришини буюрди. Карлоснинг ё ўрмончанинг ўзида, ё шу яқин-итрофда эканига ишончи комил эди унинг. Қандоқ бўлган тақдирда ҳам унинг изини янгитдан топиб оlish ҳеч гап эмасди. Башарти қурбонлари ўрмончада бўлса —

итнинг ҳаяжонланаётганига қараганда эса, ҳақиқатан шундай эди — унга исковучнинг маҳоратига ортиқ ҳожат қолмади. Бўлак чора-тадбир қўллаш фурсати етди.

Мануэль тўғри йўлдан бурилиб, ўрмонча чеккасида бир хил масофада бўлишга тиришган ҳолда, айланиб ута бошлади. Овчилар ҳайрат ичра тўхтадилар. Улар майсазор кўриниб турадиган жойга етиб келган эдилар. Майсазор ўртасида каттакон гулхан гуриллаб ёняпти десангиз!

— Айтмабмидим сенга! — деди Мануэль ҳаяжон-ла. — Ҳув ана, ухляпти аҳмоқ! Кечаси изидан топиб олишларини хаёлига ҳам келтирмаган... Совуққа товлари йўқроқ экан чоғи — қандоқ гулхан қалаганини қара! Фалокатни хоби-хотиригаям келтирмаяпти-да... Бу майдончани биламан — жуда антиқа жой, фақат икки томонидангина кўринади гулхан. А-ҳа, ана оти!

Гулхан шуъласидан салгина нарироқдаги қорабайир яққол кўриниб турарди.

— Жин чалгур! — сўзини давом эттирди овчи. — Малласочни шунчалик каллаварам деб ўйламаган эдим. Қара! Анави ухлаб ётган ўша-ку, ахир! Шубҳасиз ўша!

Мануэль кўрсатаётган тарафда, гулхан олдида алланима қорайиб кўринарди. Афтидан, кимдир узала тушиб ухлаб ётганга ўхшайди.

— Ё биби Марям, худди ўзгинаси-ку! — тасдиқлади Пепе. — Шундоқ гулханнинг ёнгинасига чўзилиб олибди. Вой хомкалла-е! Кундай равшан, бизни шундай зимистонда топиб келолмайди деб ўйлаган.

— Секироғ-э! Ит кўринмайди, малласочни қўлимизда деявер! Валақлашни бас қил, Пепе! Қани, орқамдан!

Мануэль тўғри ўрмончага йўлни солмай, хиёл қуйроққа, дарё қирғоғига қараб юрди. Овчилар шу тахлит, бирон оғиз ҳам сўзлашмай, отларини йўрттира кетдилар.

Уларнинг қурбони бу пайтда бундан яхшироғини хаёлга келтириб бўлмайдиган қулай жойда ётибди, шу сабабдан улар ушбу қулай вазиятдан фойдаланишга шошилаётибдилар. Бу дарахтзорни икковлари ҳам яхши билишади, зотан неча-неча мароталаб унда бекиниб туриб буғу отишган.

Овчилар қирғоққа етиб бориб, отдан тушишди-да, отлари билан итларини толга боғлаб, ўрмончага қараб юришди.

Ҳозир улар илгаригичалик эҳтиёткорлик қилмаётган

дилар. Қурбонлари гулхан ёнида чалқайганча ухлаб ётганига заррача шубҳаланмасдилар. «Хомкалла!»— деб ўйлаётганди улар. Аммо у ошналарнинг бу ерга етиб келишларини қаёқдан ҳам билсин? Энг зийрак, энг фаросатли одам ҳам ўзини бу ерда бежавотир ҳисоблаши тайин эди. Ётиб ухлаётганининг ҳеч қандай ҳайрон қоладиган жойи йўқ — шубҳасизки, у қаттиқ чарчаган. Гулхан ёққаниниям таажжубли ери йўқ, кечаси тузуккина салқин тушди, бунақанги ҳавода ўт ёқмай ухлолмайсан. Бари мутлақо табиийдек туюларди.

Улар ўрмонча чеккасига етиб келдилар-у, ўйлаб-нетиб ўлтирмай, буталар орасига ўрмалаб кириб кетдилар.

Шабада барглари билинар-билинимас тебратаётган осуда тун эди — буталар орасидаги шитир этган товушнинг майдончанинг исталган чеккасида туриб эшитиш мумкин эди. Сувнинг узоқдаги тезоб жойда оҳистагина шилдираётгани, милдир-милдир мавжланиб, қирғоқ ёқалаб астагина шалоплаши, гоҳо дашт бўрисининг улишию тун қушининг мунгли нидоси — қулоққа чалинаётган товушларнинг бари шундангина иборат эди.

Шунга қарамай, гарчи икки ошна қуюқ буталарни оралаб бораётган бўлсалар ҳамки, бирон шарпа уларнинг яқинлашаётганларини фош этмасди. Бирор-бир янроқ шитир этмади, бирон навда эгилиб ҳилп этгани йўқ, қўл ёхуд тизза остида биронта қуруқ чўп чирс этмади — хуллас ҳеч нарса қоронғи бутазорда инсон зоти борлигидан далолат бериб, сирни фош этмасди. Бутаю чакалақлар оралаб қандай ўтиб боришни биларди бу одамлар. Улар майсазорда ўрмалаётган илон мисоли шарпасиз яқинлашиб борардилар.

Майдончага чуқур сукунат чўмганди. Унинг қоқ ўртасида ёрқин шуъласи ила атрофни ёритганча ловуллаб гулхан ёнарди. Нарироқда ажойиб тулпор, бизон овчисининг антиқа қорабайири турибди; гулхан ёғдусида уни таниш қийин эмасди. Гулханга яна ҳам яқинроқда узола тушиб ётган овчининг танаси кўриниб турибди, афтидан, ухлаётган бўлиши керак. Худди шундоқ-да — анави унинг сафар тўрваси, сомбреро, этик ва шпорлари. Отининг бўйнида лассо осилиб турибди, унинг учини эса ухлаётган эгаси қўлига ўраб олган бўлиши керак, албатта. Буларнинг барини бир қарашдаёқ пайқаш мумкин эди.

От сесканиб тушди, туёғи билан ерни гурсиллатиб қўйди-ю, бироқ яна осойишта тураверди.

Нимани пайқади экан у. Бирорта йиртқич ҳайвон писиб келмаётганмикин?

Йуқ, бу йиртқич ҳайвон эмас; пайдо бўлган жондор йиртқичдан ҳам хавфлироқ.

Майдончанинг жанубий этаги ёқалаб ўсган буталар орасидан бир нусха мўралади — бу одамнинг бети эди. У бирров мўралади-ю, ўша заҳотиёқ барглар орасида ғойиб бўлди. уни таниш мушкул эмасди. Бу турқни ловуллаб ёнаётган гулхан шуъласида кўрган одам унинг сарғимтил тусда эканини пайқаб, ўша ондаёқ кимнинг башараси эканини англаб етарди. Бу мулат Мануэлнинг юзи эди.

Бу башара барглар орасида кўп яшириниб қолмади, кейин яна пайдо бўлди, унинг қаватида яна битта, хийла қорачароқ афт кўринди. Ҳар иккаласи ҳам бир томонга қараяпти. Икки жуфт кўз гулхан ёнида чўзилган гавдага қадалган: у одам ҳанузгача тинчгина ухляпти чоғи. Уларнинг кўзлари ёвузонаю тантанавор чақнарди. Мана энди зафар қозонишлари аниқ! Қурбон ниҳоят уларнинг қулида!

Шундан сўнг башаралар яна ғойиб бўлди. Бирор дақиқа кўринмади, буталар орасидан одам борлигини билдиргувчи тиқ этган садо эшитилмади. Бироқ, мана, тағин мулатнинг боши кўринди, фақат бўлак жойда, пастроқда, буталар сийракроқ ерда.

Яна бир сониядан сўнг чакалак орасидан танаси кўринди, у аста майдончага ўрмалаб чиқа бошлади. Кейин иккинчи овчи ҳам ўрмалаб чиқди. Мана, икковлари сездирмайгина майсадан ухлаб ётган одамга қараб ўрмалаб келишяпти. Қорнини ерга берганча икковлон бамисоли иккита каттакон эчкиэмардек, бири изидан иккинчиси судралиб келяпти.

Олдинда Мануэль. Унг қулида узун пичоқни чангаллаб олган, чап қулида милтиқ.

Улар ниҳоятда эҳтиёткорлик билан, аста-секин илгарилаб келишяпти-ю, лекин мабодо қурбонлари уйғониб кетиб, пайқаб қоладиган бўлса, ўша лаҳзадаёқ олға ташланишга тайёр эдилар.

Уйқудаги овчи улар билан алангаланаётган гулхан ўртасида қимир этмай ётибди ҳамон. Майсада гавданинг узун сояси липиллаб турибди. Бежавотирроқ бўлсин учун

овчилар ўша кўланкагача ўрмалаб келиб, ўшани пана-
сида жилаверишди олдинга.

Мана Мануэль узала тушиб ётган гавдадан уч футча
берида; у олдинга ташланишга ҳозирланиб писибгина
тиззалади. Юзига ёрқин шуъла тушди, «манаман» деб
кўринди-қолди у. Унинг вақти-соати етган эди.

Нақ қамчи қарсиллагандек ўқ овози янгради, очиқ
майдонча четидаги эманнинг тарвақайлаган шох-бу-
тоқлардан ҳосил бўлган ҳашамдор «қалпоғини» ёрқин
чақин тешиб ўтди. Мануэль дафъатан сакраб турди-ю,
вахшиёна қичқирганича қўлларини олдинга чўзиб, ка-
ловлаб бир-икки қадам босди-да, пичоғи билан милтиғи
қўлидан тушиб, ўзи тўғри гулханга қулади.

Пепе ҳам сакраб турди. У ўзини ухлаётганга солган
одам отганига ишонарди. Чўзилиб ётган гавдага шитоб-
ла ташланди ва жаҳду жадалла унинг биқинига пичоқ
санчди.

Ўша ондаёқ у даҳшатли ўкирганича орқага отди ўзи-
ни. Қулаган ошнасига ёрдам бераман деб ҳаяллаб қол-
маёқ, тўғри майдонча бўйлаб югурганича буталар ора-
сига уриб кетди, гулхан ёнида ётган гавда эса ҳануз қи-
мир этмасди.

Аммо ўқ овози эшитилган эманнинг шох-бутоқлари
орасидан тушиб келаётган одамнинг қораси кўзга ча-
линди; майсазор узра чўзиқ ва қаттиқ хуштак янгради-ю,
от бўйнидаги лассонинг учи ерда судралган кўйи дарахт
томон отилди.

Узун милли милтиқни ушлаб олган ярим-яланғоч
одам дарахтдан тўппа-тўғри отнинг белига сакраб туш-
ди. Бир сониядан сўнг одам ҳам, от ҳам дарахтлар ора-
сидаги очиқ жойдан ғойиб бўлди-қўйди. Чавандоз водий
бўйлаб шамолдек елиб борарди.

Л Х БО Б

Гулхан ёнида ётган ҳар қалай ким эди, ахир? Бу
бизон овчиси Карлос эмасди. Лекин бу ўшанинг кийим-
лари — унинг ридоси ва шляпаси, унинг шпорли этиги
ёди-ку!

Шундай бўлса-да, гулхан ёнида ётган Карлоснинг ўзи
эмасди. Йўқ, ярим-яланғоч, дарахтдан сакраб тушиб,

қорабайирни учириб кетган худди уша-ку! Тоza жумбоқ бўлди-ку буёғи!

Биз у билан ўрмонча чеккасига етиб келганида, икки соатча бурун ажрашган эдик. Ана шу вақт ичида нималар билан машғул бўлди экан у? Ҳамма жумбоқ айнаи мана шунда-да.

Ўрмончага етиб келгач, Карлос ичкарига, майдончагача кириб борди; уша ерда отини тўхтатиб, ундаи тушди. Бизонга ачиниб жавдиради, уни барра майсага авайлабгина қўйди-ю, лекин яралари боғланмай қолаверди. Шу тобда эгасининг вақти йўқ эди бунга: булак ишлар кутаётганди уни.

Карлос жиловни бўшатиб, отни ўтлагани қолдирди, ўзи эса токи шу ерга келгунича йўлакай хаёлан пишитган ўй-режасини амалга оширишга киришди.

Аввало гулхан қалаши керак эди — бунақанги совуқ кечада буткул ўринли эди бу. Майда буталар орасидан қоқ-қуруқ шох-шабба топилди; Карлос уларни ташиб келтириб, майдончанинг ўртасига уйди, шундай қилиб, мана, гулхан ҳам теvarак-атрофни ёритиб гуриллаб ёна бошлади. Ўтнинг қирмизи ёлқинида ҳайбатли кактуслар тошдан йўнилган устунлар тизмасига ўхшаб кетарди; Карлоснинг нигоҳи энди ўшаларга қадалган эди.

У кактусларга яқинлашиб, пичоқ билан энг йўғонини кеса бошлади; ҳадемай бу паҳлавон гурсиллаб қулади. Шундан кейин Карлос танаси ва йириқ шохларини ҳар хил узунликда қирқиб, уларни гулхан ёнига ташиди. Наҳотки уларни ёқмоқчи бўлса у? Ахир жиққа ҳўл ўтин оловни алангалатиш ўрнига, писиллатиб пасайтириб қўяди-ку!

Бироқ Карлос мутлақо бундай ниятда эмасди. Аксинча, бу ғўлаларни майса устига, гулхандан бир неча фут берироққа усталик билан, пухта ўйлаб териб қўйдики, оқибатда ҳажми-шакли худди одам гавдасига ўхшаган бир нима ҳосил бўлди. Иккита ғўла сон вазифасини, иккита бошқаси қўл—худди ухлаётган одамнинг икки ёққа ташланган қўллари вазифасини адо этарди; елка-кифтлари ўрнини эса «яшил шамдон»нинг букикроқ бутоғи эгаллади. Карлос кенг-қовул ридосини ана шу гавда устига ёпганида у тонг қоларли бир тарзда дам олаётган ёки ёнбошлаб ухлаб ётган одамга ўхшаб кетди.

Аммо ушбу асар — зотан бу, албатта, санъат асари эди — ҳали ниҳоясига етмаганди: боши билан оёғининг

тиззасидан пастки қисми етишмасди. Илло ҳадемай улар ҳам бунёдга келди. Карлос ўтти коптокка ўхшатиб думалоқлаб, елканинг тепасига қўйди; шарфи билан шляпаси ёрдамида бу копток ўз хизматини ўташи лозим бўлган нарса — одам калласига ўхшади-қолди. Бостириб қўйилган шляпа уни деярли кўмиб кетаёзганди; ухлаётган кимса у билан юзиши намдан ёки чивиндан асрайдиган қилиб бекитиб олибди-да, деб ўйлаш мумкин эди.

Энди оёғини тугаллаш қолганди холос, лекин бунга пича овора бўлишга тўғри келди. Негаки овчилар одатда оёқларини оловга қараб узатиб ухлайдилар — демак, оёқлар шундоққина кўзга ташланиб туриши ва ҳеч ким ясама деган шубҳага бормаслиги лозим.

Бу икир-чикирларнинг барини Карлос илгарироқ ўйлаб пишитиб қўйган эди, шунинг учун ҳам бирор дақиқани беҳуда кеткизмай, ишни давом эттираверди. У оёғидаги хиром этигини ечиб, уни кактус ғўласидан бунёдга келган сонга қиялатиб тақаб қўйган эди, этиги соғининг учи озроққина кенг-ковул ридонинг этаги остига кирди. Қўполдан-қўпол шпорларини этигида тақиғлиги-ча қолдирди — шпорлари гулханнынг ёрқин ёлқинида йилтиллар ва узоқдан кўриниб турарди.

Озроққина ишлов берилди-ю, тулум таппа-тайёр бўлди.

Уни ясаган кимса майдончанинг энг чеккасига бориб, айланасига ҳаракатланган кўйи тулумни ҳар томондан кўздан кечирди. У мамнун бўлди. Ҳақиқатан ҳам йўл юриб чарчаган, ҳатто шпорини ҳам ечмай ухлаётган йўловчи эканига ҳеч ким иккиланмаган бўлурди.

Карлос гулхан ёнига қайтиб, астагина ҳуштак чалиб отини ёнига чорлади. Йигит уни оловга яқинроқ ерга етаклаб бориб, жилов тизгинини эгари қошига боғлади. Яхши ўргатилган от ўша замоноқ ўт чимдишдан тийилди: у токи эгасининг қўли ёки ўзи кўниккан таниш ишора бу ҳолатдан халос этгунига қадар жойида тинчгина туриши керак эканини биларди. Кейин Карлос жилов ҳалқасига боғланган лассони ечди. Арқоннинг ечилган учини гулхан ёнида ётган гавда томонга тортиб, гўё ухлаётган кимса уни қўлида ушлаб ётганга ўхшасин деб ридоси остига тиқиб қўйди.

Бизон овчисини ўртадаги гавдани кўздан кечирганча майдончанинг бутун раҳини айланиб чиқди, чамаси, у яна мамнун кўринди. Сўнгра у буталар орасидан бир қу-

чоқ қуруқ шох-шабба олиб чиқиб, гулханга ташлади.

Мана у, худди майдонча теграсида ўсган дов-дарахтларни ўрганаётгандек, тепага қараяпти. Нигоҳи азим туп эманда ушланиб қолди. Эман нақ майдонча қирғоғида кукка буй чўзган, унинг ёнламасига тарвақайлаб кетган узун шохлари майдонча узра узатилгандек эди. Чирмовуқлар чирмашиб, шокила-шокила йўсинлар билан қопланган мазкур абадий яшил, ҳайбатли дарахт бамисоли улкан соя-салқин чодирга ўхшаб кетар, атрофидаги ҳамсоялари орасида энг баланду энг тарвақайлаб ўсгани эди. Бу дарҳақиқат ўрмончанинг сардорию ҳукмдори эди.

— Худди акангга кераги-да,— дея ғудранди Карлос унга тикилар экан.— Ораси ўтгиз қадамча келади — жуда боп масофа. Дарахтлар оралиғидаги йўлакдан келишмайди улар, албатта, буёғидан хавотирланмасаям бўлади. Борди-ю, ўша ёқдан келганларидаям... Э йўқ, улар қирғоқ томондан, толлар панасидан келишади. Ҳа, худди шундоқ... Хўш дегандан, энди Бизонга қарасак ҳам бўлади.

У ҳали-ҳануз боя қўйган жойида қимир этмай ётган итга қараб қўйди.

— Бечора-я!— деди у куйиниб.— Тоза азоб чекди... Анавиларнинг маълун пичоқларининг изи бир умрга чандиқ бўлиб қолади. Эҳтимол у қасдини оладиган дамларгача етиб борар ҳали, яна ким билади дейсиз. Жудаям бўлиши мумкин-да! Лекин уни ҳозир қаёққа қўйсамкин?

Бирон дақиқа ўйга толиб турганидан кейин ғудранишда давом этди у:

— Жин урсин! Вақтни кеткизяпман-ку. Ярим соат ўтди, ундан кам эмас. Агар изимга тушишган бўлса, аллақачон яқинлаб қолишган «Анави шалпангқулоқ махлуқлари изимни бемалол топади, албатта,— ишонаманки, у янглишмайди. Лекин Бизонни нима қилсам экан-а? Борди-ю, уни дарахтга боғлаб, қўйсам-чи, унда бечора ит тинчгина ётади-я! Хўш деганингиздан, бордию йўлакдан юриб қолишса-чи? Бундай бўлмас-ов, албатта. Уларнинг ўрнида бўлсам, бундай қилмасдим мен. Лекин улар ҳарқалай ўша томондан келишади деб тахмин қилайлик. У чоғда иттин кўришади-ю, бу ерда бир ишқал борлигини фаҳмлашади. Балки каллаларига тепага қараш-

фикри келиб қолар, ана унда... Пўқ, пўқ, бу ярамайди! Бирон бошқа иложини топиш керак.

У эманга яқинлашиб, унинг пастки шохларини диққат-ла кузата бошлади. Чамаси, излаганини топди у. Нима қилишини энди билади.

— Мана буниси бўлади, — гудранди у. — Итни чирмовуқ навдаларига ётқизиб қўяман. Уларни яна пича қалинроқ қилиб тўқиб-чирмаштираман-да, устидан йўсин ташлайман.

Шохларга осилиб, дарахтга сакраб чиқиб олди у.

Бир нечта чирмовуқни юлқиб синдириб, бутуқларнинг айриси устига териб, саватга ўхшатиб тўқиди, шу тариқа майдончага ўхшаш жой ҳосил бўлди, кейин бир неча қучоқ йўсин сидириб-йиғиб, чирмовуқ навдаларидан тўқилган саватсимон майдончага тўшади.

Бари тайёр бўлгач, Қарлос дарахтдан сакраб тушиб, Бизонни кўтарди-да, уни авайлаб йўсин устига ётқизди; ит қимир этмай ётарди.

Ана энди ўзи қаерга жойлашиши устида бош қотирадиган фурсат етганди. Бунинг мушкул жойи йўқ: дарахтга маҳкам ва қулай ўрнашиб олади-да, япроқлар орасига яхшилаб яшириниб, милтиқни шай қилиб туради, вассалом.

Шундай қилиб, Қарлос жойлашишга киришди: йўғон шохга ўтириб, оёғини бошқасига қўйди-да, тирсакларини учинчи шохга тиради. Милтиғи бутуқнинг айри жойида ётар, овчининг қўллари қўндоғини маҳкам чангаллаб олганди.

Қарлос милтиқни диққат билан кўздан кечирди. Шубҳасизки, ўқлоғлиқ эди у. Хўш, баногоҳ пилиги кечаси тушган шабнамда намиқиб қолган бўлса-чи? У ўқдон қопқоғини очди, бошмалдоғининг тирноғи билан милтиқдорини чиқариб ташлаб, доридонидан янғисини солди. Кейин милтиқларининг бир қисми найчага тушиб, портлатгичгача етиб борадиган қилиб устидан босиброқ текислади. Сўнг эса чақмоқтошга ўтди — унинг мустаҳкамлигини текширди, чеккаларини кўздан кечирди. Афтидан, ҳаммаси жойида экан чоғи, Қарлос милтиқни тагин бутуқнинг айри жойига жойлаштириб қўйди.

Бизон овчиси тасодифга ишонадиганлар тоифасидан эмасди — унинг касб-коридаги одамлар эҳтиёткорлик ҳикматига ишонадилар. Унинг ҳозирда айниқса эҳтиёткор эканидан ажабланиш жоизмикин? Ҳаттоки майда-

чўйда жиҳатларни писанд қилмасликнинг оқибати ҳалокат келтириши ҳам мумкин. Милтиқ отилмай қолса, бу — ҳаёти эвазига тушиши ҳеч гап эмас. Ана шунинг учун ҳам унинг чақмоқтош ва милтиқдори қуруқ эканини ҳафсала билан кўздан кечирганининг сира ажабланидиган жойи йўқ.

Жуда қулай маррани танлаганди у. Бу ердан майдонча буткул кўриниб турарди. Башарти унда ақалли мушук пайдо бўлганида ҳам — уни кўрмай қолиш мумкин эмасди.

Қарлос даммини ичга ютганича, бирор соатлар чамаси буталар қуршаган майдончага хавотир-ла тикилиб утирди.

Ниҳоят, сабр-тоқати эвазига тақдирланди. У буталар орасидан мўралаган сарғимтил башарани кўрди, шунда дарҳол ўқ узишига сал қолди. У ҳатто мўлжалга олди, бироқ башара ўша заҳотиёқ яна ғойиб бўлди.

У тагин пича кутди — мана, гулханнынг ёрқин шуъласи тиззалаб олган Мануэлнинг афтини ёритди. Шу пайт бармоғи тепкини босди-ю, Қарлос мерганона узган ўқ маккор ғанимининг калласини тешиб ўтди.

ЛХІ БОБ

Пепе деярли Қарлос дарахтдан сакраб отига миниб, ўрмонча йўлагидан йўрттириб кетган сонияда буталар орасига уриб қолди. Майдончада тирик жон зотидан нишона қолмади.

Давангирдай гавда қўлларини олдинга чўзганича ёлғиз — гуриллаб ёнаётган гулхан устида ётарди. Ўз оғирлиги билан у шох-шаббани босиб, ёлқинни тўсиб қўйганди. Шунга қарамай, шуъла ҳарҳолда қип-қизил доғ босган даҳшатли башарани ёритишга етгулик эди. Танаси, оёқлари, қўллари қимир этмасди — худди ёнгинасида ётган тулумдай жонсиз эди. Сарғимтил овчи ўлганди. Ловуллаган аланга қўлларини ялаб-ясқаяпти, уни еб юборишга тайёр, аммо овчи оғриқни сезмаяпти. Оловни ўликлар учун қўрқинчли жойи йўқ!

Лекин бошқалар қани, қаерда? Улар икки томонга қараб улоқиб кетишганди-ку, ахир. Бир-бировларидан қочаётганлари йўқми мабодо?

Пепе келган жойига йўл олганди. Бироқ, келган йўли-

дан мутлақо бошқа тарафдан кетяпти. Барглардан тўқилган қалин парда ортида ҳам тўхтамади — у худди қўрқувдан бутунлай эси оғиб қолгандай, оёғи ерга тегиб-тегмай учиб боряпти. Шох-шаббалар қарсиллаб-чирсиллаб синяпти, барглар шатир-шутирляяпти, у ўрмончадан тиккасига, йўл танламай югуриб кетяпти. Лекин мана, бу шовқин ҳам эшитилмай, Карлоснинг оти дупури ҳам олисларда тинди-қолди.

Ҳозир қаердайкин улар, Пепе билан Карлос? Бир-бирларидан қочиб қолишдимикин? Афтидан, худди шундоққа ўхшайди — ахир улар тамоман турли тарафга қараб кетишганди-да.

Аммо бундай эмасди. Пепе иложу имкони бориचा бу жойдан узоқроқ қочиш дардида эди-ёв; унинг рақиби эса бошқа ниятда эди. Тўғри, у ўрмончадан от чоптириб чиқиб кетди, бироқ бу қочди дегани эмасди.

Карлос Пепени яхши билганидан шу тобда унинг ботирлигидан ном-нишон ҳам қолмаганига заррача шубҳаланмасди. Қорача тусли овчининг вужудини дабдурустдан, устига -устак бундайини жумбоқлию сирли шароитда дўстидан жудо бўлгани заҳоти ҳадсиз даҳшат чулғаб олганди. Бу қўрқувдан ҳали-бери ўзига келолмайди у. Фақат бир нарсани — қандоқ қилиб қочиб қолишнигина ўйлайди. Карлос буни биларди.

У ғанимлари қай тарафдан — ўз-ўзидан равшанки, дарахтзорнинг жануб томонидан — келишганини ўша заҳотиёқ англаганди. У ғанимлари худди ўша тарафдан келишини кутган ва қалин бутазорларга тикилган пайтларида диққат-эътиборини ҳаммадан кўра кўпроқ ўрмончининг айнан ўша томони тортаётган эди. Улар, бостириб борадиган энг хавфсиз томон мана шу, деб ўйлашган, — шундай тахмин қилганди Карлос, у ҳақ бўлиб чиқди ҳам.

Туёқлар дупури уни чўчитиб юбориши мумкин деб хавфсираганларидан отларини бирон чеккароқда қолдиришган оғайнилар, албатта, деб ўйлади кейинроқ Карлос, бунда ҳам хато қилмаганди у. Унинг яна битта тахмини тўғри чиқди: Пепе ҳозир отлари турган ерга қараб югурияпти. Карлос душмани буталар орасига уриб кетганини кўргандаёқ буни англаб етганди.

Аслида ҳам шундоқ бўлиб чиқди. Ўз ошнаси ва раҳнамосининг сирли равишдаги ҳалокатидан сўнг Пепе Карлос билан олишувни ўйламаёқ қўйди. Тезроқ отлар

ёнига етиб олиб, жуфтакни ростлаб қолиш — бор истак-хоҳиши шугина эди, холос. Балки Карлос дарҳол орқасидан қувмас-у, зимистон қоронғиликда ғойиб бўлишга улгурар.

Аммо у янглишганди; Карлос унинг қочиб қолмишига халал бериш учун ҳам олдинга от солиб кетган эди. У ҳам отлар ёнига етиб боришга аҳд қилганди.

Урмончадан чиқа солиб Карлос отини ўннга буриб, дарахтзор чеккасидан елдирга кетди, дарё кўринадиган жойга етиб боргач эса қорабайирнинг таққа жиловини тортди — у милтигини янгитдан ўқлаб олиши керак эди.

Милтигини тикка қилиб кўтарди-да, милтиқдори идишига қўл узатди. Пайпаслаб у йўқ эканини билиб ҳайрон бўлди. Уёқ-буёғини пайпаслади—доридони йўқ! Елкаси оша осиб олган боғичи ҳам йўқ. Чамаси, у дарахтдан сакраган пайтида боғич шохга илиниб қолган-у, доридони ўша ерда қолаверган.

Бу муваффақиятсизликдан хафа бўлиб кетган Карлос отини буриб, орқага қайтишга чоғланганида баногоҳ текисликда, дарё ёқасидаги мажнунтоллар остидан ёзиллаганча қочиб бораётган қорага кўзи тушди. Шубҳасиз, Пепе қочиб боряпти, бошқа ким ҳам бўларди!

Карлос тараддулланиб туриб қолди. У то бориб милтиқдори тўрвасини олиб келиб, милтигини ўқлагунича ғаними қочиб қутулиб кетиши мумкин. Отлари яқин ерда бўлиши керак, у отда жуфтакни ростлаб қолиши тайин. Кундузи Карлос отда бўлган чоғидаям осонгина етиб олган бўларди-я, лекин бунақанги зим-зиё тунда етолмаса кераг-ов. Агарда Пепе беш юз ярдча олдинга ўтиб олса, кўринмай кетади у.

Бу ҳол Карлосни ниҳоятда ташвишга солиб қўйди. Унинг Пепега ўлим тилашга асосли-ю жиддий сабаблари бор эди. Аммо мутлақо табиий бўлмиш интиқом истагини эмас, шу қатори мулоҳазакорлик ҳам: бу одамдан қутулиш керак, деб шипшиб турарди. Бу ёлланган қотиллар шундай бир хиёнаткорона тарзда Карлоснинг изига тушган эдиларким, оқибатда унинг вужудида интиқом истак-иштиёқи уйғонганди. Бунинг устига қочоқ, токи бу аблаҳлардан лоақал биттаси ҳаёт экан, унинг хавфли душман бўлиб қолишини биларди. Йўқ, Пепе қочиб қутулиб кетмаслиги керак!

Карлоснинг иккиланиши кўпга бормади. Милтиқдори тўрвасини деб орқага қайтиш — ғаними қўлдан чиқа-

риб юбориш деган гап. Ана шу ўй уни бир қарорга келишга мажбур этди. У милтиғини ерга улоқтириб, отини қичаганича текислик бўйлаб дарё ёқасига шамолдек учира кетди. Бир неча лаҳзадан сўнг эса қочиб бораётган ғанимига етиб олди.

Пепе отлар томонга бораётган йўли кесиб қўйилганини кўриб, худди олишувга ҳозирлангандек қиёфада тўхтади. Бироқ, Карлос отидан тушиб улгурмасданоқ Пепенинг яна руҳи тушиб кетди; мажнунтол буталарини оралаб ўтиб, ўзини сувга отди.

Карлос буни ҳисобга олмаганди. У аллақачон отдан тушиб бўлган ва ҳозир саросимада, дилисиёҳ бўлиб туриб қолган эди. Наҳотки, ғаними қутулиб кетади? Нима қилсин: тагин отига минсинми ёки пиёда қувсинми уни?

Карлос тезда қарор қилди: албатта, пиёда-да! У ўзини Пепенинг ортидан қалин толзорга урди-ю, қирғоққа ўтиб олиб, биргина сонияга шундоққина сув ёқасида тўхтади. Айни шу онда ғаними қарши қирғоққа чиқиб, оёғини қўлга олганча сойлиқдан чопа кетди. Шунда Карлос тагин ўйланиб қолди: уни отда қувган маъқул эмасмикин? Лекин қирғоқ бу ерда баланд, от тармашиб чиқолмайди, дарёни бу еридан кечиб ўтиб ҳам бўлмайди. Текшириб кўришга фурсат йўқ, ҳар бир дақиқа ғанимат.

— Мендан кўра тезроқ чополмаса керга-ов,— дея пичирлади Карлос.— Демак, олға!— Шундай деб у сувга ташлади ўзини.

Бир неча қулоч отишдаёқ дарёчани кесиб ўтиб, ўша захотиёқ қирғоққа чиқди-ю, ғаними ортидан қува кетди.

Бу пайтда Пепе ундан икки юз ярдча илгарилаб кетганди, лекин кейинги икки юз ярдни югуриб ўтганида Карлосни ундан эндиликда юз ярдча масофа ажратиб турарди. Малласоч билан долларлаш Пепега йўл бўлсин! Карлос ваҳимага тушган ғанимидан (гарчи у гап ҳаётмамот устида бораётганини тушуниб бор кучини ишга солаётган бўлса-да) деярли икки карра тезроқ югураётган эди.

Таъқиб ўн дақиқага ҳам бормади.

Мана Карлос етиб қолаёзди. Пепе орқасидан келаётган оёқ товушларини эшитиб боряпти. Уёғига чопиш — беҳуда тер тўкишдир. Пепе яна боягидек жон-жаҳди билан олишишга шайдек бир важоҳатда тўхтади.

Тағин бир лаҳзадан сўнг улар бир-бировига рўпара бўлди — ораларидаги масофа ўн футча келарди.

Иккаласи ҳам узун пичоқ билан қуролланган — бу уларнинг бирдан-бир қуроли. Ҳаттоки ширвагина ёругда ҳам тиғи йилтиллаяпти.

Ғанимлар ҳатто нафас ростлаб улгуришмади. Дарғазаб ҳайқирганча бир-бировларига ташланиб, жончиқарга олиша кетишди.

Бу ниҳоятда умри қисқа олишув бўлди. Бир неча лаҳза ичидаёқ тугади. Ғанимлар таналари бамисоли чирмашиб, чирпирак бўлганларича олиша кетишди-ю, мана, улардан бири гурсиллаб қулади. Вой-войлаган овоз эшитилди. Бу Пепеннинг овози. Қулаган ўша!

Қулаган тана бирор дақиқа ерда тўлғаниб хиёл кўтарилди, яна қулади, тағин бир неча марта титраб-силтанди-да, ўлим чангалида қимир этолмай, тек қолди.

Карлос энгашиб, кўздан кечирди. Ғанимининг ёвузона, баджаҳл юзига аллақачон ажал ўз муҳрини босиб бўлганди. Бари тугаган эди. Ғолибда бунга ортиқ шубҳа қолмади.

У қимир этмай жасаддан бурилиб, дарё томон юрди.

Кейин Карлос милтиқдори тўрвасини топди, милтигини кўтариб, янгитдан ўқлади-да, отларни излагани жўнади.

Ҳадемай топди уларни. Бир ўқ исковучнинг, иккинчиси кўпроқ бўрига ўхшаб кетадиган итнинг бошига қарата узилди, отлар бойлоқдан ечилиб, ўз ҳолига қўйиб юборилди.

Карлос бу ишларни тугатиб, яна майдончага қайтди. У Бизонни дарахтдан олиб, гулхан олдига келди-да, Мануэлнинг жасади ёнида тўхтади. Олов айниқса бошқачасига яллуғланиб ёнмоқда — унга инсон жисми озуқа бўлмоқда эди.

Карлос мазкур манзарадан кўнгли беҳузур бўлиб тескари қараб олганича ўз усти-бошини йиғиштириб, тағин отга минди-ю, дара томон чоптириб кетди уни.

LXII БОБ

Сарғимтил тусли овчи билан унинг ошнаси Карлосни ахтаргани жўнаганларидан бери уч кун ўтди. Уларни жўнатганлар сабрсизлик-ла, хабар кутардилар. Ўзлари

ёллаган одамларнинг серғайратликлари, астойдил ҳаракат қилишларига шубҳалари йўқ — ваъда этилган мукофот муваффақиятнинг гарови эди, шу боисдан улар Карлоснинг қўлга тушишига қаттиқ ишонардилар. Учовлари ҳам — Робладо, Вискаarra ва иезуит — шунча мукофот ваъда қилинган экан, бошқача бўлишим мумкин эмас, деб ҳисоблашарди. Шунга қарамай, ҳарҳолда овчилардан тезроқ хабар келишини — башарти қоchoқ қўлга тушди деган хабар бўлмаган тақдирда ҳам, ақалли уни кўрганлари ёки изига тушганлари тўғрисидаги хабарни тоқатсизлик ила кутишаётган эди.

Аммо ҳазрат ҳамда зобитлар яхшилаб мулоҳаза юритиб кўриб, овчилардан бирор хабар келиши даргумон деган хаёлга келишди. Токи улар — қурбонни олиб ёхуд усиз — ўзлари қайтиб келгунларича кутиш керак.

— Овчилар ҳозир уни изма-из қувиб юришибди, албатта, — деб қўйди роҳиб, — токи ўша шаккок нобакорни қўлга туширмагунларига қадар ҳеч нима эшитиб, ҳеч нимани билолмаймиз алар хусусинда.

Бир чўпон Сан-Ильдефонсога топиб келган янгилик бу уч қадрдонни қанчалик ларзага солганини қўяверасиз асти! У иккита одам ўлигини кўрибди. Мануэль билан Пепени танибди.

Чўпон бўрилар ғажиб, қузғунлар чўкилаб ташлаган жасадларни Пекос бўйидаги ўрмонча яқинида кўрганини гапириб берди, бу одамларни яхши билгани учун уларни энгил-бошларининг қолган-қутгани ва аслаҳанжомларидан ким эканликларини англаган эмиш.

Булар мулат билан самбо — миссиянинг овчилари эканлигига тирноқчалик ҳам иккиланмасди у.

Одамлар «сирли қотиллик» деб атаган ушбу фожиа мабодо бу ёввойи ҳиндуларнинг иши деб фараз қилинмасагина, албатта — англаб етиб бўлмайдиган жумбоқдек туюлди. Овчиларни Карлосни ахтаргани жўнатишганидан водий аҳли беҳабар эди. Икковлариниям бу ерда танишар эди-ю, лекин уларнинг қаёққа, нима мақсадда боришига камдан-кам одам қизиқарди. Улар аҳоли яшайдиган жойлардан олисда, ҳеч ким бормайдиган ерда яшаб, олисда ов қилишарди. Маҳаллий аҳоли уларни ҳамишагидек овга жўнагану кўчманчи ҳиндулар ҳужум қилган уларга деб ўйлади.

Ўрмонга уланлар бўлугини жўнатдилар, уларни чўпон бошлаб борди ва улар содир бўлган фалокатнинг

замири бутунлай бошқача эканига далилу асослар топиб қайтдилар.

Уларнинг тасдиқлашларича, овчилар мутлақо ҳиндулар камон ўқи билан эмас, балки оқ танли одамнинг қуроли билан ўлдирилган экан. Айни чоқда уларнинг отлари соппа-соғ экан-у, итлари эса ўлдирилган — суяк-саёқлари соҳилда ётган эмиш.

Равшан гап, ҳиндуларнинг даҳли йўқ бунга. Ҳиндулар бўлганида итлар билан отларини олиб кетишарди, кейин, жасадларнинг жиндаккина қимматга эга жамики нарсасини шилиб кетишлари тайин эди, албатта. Хўш, ҳиндуларми бу? Асло, бу уларнинг иши эмас.

Хўш, унда ким қотиллик қилган ҳар қалай. Буни осонгина фаҳмлаш мумкин эди. Итларнинг скелетини топган жойларида ер юмшоқ бўлиб, ўлдирилган овчиларнинг отларидан бошқа яна битта отнинг туёқ излари қолганди. Бу излар кимнинг отини изи эканини танийдиган одамлар ҳам топилди. Бу барчага яхши таниш қорабайирнинг, бизон овчиси Карлос отининг излари эди.

Хулласи калом, бу жиноятни Карлос қилган. Унинг Мануэль билан ораси чатоқ эканини кўпчилик биларди. Эҳтимол улар тўқнаш келиб, жиқиллашиб қолишгандир, балки — буниси янада эҳтимолга яқинроқ — Карлос гулхан ёнида ухлаб ётган Мануэль билан Пепенинг устларидан чиқиб қолгандир-у, писиб келиб, суробларини тўғрилагандир. Мануэлни у жойидаёқ отган-у, овчи тўғри гулханга қулаган — жасади ярмигача ёниб кетибди. Иккинчи овчи қочиб қолишга уринган, лекин қонхўр жиноятчи унга етиб олиб, ўлдирган.

Жамоатнинг қаҳрига учраган Карлоснинг бошига янгидан-янги лаънатлар ёғила кетди. Унинг номини тилга олганда одамлар чўқиниб олишар ва ё дуо ўқишар, ё бўралаб ҳақорат ёғдиришарди; оналар қулоқсиз болаларини унинг номи билан қўрқитишар эди. Бизон овчиси Карлоснинг номи ҳиндулар босқинидан кўра ортиқроқ ваҳимага соларди.

Сан-Ильдефонсо аҳли орасида ғайри куч — хурофоту бидъатга ишонч баттар кучайди. Карлоснинг онаси жодугар эканига, турган гапки, бу ишларни ўғли онасининг ёрдамида ва ўшанинг васвасаси билан бажарганига эндиликда ҳеч ким иккиланмас эди.

Уни қўлга тушириш ёки ўлдиришларига ҳеч ким

ишонмай қўйди. Буни иложи бораканми? Уша иблисни қўл-оёғини боғлаб, адолат судига топширадиган азамат қаёқда? Кейин, уни қўлга туширишларига ҳеч ким ортиқ ишонмай қўйган эди.

Ҳатто унинг жодугар онасини қўлга олиб, уни гулханда кўйдиришни жиддиян маслаҳат берганлар ҳам топилди. Токи у тирик экан, Карлос учун ҳар қандай таъқиб икки пул, онасини нариги дунёга жўнатилса, ана ўшандагина қотилни жазосини берса бўлади, дерди бундайлар.

Ана шундай маслаҳатгўйлар устун келишлари ҳеч гап эмасди — кўпчилик улар томонида эди, бунинг устига уларни иезуит оталар очиқ-ошкора қувватламоқда эдилар. Бироқ, бундайин даҳшатли қурбонлик амалга ошиши учун жамоатчилик фикри узил-кесил пишиб етилишидан олдинроқ рўй берган янги воқеа ишларни кескин чаппасига буриб юборди.

* * *

Якшанба куни эрталаб, одамлар ибодатхонадан чиқа бошлаган паллада бошдан-оёқ чангга ботиб, ғарққа тер босган бир чавандоз майдонга от йўрттириб кириб келди. Эғнида уланлар сержантининг мундири, шунда ҳамма дарров таниди сержант Хомесни.

Бир неча дақиқа ичида уни бекорхўжалар оломони қуршаб олди. Якшанба бўлишига қарамай, тўрт томонда тантана нидолари янгради. Шляпалар осмонга учди, ҳавони «viva» садолари ларзага келтирди.

Қандай янгиликни эълон қилганди Хомес? Мазкур янгилик дарҳақиқат фавқулодда эди: жинояткор қўлга тушибди!

Ҳа, бу ҳақ гап эди. Карлосни ушлаб олишган ва у ҳозир аскарлар қўлида эди. Уни на куч ишлатиб, на хийла билан қўлга туширган эдилар. Барига хиёнат сабабчи эди. Уни ўз одамларидан бири сотганди.

Бу эса мапа шундай содир бўлганди. Каталинадан хат-хабар олишдан умиди узилган Карлос онаси билан синглисини Сан-Ильдефонсодан олиб чиқиб кетишга аҳд қилди. Уларга одамлардан олисда, овлоқ ердан бошпана тайёрлаб қўйиб (душманларни етиб боролмасди уёққа) ўзи эса кейин, имкони туғилди дегунча водийга қайтиш ниятида эди.

У онаси билан синглисини узлуксиз кузатаётганларини, шунинг учун уларни у ердан олиб чиқиб кетиш асло осон эмаслигини биларди. Агарда унга хиёнат қилмаганларида ҳар қалай мақсадига етган бўларди. Охириги марта овга кузатиб борган пеонлардан бири эндиликда уни душманларига сотган эди.

Карлос ранчога келиб, шошилинич олис йўлга ҳозирлик кўраётган эди. Отини нарироқда, буталар орасида қолдирганди. Бахтга қарши Бизон ёнида эмасди. Вафодор ит дарадаги олишув пайтида етган жароҳатларни битиб, ҳали тузалиб улгурмаган эди, йўқса ранчо атрофида ўша пойлоқчилик қилган бўларди. Мана энди бўлса Карлосга бу юмушни пеонга топширишига тўғри келди.

Робладо билан Вискарра бу муттаҳамни илгарироқ сотиб олганди. Шундай қилиб у ўз хўжайинини қўриқлаш ўрнига душманларга хабар қилгани ошиқди. Аскарлар уйни қуршаб олишди. Карлос мардона қаршилик кўрсатди, бир неча одамни ер тишлатди, аммо охиरोқибатда ғанимларнинг дасти баланд келиб уни қўлга туширдилар.

Деярли Хомес пайдо бўлган дамдаёқ янграган карнай садоси уланлар бўлуғи яқинлашаётганидан далолат берди ва ҳадемай улар майдонга кириб келдилар. Улар ўртасида, икки карра кучайтирилган соқчилар қўриқловида, оёқ-қўли мусти-мустаҳкам қилиб боғланган, хачирга мингазилган банди келарди.

Бундай ғаройиб воқеа ҳақидаги овоза ниҳоятда тез тарқалди-ю, майдонни машҳур бизон овчисини кўришга иштиёқманд текин томошатаблар оломони босиб кетди.

Бироқ, одамлар қизиқсиниш-ла тикилаётган ёлғиз Карлоснинг ўзигина эмасди бу ерда. Унинг орқасидан майдон бўйлаб икки аёл бандини ҳам олиб ўтишди, улардан бири бекорхўжа томошатабларда жиноятчидан кам қизиқиш уйғотмаётганди. Бу асира — унинг онаси. Юзлаб жуфт кўзлар унга ғазаб ҳамда қўрқув-латиқилар, уни авахтага масхара-мазаҳлару дағдағалар дўли ила кузатиб қолардилар.

— Жодугарга ўлим! Ўлим! — деб қичқиришарди бағритош золимлар у ёнларидан ўтиб бораётганда.

Ҳатто унинг навниҳол ҳамроҳи, унинг қизининг кифтларига ёйилган, тўзғиган сочлари ва ғилқ-ғилқ ёш тўла

кўзлари мутаассиб оломоннинг кўнглини юмшата олмади.

— Икковигаям ўлим — онасигаям, қизигаям ўлим!

Қўриқчилар қутуриб кетган оломон ёпирилиб қолмасин деб асираларни шоша-пиша авахтага итариб киритишга мажбур бўлдилар.

Яхшиямки буни Карлос кўрмади. Уларнинг қўлга олинганларидан йигитнинг ҳатто хабари ҳам йўқ эди. У онаси билан синглисини ранчода қолдиришган, уларга зиён-заҳмат етказишмаган деган умидда эди, ғанимлар ёлғиз мендангина ўч олишяпти, деб ўйлаганди. У ўз таъқибчиларининг иблисона ният-режаларини билмасди ҳали.

ЛХІІІ БОБ

Асираларни шаҳар турмасига, Карлосни эса ишончлироқ бўлсин учун қалъага олиб бориб, ички қамоққа қамадилар.

Тунда уни меҳмонлар зиёрат қилди. Комендант билан Робладолар ўзларининг интиқом олишдек палидона майлу истакларини қондириб роҳатланиш иштиёқига тоб беролмадилар.

Ўз қадаҳларини сипқориб, шодон ҳамшишалари билан биргаликда камерага кириб келиб, қўл-оёғи боғлиқ бандини масхара қила бошладилар. Ширакайф зиёратчилар уни оғзиларига келган таҳқиру ҳақоратларга кўмиб ташлайверадилар.

Карлос бу ҳақоратларнинг барига ғиқ этмай, узоқ бардош берди. Ниҳоят, Вискарранинг навбатдаги қўпол масхаралашидан қони қайнаб кетиб ўзини тутолмай қолди ва комендантнинг хунуги чиққан башараси хусусида нимадир деб юборди. Бу гапдан аблаҳ қутуриб кетди-ю, боғлоқлиқ бандига қўлида ханжар билан ташланди. У агарда Робладо билан бошқалар аралашмаганида Карлосни ўлдирган бўларди, албатта. Улфатлари унга Карлосни ўлдириб қўйса ўзларини ваъда қилинган эрмак — томошадан бебаҳра этишини эслатдилар. Ана шугина Вискарранинг жазавасини жиловлади, бироқ у ноиложу ночор бандининг юзига бир неча бор мушт туширганидан сўнггина тинчланди.

— Майли, аблаҳ яшаб туратурсини! — деди Робладо.

Эртага биз унга қувноққина бир томошани кўрсата-
миз-да.

Маст каллакесарлар—ваъда қилинган «томоша» ус-
тида бош қотиришни тутқунга ҳавола қилганча — ган-
дираклашиб чиқиб кетишди камерадан.

Тутқунни бундан бўлак қиладиган иши ҳам йўқ эди.
Карлос ўзини саранжомлашларини жуда яхши фаҳмла-
ди. У ҳарбий ёки граждандар судьяларнинг муруввати-ю
марҳаматидан умидвор эмасди. Айтаётган томошалари
менинг ўлимим бўлса керак-да, деб ўйларди у. Тун бў-
йи изтиробли хавфсираш ич-этини тирнаб чиқди — ўзи-
ни деб эмас, балки ўз ҳаётидан кўра азизроқ бўлган
кимсаларини деб.

Камеранинг энсизгина туйнугидан тонг мўраллади.
Тутқун бўлак ҳеч нима ва ҳеч кимни кўрмади. Бадқаҳр
зиндонбонлар унга на бирон оғиз тасалли берадиган сўз
айтдилар, на ҳамдардлик ила қиё боқдилар, на сув, на
овқат келтирдилар. На дўст-ёри йўқлаб келди денг. Бу-
тун жаҳонда уни деб юраги безовта тепадиган бирорта
юрак йўқдек эди.

Пешин бўлди. Карлосни қалъадан олиб чиқишди,
тўғрироғи — судраб чиқишди. Уни аскарлар ўртага олиш-
ди. Қаёққа олиб боришаркин уни? Қатл этганими?

Унинг кўзини боғламадилар. У ўзини шаҳар бўйлаб
майдонга олиб боришаётганини кўриб турарди. У ерни
тумонат одам босиб кетибди. Оломон ҳам майдонни,
ҳам у кўриниб турадиган жамики асотяеларни эгал-
лабди. Афтидан, бутун водий аҳли шаҳарда жам бўл-
ганди. Асиендо эгалари дейсизми, чорвадорлар дейсиз-
ми — жамикиси шу ерда! Ким йўқ денг-а бу ерда! Ле-
кин улар нима сабабдан бу ердалар! Уларни бирон ҳад-
дан зиёд хунук ҳодиса етаклаб келган бўлса керак.
Аниқ кўриниб турибдики — улар қандайдир фавқулод-
да томошани кутишяпти. Балки Робладо ваъда қилган
томошанидир? Лекинига қандай томоша бўлдикин бу?
Тағин уни ана шу бутун оломоннинг кўзи олдида қий-
намоқчи эмасмикинлар? Худди шундоқ бўлиши мум-
кин-да...

У ўтиб бораркан, сон-саноғи йўқ оломон ундан ку-
лар, мазах қиларди. Уни майдон орқали олиб ўтиб, ша-
ҳар турмасига итариб киритишди.

Камерадаги декор ёнига қўйилган қўпол харракда

нафасни ростлаб олса бўларди. Шўрлик ўзини харракка ташлади — бойлоғлиқ қўл-оёғи қаддини ростлаб ўлтиришига йўл бермасди.

У ёлғиз қолди. Уни қўриқлаб келган аскарлар камерадан чиқиб, устидан қулфлаб қўйишди. Эшик ортида улардан бир неча киши қолганини билиб турарди овчи — уларнинг овозлари ва қиличларининг шарақ-шуруқи эшитилаётган эди. Ҳақиқатан ҳам икки кишини соқчиликка қолдиришган эди. Бошқалар тарқалишиб, майдонни тўлдирган оломонга қўшилиб кетишган эди.

* * *

Карлос бир неча дақиқа қимир этмай, ҳеч нимани ўйламай ётди. Қалби қайғу-аламдан тош қотганди. Умри бино бўлиб биринчи маротаба руҳий тушкунликка ён бераётгани эди.

Бу туйғу оний, ўткинчи эди, инчунун ўй-фикри яна ишга тушиб кетди, аммо умиди сўниб бўлганди. Одамлар умид фақат жон билан бирга чиқади, дейдилар, йўқ, хато бу. У ҳануз ҳаёт, умиди эса ўлиб бўлганди. У қочиб қутулиб кетишига умид қилолмасди: уни ниҳоятда яхшилаб қўриқламоқда эдилар. Ҳазоби қўзиган ғанимлар уни ушлаш осон эмас эканига амалда ишонч ҳосил қилиб, қочишига зиғирчалик имконият қолдирмагандилар. Афв этишлари ёхуд шафқату ҳамдардлик кўрсатишларини эса Карлос хаёлига ҳам келтирмаётган эди.

Аммо ақлу онги ишлай бошлаган эди.

Қулфнинг калити буралиб, тутқун ёлғиз қолдими, бас, у аввало, қамоққа тушганим тўғрими, деб текшириб кўраётгандек ўз зиндонининг деворларини кўздан кечиради. Тамоман табиий бўлмиш ана шу истакка итоат этган Карлос деворларни кузатди. Шапалоқдеккина ойна, тўғрироғи, туйнукдан ёруғлик тушиб турибди: камера ертўлага жойлашган эмасди. Деразача баландда эди-ю, лекин харракка чиқилса, унинг қай томонга қараганини кўрса бўларди. Бироқ, Карлос бунга қизиқсинмай, боягидек қимир этмай ётаверди. У қамоқхона деворлари тош ёхуд пишган ғиштдан эмас, хом ғиштдан эканини, бунинг устига унчалик қалин ҳам эмаслигини кўриб турарди, бунинг исботи — туйнук. Бунақанги

девор жудаям мустаҳкам бўлавермайди. Қўлида ўткир қуролию фурсати бор журъатли одам деворни кўпда қийналмай тешиб, бу ердан чиқиб кетиши мумкин эди. Карлос шу тахлитда ўй сурарди. Лекин у ўзида на ўткир асбоб ва на фурсат борлигини ҳам хаёлидан кечирди. Бир неча соатдан, балки бир неча дақиқадан кейин уни, албатта, бу қамоқхонадан қатл суначасига олиб чиқадилар.

У ўлимдан қўрқмаётган, ҳатто қийноқдан ҳам чўчи-маётган эди — у ўзига айнан шундай жазо ҳозирлаб қўйганларини билар ва буни кутаётган эди. Онаси ва мағрур ҳамда меҳрибон қиз бўлмиш суюкли синглиси билан абадий видолашажаги ҳақидаги ўй-фикрлар оғир қийноқ эди унинг учун; уларни ҳеч қачон кўрмайман энди, деган фикр ич-этини кемирарди.

Наҳотки ўзи тўғрисида ҳеч хабар бериб бўлмаса уларга? Наҳотки унинг охириги сўзи, ўлими олдидаги мулоҳазаларини яқинларига етказадиган дўсти бўлмаса? Ҳа, йўқ, ҳеч кими йўқ!

Хонани қиясига кесиб тушган нур вақти-вақти билан ғойиб бўлиб, хона қоп-қоронғилашар — ташқарида туйнукни нимадир тўсиб қўяр эди. Бу ошналарининг елкасига чиқиб, тутқунни кўришга уриниб ичкарига мўралаётган бироп сичков бекорчининг башараси бўларди.

Туйнук одамларнинг бошларидан баландроқда эди. Майдондан қўпол сўкишу ҳақоратлар, яна тарин Карлоснинг бир ўзигагина эмас, шунингдек унинг жондан азиз кимсалари — онаси билан синглисига қаратилган ҳақорату таҳқирлашлар эшитиларди. У алам ва хавотирла қулоқ соларди. Нима учун уларни кўп тилга олиш-яптийкин? Сўзларни тузук-қуруқ тушунолмааяпти-ю, бироқ ғовур-ғовур орасидан онаси билан синглисининг исмларини илғаб оляпти.

У шу аҳволда харракла бирор соатча ётди. Кейин эшик очилди-да камерага Вискаarra билан Робладо кириб келишди. Уларни Хомес кузатиб келганди.

Тутқун паймоним тўлибди деб ўйлади. Ҳозир уни қатлга олиб боришади. Бироқ у янглишганди. Ҳозир буларнинг нияти бошқача эди. Муттаҳамлар унинг руҳий азобланишини кўриб лаззатланмоқчи эдилар.

Зобитлар камерада кўп бўлишмади.

— Хўш дегандан, ошна,— дея гап бошлади Робладо,— бугун биз сенга томоша кўрсатишни ваъда қил-

ган эдик. Сўзининг устидан чиқадиганларданмиз, ҳа. Гап мундоқ, ҳаммаси тахт, томоша ҳадемай бошланади. Харракка чиққинда, деразачадан томоша қилгин. У ердан майдон жуда яхши кўриниб туради — ташвишланма, дурбинни кераги бўлмайди сенга? Қани тур! Вақтни бой берма! Қизиқ нарсаларни кўрасан.

Робладо хириллаб кула кетди, комендант билан Хомес унга жўр бўлишди. Жавобни кутиб ҳам ўлтирмай, учовлон камерадан чиқиб, қоровулга уни қайтатдан қулфлаб қўйишни буюришди.

Уларнинг келиши ва Робладонинг сўзлари Карлосни бошини қотириб, ўйга солиб қўйди. Бунинг маънисини нима бўлдикин? Томоша, бунинг устига у — томошабин? Унинг қатлидан бошқа яна қанақанги томоша бўлиши мумкин? Ҳар қалай нима дегани экан бу?

Бир муддат у Робладо гапларининг маъзини чақиб кўришга уринди-ю, ниҳоят, назарида бунинг калитини топгандай бўлди.

— Э-ҳа! — гўлдиради у. — Дон Хуан... Э, гап буёқда экан-ку! Бечора дўстим-а! Булар унияма ўлимга ҳукм қилишибди-ю, у мендан олдин ўлиши керак экан-да. Булар унинг қатлини томоша қилишимни ишташяпти. Вой ёвузлар-ей! Йўқ, қарамайман — уларга бундай ҳузурни бахш этиб бўлман! Шу жойимда қоламан.

У шундай деб, энди қайтиб турмайман деган аҳдда, яна харракка чўкди. Гоҳо-гоҳо гудраниб қўярди у:

— Бечора дон Хуан! Содиқ дўстим... Бир умрлик дўстим. Ҳа, бир умрлик. Ахир у мени деб жонидан жудо бўляпти, мени деб-а... Қадрдон дўстим, қадрдоним!..

Тутқуннинг фикр-мулоҳазалари қўққисдан узилди. Кимнингдир юзи шинакни тўсиб қўйди-ю, дағал овоз шанғиллади:

— Хей, Карлос, бизонлар жаллоди! Буёққа қарасанг-чи! Жин урсин, арзийдиган томошалар бўляпти буёқда! Онангни, жодугар ёсуманни кўриб қўй бир! Ҳув ана, ҳусни-жамолини кўз-кўз қиляпти у! Ҳа-ҳа-ҳа!

Мабодо заҳарли илон чақиб олгани ё ғаними тўсатдан мушт тушириб қолганида ҳам Карлос бунчалик шитоб-ла сапчиб туриб кетмаган бўларди. У қўл-оёғи бойлоқ эканини унутганди — гуппа қулади ерга; бир амаллаб тиззалади.

Энди эҳтиёткор бўлиб қолди у; дарров бўлмаса ҳамки, ҳарҳолда тикка турди. Амал-тақал билан харракка

чиқди-да, юзини туйнукка тақаб, ташқарига жавдиради.

Майдонда нималар бўлаётганини кўрганида томирларидаги қон тўхтаб қолгандек бўлди, манглайдан йирик-йирик, реза-реза тер чиқиб кетди. Қалби, вужудини ваҳима чулғаб олди-ю, наздида кимнингдир қўли юрагини чангаллаб, темир панжалари билан миждилаётгандек бўлди.

LXIV БОБ

Майдоннинг ўртаси бўшаб қолди — уни аскарлар қуршаб олдилар. Уйларнинг деворлари томон сиқиб қўйилган одамлар оломони атрофни ўраб, шийпону томларни тўлдириб юборганди. Майдоннинг марказига яқинроқда зобитлар, алькальд, амалдорлар маҳаллий оқсуяк-аслзодалар жойлашишган эди. Уларнинг деярли ҳаммаси мундирда бўлиб, бошқа пайтда айнан шулар оломоннинг диққат-эътиборини тортишлари турган гап эди. Аммо ҳозир бошқа бир тўда хийла ортиқроқ қизиқиш уйғотаётган, жамики кўзлар бутун диққату эътибори-ла худди ўша тўдага қадалган эди.

Тўда майдоннинг турма рўпарасидаги, нақ Қарлос мўралаётган шапалоқдек ойна қаршисидаги бурчагини банд этганди. Унинг нигоҳи дарҳол ана шу тўдада тўхтади. Бўлак ҳеч нимани — на оломонни, на унинг йўлини тўсиб турган аскарларни, на важоҳатли бошлиқлари ясап-тусан аслзодаларни кўрарди — кўзи ойна рўпарасида турганларнигина кўрарди. Улардан кўзини узолмасди.

У ерда иккита устига нақ оёқларигача тушган қора саржа ёпиқ ёпилган, патила-патила жунли қўнғир эшак турарди. Ҳар иккала эшакда жул нўхта; нўхта тизгинини худди ўша қора матодан кийим кийган қора танли ҳайдовчи ушлаб олган. Ҳар қайсисининг кетида худди ўшандоқ антиқа кийиниб, бизон терисидан тўқилган қамчин ушлаб олган яна битта ҳайдовчи. Ҳар қайси эшакнинг ёнида тагин иезуит оталардан бирови турибди, қўлида ўз касби-корнинг ажралмас ашёлари — дуонома, тасбеҳ ва хоч. Уларнинг важоҳатлари ишчаннамою жиддий: улар хизмат вазифаларини адо этиптилар. Ўлло қандай вазифани? Буёғини эшитинг!

Эшакларга эгар урилган. Улардан ҳар бирининг устида — тирик мавжудот — одам бор. Улар бемалол-эркин ўтирганлари йўқ — боғлаб қўйилган улар. Оёқлари тўпиқларига ўралган арқон билан бир-бировига тушовланган, кифту елкалари эгик турсин учун қўллари эшакнинг бўйнидаги ёғоч бўйинчага боғланган. Бошлари қуйи солинган, юзлари девор томонга бурилган — оломон ҳозирча уларни кўрмаяпти.

Улар яримьяланғоч. Буларнинг аёл эканини фаҳмамоқ учун бир бор кўз ташлашнинг ўзиёқ кифоя. Уларнинг узун, ёйилган сочларини кўргандаёқ ҳеч қандай шубҳадан асар ҳам қолмайди бунга; бирининг сочи оппоқ, иккинчисининг олтинранг, сочлари асираларнинг ёноқ-бетларини ёпиб, эшакларнинг бўйнигача тушиб турибди. Лекин улардан бирини бусиз ҳам таниш қийин эмас. Унинг қадди-басти — гузаллик маъбудасидай. Ҳатто ҳайкалтарошнинг нигоҳи ҳам уни бенуқсон деб тан олган бўлурди. Бошқасига йиллар ўз муҳрини босган. Уни бурушиғу ажин босган, суяклари саналиб турибди, унга боқиш кўнгилсиз.

Ё тангрим! Бизон овчиси Карлос учун қандай томоша, қандай кўргулиг-а бу! Эшакка мингазилган сазойилар — онаси билан синглиси-ку! Овчи уларни дарҳол, бир боқишдаёқ таниди.

Башарти юрагини камон ўқи тешиб ўтган чоғида ҳам бундан қаттиқроқ азоб бермасди. Унинг лабларидан бўғиқ ингроқ — унинг изтироб чекаётганини ошкор этган бирдан-бир товуш учди. Кейин жим қолди. Узуқ-юлуқ, бесаранжом нафас олишигина унинг ҳаётлигидан далолат бериб турарди, холос. У қулагани, ҳушидан кетгани йўқ. У туйнук ёнидан чекинмади. Аввал-бошда оёғига зўр келмаслик учун кўкрагини қандоқ деворга тираб турган бўлса, ҳануз ўша ҳолатда, бамисоли ҳайкалдек қотиб турарди. Ҳаракатсиз қотган кўзлари бахти қаро аёлларга қадалганди.

Майдон ўртасида Робладо билан Вискаarra — ниҳоят тантана қилишяпти! Унинг туйнукдан қараб турганини кўришди. Йигит эса уларни кўрмасди: айти дақиқаларда овчи оламда улар борлигини унутган эди.

Ибодатхона минорасида қўнғироқ бонг уриб, тинди. Бу машъум маросим бошланганини эълон этгувчи ишора эди.

Ҳайдовчилар эшакларни девордан узоқлаштириб,

майдонга ёнламасига, олдинма-кетин тўхтадилар. Эндиликда аёлларнинг юзи қисман оломонга қараб қолган, бироқ паришон сочлари деярли тўсиб турарди. Иезуитлар яқинроқ келдилар. Ҳар қайсиси ўзига қурбон танлаб олди. Улар бандилар узра аллақандай тушуниб бўлмас сўзларни гўлдирадилар, сазойиларнинг бетларига қилиб қўлларидаги хочни силкидилар-да, бир қадам тисарилиб, орқада турган аблаҳларга нимадир деб шипшидилар.

Улар эса ишорага бажонидил жавоб қайтардилар. Дастасидан қулайроқ ушлаб, ҳар бири аёлларнинг яланғоч курагига қамчи тушира бошлади.

Қамчи бафуржа ҳамда бир маромда тушар, ҳар бир зарба санаб борилар эди. Ҳар битта зарба танада ўз изини қолдирарди. Аёллардан ёшининг терисида аниқроқ кўринарди бу излар; қаттиқроқ саваётганларидан эмас, балки оппоқ, мулойиму нозик терида қип-қизил тарам-тарам излар яққолроқ кўзга ташланаётган эди.

Ғалати томонини қарангки, аёллар фарёд уришмаяпти. Қиз буткул ғужанак бўлиб олган ва астагина пиқиллар, илло оғзидан бирон «вой» ёхуд «иҳ» деган ингроқ чиқмасди. Кампир бўлса ҳатто қилт этмас, ҳеч нима азоб чекаётганини ошкор қилмаётган эди.

Ҳар бирига ўн қамчи тушгач, майдон ўртасидан:
— Қизга етади, бас!— деган овоз эшитилди.

Оломон илиб кетди бу овозни, шунда кичик жабрдийдани саваш зиммасига юкланган жаллод қамчисини йиғиб, ортга чекинди. Иккинчиси эса ҳисоб токи йигирма бешга етгунича давом эттираверди ишини.

Кейин оркестр садоси янгради. Эшакларни майдон четидан етаклаб бориб, навбатдаги бурчакда тўхтатдилар.

Мусиқа тинди. Тақводор отахонлар яна ишга тушиб, хочларини силкидилар. Жаллодлар навбати етди, аммо бу гал улардан фақат биттасигина ўз вазифасини ижро этди. Оломон қизни савашдан халос этишларини талаб қилди, лекин у ҳануз ўшандай таҳқирловчи, шармандали ҳолатда эшак устида ўлтирар эди.

Кампирга тағин йигирма беш қамчи урдилар. Яна мусиқа янгради-ю, издиҳом майдоннинг учинчи бурчагига йўл олди. Даҳшатли қийноқ яна такрорланди. Сўнгра майдоннинг тўртинчи, охири бурчагига қараб

юрдилар. Жазо ўша ерда тугатилди: кампир юз қамчи еди — лозим бўлган зарбани беками-кўст олди.

* * *

Маросим ниҳоясига етди. Оломон бахти қаро жабрдийдаларни ўраб олди. Қўриқлаб турган қўриқчилар уларни ўз ҳолига ташлаб, жунаб кетган эдилар.

Одамларнинг юзида ачинишдан асар кўринмайди, ёлғиз қизиқсинишгина бор, холос. Кўзлари ўнгида содир бўлган мусибат ушбу қурама оломоннинг юрагида деярли раҳму шафқат, ҳамдардлик уйғотмаганди. Мутаассиблик раҳм-шафқатдан кучлироқдир. Жодугар билан шаккоқ қизга ким ҳам ғамхўрлик қилар, ҳамдардлик кўрсатарди дейсиз!

Шунга қарамай, уларга ғамхўрлик қиладиганлар топилди ҳар қалай. Арқонни қирқиб ташлаган, жафокашларнинг пешонасини силаган, шолрумолларини кифтларига ташлаган, мазкур унсиз — шунинг учун ҳам унсизки, беҳуш эди улар—қурбонларнинг лабини ҳўллаган қўллар топилди.

Шу ерда оддийгина арава ҳам турган экан. У қандай қилиб бу ерга келиб қолди, ҳеч ким билмасди ва ҳеч ким қизиқмади ҳам бунга. Қош қорайиб келмоқда эди, қизиқсинишу синчковликларини қондирган, бунинг устига очқаб қолган одамлар уй-уйларига тарқай бошладилар. Барваста аравакаш билан икки ҳинду қандайдир ёшгина қиз бошчилигида жабрдийдаларни аравага ётқиздилар; сўнг аравакаш ўз жойига чиқди-ю, арава жилди. Қиз билан унга ёрдамлашган ҳиндулар арава орқасидан йўлга тушдилар.

Улар шаҳар сарҳадини ортда қолдириб, бутазорларни кесиб ўтадиган айланма йўлдан юриб, Роситани илгари бир марта олиб келишган худди ўша овлоқ ранчога етиб бордилар. Қизни бу гал ҳам Хосефа олиб келганди.

Жафокашларни уйга олиб кирдилар. Тез орада улардан бири эндиликда азоб чекмай қўйганини пайқадилар. Қизни ҳушига келтирдилар ва у опасининг оламдан ўтганини кўрди.

Кампирнинг чаккаларини ишқаб, лабларини ҳўлладилар, қўлларини ишқаладилар — бари беҳуда эди.

Она қизининг жони-жаҳони билан урган фарёдини эшитмади. Ажал уни аллақачон ўзга оламга олиб кетган эди.

L X V Б О Б

Карлос бу даҳшатли манзарани камера туйнугидан кўриб турарди. Биз уни ғиқ этмай тикиларди дедик. Лекин бу унчалик тўғри эмасди. Ора-сира, қонга беланган қамчи жабрдийданинг курагига қаттиқроқ тушган пайтда унинг кўксидан интиҳосиз изтиробнинг белхтиёрий нфодаси бўлмиш бўғиқ ингроқ отилиб чиқарди.

Карлоснинг қиёфаси жисми-жаҳонини ўртаб-ёндираётган чидаб бўлмас оташ-алангани овозга қараганда яққолроқ ошкор этиб турарди. Туйнукка тасодифан ёхуд қизиқсиниб кўз ташлаб қолган кимсани унинг башараси даҳшатга соларди. Бет мушаклари тош қотган, ҳаракатсиз кўзлари гирдини қора ҳалқалар қуршаган, қимтилган лаблари ортида тишлари гирих ҳолатда, пешонасида йирик-йирик тер томчилари йилтирар эди. Гўё у ортиқ нафас олмай қўйган, рангида қатра қони қолмагандек эди. Нақ ажалнинг ўзгичасидек туси ўчгану мрамардан ясалгандек бирон туки қилт этмасди.

Карлос ўзи турган жойдан майдоннинг икки бурчинигина кўра оларди — мазкур жаҳаннамий қийноқ бошланган ер билан кейинги йигирма беш зарба саналган бурчагинигина. Кейин издиҳом кўринмай қолди, лекин Карлос, гарчи энди даҳшатли манзара кўзларига азоб бермаётган бўлса-да, енгил тортганини ҳис этмади. У қийноқ давом этаётганини билиб турарди.

У туйнукдан узоқлашди. Энди бир қарорга келган — ўз-ўзини ўлдиришга аҳд этганди у. Сабр косаси тўлган, ортиқ чидашга кучи қолмаган эди. Улим уни азоб-уқубатлардан халос этади. Улиши керак.

Аммо қандай ўлдиради ўзини?

Унинг қуроли бўлмаса, борди-ю, ҳатто бўлган чоғда ҳам бойлоқ қўллари билан барибир ундан фойдалана олмасди.

Айтмоқчи, бошини деворга уриб мажақласа-чи?

Хом ғишт деворга қараб туриб, бунда мақсадига ета олмаслигини англади у. Фақат ўзини ҳушдан кет-

казади-ю, 'аммо ўлдиролмайдди. Кейин эса даҳшатли ҳаётини давом эттиргани яна ҳушига келади.

Ўз-ўзини ўлдириш чора-йўриғини излаб кўзлари ила камерани алағлаб чиқди.

Шифтга кўндаланг тўсин ташланган экан, у шундай баландда эдики, унга энг новча одамгина ўзини оса олиши мумкин. Башарти қўллари буш-у, кейин, бу ердан арқон топилганида шундай қилган бўларди у. Дарвоқе, арқон бор, бор бўлгандаям етарли даражада узун: қўллари хом теридан тилинган тасма билан бир неча марта ўраб-чандиб ташланган.

Карлос тасма хусусида ўйлай бошлади. Унинг чўзилиб ва бўшашиб қолганини пайқаганида овчининг нақадар ҳайрон бўлганию қувонганини қўяверасиз асти! Қўлларидаги тепчилаган қайноқ тер хом терини ивितган-у, у мулойимлашиб, юмшаб қолган эди. Ўзи шоҳиди бўлган манзарадан ақлдан озиб қолаётган Карлос ўзини йўқотиб, ғайрихитиёрий равишда кескин ҳаракатлар қилиб тасмани бир неча дюйм чўзиб юборган эди. Ҳозир у тасмани бемалол ечса бўлишини дарҳол сезди-ю, йўқотадиган ҳеч нарсаси қолмаган одам сиеқиди бор кучию буткул ғайратини ишга солди. Агарда қўллари олдига қилиб боғлаганларида у тасмани тишлари билан ғажиб ташларди, аммо орқасига қилиб чандиб боғлаб ташлаган эдилар. У қўллари кучи борича тортиб-юлқилайверди.

Жаҳонда арқону тасмани усталик билан ишлатишда испанларга етадиган одам йўқ. Бундайин санъату маҳоратда ҳиндулар ҳам беллашолмайдди улар билан; ҳаттоки энг чапдаст денгизчи тугган тугун ҳам улар солган тугун олдида ип эшолмайдди. Оламда ҳеч ким бандини темир анжомларсиз уларчалик ишончлию пухта кишанбанд қилолмайди. Карлос шу тарзда пишиқ-пухта кишанланган эди.

Аммо, ғайритабиий кучга кириб, жон-жаҳди-ла бир ишга аҳд этган одамни тери тасма ёхуд канопадан эшилган арқонда бойлоқ тутиб бўлмайди. Бундай одамга етарлича фурсат берсангиз бас — у халос бўлиб олади. Шу боисдан ҳам Карлос ўзига фақат вақт зарурлиғини биларди.

Хом тери нам тортиб қолгани боис кўп вақт кетмади бунга. Орадан ўн дақиқа ўтмаёқ тасмалар билагини

дан сирғалиб тушди-ю, бандининг қўллари тушовдан бушадн-қўйди.

У бармоқлари билан тасманинг чигалини ёза бошлади. Кейин бир учида сиртмоқ ясади-да, харракка чиқиб, иккинчи учини тўсинга боғлади. Сўнг сиртмоқни бўйнидан ўтказиб, тананинг оғирлиги тушганида қанча узаёишини чамалаб кўрди-да, харракнинг четига туриб, сакрашга шайланди...

«Уларни яна бир марта кўраман-у, кейин у дунёга равона бўламан,— хаёлидан кечирди Карлос.— Шўрпешона қадрдонларим... охирги марта!»

У деярли туйнукнинг рўпарасида турган эди. Майдонга қараш учун хиёлгина эгилиши керак эди, шу сабабдан Карлос нича эгилди.

Улар кўринмади; бироқ оломон ҳозирда майдоннинг турмага тақалган бурчагига қараб турарди. Даҳшатли жазо ҳадемай охирлайди. Уларни бу ердан олиб ўтишаётганда кўриб қолар балки. У кута туради — бу умрининг охирги дақиқаси бўлади...

Ие, нима бўлди бу? Ё тангрим, бу...

У ҳавони чувиллатиб кесиб ўтган қамчи товушини эшитди. У оҳистагина инграшни эшитди ёки шундай тасаввур этди. Оломон жим, тиқ этган шовқин эшитилиб турарди унга.

«Ё марҳамати бениҳоя эгам, наҳотки оламда раҳмшафқат йўқ! Ё қаҳҳор, илтижомга қулоқ бергайсан!.. Ё қаҳҳор! Нега энди мен аҳмоқ ўз жонимга қасд қилмоқчи бўляпман ўзи? Ахир қўлларим бўшқу — наҳотки эшикни қўпориб, қулфни бузолмасам? Менга бор-йўғи уларнинг қуроли таҳдид қиляпти, холос, балким...»

Шу ўйда у бўйнидаги сиртмоқни чиқариб ташлаб, туйнукдан узоқлашишга чоғланган ҳам эдики, тўсатдан пешонасига, аллақандай оғир нарса гурс этиб урилиб, гарангситиб қўяёзди.

Олдинига Карлос бунн пастдан туриб бирорта аблаҳ отган тош бўлса керак деб ўйлади, аммо ғалати нарса харракка тушиб, бўғиқ жиринглаб кетди.

Карлос пастга қараб, ғира-ширагина ёруғда аллақандай чўзинчоқроқ нарсани кўрди. У шартта энгашиб, ипак шарфга ўралган, яхшилаб боғланган тугунчани олди.

Карлос шоша-пиша тугунчани ечиб, ёруққа тутди.

Унда олтин танга тўла хамён, пичоқ ва бир варақ бук-логлиқ қоғоз бор экан.

Карлос ҳаммасидан бурун қоғозни олди. Бу пайт қуёш ботиб, камера қоронғи бўлиб қолган, бироқ туйнук олди ҳали хат танийдиган даражада ёруғ эди. У қоғозни ёйиб, уни ўқий бошлади:

«Сизни эртага қатл этишлари керак. Сизни бу кеча шу ерда қолдиришадими ёки қалъага олиб кетишадими, била олмадим. Агарда турмада қолсангиз бари жойида бўлади. Сизга иккита қурол жўнатаяпман. Хоҳлаганингиздан ёки ҳар икковидан фойдаланарсиз. Деворни тешса бўлади. Ташқарида сизни содиқ одам кутади. Мабодо қалъага олиб кетадиган бўлишса, йўлда қочишга уриниб кўринг — булак имконият бўлмайди. Сизга — қатъият ва мардлик тимсолига — дадил ҳамда қатъиятли бўлишни маслаҳат бериб ўлтиришимнинг ҳожати йўқ. Хосефанинг ранчосига қочинг. У ерда эндиликда ҳам хавф-хатарларга, ҳам сизнинг озодлигингизга шерик бўлишга тайёр кимсани кўрасиз. Кўришгунча хайр! Қалбимнинг ардоқли дўсти, кўришгунча хайр!»

Имзо чекилмаган эди.

Аммо Карлосга бунинг кераги ҳам йўқ — хатни ким ёзганини жуда яхши билади у.

— Довюррак, қалби дарё қиз! — хатни қўйнига, овчи қўйлаги остига яшираётиб пичирлади у. — Сен учун яшаганим бўлсин! Бу фикр умидларимни қайта тирилтиради, курашмоққа янгитдан куч-қувват бахш этади менга. Мабодо ўлган чоғимда ҳам жаллод қўлидан топмайман ажалимни. Йўқ, асло, мана, қўлларим кишандан халос бўлди. Токи ҳаёт эканман, уларни ортиқ кишанлаб бўптилар! Фақат ўлимгина мени таслим бўлишга мажбур эта олади!

Банди харракка ўлтирди ва шоша-пиша ҳануз оёқларини қисиб тушовлаб турган тасмани еча бошлади. Кейин тағин сакраб турди-да, пичоқни маҳкам чангаллаганича хона бўйлаб юришга тушди, ҳар бир орқага бурилишида эшикка таҳдидли тикилиб қўярди у. У соқчиларни оралаб ёриб чиқишга қарор берганди, ёнига биринчи бўлиб кирган одамга ташланишга тайёр экани кўриниб турарди.

Хонада бир неча дақиқа давомида нақ катакдаги йўлбарс мисоли нари-бери бориб-келаверди.

Бир пайт хаёлига аллақандай янги фикр келиб, қўқ-

қисдан тўхтади. Ҳозиргина ташлаб юборган тасмаларни йнгиштириб олди-да, харракка чўкиб, тупиқларига бошқатдан, лекин чаптастлик ва устомонлик билан, бир юлқинишда ечилиб кетадиган қилиб ўради. Пичоқни қўйнига яширди, ҳамённи илгарироқ беркитганди ўша ерга. Сўнгра тўсиндаги хом тери тасмани тортиб олди-да, қўлини орқасига қилиб, билагига шундай ўрадики, гўёки мусти-мустаҳкам бойлоққа ўхшаб кетди. Ана шундан кейин харракка узанди. Юзини эшикка қаратиб, худди қаттиқ уйқуга кетгандай қимир этмай ётаверди у.

LXVI БОБ

Бизнинг ҳиссиётлар сўнигу шавқсиз, муҳаббат ғаразли ҳамда таъмагирона ўлкамизда бўлак мамлакатларда кучли эҳтирос, оташин севги туғдирадиган телбаларча ҳаракату мардона қилмишларни тушунолмаслик бир ёқда турсин, ҳаттоки бундай бўлишига ишонмаймиз.

Испан аёлларининг севгиси кўпинча шундай бир терану улуғворлик касб этадиким, ушбу туйғуга савдогарона манфаатпарастлик қоришиб кетадиган халқлар бунни билмайдилар ва ҳеч қачон ҳис этолмайдилар. Мазкур олижаноб ҳилқатлар вужудда у кўпинча чинакам эҳтиросга, бўлак жамики ҳис-туйғуларни комига тортиб, қалбни буткул эгаллаб оладиган бетийиқ, бемулоҳазаю теран майл-эҳтиросга айланади. Фарзандлик садоқати, ота хонадонига содиқлик, маънавий ҳамда ижтимоий бурч унинг қаршисида ортга чекинади. Севгимуҳаббат баридан ғолиб чиқади.

Каталина де Круссенинг қалбини оташдек ўртаётган муҳаббатнинг қудрати ана шундай эди.

Унинг муҳаббатига қарши қизлик меҳри бош кўтарди, тарозу палласининг бирига севги, иккинчисига жамоатчилик орасида тутган мавқелари, бойлик ва талай нарсалар қўйилди-ю, аммо муҳаббатнинг тоши оғир келди. Унга бўйин эгган Каталина бўлак бари нарсдан воз кечишга аҳд қилди.

Ярим кечага яқинлаб қолган, дон Амбросионинг уйи қоп-қоронғи ва осуда эди. Уй соҳиби йўқ эди. Вискарра билан Робладо қалъада базми жамшид қурмоқда эди, шу бонс жамоатнинг гуллари ўша ёққа таклиф этилганди. Меҳмонлар сирасида дон Амбросио ҳам бор эди.

Бу пайтда у қалъада қувнаб-яйраб улфатчилик қилаётганди.

Бу базм аёллар учун эмасди, ана шу сабабдан ҳам Каталина йўқ эди у ерда. Базми шошилинич, ҳеч қандай тайёргарликсиз ташкил этгандилар — ўтган кундаги воқеа-ҳодисаларни нишонламоқ керакку, ахир! Зобитлар билан руҳонийлар аъло кайфиятда эдилар ва зиёфатни қойилмақом қилиб ўтказиш учун кучларини аямадилар.

Шаҳарда осудалик ҳукм сурар, дон Амбросионинг хонадонида ҳам ҳаммаёқ осойиштадек туюларди. Соҳибини кутаётган дарвозабон эшик олдида хийла тутилиб қолган, лекин дарвозахонадаги курсида ўлтирар ва мудраб қолганди чоғи.

Дарвозабоннинг уйқуга кетиши қўл келадиганлар уни кузатишаётган эди.

Отхонанинг кенгбар эшиклари ланг очиқ. Очиқ эшикдан бировнинг қорасини илғаш мумкин эди. Бу отбоқар Андрес.

Отхонада чироқ йўқ. Бироқ, чироқ ёниб турган бўлса, бўлмаларда эгарлоғлиқ тўртта от тайёр турганини кўриш мумкин эди. Яна бир ғалати ҳолат: ҳамма отларнинг туёқлари яхшилаб дағал жун мато билан ўраб-боғлаб қўйилган эди. Албатта, бекорга қилинмаган бу иш!

Дарвоза олдидан отхона йўлаги кўринмайди. Лекин отбоқар баъзан олдинроққа ўтиб, муюлишдан ўгринча мўралаб қўйяпти. У дарвозабонни кузатаётган бўлиши керак. У пича қулоқ солиб туради-да, кейин олдинги жойига, отхонанинг қоронғи йўлагига қайтади.

Хоналардан бири — сеньорита хобхонасининг эшиги дарпардаси орасидан ингичкагина ёруғлик тушиб турибди. Аммо мана, иттифоқо чироқ сўнди. Ҳадемай эшик шовқинсиз очилди-ю, аёл киши зипиллаганча ташқари чиқди. Девор ташлаб турган кўлага панасида отхона томонга юрди у, очиқ эшиклар олдида яқинлаб, паст товуш билан чақирди:

— Андрес!

— Шу ердан, сеньорита, — дея жавоб қилди отбоқар ёруғ томон бир одим ташлаб.

— Хаммаси эгарлоғлиқми?

— Ҳа, сеньорита.

— Туёқларига латта ҳам ўралганми?

— Ҳаммасини, сеньорита.

— Анавини нима қилдик?— сеньорита дарвоза томонга ишора қиларкан, ташвишли оҳангда давом эттирди сўзини.— То отам қайтмагунича кетмайди у, унгача эса фурсат ўтиб бўлади. Эй биби Марям-а!

— Балким дарвозабонни ҳам анави қизга ўхшаб гумдон қилиш керакдир? Бемалол эплаштираман уни.

— Ҳа, Висенсами... Ундан қандай қутулдинг ўзи?

— Қўл-оёғини боғлаб, оғзига латта тикдим-у, боғда, қоровул уйчасига қамаб қўйдим. Ишонаверинг, сеньорита, то биров топмагунича у ердан сираям чиқолмайди. Ундан чўчимасаям бўлади. Бир оғиз айтсангиз бас — дарвозабонни ҳам худди ўшандоқ гумдон қиламан.

— Йўқ, йўқ, йўқ! Унда отамга дарвозани ким очади? Йўқ, бу ярамайди.— Қиз ўйга толди.— У иттифоқо турмадан қутулиб чиқса-ю, отлар етиб боролмаса-чи? Уни пайқаб қолиб, орқасидан қувишса, тутиб олишса-я.. У ердан қутулиб чиқади, имоним комил, чиқади! Қанча вақт керак бўларкин унга? Эҳтимол, озроққинадир. У бойлоқ арқонни тез ечади. Биламан, эплайди буни, бир марта ўзи гапириб берганди... Ё биби Марям! Балки у аллақачон чиқиб олган ва мени кутаётгандир! Шошилиш керак!.. Э-ҳа, дарвозабон бор-а.. А-ҳа!

У қичқириб юбораёзди ва шахд-ла Андресга юзланди. Афтидан, миясига қандайдир фикр келганди.

— Андрес! Меҳрибон Андрес, қулоқ сол! Ҳаммасини эплаймиз.

— Кулоғим сизда, сеньорита.

— Мана мундоқ. Сен отларни орқадан, боғдан олиб чиқасан. Уларни анҳордан ўтказа оласанми?

— Қийин жойи йўқ, буни сеньорита.

— Жуда соз! Боғдан олиб ўт уларни... Шошма!

У боққа олиб чиқадиган узундан-узун хиёбон-йўлкага назар ташлади; хиёбон-йўлка нақ дарвозанинг шундоққина рўпарасидан чўзилиб кетган ва у ердан кўриниб турарди. Агар дарвозабон ухламаётган бўлса, қоронғи кечалигига қарамай, йўлкадан тўртта отни етаклаб кетаётганларини албатта кўради.

Илло Қаталина яна жонланиб қолди — бу тўсиқни қандай бартараф этиш чорасини ўйлаб топган эди шекилли.

— Гап бундай, Андрес. Дарвоза олдига боргин-да,

дарвозабон ухлаяптими-йўқми, қарагин. Дадил бора-вер. Агар ухлаётган бўлса, жуда яхши. Мабодо уйғоқ бўлса, гапга соласан уни. Ташқарига чиқиб келай, деб илтимос қил. Ўзини ҳам бир амаллаб ташқарига чақириб, ўшоқда чалғитиб тур. Отларни ўзим олиб ўтаман.

Бу режа яроқли эди, шу тариқа отбоқар дарвозабон билан дипломатик учрашувга ҳозирланди.

— Бир оздан кейин менинг орқамдан боққа ўтасан. Эҳтиёт бўл, хато қилиб қўйма тагин, Андрес! Мукофотни икки баравар ошираман. Сен мен билан кетасан-ку, ахир, нимадан ҳам қўрқасан?

— Сеньорита, мен сизга айтсам, жонимниям аямайман сиз учун?

Олтиннинг қудрати беқиёс-да. Олтиннинг кучи матонатли Андресни соҳибасининг кўнглини олиш учунгина эски дўстликка хиёнат қилишга мажбур этди. Олтинни деб у дарвозабонни ўлтирган жойидаёқ бўғиб ўлдиришга тайёр эди.

Униси эса ухламаётган экан; испан дарвозабонлар одатича мудраб ўтирган экан, холос. Андрес ўзининг ҳужумкор режасини ишга солди — дарвозабонни сизгара билан меҳмон қилди, бир неча дақиқадан сўнг эса ош-наси ҳеч қандай шубҳага бормаи, у билан биргалашиб ташқарига чиқди, икковлари ўша ерда чека бошлашди.

Уларнинг гўнғир-гўнғир овозидан Каталина ҳамма иш жойида эканини англади. У қоп-қоронғи отхонага кириб, зинғиллаганча отлардан бирининг ёнига борди-да, уни жиловидан ушлаб, ташқарига олиб чиқди. Қиз уни тезгина боққа етаклаб бориб, дарахтга боғлади. Кейин орқасига қайтиб, отхонадан иккинчи ва учинчи отни олиб чиқди; мана ниҳоят тўртинчиси ҳам боғдаги дарахтга боғланди.

Каталина яна ҳовлига қайтди. У отхона эшигини бекитди, ўз хонаси эшигини қулфлади-да, дарвоза томонга кўз ташлаб олиб, кетига, боғ ичкарасига физиллади. Ўз отига минишию иккинчи отни жиловидан тутганча Андресни кутишгина қолганди, холос.

У кўп кутмади. Андрес вақтни аниқ ҳисобга олганди. Бир неча дақиқадан кейин боғда пайдо бўлди у; дарчани беркитди-ю, соҳибаси ёнига етиб келди.

Уларнинг ҳийласи ғоятда муваффақиятли чиқди. Дарвозабон ҳеч қандай шубҳага бормади. Андрес унга

хайрли тун тилаб, энди ётиб ухлайман деб гудраниб қўйди.

Ана энди дон Амбросио хоҳлаган пайтида қайтиши мумкин. Одатдагидек у ўз хобхонасига ўтади тўғри. Кимдан жудо бўлганини эрта билангина билади.

Отларнинг туёғига ўралган матоларни олиб ташлади-ю, ортиқча шовқин кўтармай тўрттала отни анҳордан ўтказишди. Нариги қирғоққа ўтгач, суворилар аввалига қояларга қараб йўл солишди, аммо тез орада буталар оралаб сойликка олиб борадиган сўқмоққа бурилишди. Бу йўл уларни Хосефанинг ранчасига элтарди.

LXVII БОБ

Карлос харракда ётган жойида деворнинг тешиги осонроқ ерини излаб ўз зиндонхонасини диққат-ла кузатди. Деворлар хом гиштдан эканини, гарчи улар оддий жинояткорни сақлаш учун етарлича мустаҳкам бўлса-да, ишбоп қуроли бор, халос бўлишга қатъий аҳд ётган одам деворни кўпдаям азият чекмай теша олиши мумкин эканини биларди энди. Бунга икки соат кифоя. Аммо бировга сездирмай ва ҳеч ким халал бермасдан қандай қилиб икки соат ишласа бўлади? Мана нима хусусида бош қотиришига тўғри келди тутқуннинг.

Фақат бир нарса равшан: ишни ҳозир бошлаб бўлмайди, қоровуллар алмашичини кутиш керак.

Карлос тўғри ўйлаганди. То қоровуллар алмашмагунича у олдингидек худди қўл-оёғи чандиб боғланганга ўхшаб харракда чўзилиб ётаверди. У соқчилар навбат алмашаётиб ўзини топширишларини, янгилари эса қабул қилиб олишаркан, банди камерадалигини текшириб кўришга мажбур эканларини, бинобарин, ичкарига мўралаб қарашлари лозимлигини биларди. Унинг ҳисобича қоровуллар алмашилишини кутиш кўпга бормаслиги керак — янги соқчилар ҳадемай келиб қолишади.

Карлосни биргина нарса хавотирга солаётганди: уни кечаси турмада қолдиришармикин ёки бежавотир бўлсин учун яна қалъага қайтариб олиб кетишармикин? Мабодо уёққа олиб кетадиган бўлишса, унда Каталиа маслаҳат берганидек таваккал қилиб йўлакай қочибга уриниб кўришдан бўлак чора қолмайди. Қалъа авахта-

сида у тош деворлар исканжасида қолади. Унақанги деворни тешишни эса хаёлига келтирмаса ҳам бўлади.

Албатта, уни ушаёққа олиб кетишлари мумкин. Илло, очигини айтганда, улар нима сабабдан тутқунни қўл-ёғи чандиб боғланган, қуролсиз-несиз, яна-тагич сергак соқчилар қўриқлаб турган бир ҳолда турмадан қочиб кетади деб қўрқишлари керак? Йўқ. Унинг қочиб кетиши ҳеч қайсиларининг хаёлига ҳам келмайди. Ниҳоят, уни бу кеча шу ерда, турмада қолдирганлари хийла қулайроқ. Уни қатл этишлари лозим бўлган майдон шундоқ ёнгинасида, қатл этиш шак-шубҳасиз, эртага тайин қилинган. Анави ёқда, худди турма рўпарасида аллақачон дор қуриб ҳам қўйилибди.

Қисман ана шундай мулоҳазада, қисман эса чандон бора кўнгилпроқ ишлар билан банд бўлганлари сабабдан зобитлар дарҳақиқат уни шаҳар қамоқхонасида қолдиришга қарор бергандилар-у, лекин Карлос бундан беҳабар эди.

Айтмоқчи, у ҳаммасига тайёр эди. Борди-ю, уни қалъага қайтариб олиб кетадиган бўлсалар, дастлабки қулай фурсат келиши биланоқ, жонини тикса ҳамки, қочишга уриниб кўради. Борди-ю, уни турмада қолдирсалар, у янги соқчилар келгунича кутади, соқчилар узоқлашиши билан эса деворни тешишни бошлаб юборади. Айтайлик, уни иш устида кўриб қолдилар — нима ҳам қиларди, унда фақат бир йўли қолади: у соқчиларга ташланиб, улар сафини ёриб чиқиб кетади.

Унинг қочиши ишончсиз, бесамара режа эмасди. Жасур, аҳдида собит, бунинг устига пичоқ билан қуролланган, ёлғиз ўлимгина ниятидан қайтариб қола оладиган одамни қамоқда тутиб туриш мутлақо осон эмас. Бундай одам, ҳаттоки ғанимлар бўлуғи қуршовида бўлган тақдирида ҳам баъзан қутулиб чиқиб кетади. Карлоснинг эса муваффақиятга эришишдан умиди хийла кўпроқ эди. Ахир у кучли ва довюрак, ғанимларидан кўпчилиги унинг олдида ночору нотавон бир нарса. Жасоратда ҳам ажралиб турадиган жойлари йўқ. Карлос улар ўзини қўллари ечиқ ва қуроли борлигини кўрганлари заҳотиёқ тирақайлаб тўзиб кетишларини биларди. Лекин бир нарсадан, карабинлардан ўққа тутишларидан эҳтиёт бўлиши керак, албатта. Бироқ, бундай ҳолда ҳам у омади панд бермаслигидан умидвор эди, зотан аскарлар мерганлик бобида ҳам мақтана олмасдилар;

устига-устак, зимистон тун уни уз ҳимоясига олади.

У жамики озодликка чиқиш илож-имкониятларини хаёлан чўтлаганича, харракда бир соатдан ортиқроқ ётди. Унинг хаёлини майдондан эшитилган шовқин бўлиб юборди. Бу турмага яқинлаб келган янги аскарлар тудасининг шовқини эди.

Карлоснинг юраги безовта тепа кетди. Уни қалъага олиб кетгани келишмадимикан? Шундоқ бўлиши ҳеч гап эмас-да. У изтиробга солгувчи тоқатсизлик ила ҳар битта сўзга қулоқ тутганча кута бошлади.

Бу навбат алмашгани келган соқчилар эканини билганида нақ терисига сиғмай қувнаб кетди. Уларнинг гап-сўзларидан ўзини кечаси билан турмада сақлаш буюрилганини билиб олди. Айнан шуни эшитишни истоганди у.

Ҳеч қанча ўтмай эшикни очиб, бир неча улан кириб келди. Бирининг қулида фонус бор эди; унинг ёруғида Карлосни кўздан кечиришди, айна чоғда ҳақоратлаб-масхаралаш бобида ҳам зиқналик қилишмади десаангиз. Улар тутқуннинг пишиқ-пухта боғлоглиқ эканини кўришди. Кейин уни ёлғиз қолдириб, чиқиб кетишди. Турган гап, эшикни яна қулфлашди, камера зим-зиё бўлди-қолди.

Карлос токи аскарлар нари кетишганига ишонч ҳосил қилгунича қимир этмай ётаверди. У эшик ортида янги келган соқчилар қандай жойлашишаётганини эшитиб-пайқаб турди, сўнг бошқаларнинг ғўнғир-ғўнғири узоқлашиб бориб тинди.

Ана энди ишга тушса бўлади. У қул-оёғидаги тасмаларни зудлик билан тушириб ташлаб, қўйнига яширган пичоқни чиқарди-да, деворни тешишга киришди.

У эшикдан энг наридаги жойни, камеранинг орқа деворини танлаган эди. У бу ердан қаёққа чиқишини билмасди-ю, лекин унинг орқасидан текислик бошланишини тахмин қилиши мумкин эди.

Бу қалъа қамоқхонаси эмас, балки шаҳар маъмурияти майда-чўйда жиноятчиларни қамайдиган оддий бино эди. Янаям соз-да, деворни тезроқ тешаман деб умид қилса бўлади.

Девор пичоқ билан унғайгина ўйила бошлади. Ахир бу бор-йўғи сомонли лойдан қуйилган хом ғиштдангина иборат эди-да, ғишт йигирма дюймдан кам қалинликда терилмаганига қарамай, Карлос бир соат ичида

бемалол чиқиб кетадиган туйнук очишга муваффақ бўлди. У балки, буни янада тезроқ бажариши мумкин эди-ю, бироқ эҳтиёткорлик билан, иложи борича шовқин-шарпасиз ишлашига тўғри келди. Икки марта соқчилар камерага кирмоқчи бўлгандай туюлди назарида, икки гал ҳам у ирғиб туриб, соқчиларга ташланишга шайланди. Бахтига тасавури алдаганди уни — камерага ҳеч ким кирмади. Мана, бари тайёр, банди туйнукдан ичкарига ёпирилган муздек ҳавони туйиб ҳузурланди.

У ишни бас қилиб, қулоқ солди. Турманинг бу тарафида тиқ этган товуш эшитилмасди. Чор-атроф зимистон ҳамда осуда эди. Карлос туйнукдан бошини чиқариб, тевааракка аланглади. Тун зимистон бўлишига қарамай, у шундоққина девор тагида ўсган кактуслар билан бурганларни илгади. Омадни қаранг — қимир этган жон зоти кўринмайди!

Карлос туйнукни кенгайтириб, қўлида пичоқ билан ташқарига ўрмалаб чиқди. Эҳтиётлик билан, шарпа чиқармайгина оёққа босди. Гуркираб ўсган, баланд бурган, кактус ва сабурдан ташқари ҳеч нима кўринмасди. У тураржойлардан олисда, яйловда турарди. У озодликда эди!

Карлос ўт-ўланлар панасида текисликка қараб бикииб бораверди. Бир пайт қаршисида ер остидан чиққандек кимнингдир қораси пайдо бўлди-ю, оҳистагина товушда унинг исмини айтди. У Хосефани таниди. Улар икки оғизгина гаплашиб олишди-ю, қиз астагина олга юрди; Карлос унга эргашди.

Улар буталар орасига кириб боришди ва ёлғизоёқ сўқмоқ бўйлаб шаҳарни айланиб ўтишди. Хосефанинг ранчоси шаҳарнинг қарама-қарши томондаги чеккасида эди; ярим соатдан кейин улар ана ўша оддийгина бошпанага кириб боришди.

Яна бир нафас ўтди-ю, Карлос онасининг жонсиз майити ёнида тиз чўкди.

Онасининг ўлими унинг учун кутилмаган ҳол эмасди. Оқибати шундай бўлишини олдиндан билиб, кўра олганди. Эрталаб кўрганларидан асаб торлари узилиб кетадиган даражада таранг тортилиб бўлганди аллақачон. Шунақаси ҳам бўлади, бир қайғу иккинчисини босиб кетиб, уни қалбдан ситиб чиқаради. Аммо Карлос чеккан изтироблар ундан кўра улканроғи олдида хира

торта олмасди. Қайғу-ғам уни шунчалар шафқатсизона жароҳатлаган эдиким, гүё у тош қотиб қолганди.

Унинг дарду аламини енгиллатишни истовчи хилқат — унинг фидокор халоскори эндиликда ёнида эди.

Аммо, ҳозир ғам-қайғуга бериладиган пайт эмасди. Карлос онасининг муз лабларидан ўпиб, синглиси билан севгилисини шошилишч қучди.

— Отлар борми!— сўради у.

— Шу ерда улар, дарахтлар орқасида.

— Кетдик! Бирор дақиқани кеткизмай, бу ердан жўнаш керак. Қани кетдик!

У шундай деб онасининг жасадини серапега ўраб, кўтарди-ю, уйдан чиқди.

Ҳамроҳлари эса уни отлар яшириб қўйилган ерда кутиб туришар эди.

Карлос отлар бешталигини кўрди. У ўзининг қорабайирини кўрганда кўзлари қуёончдан чақнаб кетди. Уни Антонио ахтариб топганди. Унинг ўзи ҳам шу ерда эди.

Мана, ҳаммалари отда: Росита ва Каталина, Антонио ва отбоқар Андрес. Карлоснинг ўзи эса онасининг майити билан вафодор тулпориди.

— Водийдан қўйилаб борамизми, хўжайин?— деб сўради Антонио.

Карлос ўй сурганча пича жим турди.

— Йўқ,— деди у ниҳоят.— Уша йўлдан қуриб келишади бизни. Қиз ўлган қоя ёнидан ўтамиз. Бизни қоятошлар оралаб тепага чиқиб кетишимиз уларнинг хаёлигаям келмайди. Сен, Антонио, бутазорлар орқали йўл бошлаб борасан — ўша сўқмоқни сен ҳаммадан яхшироқ биласан. Олға!

Шундай қилиб суворилар йўлга тушдилар. Тез орада улар шаҳар сарҳадидан чиқиб, қояга элтадиган иланг-биланг сўқмоқдан боравердилар. Отлар буталар оралаб олдинма-кейин тизилишиб борарди; суворилар чурқ этмас, ҳатто бир-бирлари билан пичирлашиб ҳам гаплашмас эдилар.

Орадан бирон соат ўтиб улар қоялар оралиғидаги тик ўрга етиб бордилар-у, ҳаялламай, ҳамон боягиндай жимгина, турнақатер тизилганча, токи тепага чиқиб олгунларига қадар юқорилайвердилар. Карлос Антониога бошқаларни ясситоққа олиб чиқишни буюрди, ўзи эса орқада қолди.

Улар узоқлашгач, Карлос оти бошини буриб, қоя томон йўрттириб кетди. Қоянинг нақ раҳида тўхтатди отини — қаршисида Сан-Ильдефонсо худди кафтидадек ястаниб ётарди. Тун қоронғусида водий ўчган вулқоннинг ҳайбатли оғзига ўхшаб кетарди. Пастда, шаҳар ва қалъада, гўёки ҳали совиб улгурмаган лаванинг сўнгги чақновидай, чироқлар милтилларди.

От қилт этмай турибди. Чавандоз қўлидаги онаси қасадини баландроқ кўтариб, худди ўша чироқларнинг ҳам кўришини истагандек, онасининг қонсиз юзини очди.

— Онажон! Онажонгинам! — қайғу-аламдан бугилган овоз билан бўзлади у. — Оҳ қани энди бир нафасгагина, ақалли бир сониягагина бу кўзлар кўрсаю бу қулоқлар эшита олса-я, унда сен менинг қасамёдимнинг шоҳиди бўлар эдинг-а! Қасамёд этаман, сенинг қасосингни оламан! Ана шу дамдан эътиборан ўзимнинг бутун куч-қувватимни, бутун вақтимни, қалбиму жисмимни қасос йўлига тикаман. Ўч оламан... Йўқ, бу сўз камлик қилади! Бу интиқом эмас, балки адолатни қарор топтирмақ, бу жинояткорларни, олам бино бўлгандан бўёнгги энг разилу энг қабиҳ қотилларни жазосини бермоқликдир! Улар жазодан қочиб қутулолмайдилар. Онаминг руҳи поки, эшит менинг лафзимни! Улар жазодан қочиб қутулолмайдилар! Сенинг ўлимнинг учун қасос оламан, сенга етказган азоб-уқубатларига яраша жазоларини оладилар мендан! Интиқом соати яқин — сизлар ўйлагандан кўра яқинроқ. Мен кетяпман, аммо албатта қайтаман! Озроққина сабр қилсаларинг — мени кўрасизлар яна. Ҳа, шундоқ! Бизон овчиси Карлос билан бетма-бет турасизлар ҳали!

Карлос ўнг қўлини баланд кўтариб, олға томон дагдағали мушт дўлайди, шунда чехраси қасоскорона тантана ўти учқунидан аланга олгандай бўлди.

Оти ҳам, худди ўша майлу иштиёқ таъсиридадек, ғайритабiiй равишда қаттиқ кишнаб юборди, кейин эгасининг ишорасига биноан шартта бурилиб, қоядан нарига қараб чопа кетди.

ЛХVIII БОБ

Майдондаги шармандали маросимни охиригача томоша қилган Вискарра билан Робладо қалъага қайтишди.

Юқорида айтиб ўтганимиздек, улар ўзлари ёлғиз қайтишмади — шаҳарнинг атоқлию номдор кишилари: кашаши, незуйт отахонларни, алькальд ва бошқаларни зиёфатга таклиф этишди. Зобитларни Карлоснинг қўлга тушиши билан табриклашарди, шу боис бу воқеани нишонлаш лозим бўлиб қолди. Комендант билан унинг капитани — тантананинг бош сабабчиси, бир вақтихушлик қилишга қарор беришди. Ана шунинг учун ҳам қалъада базми жамшид қурмоқда эдилар.

Карлосни қалъа авахтахонасига олиб келиб ўлтириш керакмикин? Келинг, бир кеча шаҳар турмасида ёта қолсин. Нимадан қўрқишади? Қочиб кетолмас-ку, ахир! Қўл-оёғи чандиб боғланган ва ишончли соқчилар қўриқлашаётган бўлса.

Эртага кун битади. Эртага ғанимлари унинг қандай ўлишини мамнуният, хурсандчилик билан кўришади. Эртага комендант билан Робладо интиқом сурурини суришади.

Дарвоқе, Вискарра бугуноқ зафар завқини сурмоқда эди. Гарчи майдонда: «Етар, бас!» деб қичқирган унинг ўзи бўлса ҳамки, Карлоснинг синглисидан ўзига нисбатан кўрсатган нафрати учун қасдини олганди. Раҳми келгани, ачинганидан ўртага тушмаганди у. Асло, унинг оғзидан чиққан ўша сўз мутлақо инсонпарварлик садоси эмасди.

Вискарранинг нияти маккорона ҳамда қабиҳ эди. Эртага Роситанинг акасини йўлидан гумдон қилишади, ана ундан кейин...

Аммо-лекин на шароб, на мусиқа, на қаҳқаҳаю ҳазил-мутойибалар комендант фикрини аччиқ бир ўйдан чалғита олди. Негаки девордаги кўзгу унинг хунуги чиққан башарасини такрор ва такрор акс эттириб турган эди-да, ахир. Ҳа, Вискарранинг ғалабаси қимматга тушди-ю, тантанаси эса аянчли эди.

Робладо — у ҳузур қилмоқда, беҳад шод. Меҳмонлар орасида дон Амбросио ҳам бор, улар ёнма-ён ўлтиришибди.

Май кўн эгасини сўзамол қилиб юборганди. У илтифотли ҳамда ваъдага сахий, қулфи дили очилиб кетган эди. Айтишича, қизи ўзининг енгилтак қилмишидан пушаймон эмиш, ҳозир Карлоснинг қисматига бефарқ қарармиш. Робладо умидини узмасин эмиш.

Эҳтимол дон Амбросионинг ўз сўзларига ишониши-

га асоси бордир. Балки Каталина ўзининг мардона, қалтис ниятини яхшироқ яшириш учун шу қабилда бирон нима дегандир.

Шаробу май дарё мисоли қуйилаётган, коментдантинг меҳмонлари яйраб-эшилиб кайфу сафо қилаётган эдилар. Қўшиқ куйлашар, қадаҳ сўзлари айтишар ва ватанпарварона нутқлар ирод этишарди. Вақт ярим кечадан оғса ҳамки, вақтичоғлик тугамаётган эди.

Базм авжга минган паллада кимдир тутқунни олиб келишни таклиф этиб қолди. Ушбу бемаъни эрмак маст-аласт улфатларга ёқиб тушди. Кўпларнинг шунчалик оғизга тушиб, машхур бўлиб кетган бизон овчисини яқиндан кўргилари келиб қолди.

Таклифни бир неча киши баравар ёқлади-ю, комендант рози бўлди. Хўш, меҳмонларни нимагаям хушнуд қилмасин? Бунинг устига десангиз, Вискарранинг ўзига ҳам, шунингдек Робладога ҳам, ёққанди бу фикр. Ҳозир бадбин душманларини яна бир карра масхара-лаб, таҳқирлашишади-да.

Хуллас, сержант Хомесни чақириб, уни Карлосни олиб келгани жўнатишди-ю, базм давом этаверди.

Бироқ, базм сира кутмаганда, жуда тез тугади. Хонага сержант Хомес отилиб кириб, баралла эълон қилди:

— Банди ғойиб бўйти!

Мабодо ўрталарида тўп ўқи ёрилган чоғида ҳам меҳмонлар бунчалик тумтарақай тўзиб кетмаган бўлармидилар. Мутлақо ақл бовар қилмайдиган тўс-туполон бошланди; ҳамма столу стулларни ағдариб-тўнтарганча ўрнидан туриб кетди; қадаҳу шишалар хона саҳнига отилиб тушди.

Бир дақиқа орасида хонада пашша ҳам қолмади. Баъзилар бола-чақалари омон-эсон эканини билгани уйига югурди, бошқалари сержантнинг гапи ростлигига ўз кўзлари билан кўриб ишонч ҳосил қилгани турмага қараб чопди.

Вискарра билан Робладолар ақлдан озишларига бир баҳя қолди. Улар ғазабдан қутуриб, оламда бор нарсага лаънат ёғдиришарди. Бутун гарнизонга шу заҳотиёқ қуролланиш буюрилди.

Бир неча дақиқа ичида қалъадаги деярли бари аскар отга миниб, шаҳарга қараб елдириб кетди.

Турмани қуршаб олдилар.

Мана тутқун қочиб қолган туйнук. Тасмаларни қандай ечдийкин? Қим қурол бердийкин унга?

Соқчиларни суроқ қилиб саваладилар, савалаб туриб суроқ қилдилар, бироқ улардан ҳеч нимани билолмадилар. Соқчилар эса Хомес аскарлар билан бандини олиб кетгани келганидагина унинг қочиб кетганини билган эдилар-да, ахир.

Қочқинни излагани ҳамма томонга кичикроқ-кичикроқ бўлуклар жўнатилди, аммо улар кечаси нимаям қила оларди? Барча уйларни тинтиб чиқишди, лекин бундан нима фойда? Овчининг шаҳарда қолиши даргумон-ов. Турган гап, у яна Муаззам Текисликнинг аллақаерига от солиб кетган, вассалом!

Тунги излашлар ҳеч нима бермади; водийнинг этагига жўнатилган бўлук Карлоснинг ёки ақалли унинг сингиси билан онасининг ҳеч қандай изини тополмай, тонгда қайтди. Шаккок кампирнинг шу кеча жони узилганини шаҳардагилар аллақачон билган эдилар, лекин унинг жасади қаёққа ғойиб бўлди экан? Тағни унга жон битиб, бандига қочишда кўмаклашган бўлса-я? Нима ҳам дердик, жудаям бўлиши мумкин-да!

Эрталаб, хиёл кечроқ, мазкур жумбоқнамо ҳодиса бир оз ойдинлашгандек бўлди. Кечаси қизини безовта қилмай хобхонасига кириб кетган дон Амбросио уни нонушта устида кута бошлади. Нега энди у ўз вақтида чиқмаяпти? Отанинг жаҳли чиқди, кейин юрагига гулгула тушди ва охири унга одам юборди. Аммо ётоғи эшигини тақиллатишганда ичкаридан жавоб бўлмади.

Эшикни бузиб, ичкари киришди — ия, буёғи қандоқ бўлди? Хонада ҳеч ким йўқ, ўриннинг таҳи бузилмаган: сеньорита қочибди!

Топиш керак уни! Отбоқар қаерда? Отлар қани? Уни қувиб етиб, қайтарилсин!

Отхонага югуришди, эшигини очишди. Отбоқар йўқ, отлар йўқ — улар ҳам ғойиб бўлишибди!

Ё азиз-анбиёлар! Қандай кўргилик! Дон Амбросионинг қизи жиноятчига қочишда ёрдам бергани етмагандек, ўзиям қочибди, ҳозир бирга экан улар! «Кўз кўриб, қулоқ эшитмаган гап-а бу!» — дейишарди барча бир оғиздан.

Ниҳоят изларини топдилар. Йирик уланлар бўлуги, улар қаторида отлиқ ведий аҳли ана шу из бўйлаб йўлга тушди. От туёқлари изи ясситоғликка, сўнг Пе-

кос сари элтди. Қочқинлар дарёни кечиб ўтгандилар. Уёғига из йўқолди. Суворилар бўлиниб, қуруқ шағал бўйлаб ҳар томонга йўл олдилар, эндиликда изларни илғашнинг иложи қолмаган эди.

Бир неча кунлик бесамара излашлардан кейин таъқибчилар қайтиб келдилар. Янги бўлук жўнатилди, аммо буниси ҳам қуруқ қайтди. Карлос паноҳ топиши мумкин бўлган ҳар бир хилват бурчак: эски ранчо, Пекос ёқасидаги дарахтзорлару ўрмончаларни тит-пит қилдилар, ҳатто дарага ҳам бостириб бориб, ғорни тинтишди — қочқин билан ҳамроҳларининг ҳеч ерда ҳеч қандай белги-аломатидан нишона йўқ! Улар Сан-Ильдефонсонни ташлаб кетишган деб тахмин қилишгина қолган эди.

Мазкур тахмин тасдиқланди-ю, барча ниҳоят турли фаразу тахминларга бориб боши қотишдан қутулди. Дўстона кайфиятдаги команчилар водийга йўлакай тушиб ўтарканлар, Карлосни ясситоғликда учратганларини гапириб бердилар. Унинг ёнида икки аёл ва озуқа ортилган хачирларни ҳайдаб бораётган бир неча хизматкор бор экан. Бизон овчиси команчиларга, олис сафарга — Муаззам Текисликларнинг нариги томонига отландим, дебди.

Бу маълумот аниқ бўлиб, ҳеч ким бунга шубҳа қилмади. Карлос ўзининг америкаликлар мамлакатига кетиш ниятида эканини бот-бот тилга олиб турарди. У худди ўшаёққа жўнаган, ҳаммасидан аниғи, ўшоқда, Миссисиппи соҳилларига қўш ташласа керак. Энди унга ҳеч ким қувиб етолмайди. Уни бу ерда ортиқ кўрмайдилар — қачон бўлмасин унинг Янги Мексиканинг кенту қишлоқларида яна пайдо бўлиши дарғумон.

* * *

Ойлар ўтди. Карлос билан унинг яқинлари ҳақда команчилар гапириб берганидан бошқа ҳеч гап эшитилмади. Гарчи на уни, на у билан бирга кетганларни унутмаган бўлсалар-да, улар тўғрисида гапирмай қўйишди. Сан-Ильдефонсо аҳлининг бошқа ишлари ҳам бор эди, охирги кезларда шунчалик муҳим воқеалар содир бўлдиким, улар машҳур қочқин хусусидаги хотираларни деярли бир чеккага суриб қўйдилар.

Кентга ютлар босқини таҳдид солиб турарди. Бундан қочиб қутулишнинг иложи йўқдай эди, аммо шунда ютларга, ўз навбатида, бошқа уришқоқ қабила ҳужум қилиб, уларни тор-мор келтирди. Ютларнинг мағлубияти водийга қилинадиган бу йилги босқиннинг олдини олди-ю, лекин хавф кейинроққа сурилди, холос.

Бундан кейин эса Сан-Ильдефонсо узра яна бир хатар таҳлика сола бошлади: бу ердаги аҳолининг аксар қисмини ташкил этган тинч ҳиндулар — тагнослар исёнини кутишди. Уларнинг талай қишлоқлардаги биродарлари қўзғалиб, испан асоратини ағдариб ташлашга муваффақ бўлгандилар. Шундоқ экан, Сан-Ильдефонсодаги тагносларни ҳам қўзғолонни, озодликни орзу қилмайдилар деб бўлармиди?

Аммо-лекин маъмурларнинг тадбиркорликлари тўғрисида Сан-Ильдефонсодаги фитна тағ-заминидаёқ бўлиб қўйилди. Етакчиларини қўлга олиб, ҳафсала билан сўроқ қилдилар, жазога ҳукм этиб, отиб ташладилар. Қатл этилганларнинг каллахомларини уларнинг итоат этишдан ўзга чоралари қолмаган қизил танли юртдошларига ибрат бўлсин учун қалъа дарвозаси тепасига осиб қўйдилар.

Мазкур фожиавий воқеалар аксар жиҳатдан бизон овчиси ва унинг иши унутилишига имкон яратиб берди. Албатта, Сан-Ильдефонсода баъзи бировларнинг уни эслашга жиддий асослари бор эди-ю, аммо кўпчилик у ва яқинлари ҳақда ўйламай қўйган эди. Қочқиннинг аллақачонлар Муаззам Текисликларни кесиб ўтганини, ҳозирда ўз халқи ҳимоясида Миссисипи соҳилларида яшаётганини ҳаммалари эшитган ва бунга ишонган эдилар.

ЛХІХ БОБ

Хўш, Карлос буёғига нималарни бошдан кечирди ҳар қалай? Унинг Муаззам Текисликни кесиб ўтиб кетгани ростмикин? Наҳотки у шу бўйи қайтмаган бўлса? Сан-Ильдефонсо кентига кейин нима бўлди?

Ана шундай саволларни беришга тўғри келди, зеро мазкур афсонани ҳикоя қилаётган одам жим қолган эди. Унинг нигоҳи водий бўйлаб кезар, гоҳо Қиз ўлган қояга қадалар, гоҳо эса гиёҳ босиб ётган харобазорлар-

да тухтарди. Ҳикоячини чуқур ҳаяжон чулғаб олганди — ана шу боисдан жим қолган эди у.

Унинг тингловчилари Сан-Ильдефонсо бошига тушган савдоларни фаҳмлай бошлаган ва ҳикоятнинг ниҳоясини сабрсизлик ила кутаётган эдилар. Орадан пича ўтгач, ҳикоячи ҳикоясини давом эттирди:

— Ҳа, Карлос қайтиб келди. Сан-Ильдефонсога нима бўлди дейсизларми? Бунга анави харобазорлар жавоб беради сизларга. Сан-Ильдефонсо уйқуда эди. Бунинг қандоқ бўлганини эшитишни хоҳлайсизларми? Бу даҳшатли ҳикоя — хунрезлик ҳамда интиқом ҳикояти. Карлос қасос олди. Бизон овчиси Сан-Ильдефонсо водийсига қайтди, аммо ёлғиз ўзи эмасди. У беш юз нафар жангчи, уни ўзларининг раҳнамолари, ўз оқ танли сардорлари қилиб сайлаган қизил танли жангчиларни бошлаб келди. Бу бўйсунмас вако қабиласи жангчилари эди. Улар душманлар овчига қандайин жабр-ситам ўтказганларидан хабардор эдилар ва унинг қасосини олишга қасамёд этгандилар.

Куз, кеч куз палласи — Америка текисликларида қўл тегмаган ўрмонлар олтину қирмизи тусга кириб, табиат бамисоли ҳар йилги оғир меҳнатдан сўнг нафас ростлаётгандек, у ўз фарзандларига саховат-ла тайёрлаб қўйган тўкину ҳашамдор зиёфат лаззатини сурган жамики мавжудот бахтиёру мамнундек туюладиган энг сўлим палла эди.

Тун, кузги сутдек ойдин кеча, кўкда кумуш ёғдуси бутун жаҳондаги ҳосил кўтарар паллада жамики қўшиқларда мадҳ этилгувчи тўлиной сузарди.

Гарчанд бу ерда ҳеч қачон экин-тикин нима-ю, йиғим-терим нималигини билмаган бўлсалар ҳамки, унинг кумуш нурлари Льяно Эстакадонинг овлоғу ҳувиллаган, беадад ялангликларига асло кам ёғилмаётган эди. Овчарканинг огоҳлантирувчи ириллаши тинчиб қолган пода ёнгинасида мудроққа кетган подачини уйғотиб юборди. У хиёл қаддини кўтариб, безовталик-ла атрофга аланглади. Нима бўлдийкин — бўрими ё айиқ, малла пумадир¹ балки? Йўқ, бу йиртқич ҳайвон эмас. Чўпон прерия — даштга нигоҳ ташлар экан, мутлақо ўзгача манзарани кўрди... Кўрди-ю, титраб кетди.

Даштда узундан-узун қора шарпалар сафлари тур-

¹ Пума — Америка ёввойи мушуги.

нақатор тизилганча келяпти. Бу устида чавандози билан келаётган отларнинг қораси эди. Отлар бирининг тумшуғи иккинчисининг сағрисига тегиб олдинма-кетин келяпти. Улар машриқдан мағрибга қараб келяпти. Сафнинг боши жуда яқинлаб қолган, охири эса олисларда, чўпон уни кўрмаётган эди.

Ҳадемай қўшин етиб келди. Суворилар чўпон биқиниб ётган жойдан икки юз одимча наридан ўтиб боришарди. Улар ими-жимиди, равон ўтиб боришяпти. Жиллолар жингиллаб, шпорлар шиқирламас, қиличлар шарақ-шуруқламасди. Ёлғиз тақаланмаган туёқларнинг босинқи гурс-гурсию гоҳо-гоҳо бирон отнинг бетоқат кишнаши (сувори зуғуми остида ўша заҳотиёқ тинарди кишнаш) эшитиларди, холос. Улар шовқинсиз — шарпалардай оҳиста ўтиб боришарди. Тулиной ёғдусида рўёларга ўхшаб кетарди улар.

Чўпон булар рўё эмаслигини билиб турса ҳам, кўрқанидан дағ-дағ қалтирарди. Булар кимлигини жуда яхши биларди у, кети кўринмаётган издиҳом нимани англатишини ҳам тушуварди. Ҳинду жангчилари жангга отланганлар. Сутдек ойдинда у яхшилаб кузатди ҳиндуларни. Сафда фақат эркакларгина эканини кўрди у. Белигача ва сонидан настигача яланғоч, кўкраклари билан қўлларига бўёқлар чаплаган, камон, садоқ ҳамда ёй ўқлари билангина қуролланган улар. Унда ҳеч қандай шубҳа қолмади: бу ёввойи ҳиндулар уруш сўқмоғига чиққанлар.

Лекинига чўпонга ҳаммасидан кўра мазкур унсиз бўлукнинг олдида бораётган сардор таажжубланарли кўринди. На кийими, на қурол-яроғи, на терисининг туси бошқаларга ўхшарди. Чўпон кўрдик — сардор оқ танли одам!

Аммо чўпоннинг таажжуби тезда барҳам топди. У эс-ҳуши жойида, зийрак одам эди. Бир пайтлар сарғимтил тусли овчи билан унинг ошнасининг жасадини топган шу эди. Ўша кезлардаги воқеалар ёдига тушиб кетди. Пича бош қотириб мулоҳаза юритгач, бу оқ танли сардор бизон овчиси Карлосдан бошқа одам эмас деган қарорга келди у. Чўпон ҳақиқатан янглишмаган эди.

У аввало ўз жонини асраб қолишни ўйлади ва қимир этгани кўрқиб, пилдир-пис бўлиб ётаверди. Аммо жангчилар ёнидан ўтиб кетиб булар-бўлмасоқ, дарров бошқача хаёлга борди. Ҳиндулар уруш сўқмоғида!

Улар кентга қараб кетяптилар-у, раҳнамолари Карлос, бизон овчиси! Шунда хотирига қувғиндининг бошига тушган савдолар келиб, ўша воқеани ипидан-игнаси-гача эслади. Турган гап, Карлос Сан-Ильдефонсога душманларидан ўч олгани келяпти!

Қисман ватаипарварлик туйғусидан, қисман мукофот умидида чўпон Карлосга халал беришга аҳд этди. У ҳозироқ водийга жўнайди-ю, гарнизондагиларни огоҳлантиради.

Суворилар ёнидан ўтиб кетганлари замоноқ ўрнидан сакраб тура солиб, қалъага югуришга шайланди. Аммо у чучварани хом санаганди. Оқ танли йўлбошчи олдиндан жўнатган айғоқчилар чўпонни аллақачон пайқаб, подаси билан бирга қуршаб олишган эди, шу боисдан ҳам ҳозир шиппа қўлга туширишди уни. Поданинг ярми ўзи сотмоқчи бўлган одамларнинг кечлик овқатига кетди.

Чўпон йўлиққан ергача оқ танли сардор ва унинг ҳамроҳлари яхши таниш йўл — тижоратчилар ҳиндулар билан савдо қилгани қатнайдиган йўлдан келгандилар. Шу ерга келганда раҳнамолари йўлни буриб, бирон оғиз чурқ этмай, жангчиларни кўндалангига дашт бўйлаб бошлаб кетди. Кети кўринмайдиган суворилар сафни итоаткорлик ила, худди иланг-биланг судралиб бораётган баҳайбат илондай сас-садосиз унга эргашди.

Бир соатдан кейин Муаззам Текисликнинг этаги — сардорларига беш қўлдай ошно бўлган жойларга етиб бордилар. Бу жой у ғанимларидан неча марталаб яширинган дара узра юксалиб турар эди. Ҳануз кўзни қамаштиргудек ёрқин нур таратаётган ой уфқ сари пастлаб қолган, ёғдуси дара тубига етиб бормаётганди. У ерни қуюқ қўлага чулғаган эди. Қўйига тушиш машаққатли, лекин бундай одамлар учун, яна-тагин шундай йўл бошловчи билан мушкул эмасди.

Энг яқиндаги жангчига икки оғизгина сўз айтиб, оқ танли сардор отини тор дарага бурди ва қоялар қўлагасида кўздан ғойиб бўлди.

Ҳалиги жангчи буйруқни ортидагисига айтди-ю, Карлоснинг кетидан қоронғиликда ғойиб бўлди. Тубсиз дара шу тариқа беш юз нафар суворини бирин-кетин комига тортди.

Бир муддатгача узлуксиз, тез-тез гурсиллаган дўпир-дўпир — икки минг туёқнинг қоялару шагалларга урил-

ган товуши эшитилиб турди. Бироқ, бу шовқин аста-секин тина бориб, ниҳоят ҳаммаёқ жимжит бўлиб қолди. Одамлару отлар дарада эканидан ҳеч бир нишона сезилмас ва эшитилмасди. Ошиёнларига чақирилмаган меҳмонлар бостириб кирган ёввойи ҳайвонлару қушлар— тентакқушнинг зорланганнамо йиғиси, бўрию бургутнинг қулоқни тешгудек чинқиригигина эшитиларди, холос.

* * *

Орадан яна бир кун ўтди. Яна ой жамол кўрсатди, шунда кунбўйи дарада кулча бўлиб ётган баҳайбат илон унинг этагидан оҳистагина сирғалиб чиқиб, сойлик орқали Пекос дарёси томон ўрмалай кетди.

Мана у дарёга етиб бориб, нариги қирғоққа ўта бошлади. Отлар олдинма-кетин тизилган кўйи сувни шалоплатиб ва сачратиб дарёни кечиб ўтиб, сафлар олға силжийверди.

Пекос сойлигидан чиққан ҳайбатли илон ясситоғликнинг бутун Сан-Ильдефонсо водийси кўриниб турадиган қисмига кутарилди.

Қисқагина муддатга нафас ростлагани тўхталди, олдинга айғоқчилар жўнатилди-да, сафлар тагин жилди.

Ой Сьерра-Бланк чўққиси ортига яширинган паллада сафларнинг боши Қиз ўлган қояга етиб борган эди. Раҳнамолари кейинги соатларда, худди ой ботишини кутаётгандек, секин илгарилаётган эди. Эндиликда ойдиннинг ҳожати йўқ. Бўлажак воқеалар учун кўпроқ қоронғилик қўл келади.

Ўўлни кузатгани юборилган айғоқчилар қайтдилар. Оқ танли сардор ўз қўшинини қоятошлар оралиғидаги торгина йўлакдан қуйига эргаштириб тушиб кетяпти. Яна ярим соат ўтди — беш юз сувори сездирмайгина бутазорларга беркинди.

Метис Антонио чакалакзор ўртасидан яйдоқ майдончани излаб топди. Жангчилар отларидан тушиб, уларни дарахтларга боғладилар. Улар ёвга пиёда ҳужум қиладилар.

* * *

Тунги соат бир. Ой ботган, унинг ёғдусини акс эттирган парқу булутлар дақиқа сайин қорайиб боряпти.

Энди йигирма одим нарироқдаги ҳеч нарсани илғаб бўлмай қолди. Симоби тусли осмон сийнасида улкан қалъа биноси қоп-қораю мунгли кўринади. Минорадаги соқчини кўз илғамайди; аҳён-аҳёндагина унинг: «Сергак бўл!» деган чинқироқ нидоси таралиб қолади — демак, ўз маррасида турибди у. Бу нидога дарвоза олдидаги соқчи жавоб қайтаради, шундан сўнг тагин жимжитлик қарор топади. Гарнизон маст уйқуда, дарвоза олдидаги соқчилар ҳам тош супага узанганча, беғаму беташвиш уйқуга кетади.

Қалъадагилар ногаҳоний ҳужумдан хавотирланмайдилар: ахир ҳиндулар босқини ҳақида ҳеч қанақанги овоза йўқ, қўшни қабилалар билан дўстона муносабатдалар, фитначи тагнослар гумдон қилинганку. Ортиқча эҳтиёткорликнинг нима кераги бор? Гарнизонни қуриқлаш учун одатдагидек дарвоза олдидаги битта, асотеядаги иккинчи соқчининг ўзиям етиб ортади. Ҳа, худди шундоқ! Душман яқинда экани қалъа истиқоматчиларининг тушига ҳам кирмаётган эди.

«Сергак бўл!»— дея қичқиради девор тепасидаги соқчи тагин.—«Сергак бўл!»— жавоб қайтаради бошқаси, дарвоза олдидагиси.

Аммо иккови ҳам беғаму бепарво, кўпда ҳам сергаклик ила қулоқ солаётгани йўқ; улар аллақандай кўлага-шарпаларнинг ер бағирлаганча, бамисоли баҳайбат эчкиэмарлардек деворга қараб ўрмалаб келаётганларини пайқашмаётган эди. Уша кўлага-шарпалар ўт-гиёқ устида силжиб, мудом қалъа дарвозаси сари яқинлаб келмоқдалар. Соқчининг ёнида фонус ёниб турибди, у маълум ергача атрофни ёритяпти. Лекин бундан нима фойда — соқчи уларни кўрмаяпти-ку барибир!

Ахийри аллақандай шовқин етиб борди унинг қулоғига. Мана, лабларидан: «Келаётган ким?» деган сўзлар учиб чиқишга чоғланди ҳам — бироқ ўлим тўғаноқ бўлди бунга. Бир йўла олти камоннинг тори тортилиб, соқчининг кўкрагига олтига ёй ўқи қадалди. Уқлар юрагини тешиб ўтди-ю, ҳатто «вой!» деёлмай қулади-қўйди. Қора кўлага-шарпалар оқими очиқ дарвозадан ичкарига уриб кетди. Ғафлатда қолган соқчилар қуролини олишга ҳам улгурмай жон таслим қилдилар.

Ваколарнинг жанговар наъралари янгради, юзлаб тунд тусли жангчилар кўчки янглиғ ички ҳовлига ёпирилдилар.

Улар патиони тўлдириб, казармалар эшикларига ҳамла қила кетдилар. Аскарлар саросимада биргина кўйлақда югуриб чиқиб, ўзларининг одми тусли рақиблари ўқига учраб, гуппа-гуппа қулайвердилар. Тўрт томондан карабину тўппончаларнинг қасира-қусури эшитиларди-ю, ammo ўқ узаётганлар қуролларини бошқатдан ўқлаб улгурмаслариданоқ ер тишлаб қоларди.

* * *

Гарчи кўпга чўзилмаган бўлса-да, даҳшатли жанг эди бу. Ҳаммаси: бақирӣқ-чақирӣқ, оҳ-воҳ, дод-фарёд, қасира-қусур ўқ овозлари; қасоскор етакчининг қўнғироқдай овози билан ҳамроҳларининг ваҳшиёна наъра-ҳайқирӣқлари; эшиклар бузилган ёки ошиқ-мошиғидан қўпорилган пайтдаги ёғоч-тахталарнинг қарсиллагани, қиличу шамширлар жаранги, камон ўқларининг чувиллаши, карабинларнинг варанглаши — бари қоришиб кетганди... Ҳа, бу чинакамига даҳшатли жанг эди!

Бироқ, мана, ниҳоясига етди у. Деярли тўлиқ тинчлик бошланди. Жангчилар энди ҳавони ваҳимали наъра-ҳайқирӣқлари ила ларзага келтиришни бас қилдилар. Уларнинг ғанимлари, аскарлар, яксон этилди. Барча казармалар тозаланди, бирортасини ҳам унутмадилар, казармаларнинг яқингинадаги истиқоматчилари эса қора қонларига беланиб, ҳовли рўясида ёки эшиклар олдида уюлиб ётишибди. Жамикиси жой-жойида ўлдирилганди.

Дарвоқе, йўқ, жамикиси эмас. Икки киши тирик қолган, икки кишига шафқат қилган эдилар. Вискарра билан Робладо ҳануз ҳаёт эди.

Мана, бинонинг эшиклари тагига қучоқ-қучоқ тараша-шабба уйиб, ёқиб юборишяпти. Бурқсаган тутун устунларини гуруллаб кетган алвон аланга тиллари осмонга ўрляяпти. Ўт асотейнинг йўғон арча тўсинлари сари ўрмалаб бораяпти; тўсинларга ўт туташиб, улар қасирқусур қилиб ҳовлига босиб тушяпти. Ҳадемай қалъадан тутаб ётган харобагина қолади...

Аmmo қизил танли жангчилар қалъа ёниб бўлгунича кутиб ўлтирмадилар. Сардорларининг интиқоми ҳали интиқосига етказилганича йўқ. У нафақат аскарлардан ўч олиши керак. У водий аҳолисидан ҳам қасос олишга оин ичган. Сан-Ильдефонсо яксон бўлиши лозим!

Хуллас, Карлос ўз онтини бажарди. Қуёш чиқма-масиданоқ шаҳар аланга ичида қолди. Уқ-ёй, найзаю томагавклар ўз ишини адо этди: юз-юзлаб эркаклар, хотин-халажу бола-бақралар аланга қоплаган ўз уйлари томи остида халок бўлдилар.

Ҳинду тагнослардан ташқари, озроққина одам тирик қолди, бу даҳшатли қирғинбарот туғрисида ҳикоя қилиб берганлар ана ушалар. Бир нечтагина оқ танлига (ушалар қаторида Каталинанинг бахти қаро отаси ҳам бор) қолган-қутган бисотини олиб, бўлак кентларга кетишга ижозат этдилар.

Қандайдир ўн икки соат ичида Сан-Ильдефонсонинг жамики кентлари — шаҳар, қалъа, миссия, асиендолару ранчолари хоки туроб бўлди. Ушбу сўлим водийнинг фуқароси ҳам йитиб битди.

Бор-йўғи ярим кунгина ўтди. Сан-Ильдефонсо харобалари ҳали тутаб ётибди. Унинг аҳолиси қирғин қилинган, бироқ бу ерда одамлар бор. Майдонда юзлаб қизил тапчи жангчилар, улар тўрт бурчак шаклида саф тортганлар. Уларнинг қаршисида, майдоннинг ўртасида ғаройиб томошанинг яна бир кўриниши ижро этилмоқда — сардорларининг интиқоми ниҳоясига етказилмоқда.

Икки киши эшакка миндирилиб, боғлаб ташланган. Уларнинг энгиллари ечиб олинган-у, яланғоч курақларини сукут сақлаётган томошабинлар кўриб турибдилар. Гарчи ҳозир ҳалвиллаб-ҳалпираб турадиган кенг-ковул жуббалари бўлмаса ҳамки, калта қилиб олинган, теппаси думалоқ қилиб қирилган сочидан бу икковлонни ташиш қийин эмасди.

Булар миссиядан, иезуит отахонлар эди.

Қамчи яланғоч таналарга қарсиллаб тушиб, чуқур ботяпти, иезуитлар овозлари борича оҳ чекиб, оғриқ ва қўрқувдан тўлғаниб-жилпанглаяпти. Улар жон-жаҳдлари ила бу шафқатсизона савалашни бас қилишни ёлбориб, ўз ситамгарларига тавалло этияпти, аммо уларга ҳеч ким қулоқ солмаяпти.

Бу жазолашни икки оқ танли кузатиб турибди. Улар-

дан бири Карлос, бизон овчиси, иккинчиси — чорвадор дон Хуан.

Тақводор отахонлар уларда раҳм-шафқат уйғотишга беҳуда уринишяпти. Барибир улар бу икки кимсанинг кўнглини юмшата олишмайди — икковиниям юраги тош қотган.

— Волидаи муҳтарамамни эсланглар, синглимни эсланглар!— дейди Карлос рижиниб.

— Ҳа-ҳа, қилмишларингни эсланглар, эй нобакор тақводорлар!— дея қўшимча қилади дон Хуан.

Қамчи яна чувиллаб ҳаволайди-ю, яна қарсиллаб куракларга тушади, токи майдоннинг тўрт бурчи ушбу жазолашнинг шоҳиди бўлмагунга қадар давом этаверди шу тариқа савалаш.

Сўнг эшакларни ибодатхонага етаклаб бордиларда — у дуду исидан қорайиб кетган, томи босиб тушган эди — бошини-бошига тақаб боғладилар; томошабинларга сазойиларнинг фақат куракларигина кўриниб турарди.

Бир чеккада жангчилар сафга тизилишган, уларнинг камонлари тори тортилган, ишора берилгани ҳамоноқ камон ўқлари ёмғири чувиллаб ҳавони тилишлай кетди. Тақводор отахонларнинг чекаётган азоб-изтироблари ниҳоясига етди: иккаласи ҳам рихлатга йўл тутди.

* * *

Мана, мазкур даҳшатли фожианинг сўнги кўринишига яқинлаяпман; уни таърифу тавсифлашга сўз топилмайди. Ушбу даҳшатли манзара қаршисида ўтган маш-маша-мажороларнинг бари хира тортиб қолади. У Қиз ўлган қоя чуққисиди воқе бўлади. Уша ерда ясситоғнинг бир бурчи энсизу узун бурун шаклида водий бағрига ёриб кирган, Карлос авлиё Иоанн байрами куни ана шу ерда қойилмақом қилиб синовдан ўтганди.

Мана ҳозир ҳам чавандозлик маҳорати намойиш этилади. Аммо қатнашчилар илгаригиларига қанчалик ўхшамайдию томошабинлар қанчалик ўзгача!

Икки киши отда. Булар райриихтиёрий чавандозлар— улар эгарга борлаб қўйилган. Қўллари жилов тизгинини тутиб тургани йўқ — орқага қилиб боғланган, оёқлари эса от қорнидан ўтказиб тортилган хом тери тасма билан бир-бирига боғланган. Суворилар эгарда қимирламай, мустаҳкам ўлтирсин учун пишиқ тасма айилдан бир учи эгарнинг қоши, иккинчи учи қуюшқон томон кетган тас-

малар билан ҳам чандиб ташланган. Шундай қилиб, от суворини эгарсиз тунтариб қулатолмайди, эгарни тушириб юборишга эса пишиқ айил йул бермайди. Бари олдиндан ҳисобга олинган: бу суворилар ўз санъат-маҳоратларини намоён этмай туриб эгардан учиб кета олмайди.

Бироқ бу ишни ўз ихтиёрларича қилмайдилар. Бунга ишонч ҳосил қилмоқлик учун уларнинг башараларига бирров кўз ташлашнинг ўзи кифоя. Мазкур, башараларда даҳшатли ҳис-туйғулар: ночору нотавонларча қўрқоқлик, чексиз ноумидлик яққол акс этиб турибди.

Бу одамлар—ўрта ёшли, иккаласи, ҳам башанг ҳарбий либосдаги зобит. Лекинига бусиз ҳам улар Карлоснинг хунхўр, ашаддий ғанимлари — Вискаarra билан Робладо эканини англаш мушкул эмас. Аммо ҳозирда улар Карлоснинг рақиблари эмас, унинг асиридирлар.

Хўш, унда нега уларни отга бундай ғалати тарзда миндириб қўйишибди? Қандай кулгили томоша ижро этилиши керак бу ерда?.. Қулгили томоша? Йўғ-э, ундоқ эмасдир-ов!

Қаранглар-а: бу суворилар остидаги отлар — ёввойи мустангларку. Қаранглар, ҳар қайси мустангнинг боши дағал мато парчаси билан ўралган, улар ҳеч нимани кўрмайди.

Нима учун бу? Буни ҳозир билиб олаёсиз.

Ҳар қайси отни ҳинду тагнос аранг ушлаб турибди. Мустанглар Қиз ўлган қояда, олға туртиб чиққан бурун олдида турибди.

Сафга тизилган ҳинду жангчиларнинг юзлари ҳам ўшаёққа қараган. Улар сукутда. Мудҳиш сукунатга ҳеч нарса руҳна солаётгани йўқ. Олдинда қорабайир минган сардор, худди одамлар ундан ишора қутаётгандек, барчанинг нигоҳи унга қадалган. Унинг чеҳрасидан қон қочган-у, аммо қаҳру қатъият акс этиб турибди. Қасос олиш ҳали поенига етганича йўқ.

У ва унинг қурбонлари бир-бировларига бироқ оғиз сўз қотмаяптилар. Бари айтиб бўлинган, Улар ўз ёзмиш-қисматларини биладилар.

Удар овчига орқа қилиб ўлтиришибди эгарда, йигитни кўришмаяпти улар; лекин отларни жиловидан тутиб турган иккала тагноснинг сардорга тикилган нигоҳида қандайдир ғалати ифода бор. Нимани кутяпти улар? Ишорани кутяпти.

Овоз чиқармай, қўл ила ишора берилди. Тагнослар мустанглари қўйиб юбора солиб, ўзларини четга отишди. Яна ишора берилди — шунда жангчилар отларини ниқтаб, ваҳшиёна ҳайқирганча олға интилдилар.

Мана, уларнинг найзалари мустангларнинг сағрисига қадалди, ҳеч нимани кўрмаётган отлар қоянинг олға туртиб чиққан учига томон елиб кетди...

Улим талвасасида суворилар бугундан отилиб чиққан даҳшатли бўкириқни таъқибчиларнинг ҳайқириқлари босиб кетди. Кўз очиб-юмгунча бари тамом бўлди. Утакаси ёрилаётган мустанглар устларидаги чавандозларни абадият қаърига элтганча, қоядан учиб кетди.

Қизил танли жангчилар жар ёқасида гуж бўлиб, сўзсиз-сассиз бир-бировларига тикилишар эди.

Шунда чавандоз олға томон от солди; у отини шундоқ қоя қирғоғида тўхтатиб, пастга, тубсиз жарликка қаради. Бу оқ танли сардор.

У қуйида ётган айқаш-уйқаш уюмга тикиляпти. Одамлар билан отлар қимир этмай ётибди — улар ўлган, пачақланиб, қийма-қийма бўлган, ерпарчин... Қандай даҳшатли манзара!

Карлос, бамисоли елкасидан тоғ тушиб, юрагини босиб-эзиб ётган ҳарсанг кучгандай, чуқур тин олди. Сўнг дўстига юзланди.

— Дон Хуан! — деди у. — Мен сўзимнинг устидан чиқдим: онамнинг қасдини олдим!

* * *

Ботиб бораётган қуёш ҳинду жангчиларнинг узундан-узун сафини кўриб турарди: улар водийдан бири кетидан иккинчиси чиқиб келиб, Льяно Эстакадо томон йўл олишарди. Лекин улар буёққа келаётганларидагидан мутлақо бошқача ҳолатда қайтишмоқда. Улар Сан-Ильдефонсодан қадрдон ўлкаларига ўзларининг қонуний ўлжалари деб ҳисобловчи талон-тарож қилган бойликларини олиб кетяптилар.

Олдинда ҳамон бизон овчиси боряпти, унинг қаватида — чорвадор дон Хуан. Яқиндагина содир бўлган даҳшатли воқеалар уларнинг дилиқни хуфтон қилиб, чеҳраларига қайғули кўлага ташлаган эди, илло бу кўлага суворилар хаёлан истиқбол сари парвоз этган дамларида туман янглиғ тарқаб, кўнгиллари равшан тортарди.

Сафлари нитиҳосида уларни қувончли висол онлари кутмоқда эди.

Карлос дўст ҳиндулар ҳузурида узоқ туриб қолмади. Улар бир вақтлар ваъда қилган олтинни олиб, шарққа томон йўлини давом этдириб, ўшаёқда, Луизиана, Ред-Риверда зироатчилик ишларини юритиб юборди. Ёнида гузал маҳбубаси, меҳрибон синглиси, дон Хуан ва бир печа эски хизматкорлари билан талай йиллар тинч-осуда ҳамда дориламон яшади.

Вақти-вақти билан ўзининг кўҳна дўстлари ваколари юртига овга бориб турарди, дўстлари эса уни кўришдан ҳаминша шод бўлишар ва ҳали-ҳанузгача уни оқ танли сардоримиз деб аташар эди.

Сан-Ильдефонсо ҳақида бўлса ўша кунлардан бери ҳеч гап эшитилмай қўйганди. Шу тариқа бу сўлим водийда одамлар маскан тутиб, кенту қишлоқ бино бўлмади. Иезуит отахонлар илиштирган қуллик исканжасидан халос этилган тагнослар бўйниларига зўрлаб кийгазилган яриммаданий тараққиёт бўйинтуруғидан жон-жон деб воз кечдилар. Улардан баъзилари бошқа кенту қишлоқларга жойлашдилар, кўпчилиги эса аввалги таомилларига қайтдилар — улар бепоён даштликлар овчисига айландилар яна.

Эҳтимолки, ўзга замонлар бўлганида Сан-Ильдефонсонинг тақдири катта қизиқиш уйғотган бўлармиди, аммо биз тасвирлаган воқеалар испан-америка тарихининг фавқулодда даврида рўй берган эди. Айнан ўша кезларда Испания ҳукмронлиги бутун Америка қитъасида инқирозга юз тутиб, шитоб-ла тапаззулга кета бошлаганди, шу боисдан ҳам Сан-Ильдефонсонинг ҳалокати фожеликда ўзидан сира қолишмайдиган кўплаб воқеа-ҳодисалар орасида бор-йўғи яхлит томошанинг бир кўринишигина эди, холос. Гран-Квивира, Або, Чилили ва юзлаб бўлак кенту шаҳарлар ҳам тахминан ўша кезларда ғоратгарликка учраганлар. Улардан ҳар бирининг ўз тарихи, ўз қонли ҳикояти бор — эҳтимолки, улар биз сизга ҳикоя қилиб берган ҳикоятдан чандон бора қизиқарлироқдир.

Сўлим Сан-Ильдефонсо водийсига бизни тасодифгина етаклаб келди, холос, бизни у ҳақдаги афсона — оқ танли сардор ҳақидаги афсона ёдида сақланиб қолган одамга йўлиқтиргани ҳам тасодифдир.

Т а м о м

Литературно-художественное издание

На узбекском языке

МАИН РИД

БЕЛЫИ ВОЖДЬ

Роман

Муҳаррир Шавкат Туроб

Мусаввир Э. Қиғай

Расмлар муҳаррири Р. Зуфаров

Техник муҳаррир В. Демченко

Мусаҳҳиҳ Б. Юнусов

ИБ № 2748

Босмахонага берилди 13. 11. 89. Босишга рухсат этилди 21.01.90. Формати 84×108^{1/32} № 2 қоғозга «Литературная» гарнитурда юқори босма усўлида босилди. Босма листи 11,5. Шартли босма листи 19,32. Шартли кр.-отт. 19,77. Ҳашр листи 19,92. Тиражи 100000. Буюртма № 160. Шартнома 145—89. Баҳоси 2 с. 20 т.

Ўзбекистон ЛҚСМ Марказий Комитети «Еш гвардия» нашриёти 700113 Тошкент, Чилонзор массиви, 8-квартал, «Қатортол» кўчаси, 60.

Ўзбекистон ҚСР Нашриёт, полиграфия ва китоб савдоси ишлари Давлат комитети Тошкент «Матбуот» полиграфия ишлаб чиқариш бирлашмасининг 2-босмахонасида босилди. Янгийул шаҳри 702800 Самарқанд кўчаси, 44.



2 с. 20 т

